


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	60
SAN LUCAS	96
SAN JUAN	160
LOS HECHOS	205
ROMANOS	263
1 CORINTIOS	288
2 CORINTIOS	314
GALATAS	330
EFESIOS	339
FILIPENSES	347
COLOSENSES	353
1 TESALONICENSES	359
2 TESALONICENSES	364
1 TIMOTEO	367
2 TIMOTEO	374
TITO	379
FILEMÓN	382
HEBREOS	384
SANTIAGO	402
1 SAN PEDRO	409
2 SAN PEDRO	416
1 SAN JUAN	420
2 SAN JUAN	426
3 SAN JUAN	427
SAN JUDAS	428
APOCALIPSIS	430

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve.

³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram.

⁴ Aram rahir Aminadab, Aminadab rahir Naasón, Naasón rahir evocoyase Salmón,

⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí,

⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa.

⁸ Asa rahir Josafat, Josafat rahir Joram, Joram rahir evocoyase Uzías.

⁹ Uzías rahir Jotam, Jotam rahir Acáz, Acáz rahir ahe Ezequías.

¹⁰ Ezequías rahir Manasés, Manasés rahir Amón, Amón rahir evocoyase Josías.

¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel.

¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor.

¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud.

¹⁵ Eliud rahir Eleazar, Eleazar rahir ahe Matán, Matán rahir evocoyase Jacob.

¹⁶ Jacob rahir José, María mer, María evocoyase Jesús si secoi. Ahe imembri Tūpa Rembiporavo Poropīsīrosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropīsīrosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espíritu Santo pīratasa pipe imembi.

¹⁹ Evocoyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe.

²⁰ Aipo opīhañemoñeta reseve oque. Iquerve rumo, Tūpa rembiguai oyemboyecua chupe aipo ehi: “José, David suindar, eresiquiyei rene María rese nde menda āgua. Esepia, Espíritu Santo sui ou imembirã.

²¹ María virecose omembri, pemondora sererguã Jesús. Esepia, ahe oipīsīrora omu judío eta yangaipa sui” ehi.

22 Co rupi opa yaviye yande Yar remimombehugüer aipo ehi vahecuer ñehe mombehugar aracahe:

23 “Cuña ndaseco marai vahe imembira.

Ahe imembri rer-ra Emanuel” ehi
(“Tüpa yande rese ité secoi’ oya aipo ehi).

24 Omahese José, Tüpa rembiguai oyeupe ñehe agüer omboyeroya ité. Ichui omenda María rese cute.

25 Ndoyapo vıteı eté rumo mbahe oyese yuvıreco. Yıpındar imembira rane ité, ahese José omondo Jesús serergüã.

2

Ava yasıtata rese oyembohe vahe ari sēsa cotindar yuvıraso pītani repia

1 Herodes mborerecuar guasu recose, Jesús oha Judea ivı rupi tecua Belén ve. Coıye yugüeru ava yasıtata rese oyembohe vahe ari sēsa coti sui Jerusalén ve.

2 Ahe oporandu Herodes upe yuvıreco aipo ehi:

—¿Que vo aipo oha judıo rerecuar guasu? Esepia niha, caharu coti yasıtata orosepia. Sese oroyu ari sēsa coti sui imboeteı āgua —ehi yuvıreco chupe.

3 Aipo ihese, mborerecuar Herodes oyembosıquıye tēı, ava Jerusalén pendar aveı ēgüe ehi pāve yuvıreco.

4 Iyaveı cūrıteımi opa omonuha uca pahi rerecuareta, Moısés porocuita rese oporombohe vahe aveı. İpare oporandu chupe:

—¿Que vo aipo ohara Poropıırosar? —ehi.

5 Ahe omboyevı yuvıreco chupe:

—Ahe ohara Judea rupi Belén ve —ehı—. Esepia, Tüpa ñehe mombehugar Mıqueas rembıcuachiagüer pıpe aipo ehi:

6 ‘Pe, tecua mini Belén pıpendar, ndahei ivı coti tēı vahe ambuae tecua Judá pıpendar sui peıco.

Esepia, pe sui osēra mborerecuar che recua iguar Israel yocuai āgua’ ehi —ehı yuvıreco Herodes upe.

7 Aipo hese, Herodes oñehe ñemi ava yasıtata rese oyembohe vahe upe ‘toıcuı eme ava yuvıreco’ oyapave oporandu: “¿Mbahe yası pıpe ité vo pesepia ramo aipo yasıtata?” ehi.

8 Oyeupe mombehu pare, omondopa Belén ve aipo ehi chupe:

—Peso evocıyase, peseca pītani. Acoı peyosuse, co rupi aveı peyevı cheu icua uca āgua. Che aveı evocıyase tasomi imboeteı —ehı angahu chupe.

9 Aipo oyeupe he pare, yasıtata rese oyembohe vahe osırıño voi yuvıraso. Ahe pıpeve yasıtata oyemboyecua irı senonera. Ichui pītani recosa rese tuprı tecua Belén ve opıta yasıtata.

10 Sepıase, ovıhareté yuvıreco.

11 İpare yuvıroıque oı pıpe, osepia pītani ichı María reseve yuvıreco. Ichui oñenopıha sovai imboeteısa pıpe. İpare opōhe ombahe rıru pıpe yuvıreco oıcuavēhe vahe rã oporerecosa sepırusu vahe oro, itaisı, ambuae mbahe sıacuı vahe mırra serer vahe aveı.

12 Yuvıroyevıse güecuave yuvıraso, ndoyuvıroyevı irı Jerusalén rupi mborerecuar Herodes upe imombehu. Esepia, Tüpa aipo omombehu iquerve chupe ambuae perı rupi iyevı āgua.

Jesús pītani seroñemısa Egipto ve

13 Aipo ava yepepi pare, José upe oyemboyecua Tüpa rembiguai iquerve, aipo ehi chupe: “Eñrapuha, eroñemi pītani ichı reseve eraso Egipto ve. Aheve erepıtara acoı che amombehuse voi nde yevı āgua. Esepia, mborerecuar Herodes osecura pītani yuca āgua oıco” ehi chupe.

¹⁴ Ahe pĩtu pipeve voi José viraso pĩtani ichi reseve Egipto ve.

¹⁵ Aheve yuvirecoi co mborerecuar Herodes mano rãro. Co rupi imboaviyesa Tũpa ñehe mombehugar remimombehugũer: “Egipto sui anose che Rahir” ehi vahe.

Herodes oyuca uca chĩhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tẽisa rese. Sese, “Toyuviraso sundao tecua Belén ve, toyucapa chĩhivahe cuimbahemi yuvireco opacatu ñuvirío araviter ovireco vahe, chĩhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cũritei.

¹⁷ Ēgũe ehi yaviye Tũpa ñehe mombehugar Jeremías remimombehugũer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyembovaha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tũpa rembiguai iquerve aipo ehi:

²⁰ “Eñarapuha, eroyevi pĩtani ichi reseve Israel recuave. Esepia, opa omano pĩtani yuca potasar yuvireco” ehi.

²¹ Aipo oyeupe hese, oñarapuha, viroyevi pĩtani ichi reseve Israel recuave.

²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso ãgua. Coiyemi tẽi iquerve Tũpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgũe ehi yaviye Tũpa ñehe mombehugar remimombehugũer: “‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirẽhisa rupi secoi

¹ Ipare Juan Oporoãpiramo vahe Tũpa recocuer rese oñehe oico Judea ivi rupi ava yemboerecuãehisave

² aipo ehi: “¡Pemboasi pe angaipa; peyevi Tũpa upe! Esepia, co Tũpa mborerecuasa cõimi secoi yandeu” ehi.

³ Co Juan rese niha oñehe yipive Tũpa ñehe mombehugar Isaías aipo ehi gũembicuachiagũer pipe:

“Oyeendu ñehesa ava yemboerecuãehisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragũer apopri, sumbicuasa mbahe pirer, sembihu evocoyase tucru, eiri caha pipendar avei.

⁵ Opacatu ava Jerusalén pendar, Judea rupindar tecua, ïai Jordán rerovica pendar avei yuviraso iñehe rendu

⁶ oangaipagũer mombehu ãgua. Ahese Juan oñapiramo ïai Jordán pipe.

⁷ Yugũeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetasa tẽi peico! ¿Ava vo, ‘Pesẽra Tũpa ñemoirosa ou vaheã sui’ ehi tupri tẽi pẽu?”

⁸ Yipindar toyecua tupri rane Tũpa upe pe yevisa pe angaipa mboasisa pipe.

⁹ Iyavei ndapeyeroyai chira ‘ore Abraham suindar oroico’ pe hesa rese tẽi pe ñepisiro ãgua. Esepia, Tũpa oicatuño ité co ita sui Abraham suindar nungar tupri apo ãgua oyeupe nara yepi.

¹⁰ Hacha niha imoingatusa voi eté opacatu ivira ndihai vahe sapo rupi yasã ãgua. Ichui yasã pare imondosa tatave.

11 Che i pipe tēi opoāpiramo Tūpa upe pe yevi āgua. Oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui.

12 Ahe oipehara mbahe rāhi ihigüer sui. Sāhi evocoyase oyapocatura, ihigüer rumo omondora tata apirēhi vahesave” ehi.

Jesús āpiramosa

13 Ipare Jesús oso Galilea sui iai Jordán ve Juan recosave ‘tache āpiramo’ oya.

14 Yipindar rumo Juan ndoipotai eté, aipo ehiño chupe:

—Nde rumo iya ité che āpiramora eve viña, ¿nde rumo ereyu che nde āpiramo āgua? —ehi.

15 —Ēgüe tehiño aipo. Iyacatu yayapora Tūpa porocuita —ehi Juan upe.

Evocoyase Juan, “Aviye” ehi chupe.

16 Oāpiramo pare, osē ive sui. Ahe pipeve voi iva oyemboi tupri, aheseve avei osepia Tūpa Espiritu ogüeyise ou iharive apicasu nungar.

17 Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoāhasa

1 Ipare Tūpa Espiritu viraso Jesús ava yemboerecuaēhisave ‘tosecoāha Carugar’ ohesa pipe.

2 Aheve cuarenta ari, cuarenta pītu ndocarui. Sese ndasiepoi eté oico.

3 Evocoyase oyemboya Carugar sese secoāha āgua, aipo ehi chupe:

—Tūpa Rahir ité nde recose, co ita sui eyapo pan cūrtei —ehi.

4 Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ēgüe ehi rumo opacatu Tūpa Ñehengagüer reroya pipe ava yuvirecovera yepi’ ehi —ehiño chupe.

5 Ichui Carugar viraso Jesús Jerusalén maranehi pipendar tūparo torre apiterve.

6 Aheve aipo ehi chupe:

—Tūpa Rahir ité nde recose, eviapi cohava sui. Esepia niha, icuachiapri pipe:

‘Tūpa oyocuaira güembigui eta nde rāro āgua.

Ahe nde mopuhara yuvireco que ñepe ita nde momara rāgüer sui’ ehi —ehi Carugar chupe.

7 Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoāhai chira nde Yar Tūpa’ ehi —ehi chupe.

8 Ipare Carugar viraso iri ivitri ivate vahe apiterve secoāha āgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe,

9 aipo ehi:

—Che rovai ereñenopihase che mboetisave, co opacatu mbahe nde rembiepia amondora nde mahera —ehi Carugar chupe.

10 Aipo oyeupe hese:

—Eyepepi che sui cūrtei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

11 Ahese Carugar oyepipi ichui. Ipape Tupa rembiguai yuvirogüeyi Jesús rese hañeco água yuvireco.

Jesús omboipi oporombohe Galilea rupi

12 Jesús oyanduse Juan roquendasa, oso Galilea ivi rese Nazaret ve.

13 Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei.

14 Na ehi yaviye Tupa ñehe mombehuser Isaías rembicuachiagüer aipo ehi vahe aracahe:

15 “Co ava ivi Zabulón pendar, Neftalí pendar, para guasu ivirindar, iai Jordán rovaindar iyavei Galilea pipendar ndahei vahe judío,

16 ahe aviye pitumimbisave yuvirecoi vahe, osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

17 Ahe ari suive Jesús omombehu Tupa recocuer ava upe: “Pemboasi pe angaipa; peyevi Tupa upe. Esepia, cõimi eté Tupa mborerecuasa secoi” ehi.

Jesús, “Perio che rupi” ehi irungatu pira mbohasar upe

18 Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco.

19 Evocoyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

20 Aipo he ramoseve, opoi opira mbohasa sui yuvireco, yuviraso supi.

21 Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi.

22 “Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

Jesús ombohe ava rehi

23 Jesús evocoyase oguata opacatu Galilea ivi rupi, judío tũparo yacatu rupi oporombohe oico. Aheve ñehesa aviye vahe omombehu Tupa mborerecuasa resendar. Oporombogüera avei opacatu-catu tõi mbaherasisa ava vireco vahe sui.

24 Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca põrai vahe iyavei ndoguatai vahe. Ahe opa tupri ombogüera.

25 Ëgüe ehi ava rehi oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5

Jesús oporombohe ivitri ve

1 Ñepe ari pipe, ava rehi repiase, Jesús oyepipi ivitri rese. Aheve oguapi oĩ. Ahese semimbohe oyemboya yuvireco sese.

2 Ichui omboipi imbohe aipo ehi:

3 “Sorivete catura acoi ava oicuase mbahe ipane vahe Tupa rese ité güeco tupri água. Esepia niha, chupe nara ité Tupa mborerecuasa.

4 “Sorivete catura acoi ava oyaseho vahe oviharëhisa pipe. Esepia niha, Tupa omboura viharetesa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catupriisa Tūpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

¹¹ “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco.

¹² Pe rumo peyembovihanora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri āgua, ndiporusai chietera; imombopasara ava pirunga āgua yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi āgua.

¹⁵ Iyavei ndayamoendi chira tataendi mbahevri ve tēi. Iyacatu rumo yasupi ivate sendave opacatu oi pipendar ava resape āgua.

¹⁶ Pe ēgüe peye aveira pemboyecua ava eta upe pe recocuer aviye vahe. Ipípe sui tomboetei yande Ru Tūpa íva pendar yuvireco” ehi ava rehi upe.

Jesús oporombohe Moisés porocuita rese

¹⁷ “Aní chira, ‘Co mbía revo oporombohe Tūpa ñehe mombehusar rembicuachía mboyeroaēhi āgua iyavei Moisés porocuita cuachiapri mboyeroaēhi āgua avei no’ peye tēi cheu. Ēgüe ehi rumo che ayu imboaviye āgua.

¹⁸ Supi eté co íva, ivi avei yandeu oime vitemiseve, ndipoi chietera que ñepeí yepe Moisés porocuita, que ambuae Tūpa ñehe mombehusar rembicuachi-agüer ocañi tēi vaherā; ñepeí-peí porocuita imombehupri imboaviyesaño itera.

¹⁹ Sese acoi ava ndoviroyai vahe que ñepeí mborocuitamira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi.

²⁰ Iyavei amombehu pēu: acoi pe reco ívi tupriisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroēhi āgua rese

²¹ “Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi.

22 Che rumo aipo ahe p̄eu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ãgüe ere t̄ei vahe eico’ ehi vahe ambuae ava upe, ahe serasosara porandu ãgua mborerecuar ivate catu vahe rovai. Acoi ava rumo oñehe marase seroĩrosave ambuae ava upe, ahe iyacatu imondosa ité tata guasuve.

23 “Sese Tũpa upe pe porerecosa reropovẽhesave tũparo p̄ipe pemahenduhase ava pe amotarẽhimbar rese,

24 peseya rane pe porerecosa aheve; peyevi rane pe amotarẽhimbar upe p̄eu iñero ãgua rese. Acoi peñerose oyeupe, ahese voi peyevi, tapeicuvẽhe pe porerecosa Tũpa upe.

25 “Iyavei peyemotarẽhise, peñero voi oyeupe peyoepiase. Anise, aviyeteramo coiye catu t̄eise pe mombehu t̄eira pe amotarẽhimbar mborerecuar upe pe reraso ãgua. Ichui aviyeteramo ahe pe roquenda ucara.

26 Supi eté aipo ahe p̄eu: Ndapesẽi chietera acoi peyemboep̄ipase voi eté pesẽra ichui” ehi.

Jesús oporombohe yemboaguasaẽhi ãgua rese

27 “Peicua niha Moisés porocuita yip̄indar: ‘Peaguasai rene ambuae ava rembireco rese’ ehi vahe.

28 Che rumo aipo ahe p̄eu: Acoi ava omahese cuña rese ipotasa p̄ipe, ahe inungar oyapo vahe ité mbahe sese op̄iha p̄ipe yepi.

29 “Iyavei inungar que pe resa pe acato cot̄indar oipota rai ucase mbahe p̄eu pe mboangaipa ãgua t̄ei, iya penose ité, pemombo amombri peyesui. Aní pe mondo uca opacatu pe recocuer tata guasuve.

30 Iyavei inungar que pe po pe acato cot̄indar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiẽhi ãgua rese

31 “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi.

32 Che rumo aipo ahe p̄eu: ava opoise güembireco sui, cuña ndoyaviise mbahe, ahese ombop̄ihañemoñeta tiẽtera güembireco mboaguasa uca ãgua. Iyavei cuimbahe omendase cuña omenda vahecuer rese, oyemboaguasa t̄ei avei sese” ehi.

Jesús oporombohe Vu Tũpa rer poru t̄eiẽhi ãgua rese

33 “Iyavei peicua acoi aipo ehi vahe pe ramo upe aracahe: ‘Pemboaviye itera pemoingatu tuprise Tũpa rer p̄ipe mbahe pemombehu vahe yepi’ ehi.

34 Che rumo, ‘Ndapeñehei chira que mbahe rer p̄ipe, iva rer p̄ipe t̄ei avei’ ahe p̄eu. Esepia, ahe niha Tũpa renda;

35 ivi rer p̄ipe t̄ei avei ndapeñehei chira. Esepia, ahe niha p̄irunga; Jerusalén rer p̄ipe avei ndapeñehei chira. Esepia, ahe niha mborerecuar ivate catu vahe recua.

36 Pe ãca rer p̄ipe avei ndapeñehei chira. Esepia, ndapeicatui chira que ñepe pe ha momorochi ãgua, imou ãgua avei.

37 Sese niha peñehese, ñepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe t̄ei” ehi.

Jesús oporombohe yande amotarẽhisar upe mbahe t̄ei mboyeviẽhi ãgua

38 “Peicua acoi Moisés porocuita arachendar aipo ehi vahe: ‘Que ava v̄inose vahe ambuae ava resa ichui, ahe sesa avei senosesara. Iyavei v̄inose vahe s̄ai ichui, s̄ai avei senosesara’ ehi vahe.

³⁹ Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe.

⁴⁰ Porandusave pe rerasose pe camisa rerocua ãgua yuvireco pe sui, pe saco avei pemondoñora chupe.

⁴¹ Ñepeí legua rupi evosii co mbahe rese cheu' ehise que ava pëu, pe rumo perasoñora ñuvirío legua rupi chupe.

⁴² Iyavei oporanduse que pe mbahe rese yuvireco pëu, pemondoño avei chupe. Aní chira perecatēhi sese" ehi.

Pesaisu pe amotarēhimbar

⁴³ "Iyavei pesendu ñehesa yipindar: 'Pesepia potai rene pe amotarēhimbar, pe mboripar güeraño pesaisu' ehi vahe.

⁴⁴ Che rumo aipo ahe pëu: Pesaisu catu pe amotarēhimbar iyavei peyeroqui pe momara potasar rese.

⁴⁵ Evocoi nungar apo pipe pe Ru Tūpa íva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei.

⁴⁶ Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuar ndipihai vahe guaisupar tēi osaisu yuvireco yepi.

⁴⁷ Ndahei yande mboripar upe güeraño yayapora 'avirave'. Esepia, ava ndoicuai vahe avei Tūpa oyapo 'avirave' omboripar upe yuvireco yepi.

⁴⁸ Sese pe recocuer perecora pe Ru Tūpa íva pendar seco catupri vahe nungar" ehi.

6

Jesús oporombohe mbahe aviye vahe apo ãgua rese

¹ "Tūpa upe mbahe peyapo potase, 'Tache repia ava yuvireco' ndapeyei chira. Esepia, ãgüe peyese, ndapeipisii chietera pe Ru Tūpa íva pendar porerecosa.

² Evocoyase iparaisu vahe rese peporerecose, "Tamombehupa ava upe vichico' ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbí omoñehe yuvireco 'Co ava aviye ité yuvirecoi, tehi angahu yuvireco yandeu' oya tēi. Supi eté aipo ahe pëu: Ëgüe ehi vahe rumo opa voi oipisi porerecosa co ívi pipe tēi yuvireco.

³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña.

⁴ Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pëu opacatu ava rembiepiave curi" ehi.

Jesús oporombohe yerure ãgua rese

⁵ "Acoi peyuruse, peicoi rene acoi ava 'tosepia che yeruresa yuvireco' ehi vahe nungar. Esepia, ahe opūha-pūha catu tūparo pipe oyeruqui yuvireco cupiha yacatu avei 'tayande repia angahu ava' ohesa pipe tēi. Supi eté che aipo ahe pëu: Ëgüe ehi vahe opa voi eté co ívi pipeve tēi oipisi porerecosa yuvireco.

⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui ãgua pe Ru Tūpa upe. Evocoyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tũpa upe inungar ava Tũpa ndoicuai vahe. Ahe omboyevi-yevi oyeruresa ‘Tũpa revo co rupi yande mboyeroya voira’ ohesave yuvireco viña.

⁸ Aní chira inungar tẽi peico. Esepia, pe Ru Tũpa oicua pe porandu renondeve mbahe ipane vahe pẽu.

⁹ Sese aipo peyera peyeroqui:

‘Ore Ru Tũpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreño ore amotarẽhimbar upe.

¹³ Ore mboangaipa ucai rene eve; eipeha mbahe naporai vahe ore sui’ peyera.

¹⁴ “Esepia, pe amotarẽhimbar upe peñerose, pe Ru iva pendar avei iñerora pẽu;

¹⁵ ndapeñeroise rumo, ahe avei niñeroi chietera pẽu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe viharẽhisa, inungar acoi Tũpa reroyasar angahu tẽi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tẽi. Supi eté aipo ahe pẽu: Ëgüe ehi vahe opa voi oipisi porerecosa ava güepia pipe tẽi yuvireco.

¹⁷ Pe rumo peyecuacuse, peñeaca mondoro tupri, peyovai tupri aveira.

¹⁸ Evocoiyase, ‘Co oyecuacu vahe’ ndehi chira ava yuvireco pẽu. Pe Ru Tũpa, ndayasepiai vahe, güeraño oicua pe yecuacusa. Ahe evocoiyase iporerecora pe rese curi” ehi.

Mbahe porañeté vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tẽi opochi ati-ati oapocatusave, imonda vahe avei evocoiyase imondaño sese pẽu.

²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ãgua.

²¹ Esepia, pe mbahe pe rembiereco setá catu vahesa rupi-rupi pe pihanemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape;

²³ acoi imarase rumo, opacatu yande retecuer pĩtumimbisave tẽi secoi. Tesapesa oime vahe yande rese, ahe ogüese rumo yande sui, mbahe tẽi eté, pĩtumimbi nungar opacatu yande recocuer upe” ehi.

Guarepochi pota raisa; Tũpa mboyeroyaẽhisa

²⁴ “Iyavei ndipoi chietera que ava ñuvirío güerecuar omboyeroya vahe. Esepia, ñepey oamotarẽhira imboyeroya potaẽhisa pipe, ambuae evocoiyase osaisu catura imboyeroysa pipe. Ëgüe peye avei, ndapeicatui Tũpa mboyeroya guarepochi pota raisa pipe” ehi.

Tũpa osãro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.

²⁶ Pesepia vīrai eta oveve vahe: nomaheti vahe, nomonuhai avei, ndoyapocatui avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui!

²⁷ Ndipoi que ñepei pe pāhu pendar oicatu vahe opihañemoñetasa pipe tēi güecocuer mopucu iri āgua.

²⁸ “Ndahei chira pe turucuarā rese tēi peyemomahenduha guasu ai. Pemahecia ru mbahe potri caha pipendar rese: ndoporaviqui eté iyavei ndoipiai oturucuarā.

²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

³⁰ Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tupri vahe!

³¹ Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe.

³² Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe.

³³ Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu.

³⁴ Peyemomahenduha guasa ai eme mbahe peyapo vaheerā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaheerā yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu.

² Esepia, inungar pe ambuae ava upe peico, ēgüe ehi aveira niha Tūpa pēu.

³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!

⁴ Ndiyai pēu, ‘Che toropitivii mbahe nde rembiavi rese’ peye vaheerā chupe. Esepia, ¡pe peyavi guasu catu mbahe ichui!

⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu.

⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepei pe pãhu pendar omondo vaheerã ita tẽi guahir upe pan rese oyeupe poranduse.

¹⁰ Que pira rese oyeupe poranduse revo, ndomondoi chiveira mboi tẽi chupe.

¹¹ Yepe ava ndaseco põrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo água acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaheerã pẽu, ahe tupri avei peyapora chupe. Ahe niha Moisés porocuita iyavei Tũpa ñehe mombehusareta porombohesa” ehi.

Oime peri icãhimi vahe ava recocuer upe nara

¹³ “Peique oquendipi icãhimi vahe rupi. Esepia, oquendipi guasu iyavei peri guasu cañi tẽisave oso vahe. Ahe supi setá catu ava yuviraso;

¹⁴ teco apirẽhisave oso vahe rumo oquendipi, peri reseve icãhimi. Supi guata água yavai eté; moviromi tẽi ava oseca yuvireco” ehi.

Ivira aviye vahe icuasa iha rese

¹⁵ “Coie yugüerura ava Tũpa Ñehengagüer mombehusar angahu tẽi pe pãhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.

¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sãchi ati vahe sui.

¹⁷ Evocoiyase ivira aviye vahe, iha aviye avei; ivira naporai vahe, iha naporai avei no.

¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe.

¹⁹ Sese opacatu ivira iha naporai vahe yasiasa yepi. Ichui imondosapa tatave.

²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tũpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tũpa mborerecuasave. Che Ru iva pendar remimbotar aposar año tupri rumo yuviroiquera aheve.

²² Ari cañi pipe setá tẽi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tẽira yuvireco cheu.

²³ Che rumo, ‘¡Aní, ndopocuai! ¡Pe mbahe tẽi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã.

²⁵ Yepe ahe oi upe oyepota tẽi ivitu ai, amarusu reseve, ichui oyeapo tẽi avei iai chupe, oi rumo ndoviapi eté. Esepia, ita harive ité yaposa.

²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriẽhisa pipe omopuha vahe ivi cuhi harive tẽi güetarã.

²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tẽi yuvireco chupe.

²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pĩratasa pipe.

8

Jesús ombogüera ava lepra vireco vahe

¹ Iviñri sui ogüeyise Jesús, ava rehii avei yuvirecoi supi.

² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipore eicuavēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵ Ipore Jesús oguataño, ñgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe

⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūritei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique ñgua; iyacatu niha cohapeve ereñeheño tēi icuera ñgua. Evocoyase nde ñehe pipe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pīpendar rumo ndasepiai eté ava imbahe reroya vahe yuvireco yepi co ava nungar.

¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rereciar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye.

¹² Judío eta rumo, oyeupe ñhesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rereciar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipore Jesús oso Pedro rētave. Aheve osepia Pedro rembireco si sohi iteangase vupave ou.

¹⁵ Opocose ipo rese, ahe ramoseve sohi opituhu ichui. Ocuerare, oñarapuha ava rese ohañeco ñgua.

Jesús ombogüera setá ava imbaheasi vahe

¹⁶ Ipore pītu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tēi omombopa caruguar ava rehii sui, iyavei opacatu imbaheasi vahe ombogüera avei no.

17 Ëgüe ehi omboaviye Tüpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

18 Jesús osepiase ava rehi oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi.

19 Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

20 Jesús rumo aipo ehi imboyev̄i chupe:

—Yavaira rumo ndeu. Esepia, v̄irai v̄ireco guaiti, iyavei aguara v̄ireco oquesa; che rumo, Ava Riqueh̄ir, ndarecoi que che r̄eta ité che p̄ituhu ãgua yepi —ehi.

21 Ipare ñepēi ivoya aipo ehi chupe:

—Che Yar, che ru manore voi che nde rupiño ité aicora —ehi.

22 —Aní, cūritei voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

23 Ipare Jesús yuviroha güemimbohe reseve yuviraso carite pipe.

24 Ipa pipe yuviraso pucu ramoseve Jesús oque ou. Ahese aviyeteramo tēi ivitu ai op̄üha ipa pipe; i ohitu vahe ndiguaȳi eté, seni-seni carite oyopi.

25 Evocoyase semimbohe yuviraso voi imomahe:

—¡Ore Yar, yande rerasora mo co carite ip̄ive! ¡Yande p̄isiro eve! —ehi yuvireco chupe.

26 Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pep̄ituhupa” ehi. Aheseve voi opa tupri op̄ituhu yuvireco.

27 —¿Mara ehi rutei p̄iha co? —ehi tēi semimbohe yuvireco chupe—. ¿Mara ehi vahe p̄iha co ava secoi?

Esepia niha, ivitu, para guasu avei omboyeroya yuvireco no —ehi.

Jesús omboyepēipa carugar Gadara pendar sui

28 Jesús oguataño güemimbohe eta reseve oyepota ipa rovai Gadara iv̄i rese yuviraso. Aheve ñuvirío ava carugar v̄ireco vahe yugüeru sovāichi. Ahe ava tehögüer ruv̄ipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi.

29 Jesús repia ramoseve rumo, oñehe p̄irata yuvireco chupe aipo ehi:

—¡Jesús, Tüpa Rah̄ir, eyepēi ore sui! Esepia niha, ndoyepota v̄itei ar̄i nde ore mombaraisu ãgua oreu —ehi tēi yuvireco.

30 Namombr̄imi cuchi rehi yuvirecoi ichui.

31 Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

32 —Aviye, peso —ehi carugareta upe.

Aipo hese, carugar opa yuv̄inose ava sui, yuv̄iroique cuchi rehi av̄iterve. Ipare rumo cuchi ndayaracua iri yuv̄ireco; iiv̄i socuer rupi yuv̄inoña yuv̄iraso, opa ipa pipe ocañi tēi yuv̄ireco.

33 Yuv̄inoña evocoyase cuchi r̄árosar tecuave yuv̄iraso opacatu mbahe güembiepia mombehu ava upe yuv̄ireco.

34 Ichui opacatu ava tecua pendar yuv̄inose ati Jesús upe, “¡Eso cohava sui!” ehi yuv̄ireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve.

² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuae co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopase, che ñero nde angaipa rese ndeu —ehi.

³ “¿Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuita rese oporombohe vahe yuvireco chupe.

⁴ Jesús rumo oicua ipihañemoñetasa, sese aipo ehi chupe:

—¿Mahera pepihañemoñeta rai pe yapisacasa rereco!

⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie?

⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rētave —ehi.

⁷ Ahese opñha voi, oso güētave.

⁸ “¿Too! ¿Mara ehi rutei vo?” ehi ava rehii yuvireco imboeteisave. “Esepia, ahe niha ombou opiratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui oose Jesús, che repia, che Roma pendar mborerecuar guasu upe guarepochi rerocuasa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe arí pipeve Jesús güemimbohe reseve yuviroique che rētave. Ambo-caru setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.

¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pñhuve tēi? —ehi seroñrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco.

¹³ Peyapisaca icuachiapri arachendar aipo ehi vahe rese: ‘Poroparisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ãgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¿Ndiyai eté ichohopri mendasave ndoyembovhai yuvireco imer oicovese ipñhuve! Oimera rumo arí imer reraso ãgua ichui curi. Ahese ramo oye-cuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité.

¹⁷ Iyavei ndiyai ava uva ricuer piasu oyapocatu siru mbahe pিরer cuacua vahe pipe. Ēgüe ehise, mbahe pিরer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe vitesese, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opūha yuviraso güemimbohe reseve supi.

²⁰ Ahe pipeve cuña doce araviter rupi suvı ndopai vahe opoco saquicuei coti iturucuar popi rese.

²¹ Esepia, ahe aipo ehi opıha pipe: “Yepe que iturucuar popi reseme tēi apocora, acuerara rumo” ehi.

²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbi vahe iyemoingatu-pase omano vahe tı̄ ãgua, ava yaseho atise avei no.

²⁴ Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaete atıño seroyaēhisave yuvireco.

²⁵ Ichui opa ava omose, ahese oique oi pipe oipopısi cuñatai. Evocoyase ahe oñarapuha voi.

²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucái yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiqueese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco.

³³ Ichui omosese carugar, iñhengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecuar pıratasa pipe co mbıa omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tũparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tẽi mbahehasisa sui avei no.

³⁶ Osepiase ava rehi, oiparaisuereco yuvireco. Esepia, ahe oñemosañõ tẽi mbahe rasicuer pãhuve inungar ovesa ndovirecoi vahe guãrosar yuvireco

³⁷ Evocoyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tẽi.

³⁸ Sese peporandu mbahe miti Yar upe, ahe tomondo ava imonuha ãgua — ehi güemimbohe eta upe.

10*Jesús oiporavo doce tupri apóstol*

¹ Evocoyase, “Perio” ehi Jesús doce güemimbohe upe. Chupe omondo güeco pĩratasa caruguar ava sui imboyepepi ãgua iyavei iporombogüera ãgua opacatu-catu tẽi mbahehasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan;

³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo;

⁴ iyavei Simón, güecua rese secatẽhi vahe pãhu pendarer; ipa vahe Judas Iscariote, ahe Jesús omondo vahe yamotarẽhimbar upe.

Jesús oyocuai güemimbohe Vu mborerecuasa mombehu ãgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ãgüe ehi tẽi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi.

⁷ “Judío recua rupi pesoseve, ‘Cõimi Tũpa mborerecuasa seci yandeu’ peyera imombehu.

⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepepi serecosar sui. Esepia niha, peipisi pĩratasa ndasepi vahe. Sese peyapoño evocoi mbahe guarepochi pisiẽhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sètave pepitami ranera. Pemboaviyese pe cuaita, ahese ramo pesora ichui” ehi.

¹² “Evocoyase peique ramoseve oi pipe, peyapora, ‘Avirave, Tũpa tape rovasa’ peyera chupe.

¹³ Acoi aviyeise oi pipendar ava pẽu, ahe oipisira Tũpa porovasasa; acoi ndahaviyeise rumo ava, ndoipisii chira Tũpa porovasasa yuvireco.

¹⁴ Acoi ndosendu potaise pe ñehe, ndape pisi potaise avei yuvireco, ahese pesẽño ahe oi pipe sui, anise tecua sui. Peipipetera pe pi ivi rãtachigüer sui, pesẽ pecua ichui ‘toipisi Tũpa ñemoirosa yuvireco’ pe yapave.

¹⁵ Evocoyase supi eté ari cañi oyepotase co tecua upe, ivate catura Tũpa ñemoirosa ava Sodoma, Gomorra iguar upendar sui curi” ehi.

Yamotarẽhipri Jesús reroyasar

16 “¡Pesendu tupri che ñehe! Che opomondo ovesa nungar ava mbahe mímiba oñaro ai vahe nungar pãhuve. Sese peresaeté tuprira peyese mboi nungar, iyavei inungar apicasu seco tupri vahe peicora.

17 Iyavei peicua catu peamotarẽhimbar sui. Esepia, mborerecuar rovai pe rerasora iyavei pe nupara otũparo pipe yuvireco,

18 ichui pe reraso aveira mborerecuareta ivate catu vahe rovai yuvireco che recocuer sui tẽi, ãgũe peyera peñehe che recocuer rese chupe iyavei ava ndahei vahe judío upe avei.

19 Acoi pe rerasose mborerecuar upe yuvireco, ‘¿Mbahe pĩha amombehura chupe?’ ndapeyei chira; acoi peñehe potase rumo, Tũpa omondora pe ñehe ãgua pẽu.

20 Esepia, ndahei chira peyesui tẽi peñehe, pe Ru Tũpa Espiritu pemoñehe ucara.

21 “Ipare rumo ava vivri omondora oamotarẽhisar upe ‘toyuca yuvireco’ oya. ãgũe ehi aveira ava guahir upe; tahir avei oyamotarẽhira oyesupa yuca uca ãgua yuvireco che recocuer rese.

22 Iyavei opacatu ava ndape ambotai chira che recocuer sui tẽi yuvireco. Acoi oyemoviracua vaheño rumo ari ipa vahe rupi, ahe ipisiroproi yuvirecoira curi.

23 Iyavei acoi pe mañeco tẽise ñepeu tecuave yuvireco, ahese peyepipiñora ichui ambuae tecua pipendar upe che recocuer mombehu ãgua. Supi eté Ava Riquehir oura ndapemboaviye viteiseve pe guatasa judío recua rupi.

24 “Ñepeu yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.

25 Iyavei semimbohe, ‘Aviye ité’ ehiñora ombohesar osecoupitise. ãgũe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pĩha siquiyesara?

26 “Sese ndapesiquiyeyi chira ava pe amotarẽhimbar sui. Esepia, yaposa vahe imombehupirẽhi cũritei, icuasaño itera curi; iyavei mbahe ñomipri, icuasaño aveira no.

27 Acoi che amombehu vahe pĩtumimbisave pẽu, pemombehu ari pipe coiye, iyavei acoi amombehu vahe pẽuñomi, perosapuca pe rẽta harive imombehu opacatu ava upe.

28 Iyavei ndapesiquiyeyi chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retocuer, yande hã reseve imocañi ãgua tata guasu pipe” ehi.

29 “Yamondo niha ñuvirío vĩraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepeu vĩraimi” ehi.

30-31 “Sese pesiquiye eme. Esepia, pe niha ivate catu vahe ité peico opacatu vĩrai sui. Supi eté Tũpa niha oicua opacatu ñepeu-peu pe ha retacuer” ehi.

“Che aicua Jesucristo” ehi vahe opacatu ava rovaque

32 “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe.

33 Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarẽhisa

34 “ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che yusa omoime ucara yeamotarêhisa.

35-36 Sese ava oñemu ae oyeamotarêhi-rêhira yuvireco; ava oyesupa oyamotarêhira, iyavei cuña membri osi oyamotarêhira, cuña vovayar oyamotarêhi aveira.

37 “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui.

38 Iyavei acoi noñemosai vahe mbahe rasi cuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco ãgua.

39 Acoi ava oipisiro pota vahe güecocuer tēi, ahe ocañi tēira; acoi omo-cañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

40 “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.

41 Acoi ava oipisi tupri vahe ambuae ava Tūpa ñehhe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri.

42 Iyavei acoi omondo vahe que chñhi i sñhisa vahe que ñepeico mbe güemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca ãgua

1 Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

2 Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese

3 imboporandu ãgua: “¿Nde ité vo Tūpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

4 Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe.

5 ‘Ndasesapisoi vahe osareco tupri cūritei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirosa resendar ñehesa’ peyera chupe.

6 ¡Oviharetera acoi ava oyeroyaño vahe che rese!” ehi Juan rupindar upe.

7 Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porêhisave capihiata ivitu ombova-mbova vahe nungar pñha?

8 Anise, ¿pesepia tie iturucuar porañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rêtave yepi.

9 Evocoiyase pesepiase, ¿‘Ava’ peye vo pe chupe? ¿Tūpa ñehhe mombehusar ité pñha? Taa, ahe ité. Evocoi niha ivate catu vahe Tūpa ñehhe mombehusar sui.

10 Ahe chupe ité Tūpa icuachiapri aracahendar pipe aipo ehi: ‘Che amondora nde renondeve che ñehhe mombehusar nde raperā moingatu ãgua’ ehi.

11 Supi eté ndipoi que ñepeico ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tūpa mborerecuasave rumo ava seco mbe güemi catu vahe ivate catu ichui.

12 “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opīratasa pipe imocañi āgua.

13 Opacatu Tūpa ñehe mombehusar rembicuachía pipe, Moisés porocuita icuachiapri pipe avei imombehusa Juan yusa rupive co Tūpa mborerecuasa resendar.

14 Yepe yavaira seroya āgua pēu viña, Juan rumo, Tūpa ñehe mombehusar Elías. Ahe imombehupri ou vahe.

15 Acoi ava osendu pota vahe che ñehe, toyapisacaño sese” ehi.

16 “¿Mbahe rese pīha amboyoyara ava recocuer cūrteindar? Esepia, co ava inungar acoi chīhivahe iguayī tēi vahe ocar rupi. Ipare oñehe pucu-pucu omboripar upe yuvireco aipo ehi:

17 ‘Oromoñehe tēi mimbī pēu, ndapepivoi eté rumo iyavei orosapucaī tēi sapucaisa vīharēhisa resendar pēu, pe rumo ndapeyasehoi eté’ ehi.

18 Esepia, ouse Juan Oporoāpiramo vahe, ahe ndohui tembihu sepīrusu ai vahe iyavei ndoīhui uva ricuer ipīrata vahe, sese, ‘Co mbīa carugar vireco vahe oyese’ peye tupri tēi chupe.

19 Coiye che ayu, Ava Riquehīr, acarū, aīhu tupri avei. Ipare, ‘Co icaru guasu ai vahe secoi, iīhu guasu ai vahe avei’ peye cheu; ‘Ava angaīpa viyar mboripar tēi iyavei guarepochi rerocuasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

20 Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraī Tūpa upe nara yuvireco. Evocoiyase aipo ehi chupe:

21 “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pāhuve yapopri, yaposara yīpive tecua Tiro, Sidón ve viña, co tecua pendar aracaheve anga omondera turucuar vīharēhisa resendar, tanimbu avei omondora oāca rese oangaīpa mboasīsa pipe yuvireco viña no.

22 Pe rumo peipisīra ivate catu vahe Tūpa ñemoīrosa ava Tiro, Sidón pendar sui ari cañi pipe coiye.

23 Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cūrteī oīme vītera ahe tecua viña.

24 Sese, pe peipisīra ivate catu Tūpa ñemoīrosa ava Sodoma iguar sui ari cañi pipe coiye” ehi.

Peyu cheu mbituhusa reca

25 Iyavei ahe ari pipe Jesús oyerure: “Che Ru, avīye ndeu. Nde niha ivā pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe.

26 Ēgüe ere niha mbahe nde remimbotar apo, che Ru” ehi.

27 “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oīcua tupri vahe yuvireco no, che güeraño ité aīcua iyavei acoi que ava upe aīcua uca potase, evocoi nungar upe aīcua uca tupriira.

28 Peyu cheu opacatu icueraī vahe. Che amondora pe pituhu āgua.

29-30 Peico che povriive, peyembohe avei che sui. Esepia, che ndache reco asiī, iyavei che povriive pe recosa ndayavaimi eté. Ahese ramo oīmera mbituhusa pēu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoyase trigo rãhii oipohopohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha yuviroique ité tũparo pipe pan imboeteipri Tũpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi.

⁵ ¿Ndapeyeroqui vo Moisés porocuita resendar pipe? Esepia, judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco.

⁶ Cũritei cohava oime ava ivate catu vahe tũparo sui.

⁷ Evocoyase pe ndapesenducuai eté Tũpa Ñehengagüer aipo ehi vahe: ‘Che aipota peporoparaisuereco, aní chira peropovēhepa porerecosa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña.

⁸ Esepia, Ava Riquehir mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui oose Jesús, oique judío tũparove.

¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pãha mbituhusa ari pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pãhu pendar acoi mbituhusa ari pipe oviapise seimba ovesa ivicuarve ndosoi chira senose viña?

¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva.

¹⁴ Evocoyase fariseo opa yuvinose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoyase Jesús oicuae fariseo pihanemoñetasa, osē oso, ava rehii avei yuviraso supi. Setá avei imbaheasi vahe ombogüera,

¹⁶ iyavei, “Che mombehui rene ava upe peyé” ehi.

¹⁷ Ëgüe ehi yaviyepa Tũpa ñehe mombehusar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espíritu chupe.

Ahe omombehu aveira mbahe ihivi vahe opacatu ava ivi pipendar upe.

19 Noiñehopepi-epi chira ava, nasase-sasei tēi chiaveira; iyavei ndosendui chietera ava iñehe ocar rupi.

20 Iyavei nomopei chietera que ñepei pataviimi oyeapa vahe; nombogüei chiaveira tataendi sātachiñomi tēi vahe.

Ëgüe ehira mbahe ihivi vahe pipe opacatu secopipa.

21 Evocoyase opacatu tecua pendar ava ndahei vahe judío oyeroyara yuvireco sese' ehi

Isaías aracahe.

“Jesús vireco carugar pīratasa oyese” ehi tēi ava yuvireco

22 Ichui ava ndasesapiso vahe, noñehei vahe carugar rerecosar viraso Jesús upe yuvireco. Evocoyase Jesús ombogüera. Ahese osareco, oñehe avei.

23 Evocoyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

24 Osenduse rumo fariseo, “Co mbia carugar rerecuar Beelzebú pīratasa pipe tēi omboyepipi carugar ava sui” ehi yuvireco.

25 Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

26 Ëgüe ehi avei carugar. Esepia, serecuar omboyepipise opovri pendar, ovavara oyeupe yuvireco viña. Evocoyase ahe oyemocañi tēira yuvireco.

27 Iyavei pe, ‘Beelzebú pīratasa pipe sui tēi omboyepipi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepipi carugar ava sui yuvireco? Tūpa pīratasa pipese, che avei evocoyase ayapo evocoi nungar ipīratasa pipe. Pe voya ae omboyecuar pe ñehe pe rembiavi yuvireco pēu.

28 Che rumo Tūpa Espiritu pīratasa pipe amboyepipi carugar ava sui. Sese cūrtei pesepia ité Tūpa mborerecuasa.

29 “Iyavei no, que ava oi que potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipare voi opara vīrocua imbahe ichui.

30 “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espiritu upe, ahe chupe ndipoi chietera ñeroisa.

32 Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

33 “Emoatiro tupri ivira, ahe iha aviyera; nderemoatiro tuprise ivira, ahe evocoyase virecora oha naporai vahe. Esepia, ivira icuasa iha rese.

34 ¡Evocoyase pe, mboi nungar tēi peico vahe, pe recocuer naporaise, ndapeicatui chira mbahe aviye vahe rese pe ñehe āgua! Esepia, pe pīha pipe sui tēi osē pe ñehe āgua.

35 Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe.

36 Sese ari cañi pipe opacatu ava opara omombehu oñehe-ñehe tēisa Tūpa rovai yuvireco.

³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyevi iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara.

⁴⁰ Esepia, inungar Jonás secoi mbosapi ari pira guasu aviterve aracahe, ěgüe ehi aveira Ava Riquehir mbosapi ari ivivri taira omano vahe pāhuve.

⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyeve Tūpa upe yuvireco Jonás omombehuse Tūpa Ñhengagüer chupe. Cūrtei rumo oime Jonás sui aviye catu vahe pe pāhuve.

⁴² Iyavei ari cañi pipe cuña mborerecuar guasu irohi coti secua vahe porandusave, omombehura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrtei rumo oime ivate catu vahe Salomón sui —ehi fariseo eta upe.

Carugar oyeve iri ava güeco agüerve

⁴³ “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuisse, ipihañemoñeta,

⁴⁴ ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri.

⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. ěgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvino hai. Ahe oñehe pota yuvireco chupe.

⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvino hai. Ahe oñehe pota yuvireco ndeu —ehi.

⁴⁸ Ahe rumo,

—¿Ava piha che si; ava piha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta.

⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, oguapi ipa popive oĩ.

² Aheve ava oñemonuha atise yuvireco, oha carite pipe oguapi oĩ, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepei mbia osē omaheti oico.

⁴ Ahe otiapi-apise mbahe rāhii oso, moviro oiti peri rupi. Vīrai ogüeyise rumo sese, opaño yuvirohu.

⁵ Iyavei moviro oiti ivi nayanai vahesave ita pāhuve. Sese cūrteimi sorī;

⁶ arī tasise rumo, opaño ipiru. Esepia, ndasapoi niha.

⁷ Iyavei ambuae mbahe rāhii oiti yu pāhuve. Ahe yu rumo sorī poyava catu yuvireco ichui. Sese opaño oyopi.

⁸ Ambuae rumo oiti ivi aviye vahesave, ahe setá iha imonuhasa; ñepe ihi sui osē cién iha, ambuae sui osē sesenta, ambuae sui treinta.

⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera p̄ha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.

¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui.

¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no.

¹⁴ Na ehi yaviye Tūpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndape-sepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapiso avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera āgua’ ehi

Isaías aracahe.

¹⁶ “Pe rumo perorivete ité sepiacuase, pesenducuae avei no.

¹⁷ Supi eté setá Tūpa ñehe mombehugar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese.

¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui.

²⁰ Iyavei acoi mbahe rāhii seitipri ita pāhuve, ahe inungar ava recocuer yipriño osendu vahe, oipisi vahe avei vorivetesu pipe Tūpa Ñehengagüer.

²¹ Ipare rumo inungar co mbahe miti ndovirecoi vahe guapo oviracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepipi ichui.

²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata

iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.

²³ Acoi itisa vahe mbahe rāhi i vi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepeipei sāhi sui osē que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhi oñoti vahe rese.

²⁵ Opacatu ava queseve rumo oyepota yamotarēhisar, caha tēi rāhi oñoti trigo pāhuve oso.

²⁶ Acoi trigo iha potase, supive avei sor i caha.

²⁷ Evocoyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhi aviye vahe ereñoti nde i vi pipe? ¿Que sui ru caha sor i pāhuve?’ ehi yuvireco chupe.

²⁸ Iyar rumo aipo ehi chupe: ‘Oime revo que che amotarēhisar’ ehi. Evocoyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi.

²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi.

³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhi che mbahe apocatusave yuvireco’ ehi i vi yar” ehi Jesús.

Yembohesa mostaza rāhi suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhi rese. Ahe mbia oñoti vahe oivi pipe.

³² Supi eté co mostaza rāhi tahimi catu opacatu ambuae mbahe rāhi sui. Ipare rumo, ocuacuase, tuvichá catu ambuae mbahe miti sui inungar i vira tuvichá vahe. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe.

³⁵ Co rumo na ehi Tūpa ñehe mombehusar rembicuachiagüer aviye āgua: “Che añehese, amboyoyara che porombohesa ambuae mbahe rese. Iyavei amombehura Tūpa i vi apo suive mbahe niporēhi vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya.

³⁷ Evocoyase omboyevi chupe: “Acoi ava mbahe rāhi aviye vahe oñoti vahe, ahe che, Ava Riquehir.

³⁸ Ivi mbahe miti rupa, ahe ava co ivi pipendar. Iyavei mbahe rāhi avīye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe.

³⁹ Acoi yamotarēhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai ìva pendar yuvireco.

⁴⁰ Iyavei inungar acoi caha tēi imonuhapri sapi āgua, ěgüe ehi aveira ari cañi pipe coiye.

⁴¹ Evocoyase che, Ava Riquehir, che rembiguai ìva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua āgua che povri ve yuvirecoi vahe pāhu sui.

⁴² Ichui omondopara tata guasuve. Aheve oyaseho tēira iyavei ombotere-tere tēira guāi yuvireco.

⁴³ Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua āgua mbahe sepirusu vahe pota raisa pipe” ehi.

Mbohīr sepirusu catu vahe sui yembohesa

⁴⁵ “Iyavei Tūpa mborerecuasa inungar ava mbahe rerocuasar oseca vahe mbohīr icatupri vahe yepi.

⁴⁶ Ahe oyosuse mbohīr sepi catu vahe, oso opacatu ombahe mondo co sepi catu vahe rerocua āgua.

Pira mbohasa sui yembohesa

⁴⁷ “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira.

⁴⁸ Acoi savapipose pira mbohasa, vinose ivi ātasave yuvireco. Aheve oiporavo pira avīye vahe oñōñapa ombahe rīruve yuvinoi, naporai vahe rumo opaño omombo yuvireco.

⁴⁹ ěgüe ehi aveira ari cañi pipe: ahese Tūpa rembiguai ìva pendar yuvinosera opacatu ava ndaseco pōrai vahe mboyepēpi āgua ava seco catupri vahe sui.

⁵⁰ Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osē ichui

⁵⁴ oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepīhamondii tēi:

—¿Que pīha co ava oyembohe catu ombahecua āgua? iyavei, ¿mara ehi pīha co mbahe poromondiisa apo? —ehi yuvireco—.

⁵⁵ ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas.

⁵⁶ Seindri avei niha yuvirecove yande pāhuve. Evocoyase, ¿que pīha oyembohera viña? —ehi tēi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

⁵⁸ Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

14

Juan Oporoãpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerācua.

² Evocoyase aipo ehi opitiviisar upe: “Juan Oporoãpiramo vahe revo ocuera yevi. Sese oyapo poromondiisa ipirata vahe” ehi.

³ Esepia niha, yipindar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi,

⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehe mombehusar secoi” ehi yuvireco chupe.

⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehi rembiepiave. Herodes upe evocoyase aviye ai eté.

⁷ Sese ahe oyemoingatu ñepi reseve que mbahe oyeupe oporanduse imondo āgua chupe.

⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe āca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe āgua. Esepia, opacatu ava güemimbori eta rovaque aipo ehi. Sese, “Taperu chupe” ehiño.

¹⁰ Ahese oporocuai Juan āca hasia āgua soquendasave.

¹¹ Ipare viraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhise carite pipe. Ava rehi rumo oyanduse, yuvinose voi güecua sui, ivi rupi yuviraso osupiti secosave yuvireco.

¹⁴ Evocoyase osēse carite pipe sui, osepia ava rehi. Ahese oiparaisuereco ava eta. Sese opa ombogüera imbaheasi vahe serasopri.

¹⁵ Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶ —Aní, ndiyai yuviraso. Pe pemondora mbahe semihura yuvireco —ehiño chupe.

17 —Poyandepomi tēi rumo pan orovireco iyavei ñuviriomi tēi avei pira — ehiño semimbohe yuvireco chupe.

18 —Peruño ave cheu —ehi güemimbohe upe.

19 Ipare aipo ehi ava rehi upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco.

20 Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

21 Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús oguata i hari rupi

22 Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe.

23 “Aviye” ohe pare ava upe, oyeupi oso ahe ae ivitri rese oyeroqui água. Pfituse chupe, opitaño aheve.

24 Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüe-mbegüei ocua sese.

25 Cõhe potase, oguata i hari rupi oso güemimbohe coti.

26 Semimbohe i hari rupi iguatase, oyembosiquiye yuvireco ichui. Sese, —¡Ndahei vo evocoi hãgüer secoi! —ehi yuvireco chupe.

27 Güemimbohe upe rumo aipo ehi:

—¡Peyemoviracuaño, che tēi! ¡Pesiquire eme che sui! —ehi.

28 —Che Yar —ehi Pedro—. Nde ité ereicose, taguata i hari rupi vicho nde piri —ehi.

29 —Erio ru —ehi chupe.

Evocoyase Pedro ogüeyi carite pipe sui, oguata i hari rupi. Osora ipiri viña.

30 Ivitu pĩrata repiase rumo, osiquiye ichui. Oso senise rumo ipive,

—¡Che Yar! ¡Che pĩsiromi eve! —ehi.

31 Ahese cũriteimi voi oipisi Pedro po rese, aipo ehi chupe:

—¡Chĩhi tēi ereyeroya che rese! ¡Mahera ndereyeroya tuprii che rese! —ehi.

32 Oyuvirohase rumo carite pipe, opituhu voi ivitu.

33 Evocoyase carite pipe yuvirecoi vahe oñenopiha sovai,

—¡Supi eté catu nde Tũpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

34 Osasase ipa, oyepota Genesaret ivi rese yuviraso.

35 Opacatu ahe pendar ava oicuae Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe,

36 aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

1 Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

2 —¡Mahera vo nde remimbohe ndoguatai yande ramoi aracahendar aracuaa rupi yuvireco? ¡Mahera vo yande porocuita mboaviyeẽhisa pipe ndoyepoi ocaru água yuvireco yepi? —ehi.

³ Jesús omboyeví aipo ehi chupe:

—Pe no, ¡mahera ndapemboyeroyai Tūpa porocuita pe ramoí aracahendar aracuasa rupi tēi pe guata āgua!

⁴ Esepia, Tūpa aipo ehi: “Pemboyeroyara iyavei peipitívira pe ru, pe sí avei no. Acoi ñehe mara vahe oyesupa upe, ahe tomanoño” ehi aracahe.

⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise,

⁶ ahese ndiyai eté ipitívii āgua chupe” peye. Ēgüe peye pe aracua raisa pipe pemocañi Tūpa porocuita peyesui.

⁷ ¡Pe Tūpa reroyasar angahu tēi peico vahe! Supi tupri ité Tūpa ñehe mombehugar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuita tēi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe:

¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru ¡va pendar remiti, opara sapohosa curi —ehi—.

¹⁴ Ēgüe tehiño yuvireco. Esepia, evocoi inungar ndasesapisoí vahe viroguata ambuae ava ndasesapisoí vahe yuvireco. Ahe evocoyase oyoya voira ovíapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua víteí avei catu pe co ñehesa?

¹⁷ ¿Ndapeicuai vo opacatu mbahe acoi ava yuru rupi oique vahe oso yavíterve, ipare osē setecuer sui?

¹⁸ Ava pihañemoñetasa sui osē vahe rumo iyuru rupi, ahe ava omboangaipa.

¹⁹ Esepia, ava pihañemoñetasa sui osē pihañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa.

²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

Cuña ndahei vahe judía viroya Jesús

²¹ Ichui osē Jesús oso, oguata Tiro iví rupi, Sidón iví rupi avei.

²² Cuña cananea, Tiro, Sidón iví rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membrí víreco caruguar oyese! —ehi pucu-pucu ou chupe.

²³ Ahe rumo nomboyeví eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquícuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tūpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che pītivimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherā —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osē oso ipa Galilea ivi. Ipare oyeupi ivitri rese oguapi oĩ.

³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoí vahe, ipāri-pāri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera.

³¹ Ichui ava niñehengatui vahe oñehe; ipāri-pāri vahe ocuera tupri; ndoguatai vahe oguata avei iyavei ndasesapisoí vahe osareco yuvireco. Sepiase ava rehi oyepihamondi aipo ehi: “Imboeteipri Israel Tūpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sētave sie porēhi reseve amondo. Aviyeteramo oviroviapi-api tiētera tieporēhi peri rupi yuvireco viña —ehi.

³³ Evocoyase semimbohe aipo ehi yuvireco chupe:

—¿Que sui pñha orosecara tembihu ava rehi upe nara cohava ava porēhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehi upe.

³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehi upe yuvireco.

³⁷ Opacatu ava ocaru vahe ihñtaro yuvireco. Ipare semimbohe omboapipo iri rane sumbirer siete iruova yuvireco.

³⁸ Cuimbahe ocaru vahe retacuer cuatro mil. Cuña, chñhivahe retacuer rumo ndicuasai.

³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha água yuvireco viña. “Emoporēhi Tūpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pñrá iteanga’;

³ iyavei añihivei: ‘Co pipe ari naporai chira. Esepia, iva rese pïra vai anga, pïtu guasu-guasu avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cūrteindar ava upe imombehu.

⁴ Co ava ndaseco pōrai vahe oyepepi vahe Tūpa sui oporandu poromondiisa rese ‘¿Tūpa suindar ité pïha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseypaña ava rehii oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco.

⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pïhañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—

¹⁸ Nde Pedro ereico, co ita guasu harive amopuhara che tūparoguã. Ñepepe manosa ndosecoreroyii chietera opiratasa pipe.

¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Aní” erese que mbahe uve co ivi pipe, ãgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tūpa Rembiporavo Poropisrosar’ peye eme ava upe cheu” ehi.

Jesús omombehu omano āgua

²¹ Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

²² Pedro rumo viraso co cotimi chupe oñehengata ãgua:

—¡Tüpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tüpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi.

²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisiora.

²⁶ Esepia, ¿aviye ai angahu piha ava upe opacatu mbahe co ivi pipendar pisi ãgua, ahe ae tēi omocañise güecocuer yuvireco viña? ¿Mbovi piha omondora ava güecocuer repirã viña?

²⁷ Esepia che, Ava Riquehir, ayevira che Ru reco pīratasa pipe che rembiguai iba pendar reseve curi. Che evocoyase aicuara ñepeipei ava rembiapo agüer rupi chupe.

²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi.

² Aheve, aviyeteramo tēi oñecuñaaro güemimbohe rovai. Evocoyase sendi sova inungar ari, iturucuar morochí, sendi avei.

³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha.

⁴ Ahese Pedro aipo ehi chupe:

—Che Yar, ¡aviye ai eté cohava yaico! Ereipotase, ayapora mbosapi teyupami: ñepeipei ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iba quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui.

⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeipei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyeví güemimbohe upe aipo ehi:

—Elías rane ité niha oura opacatu mbahe moingatu āgua curi.

¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ēgüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Ēgüe ehi Jesús oñehe Juan Oporoāpiramo vahe rese.

Jesús ombogüera chihivahe carugar rerecosar

¹⁴ Viroyepota Jesús güemimbohe ava rehisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer ovíapi tatave, ive avei no.

¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri viteí eté che rese! ¡Co coti tēi vite pe pihañemoñetas! ¡Mbovi rupi rutei vo aico vitera pe pāhuve che ñemosasa pipe! Peru evocoi chihivahe cheu —ehi.

¹⁸ Ahese oñehe pīrata carugar upe chihivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera pīha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tūpa rese. Supi eté sese pe yeroyasa, yepe ndoyaví chira mostaza rāhi tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe.

²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano āgua

²² Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarēhimbar povrive.

²³ Che yuca aveira yuvireco. Acuerayevira rumo imombosapisa arí pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondoí guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiquese Pedro oí pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo vīrocua guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

²⁶ Pedro evocoyase omboyeví chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepi chira yuvireco —ehi—.

²⁷ Guarepochi rerocuasar moñemoiroēhi ãgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi ãgua yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu ãgua chupe:

—¿Uma vo seco ivate catu vahe Tũpa mborerecuasa pipendar? —ehi.

² Evocoyase Jesús: “Erio” ehi ñepe chĩhivahemi upe, omondo güemimbohe pãhuve imoha,

³ aipo ehi:

—Supi eté, acoi ndapeñecuñaroise iyavei ndapeicoise chĩhivahemi nungar, ahese ndapeiquei chira Tũpa mborerecuasa pipe.

⁴ Acoi oñemomini vahe rumo inungar co chĩhivahemi, evocoi nungar seco ivate catura Tũpa mborerecuasave.

⁵ Acoi ava oipisi vahe co chĩhivahemi nungar che rer pipe sereco, che ité che pisi yuvireco —ehi.

Iparaısu itera ava oporomboangaipa uca vahe

⁶ “Acoi que ava rumo omboangaipa uca vahe co chĩhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo ãgua.

⁷ Iparaısu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaısu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepe pe pi, pe po rese, peso rãgüer sui tata guasu apirēhisave ñuvirío pe po, que ñuvirío pe pi reseve.

⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rãgüer sui.

Porombohesa ovesa ocañi tēi vahe resendar

¹⁰ “Peroıroi rene que ñepe chĩhivahemi che reroyasar. Esepia, ivave sembiguai che Ru pirindar ité yuvirecoi yepi” ehi.

¹¹ “Che niha, Ava Riquehir, ayu ava ocañi tēi vahe pısiro ãgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepe ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso.

¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui.

¹⁴ Ēgüe ehi avei che Ru ivave secoi vahe, ndoipotai eté que ñepe ava che reroyasar chĩhivahemi nungar cañi ãgua” ehi.

Porombohesa yande ñero ãgua rese

¹⁵ “Acoi nde mboetasa Tũpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute.

16 Nande reroyaise rumo, ahese ereñehera ñepei, anise ñuvirío ava upe nde pĩtivii ãgua rese. Ahe avei tosendu pe ñehe. Ahese oimera que ñuvirío, anise mbosapi sendusar.

17 Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tẽi aposar, ãgũe peye sereco” ehi.

18 “Supi eté acoi, ‘Aviye’ peyese que mbahe upe co ivi pipe; ãgũe ehi aveira ivave. Iyavei co ivi pipe, ‘Aní’ peyese que mbahe upe, ãgũe ehi aveira ivave.

19 “Iyavei co amombehu potami avei pẽu: Acoi ñuvirío co ivi pipe pe pĩhañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pẽu.

20 Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipãhuve” ehi.

21 Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagũer rupi pĩha? —ehi.

22 —¡Aní! —ehi—. ¡Setenta rupi siete oyupagũer! —ehi Pedro upe.

Yembohesa ava niñero potai vahe resendar

23 “Tũpa mborerecuasa inungar mborerecuar guasu omoingatu pota vahe güembiguai revesa chupe.

24 Evocoyase omboipi imoingatu ãgua, ahese ipĩtiviiisar güeru ireve ati catu vahe guarepochi rese chupe.

25 Ahe rumo ndovirecoi imboepi ãgua. Sese co mborerecuar oyocuai opĩtiviiisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi.

26 Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tẽi cheu. Opara niha amboepi ndeu’ ehi chupe.

27 Ahese oiparaisuereco, opoi irevesa sui.

28 “Aheseve voi rumo sembiguai osẽse, osepia ambuae ondugũer oyeupe ndaseta tuprii vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi.

29 ‘¡Aní!’ ehi oñenopiha oso sovai, ‘Eñemosañomi tẽi cheu’ ehi, ‘amboepipara niha acoi che revesa ndeu’ ehi.

30 Niñero potai eté rumo. ‘Tomboepipa rane ité orevesa cheu’ ehi soquenda uca.

31 Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco.

32 Evocoyase ahe serecuar güeru uca aipo ehi chupe: ‘¡Mbahe tẽi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

33 ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

34 Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

35 “Indó, evocoyase ãgũe ehi aveira che Ru iva pendar pẽu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiẽhi ãgua

1 Ipare Jesús osẽ Galilea sui, oso Judea ivi rupi ari sãsa coti iai Jordán rovai.

2 Ava rehii yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pñha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevī fariseo upe:

—¿Ndapesenducuaimi vo ñehesa icuachiapri pīpe peyeroquise: ‘Yipindar yande Aposar oyapo cuimbahe, cuña avei’ ehi?

⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi āgua. Evocoyase ñuvirío yuvirecoira ñepeī ava nungar’ ehi.

⁶ Sese ndahe iri ñuvirío, ñepeī vahe ité yuvirecoira. Evocoyase ava Tūpa omomenda vahe oyese, ndiyai ava tēi omboyepēi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheṛā güembireco upe cuachiar poisa resendar opoi āgua ichui? —ehi.

⁸ —Pe poreroyaēhisa pīpe niha Moisés ēgüe ehi pēu. Yipisuive ité rumo Tūpa ndoipotai oyesui opoi āgua yuvireco.

⁹ Esepia, acoi opoi vahe güembireco mbahe ndoyavī vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporā, ahe güeraño osenducua yuvireco —ehi güemimbohe upe—.

¹² Esepia, oime pñhañemoñetasa ava mendaēhi āgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tūpa mborerecuasa reseño ité. Acoi oicatu vahe co ñehesa reroya āgua, toviroyaño —ehi.

Jesús osovasa chñhivahe

¹³ Ipare ahe pendar güeru moviro chñhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chñhivahe?” ehiño serusar upe yuvireco.

¹⁴ Jesús rumo aipo ehi:

—¡Mahera ndapeipotai iyu āgua! Toyugüeruño chñhivahe cheu. Esepia, co chñhivahe nungar ava yuviroiquera che Ru povrive —ehi.

¹⁵ Ipare omondo opo chñhivahe harive osovasa. Ichui osē oso.

Mbia chñhivahe imbahe eta vahe omoñeta Jesús

¹⁶ Mbia chñhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuita —ehi.

¹⁸ —¿Uma vo aipo mborocuita? —ehi.

Ahese omboyevī chupe:

—‘Ndereporoyucui chira, nandeaguasai chira, nandemondai chira, nanderemirai chiaveira ambuae ava rese,

¹⁹ eremboyero yara nde ru, nde si avei, eresaísura ambuae ava nde yeaisu nungar eico’ ehi icuachiapri pīpe —ehi mbahe yar upe.

20 —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheerã? —ehi.

21 —Ereipotase mbahe tupri pipe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbia oyepepiño ichui oviharêhisave oso. Esepia, mbahe yar ité secoi.

23 Evocoyase aipo ehi güemimbohe upe:

—Supi eté yavai eteanga imbahe eta vahe upe oique vaheerã che Ru mborerecuasave.

24 Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

25 Aipo iñehesa renduse, semimbohe oyepihamondii aipo ehi:

—¡Ava angahu pñha evocoyase oñepisirora yuvireco viña! —ehi yuvireco.

26 Omahe güemimbohe rese, aipo ehi:

—Ava tñi upe yavai aipo nungar mbahe apo. Tũpa upe rumo mbahe opacatu ndayavaimi eté —ehi.

27 Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

28 —Oime itera niha mbahe pñu. Esepia, acoi ari oyepotase opacatu mbahe recuñaro ãgua, ahese che, Ava Riquehir, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

29 Acoi opacatu ava oseya vahe güeta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirêhi vahe.

30 Seta vai rumo cñritei yipindar vahe, ipa tñira yuvirecoi; seta aveira cñritei ipa tñi vahe, yipindar yuvirecoira curi —ehi.

20

Yembohesa oporaviqui vahe resendar

1 “Tũpa mborerecuasa inungar acoi ava ivi yar osẽ añihiveive oyeupe nara oporaviqui vahe reca ‘toporaviqui che uva tive yuvireco’ oyapave.

2 Oyosuse ava, ahese omoingatu oyeupe oporaviqui vaheerã upe ñepeí ari mboraviqui repri imboepi ãgua. Ahese opa omondo ocove imboporaviqui.

3 Ipare osẽ, oso añihivei, arivate catumi osepia ocarusu pipe ambuae ava oporaviquisa ndovirecoi vahe,

4 aipo ehi chupe: ‘Peso, tapeporaviqui che uva tive. Amboepi tupri niha pñu’ ehi. Ahe evocoyase yuviraso oporaviqui ãgua icove.

5 Ipare oso iri mbiter ari rupi oyeupe oporaviqui vahe reca, ãgüe ehi tupri avei caharuse, las tres rupi.

6 Ipa osẽ iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohí tñi ari momba cohava pehã?’

7 ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi.

8 “Pñtu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi.

⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepepei ñepepei ari rupindar oipisi guarepochi yuvireco.

¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepepei ari rupindar yuvireco.

¹¹ Guarepochi pisire rumo oñemoiro cove yar upe yuvireco,

¹² aipo ehi: ‘Co ava yugüeru ipa tēi vahe, ñepepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañ tēi oroporaviqui ari momba sacucuer upe oroico’ ehi.

¹³ Cove yar rumo aipo ehi ñepepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepepei ari resendar ndeu acoi, Aviye, peye vahecuer rese cheu’ ehi.

¹⁴ ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oi que vahe upe inungar tupri ndeu amboepi.

¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ēgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherā yuvireco curi” ehi güemimbohe upe.

Jesús omombehu iri omano āgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehix, che pisira, che mondo pahí eta rerecuar iyavei Moisés porocuaite rese oporombohe vahe povrive yuvireco. Ahe, “Tomano” ehira yuvireco cheu.

¹⁹ Ipare che mondora ava ndahei vahe yande mu upe mara-mara tēi che rereco āgua che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembrí upe nara

²⁰ Ipare Zebedeo rembireco ñuvirío omembrí reseve, oyemboya Jesús rese yuvireco. Ahese oñenopiha sovai oporandu āgua mbahe rese.

²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membrí eremboguapira ndeyepiri ñepepei nde mbahe rese pocosa coti, ambuae nde mbahe rese pocoēhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pñha co mbahe-mbahe tēi aiporara vaherā, inungar-ra que igua iro vahe aihu vaherā viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opomboguapi āgua che mbahe rese pocosa coti, ambuae che mbahe rese pocoēhisa coti avei. Che Ru rumo omoingatú güembiporavo upe nara oguapi vaherā che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei.

²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi.

²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaherā ava eta repirā Carugar povri sui senose āgua —ehi.

Jesús ombogüera ñuvirío ndasesapiso vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei.

³⁰ Aheve peri popive ñuvirío ava ndasesapiso vahe oguapi yuvinoi. Evocoyase osenduse Jesús ocuase supi, osapucái pĩrata yuvireco chupe aipo ehi:
—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saisusave opoco sesa rese. Ahe ramoseve ndasesapiso vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipimi. Aheve omondo ñuvirío güemimbohe

² aipo ehi chupe:

—Peso co tecuami yande rovaindarve. Aheve pesepiara guaricu imembri reseve ñapichimbri imoha. Ahe peyorañora seru cheu.

³ Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ēgüe ehi chupe aracahendar Tūpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuaise yuvireco.

⁷ Güeru guaricu imembri reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive.

⁸ Iyavei ava rehii oipipira oturucuar peri rupi imboetei guasusa pipe. Ambuae evocoyase oyasia pindo omondo peri rupi yuvireco saperā.

⁹ Ava rehii senonde, saquicuei avei oguata vahe osapucái yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰ Oique se Jerusalén pipe, opacatu co tecua pipendar oyepihamondi yuvireco. Iyavei setá oporandu-randu yuvireco:

—¿Ava pñha co mbia? —ehi tñi yuvireco.

¹¹ Ava rehi oguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tũparo pipe sui

¹² Ipare Jesús oique judío tũparo guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo.

¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo imonda rai vahe rēta nungar tñi pereco —ehi.

¹⁴ Aheve oyemboya Jesús rese yugüeru ava ndasesapiso vahe, ipãri-pãri vahe avei. Ahe opa ombogüera.

¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tũparo pipe osenduse chñhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco

¹⁶ aipo ehi chupe:

—¡Eresendu vo aipo ehi tñi vahe chñhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe:

‘Chñhivahemi, pñtanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepe pñtu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico.

¹⁹ Aheve peri popive osepia ivira higuera. Ahe sese oyemboya oso ‘¿iha pñha?’ oya viña. So güeraño tñi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru.

²⁰ Ahe mbahe repiase, ore,

—¡Too, mara ehi rutei pñha co cñriteimi opa voi ipiru! —orohe tñi chupe.

²¹ Ahese omboyevi oreu:

—Acoi peyeroyase ité Tũpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tũpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oique iri judío tũparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pñu. Pemboyevise che porandusa, ahese che avei amombehura ava porocuita rupi eté pñha ayapo co mbahe vichico.

²⁵ ¿Ava vo Juan ombou ava ãpiramo ãgua? ¿Tũpa pñha, ava tñi tie? —ehi.

Evocoyase oñemoñeta aipo ehi oyeupe yuvireco: “Tũpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira.

²⁶ Anise, ‘Ava tẽi remimbou’ yahese rumo, aviyeteramo opacatu ava yande amotarẽhira yuvireco. Esepia, opacatu: ‘Juan omombehu vahe ñehesa Tũpa suindar’ ehi eté yuvireco chupe” ehi.

²⁷ Sese,

–Ndoroicuai eté Juan mbousar –ehiño yuvireco.

Ahese ahe aipo ehi:

–Evocoyase che avei, “Ahe iporocuita pipe co mbahe ayapo” ndahei chietera pẽu –ehi mborereciar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

–¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi.

²⁹ ‘¡Nachequerẽhi!’ ehi voiño. Coiye rumo, ‘¿Mahera ãgũe ahe?’ ehi. Ipare osoño ité, eporaviqui.

³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

³¹ ¿Uma vo co ñuvirío yuvirecoi vahe oyapo vu remimbotar? –ehi.

–Co yipindar vahe –ehi yuvireco.

–Supi eté. Esepia, co angaipa viyar mbahe-mbahe tẽi aposar, cuña oyemondo-mondo tẽi vahe avei, ahe rane yuviroiquera Tũpa mborerecuasave pe sui.

³² Esepia, Juan Oporoãpiramo vahe ou co tecocuer ihĩvi vahe mboyecua ãgua pẽu pe reco tupri ãgua viña. Pe rumo ndaperoyai eté. Co angaipa viyar iyavei co cuña oyemondo-mondo tẽi vahe ava upe, ahe rumo viroya ité yuvireco. Yepe pesepia tẽi opacatu evocoi mbahe viña, ipare rumo ndapeñecuñaro pe recocuerai sui seroya ãgua –ehi mborereciar guasu yuvirecoi vahe upe.

Ava mbahe tẽi eporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rĩavi ãgua; oyapo avei oi ivate vahe ahe sese mahemoha ãgua. Ipare oseya oivi ava eporaviqui vahe upe iporu ãgua. Ichui osẽ oso amombri vahesa rupi.

³⁴ Coiye oyepotase ari uva pohosa, ahese omondo güembiguai eporaviqui vahe upe imboporandu ãgua ‘taipisi uva pohopri cheundar cute’ oyapave viña.

³⁵ Ipare rumo eporaviqui vahe oipisi sembiguai yuvireco: amove oinupanupa yuvireco, amove oyuca, oyapi-yapi avei amove ita pipe yuvireco.

³⁶ Ipare rumo ivi yar setá catu omondo iri güembiguai. Eporaviqui vahe rumo mara-mara tẽiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña.

³⁸ Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco.

³⁹ Evocoyase oipisi, vinose miti pãhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora eporaviqui vahe upe?” ehi oñehe rendusar upe.

⁴¹ Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté’

ehi icuachiapri pipe.

⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombaesa chupe.

⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco.

⁴⁶ Aheseve oipisi pota voi yuvireco viña. Osiquiyeño rumo ava rehi sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta.

³ Ipare oyocuai güembigui eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve.

⁴ Ipare oyocuai iri ambuae güembigui eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquirā vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembigui upe.

⁵ Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave,

⁶ ambuae rumo oipisi sembigui mara-mara tēi sereco āgua. Ahe ipipe oyuca yuvireco.

⁷ Evocoyase mborerecuar guasu oñemoiro eteprisave omondo osundao eta co ava oporapichi vahe yuca ucapa āgua, iyavei secua rapipa āgua.

⁸ Ipare aipo ehi ambuae güembigui eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheerā cohove.

⁹ Sese peso opacatu ava guata catusa rupi, peñehe mendasave yugüeru vaheerā opacatu pe rovaichisar upe’ ehi.

¹⁰ Evocoyase sembigui eta yuvinosépa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ēgüe ehi ava savapipo tupri oi guasu mendasave yuvireco.

¹¹ “Evocoyase acoi mborerecuar oique ava ichohopri repia. Ipare omahegua tupri ñepeí ava ipāhu pendar rese. Ahe rumo ndomondei turucuar mendasa resendar.

¹² Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñeheiño ité chupe.

¹³ Evocoiyase, ‘Peipisi co mbia, peñapichi ipi, ipo avei, pemose ocarve pĩtumimbisave. Aheve oyaseho tẽira, sãitere-tere tẽira mbaherasicuer rereco’ ehi ichohopri rese hañecosar upe.

¹⁴ Esepia, setá tẽi ichohopri, moviromi tẽi rumo iporavopri ipãhu sui” ehi mborerecuareta uve.

Fariseo osecoãha iri tẽi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara tẽi ãgua.

¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tũpa recocuer rese. Nde niha ndereroyai vahe ava ñehesa tẽi. Esepia, ava pihañemoñeta rupi ndereicoi vahe; nde pihañemoñeta rumo ñepeí reseve erereco.

¹⁷ ¿Mara ehi nde pihañemoñeta? ¿Aviyera pĩha yamondo guarepochi rese oporanduse Roma pendar mborerecuar ivate catu vahe upe viña, aní tie? — ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tẽi vahe peico. ¡Mahera che moingue pota mbahe tẽi pipe peye!

¹⁹ Pemboyecua ru ñepeí guarepochi mborerecuar guasu upendar cheu — ehi.

Evocoiyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? — ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoiyase mborerecuar upe mbahe chupendar, Tũpa upendar mbahe evocoiyase pemondora Tũpa upe — ehi fariseo upe.

²² Osenduse, oyepihamondi tẽi yuvireco. Evocoiyase yuvinose yuviraso ichui.

Saduceo oporandu Jesús upe cuerayevisa rese secoãhasave

²³ Ahe arí pipe saduceo “ndipoi eté cuerayevisa” ehi vahe yugüeru Jesús upe, oporandu tẽi angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi — ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. Evocoiyase tivri omenda sembirecocuer rese.

²⁶ Ahe omano guahiẽhiseve avei no. Ëgüe ehi avei opacatu ambuae tivri, omano avei guahiẽhiseve yuvireco.

²⁷ Opacatu imano pare, cuña avei omano cute.

²⁸ Evocoiyase opase ocuerayevi yuvireco, ¿uma rese ité pĩha opitara ahe cuña? Esepia, opacatu niha omenda yuvireco sese — ehi saduceo yuvireco chupe.

²⁹ —Pe pihañemoñetasa co coti tẽi eté. Esepia, ndapeicuai eté Tũpa ñehe icuachiapri aracahendar, ndapeicuai avei Tũpa pĩratasa — ehi—.

³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tũpa rembiguai iva pendar nungar yuvirecoira ivave — ehi—.

³¹ Co cuerayevisa resendar rumo amombehura p̄eu. Aviye ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe:

³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi t̄ei yuvireco.

Porocuita aviye catu vahe

³⁴ Ipare fariseo oyanduse yuvireco Jesús omonguiriripañoese saduceo oye-sui, ahese oñemonuha yuvireco.

³⁵ Ñepe ip̄ahu pendar Moisés porocuita rese oporombohe vahe, ahe oyem-boya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde p̄ihañemoñetasa p̄ipe, opacatu nde recocuer p̄ipe, nde yapisacasa p̄ipe avei’ ehi.

³⁸ Co porocuita aviye catu vahe ambuae porocuita sui.

³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi.

⁴⁰ Co ñuvirío porocuita rupi oguata opacatu Moisés porocuita icuachi-apri, opacatu Tūpa ñehe mombehusar rembicuachía avei —ehi.

¿Ava suindar p̄iha Porop̄isirosar?

⁴¹ Fariseo ñemonuha viteseve,

⁴² Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaheã ava p̄isiro ãgua rese? ¿Ava suindar-ra p̄iha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera p̄iha evocoyase David oñehese Espiritu p̄iratasa p̄ipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapi che acato coti acoi che amondose voi eté nde amotar̄ehimbar nde povrive yuvireco’

ehi David aracahe.

⁴⁵ Evocoyase, ¿mahera ru: “Porop̄isirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoyase ndoicatu iri imboyevi ãgua yuvireco cute. Ahe ari p̄ipe sui ndipo iri que ñepe iquer̄ehi vahe iñehe avi uca ãgua oñehe p̄ipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no:

² “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco.

³ Sese iya peroyano ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri t̄ei mbahe viña, ipare rumo co coti t̄ei mbahe oyapo yuvireco.

⁴ Iyavei omondo porocuaita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeí oporocuaíta yuvireco no.

⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco.

⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no.

⁷ Oipota avei ava oyeupe ‘avirave’ apo ãgua omboetisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeíño ité pereco pe Mbohesar.

⁹ Iyavei, ‘Che ru’ ndapeyei chira que ava co ivi pipendar tēi upe. Esepia, ñepeíño ité pe Ru pereco, ahe niha iva pendar.

¹⁰ Ndiyai avei, ‘Mborerecuar’ pembohe uca ava peyeupe. Esepia, Poropĩsĩrosar güeraño ité pe rerecuar secoi.

¹¹ Acoi ava seco ivate catu vahe, ahe toporopĩtivĩ güeco mbegüesa pipe.

¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

¹⁴ “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocuarocuaño tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipĩrata catu vahe curi.

¹⁵ “¡Peparaisu catu itera pe Moisés porocuaita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

¹⁶ “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye ãgua, ãgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi.

¹⁷ ¡Pe ndapembahecuaí vahe nungar, ndasesapisoi vahe nungar avei peico! ¿Uma vo aviye catu vahe: oro pĩha, anise tūparo tie? Tūparo pipe niha oro rovasasa yepi.

¹⁸ Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye ãgua, ãgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye ãgua, ahese iya ité yamboaviyera yande ñehe yepi’ aipo peye tēi.

¹⁹ ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pĩha, anise mbahe seropovēhepri renda tie? Ahe tenda harive niha porerecosa sovasasa yepi.

²⁰ Sese acoi mbahe omombehu vahe mbahe seropovēhepri renda rer pipe oñehe mboaviye ãgua, ndahei serer pipe güeraño, omombehu avei opacatu ihari pendar mbahe seropovēhepri rer pipe,

21 iyavei acoi ava omombehu vahe mbahe tūparo rer pipe oñehe mboaviye ãgua, ahe omombehu ipendar rer pipe avei. Ahe niha Tūpa secoi.

22 Iyavei acoi omombehu vahe mbahe que ambuae ava upe iva resendar rer pipe oñehe mboaviye ãgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoi.

23 “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepei-pei diez pe remitī menta, anis, comino pereco vahe sui ñepei Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihīvi vahe, peporoparisuerecora iyavei pemboaviye tuprīra pe cuaita yepi. Iyacatu rumo ahe pemboaviye aveira viña.

24 ¡Pe ava mbohesar ndasesapīsoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoyase. Ëgüe peye co mborocuita upe.

25 “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tuprī angahu tēi vahe! Esepia, inungar igua rīru iyavei tembihu rīru icupe rupi tēi yoseiprī. Ipīpe rumo iquīha opītaño ité. Ëgüe ehi tēi pe recocuer pe monda raisave, mbahe pota-pota tēisave avei.

26 ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatīro rane pe piha pipe mbahe yavaeté vahe sui! Ahese ramo pe rembiapo icatuprīra cute.

27 “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvīpa imomorochimbri tēi. Iharīve tēi icatuprī chupe. Ipīpe rumo tehōgüer cangüer iyavei opacatu mbahe yavaeté vahe ovireco oyese.

28 Ëgüe peye: ava rembiepiave aviye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

29 “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tuprī angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha ãgua iyavei pemoporañete ai tēi ava seco ihīvi vahe ruvipagüer yepi viña.

30 Ipare aipo: ‘Yande yaicose revo aracahe yande ramoi recose, ndayaipītivīi chietera Tūpa ñehe mombehusar yuca ãgua yuvireco viña’ peye tuprī tēi.

31 Aipo peyese rumo, pemboyecua Tūpa ñehe mombehusarer yucasar suindar pe yesusa.

32 ¡Pemboyeapī iriño evocoyase pe ramoi rembiapocuerai!

33 “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve.

34 Evocoyase che amboura pēu Tūpa ñehe mombehusar ava yaracua vahe iyavei ava pe mbohe ãgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi.

35 Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tuprī vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahīr Zacarías sui avei, ahe peyuca vahe tūparo pipe mbahe seropovēheprī renda rovai.

36 Supi eté opacatu co mbahe tēi oura pe recove vīteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrī opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua.

³⁸ Sese seyapirā tēi peicora.

³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipape Jesús osē judío tūparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tūparo!” orohe.

² Ahe rumo:

—Supi eté amombehu pēu: co opacatu pesepia vahe, ndipoi chietera que ñepeí ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vahe rā arī cañi renonde

³ Ipape Jesús oso ivitri Olivo ve uguapi oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei arī cañi āgua? —orohe chupe.

⁴ —Peicua catu, peyembopa ucai rene ambuae ava upe peico.

⁵ Esepia, setá ava yugüerura, ‘Che aico Tūpa remimbou ava pīsīro āgua’ ehi tēira ava eta mbopa yuvireco.

⁶ Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo arī cañisa.

⁷ Esepia, ñepeí ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi rirīi opacatu-catu tēi tecua rupi.

⁸ Opacatu evocoi mbahe rumo omboipi ramomi vahe mbahe tēi porarasa.

⁹ “Ahese pe pīsira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco.

¹⁰ Ahe arī rupi evocoiyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco.

¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco.

¹² Ombouvicha catura mbahe-mbahe tēi naporai vahe. Ipape sui ndoyeaisu tupri iri chira ava yuvireco.

¹³ Acoi ava oyemoviracua vaheño rumo arī ipa vahe rupi, ipīsīropri yuvirecoira.

¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca āgua. Ahese ramo oimera cañisa co ivi pipe” ehi oreu.

¹⁵ “Tūpa ñehe mombehusar Daniel oicuachía mbahe-mbahe tēi aposa resendar oime vahe rā tūparo guasu maranehi vahe pipe aracahe. Ahe pesepiase oi maranehi pipe —acoi oyerogui vahe, ahe tosenducua tupri yuvireco—,

¹⁶ evocoiyase Judea ve yuvirecoi vahe toñemipa poyava ivitri rese yuvireco ichui;

17 iyavei acoi güëta harive yuvirecoi vahe ogüeyise, toique iri eme güëtave ombahe reca;

18 iyavei acoi que rupi tēi yuvirecoi vahe, toyevi iri eme güëtave que oyeaosa renose ãgua yuvireco.

19 ¡Iparaisu itera cuña ipuruha vahe, imembi pītani vahe avei yuvireco!

20 Peporandu Tūpa upe pe recua pipe sui pe sēhi ãgua irohi pipe, mbītuhusa ari pipe avei.

21 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar.

22 Iyavei nomombītuhise Tūpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombītuhura” ehi.

23 “Iyavei que ava, ‘Esepia co Poropīsīrosar secoi’; anise, ‘Peve secoi’ ehise yuvireco pēu, aní chira peroya aipo ehi vahe.

24 Esepia, yugüerura ava ‘che Poropīsīrosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua ãgua yuvireco. Ipipe osecoñhara Tūpa rembiporavo imbopa ãgua yuvireco.

25 Opa aipo co senondeve amombehu pēu.

26 Sese que ava pēu: ‘Pesepia pe ivi iporupirēhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco.

27 Che rumo inungar overa vahe sendi añihivei sui caharu coti ocua ìva rese, ãgüe ahera che, Ava Riquehīr, opacatu ava rembiepiave ayevi irise vitu curi.

28 Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi ãgua resendar

29 “Ahe ari pipe mbahe-mbahe tēi pare cūriteimi ndoyecua iri chira ari, yasi avei ndosesape iri chira, yasitata avei opara oviapi ìva sui iyavei ìva resendar mbahe oririira yuvireco.

30 Ahese oimera ìva rese iporēhi vahe che, Ava Riquehīr, yu ãgua resendar. Evocoiyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise ìva quiha rese che pīratasa rendigüer porañetesa pipe.

31 Iyavei amboura che rembiguai eta ìva pendar. Ahe evocoiyase güemimbi omoñehe pīratara opacatu che rembiporavo co ivi rupindar que amombrī rupi yuvirecoi vahe monuha ãgua” ehi.

32 “Peyembohera ìvira higuera recocuer sui: Co ìvira soqui ramose, yaicua cōimi ari sacu vahe yepota ãgua yandeu yepi.

33 Na ehi aveira pēu che ñehe rupi tupri mbahe pesepiase, sese peicuarā cōimi eté che yevi ãgua.

34 Supi eté yuvirecove vītera ava osepia vahe co mbahe opase yaviye.

35 Iva, ivi opara ocañi, che ñehengagüer rumo imboaviyesa rane itera.

36 “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37 “Inungar ava Noé recose yuvirecoi aracahe, ãgüe ehi tupri aveira che, Ava Riquehīr, yevi ãgua renonde.

38 Yipive amarusu renonde, ahese ava ocaru, oihu; guahīr, guayri avei omomendaño yuvireco. Noé arca pipe seiquese, ãgüe ehi vite yuvireco.

³⁹ Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo tõi amaroviapi imocañipa. ãgüe ahe aveira che, Ava Riquehir, ayeve aviyeteramo tõi.

⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara.

⁴¹ ãgüe ehi aveira ñuvirío cuña ohicho vahe upe: ñepe serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui.

⁴³ Iyavei peyapisaca tupri co rese: inungar acoi oi yar oicuase revo que hora pĩtu pipe imonda vahe yepota ãgua, ahese imahemohara sese güeta pipe seiqueẽhi ãgua viña.

⁴⁴ ãgüe peye aveira peyemoingatu che yevi ãgua rese. Esepia niha, che, Ava Riquehir, aporoesapiha tẽira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua ‘tembihu tomondo che rẽta pipendar upe che porocuaita rupi’ ohesave.

⁴⁶ Acoi omboaviyese ocuaita, ahese oviharetera güerecuar yevise.

⁴⁷ Supi eté niha serecuar oyocuirã opacatu ombahe rese hañeco ãgua.

⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya,

⁴⁹ omboetasa omboipi mara-mara tõi sereco iyavei oyemboya caguar tõi rese ipiri ocaru iyavei oihu tõi ãgua.

⁵⁰ Ipare rumo serecuar oyepotara imahemohaẽhiseve.

⁵¹ Ahese omombaraisu catura, ‘Tinupasa, ava seco tupri ai angahu tõi vahe nupasa nungar pipe’ ehira chupe. Ahese oyaseho tẽira, oyemoaitere-tere tõi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tũpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi ãgua yuvireco.

² Ipãhuve yuvirecove cinco ndipihañemoñetai vahe, ambuae cinco rumo ipihañemoñetai tupri vahe yuvireco.

³ Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri ãgua yuvireco;

⁴ evocoi ipihañemoñetai tupri vahe rumo viraso yandi siru pipe guataendi reseve yuvireco.

⁵ Acoi ndoyepota apihaise cuña mevi, ahese sopesi tõi yuvireco. Coiye opaño yuviroque yuvireco ichui.

⁶ Pĩtu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesẽ ipisi ãgua cute!’ ehi.

⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco.

⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tõi chíhi pe yandi oreu. Esepia, ogüe pota ité ore rataendi’ ehi tõi yuvireco.

⁹ ‘Aní, ndiyai chira revo oromondo vaherã pẽu. Iyacatu revo peso imboepisave serocua peyeupe nara’ ehi.

¹⁰ Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rãrosar.

¹¹ Ipare oyepotase ambuae cinco cuñatai yugüeru aipo ehi yuvireco oi yar upe: '¡Emboimi tēi oreu!' ehi tēi yuvinoha.

¹² 'Aní, ndopocuai vahe ité' ehiño chupe.

¹³ "Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevíra" ehi Jesús oreu.

Ñehesa guarepochi mondosea resendar

¹⁴ "Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembigui oguarepochi rãro āgua viña.

¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepepe upe seco etegüer rupi-rupi. Ipare voi oso cute.

¹⁶ Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coipe oipisi catu iri ambuae cinco.

¹⁷ Inungar avei ambuae oipisi vahe dos mil, ichui oipisi catu iri ambuae dos mil.

¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ "Ipare coipe oyeveise serecuar, ahese oñehe güembigui upe oguarepochi retacuer cua āgua.

²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: 'Ndo co acoi erembou vahe cinco mil cheu, ichui co ambuae cinco aipisi irimi ndeu' ehi.

²¹ 'Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi chupe.

²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi.

²³ 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi avei chupe.

²⁴ "Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremouha iyavei imbovepepírer tēi avei ereipisi ndeyeupe nara.

²⁵ Sese che siquiyesa pipe añomi ivivrive nde guarepochi. Ndo co nde mbahe' ehi chupe.

²⁶ 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui.

²⁷ Ereyapocatumira che guarepochi guarepochi apocatusave cuese rahe viña che yevise voi senose āgua cheu imboyevi catumi āgua viña' ehi.

²⁸ Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi.

²⁹ 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembiere-comi ichui.

³⁰ Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasāitere tēi oī ehira sereciar chupe” ehi Jesús oreu.

Jesús oura opacatu ava recocuer rese porandu āgua

³¹ “Che, Ava Riquehīr, ayevise, opacatu che Ru rembiguai i va pendar reseve che reco ivategüer pīpe, ahese aguapira che renda porañete vahesave ava recocuer rese porandu āgua.

³² Evocoyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui.

³³ Che evocoyase ovesa aipehara mbahe rese che pocosa coti, cavara mbahe rese che pocoēhisa coti.

³⁴ Ahese che mborereciar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborereciara pīpe; ahe acoi yipive ivi apo ramo suive imoingatupri pēu nara.

³⁵ Esepia, ndacheriepoise, pe evocoyase pembou mbahe che remihura; iyavei che huseise, pe evocoyase pembou taihu; che aguata tēise pe recua rupi vichico, pe avei oi pembou che que āgua.

³⁶ Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no’ ehi.

³⁷ Evocoyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu?’

³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarā, ore aipo evocoyase oromondo ndeu?’

³⁹ Iyavei, ¿mbahese vo aipo nde repiasa nembraheasise, anise que nde roquendasave, aheve aipo oroso nde repia yepi?’ ehira yuvireco cheu.

⁴⁰ Evocoyase che, mborereciar ivate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pāhu pendar upe viña, cheu rumo ēgüe peye’ ahera.

⁴¹ “Ahese aipo ahera cute che mbahe rese pocoēhisa cotindar upe: ‘Pesiri che sui. Esepia, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu carugar upe nara sereciar reseve.

⁴² Esepia, ndacheriepoise, pe evocoyase: Yamondomi icaru āgua, ndapeyei eté cheu; che huseise, ahese, Yamondomi toi hu, ndapeyei avei cheu;

⁴³ ambuae tecua pīpe aguata tēise vichico, ahese, Eique che rētave che piri, ndapeyei eté cheu. Ipanese che turucuarā, pe rumo ndapemboui cheu, chembaheasise vichico, iyavei che roquendasave, Yasomi tēi sepia, ndapeyei eté cheu’ ahera.

⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā nde no, nembraheasise, anise nde roquendasave, marase vo mbahe rese nande pītivisai?’ ehi tēira yuvireco cheu.

⁴⁵ ‘Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté’ ahera.

⁴⁶ Ahe ava yuvirasora Tūpa ñemoirosa apirēhi vahesave. Seco ivi vahe rumo teco ori opaēhisave yuvirasora” ehi Jesús oreu.

26

Jesús yamotarēhimbar omboguai yuca āgua yuvireco

¹ Ipare Jesús aipo ehi oreu:

² —Pe peicua ñuvirío ari tēi ipane vīte co Pascua pieta yepota āgua yan-deu. Ahese che, Ava Riquehix, imondopri aicora che atica āgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave.

⁴ Aheve oñemoñeta: ‘Yambopa ipisi yuca āgua’ ehi yuvireco oyeupe.

⁵ Ahe rumo:

—Ndiyai pieta pipe ité yaipisi ava rehii yemondi guasuēhi āgua yandeu —ehi.

Cuña oipiyere Jesús āca rese mbahe sñacuá vahe

⁶ Jesús tecua Betania ve secoi, Simón lepra vireco vahecuer rētave.

⁷ Aheve mesave chiniseve, cuña vireco vahe mbahe sñacuá vahe siru reseve viroyepota chupe. Ahe oipiyere Jesús āca rese.

⁸ Orosepiase rumo oroñemoiro aipo orohe oreyeupe:

—¡Mahera vo co omocañi tēi!

⁹ Omondo vahe ité tie co setá guarepochi rupi ava iparaisu vahe pñitivi āgua viña —orohe tēi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu.

¹¹ Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve.

¹² Esepia, co cuña oipiyere mbahe sñacuá vahe che rese che tī āgua renon-deve.

¹³ Supi eté aipo ahe pēu: co ñehesa pñirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas Iscariote oyemoingatu Jesús mondo āgua yamotarēhimbar povrive

¹⁴ Ipare ñepeí ore pāhu pendar, Judas Iscariote, oso, oñehe pahi eta rerecuar yuvirecoi vahe upe

¹⁵ aipo ehi:

—¿Mbovi rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe.

¹⁶ Ahesa reseve voi oseca Jesús mondo āgua yamotarēhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pñitu ramomise, opacatu oroguapi mesave Jesús pñiri ore caru āgua.

²¹ Ore carusave aipo ehi oreu:

—Supi eté aipo ahe pēu: ñepeí pe pāhu pendar che mondora che amotarēhisar upe —ehi.

²² —Che Yar, ¿che pñiha? —orohe-rohe tēi ñepeí-peí ore yacatu ore viharēhisa pipe chupe.

23 –Omondo vahe opo che caro pipe, ahe che mondora che amotarēhisar upe –ehi–.

24 Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña –ehi.

25 Ahese Judas imondosavi oporandu:

–Ore Mbohesar, ¿che tie? –ehi.

–Taa, ¡nde ité niha ēgüe erera! –ehi chupe.

26 Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

–Ndo co, pehu co che rete –ehi.

27 Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

–Peihu peyacatu co sui.

28 Esepia, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehi angaipa rese ñero āgua.

29 Ndaihu iri chira uva ricuer cheu arí oyepotase voi che Ru mborere-cuasave ahura pe rese ambuae uva ricuer ipiasu vahe –ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

30 Ore sapucaire, oroso ivitri Olivo ve.

31 Evocoyase Jesús aipo ehi oreu:

–Opara pemocañi che rese yeroyasa peyesui co pĩtu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi vahe.

32 Che cuerayevire rumo, aso voi etera pe renonera Galilea ve –ehi.

33 Pedro rumo,

–Yepe ambuae opacatu nande reroya iri chira yuvireco, che rumo ndayepepi chietera nde sui –ehi chupe.

34 –Che rumo supi eté aipo ahe ndeu: co pĩtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu –ehi Pedro upe.

35 Pedro rumo,

–Yepe amanora nde rupi viña, che rumo, “Ndaicuai vahe aipo mbia” ndahei chietera –ehi-ehi catuño ité chupe.

Aipo orohe pāve tupri tēi chupe.

Jesús oyerogui Getsemaní ve

36 Ipare Jesús rupi orosoño Getsemaní ve. Aheve aipo ehi oreu:

–Peguapi cohavē; che aso ranera peve catumi, ayeroqui –ehi.

37 Aheve viraso Pedro oyeupi iyavei ñuvirío Zebedeo rahir. Ahese oyandu oviharēhisa oico.

38 Evocoyase ahe aipo ehi chupe:

–Ndavihai eté. Esepia, che hã oyandu ité manosa. Pepita rane cohavē iyavei pemahemohara pe yeroqui pipe che rese –ehi.

39 Evocoyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

40 Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

–¡Ndapeñemosai eté vo pe ropesii upe che rāro āgua que ñepe hora che mondugüe āgua peye!

41 Pemahemoha, peyerogui mbahe tēi pipe pe viapiēhi āgua. Supi eté pequerēhi ité viña, pe retecuer tēi niha nipiratai pëu –ehi.

⁴² Ichui imoñuviriosa rupi oso iri oyerocuqi aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

⁴³ Ipare oyeveise, osesapiha iri iqueseve ou. Esepia, sopesi nomboyeroyai eté yuvireco.

⁴⁴ Evocoyase oseyapa iri oso oyerocuqi ãgua imombosapisa rupi. Aipo ehi tupriño avei oyerocuqi Vu upe.

⁴⁵ Ipare oyeveiri iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive.

⁴⁶ Pepũha, yaso. Esepia, cõimi eté che amotarẽhisar upe che mondo vaheã secõi —ehi.

Jesús oipisi yuvireco

⁴⁷ Jesús ñehe vitesese, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuita rupi oyapo yuvireco.

⁴⁸ Yipindar rumo imondosar Judas aipo ehi: “Asovaupitese, ahese picuara; ahe peipisira” ehi.

⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe secõi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco.

⁵³ ¿Ndereicuai vo aporanduse che Ru uve viña, ahe evocoyase cõritei voi omboura doce mil sui setá catu vahe güembiguai che repi ãgua viña?

⁵⁴ Ëgüe ehise rumo Tũpa Ñehengagüer icuachiapri ndayaviyei chietera viña, ahe co cõritei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tũparo pipe, ndapeyapoi eté co nungar cheu.

⁵⁶ Co rumo opacatu Ëgüe peye Tũpa ñehe mombehusar rembicuachiagüer mboaviye ãgua cute —ehi ava rehii upe.

Ahese voi opacatu oroñemosai, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rõtave yuvireco, ahe pahi rerecuar ivate catu vahe secõi. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no.

⁵⁸ Pedro rumo amombri rupive tẽi osaquicue moña oso. Ëgüe ehi oyepota pahi rerecuar ivate catu vahe rëta rocar ãchisave. Aheve oique ipipe, iyavei uguapi oĩ sundao pãhuve ‘¿mara ehi etera pãha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tẽi ava Jesús amotarẽhisave yuca uca ãgua yuvireco,

⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:
—¿Mahera vo nderemboyevii eté ñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,
—Che orocuai Tūpa supi eté vahe rer pipe emombehu oreu: ¿Poropĩsirosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

⁶⁵ Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté ñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe ñehe-ñehe tēisa cūritei.

⁶⁶ ¿Mara ehi aipo pe pihave? —ehi.
—Supi eté, oyavi mbahe. ¡Tomanóño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete,

⁶⁸ aipo ehi yuvireco chupe:
—Nde niha aipo ereico Tūpa remimbou Poropĩsirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:
—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoiyase,
¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe.
⁷⁵ Ahese Pedro oyemomahenduha Jesús oyeupe, ‘Acoi tacura ñehe renon-deve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarẽhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tẽi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeví ãgua aipo ehi:

⁴ —Che ayemboangaipa tiẽte vichico. Esepia, amondoño tẽi mbia seco catupri vahe pẽu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tũparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã repri tẽi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehõgüer tĩ ãgua’ oyapave yuvireco.

⁸ Sese cõritei co ivi upe, “Ava ruvi repri tẽi” ehi yuvireco yepi.

⁹ Ëgüe ehi co imboaviye ité Tũpa ñehe mombehugar Jeremías remimombegüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombegüer rupi eté evocoi mbia pisí ãgua.

¹⁰ Ipipe virocua ñaihu rese oporaviqui vahe ivi yuvireco. Cheu che Yar omombegu vahecuer rupi tupri ité oyapo yuvireco” ehi Tũpa ñehe mombehugar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyeví Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tẽi yuvireco. Nomboyeví eté rumo iñehe chupe oyeepi ãgua.

¹³ Evocoyase:

—¿Nderesendui vo aipo co opacatu ndeu ñehe-ñehe tẽisa? —ehi Pilato chupe.

¹⁴ Nomboyeví eté rumo que ñepeí angara ñehesa chupe viña. “¡Too, mara ehi rutei vo co!” ehi-ehi tẽi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepeí ava soquendapri renose ãgua Pascua pieta pipe ava rehí remimbotar rupi yepi.

¹⁶ Aheve oime soquendapri mbia icuapri vahe ité Barrabás serer vahe;

¹⁷ evocoyase ava rehí oñemonuha atise, Pilato oporandu chupe yuvireco:

—¿Uma peipota che amose ucara pẽu: Barrabás pĩha, anise Jesús “Poropisirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatẽhisa pipe sui imondopri secoise.

¹⁹ Pilato güendave chini vitesese, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he ãgua yuvireco.

²¹ Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

²² —¿Mbahe vo evocoyase che ayapora Jesús rese chupe acoi ava, “Poropisirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: “Ndaicatui mbahe moingatu sepi ãgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tumbo tupeicha nungar pipe imondo curusu rese yatica ãgua.

²⁷ Evocoyase mborerecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco.

²⁸ Ahese osequipa iturucuar ichui. Ipare omonde turucuar pira vahe yuvireco sese

²⁹ iyavei omonde ñaca rese yu piapri, omondo avei ñepeu tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco.

³¹ Ëgüe ehi yoyai catu-catu yuvireco. Ipare virocua-se turucuar pira vahe ichui, ahese omonde iturucuar ité yuvireco sese. Ichui viraso curusu rese yatica ãgua yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño tēi yuvireco.

³³ Oyepotase yuviraso Gólgota serer vahesave, ahe ‘ava ãcagüer’ oya aipo ehi chupe,

³⁴ aheve uva ricuer imboyesehapri mbahe pihaupiar rese omondo tēi yuvireco Jesús toihi. Osãha tēi, ndoihi potai rumo.

³⁵ Ipare oyatica curusu rese yuvireco. Ahese sundao iguayiño oyeupe iturucuar mboyaho-yaho ãgua rese.

³⁶ Ipare aheve oguapi yuvinoi sãro.

³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸ Ñuvirío imonda rai vahe yaticasa avei curusu rese supive yuvireco, ñepi mbahe rese ipocosa coti, ambuae evocoyase mbahe rese ipocoëhisa coti yuvireco.

³⁹ Acoi ava ñocuasar iñehe-ñehe tēi, oñeaca mbovava,

⁴⁰ aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipisiro ambuae, ahe ae rumo ndoicatu oñepisiro. Israel rerecuar guasu secoise, ¡togüeyi curusu sui cūritei, ahese voi seroyasara!

⁴³ Ahe oyeroya Tūpa rese, Tūpa evocoyase oipotase, toipisiro cūritei. Es-epia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pĩtu ivi rupi. Ëgüe ehi las tres rupi.

⁴⁶ Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya.

⁴⁹ Ambuae rumo aipo ehiño yuvireco:

—Ëgüe tehiño rane, ¿oura pĩha Elías ipisiro ãgua? —ehi yuvireco.

⁵⁰ Ahese Jesús sãse pĩrata iri, omano.

⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi oriri iyavei ita guasu-guasú oyeca.

⁵² Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco.

⁵³ Ëgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe ãgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipitivi yuvireco yepi.

⁵⁶ Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar.

⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi.

⁵⁹ José evocoyase vıraso sehögüer. İpare oimama tuprı turucuar secose vahe ndiquıhai vahe pıpe.

⁶⁰ Ichui omoingue ombahe tuvıpa ipıasu vahe, ita oyoho uca vahe pıpe. İpare osovapı ita guasu yapayere vahe pıpe oso.

⁶¹ Aheve María Magdalena ambuae María rese suvıpa rovai oguapı yuvınoi.

Jesús ruvıpa osãro sundao yuvıreco

⁶² Ahere ayihive mbıtuhusa arı pıpe, yuvıraso pahi eta rerecuar iyavei fariseo Pilato upe mbahe rese oporandu ãgua

⁶³ aipo ehi yuvıreco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevıra mbosapı arı pare omano vahe pãhu sui” ehi acoi cuese oicove vıtese —ehi yuvıreco—.

⁶⁴ Sese emondo sundao sehögüer ruvıpa rãro tuprı ãgua mbosapı arı rupi semimbohe ñomiẽhi ãgua pıtu pıpe yuvıreco. Avıyeteramo, “Ocuereyevı omano vahe pãhu sui” aipo ehi tuprı tẽi tiẽtera ava upe yuvıreco. Aipo ehise yuvıreco, yıpındar semıra tẽi vahe sui ivate catura serecosa —ehi yuvıreco.

⁶⁵ Pilato evocoyase aipo ehi chupe yuvıreco:

—Avıye —ehi—. Amondora sundao pẽu. Peraso, pemovıracua tuprı ité sãro ãgua —ehi.

⁶⁶ Evocoyase yuvıraso tehögüer ruvıpa rãro tuprı ãgua yuvıreco. Ahese omondo tehögüer rovapısa ita guasu rese mbahe imomısa cua ãgua yuvıreco. İpare oseya aheve sundao sãro ãgua yuvıreco cute.

28

Jesús ocuerayevı

¹ Cõhe ramomise, domingu pıpe, María Magdalena iyavei ambuae María yuvıraso tehögüer ruvıpa repıa yuvıreco.

² Avıyeteramo tẽi orırıı pıratá ivı Tũpa rembiguai ıva sui igüeyıse. Ęgüe ehi oyepota tehögüer ruvıpave ou, ahe vırocua itape guasu sovapısa ichui. İpare iharıve oguapı oı.

³ Ęgüe ehi sendı iteanga avıye acoi overa vahe. İturucuar evocoyase morochı eté.

⁴ Osepıase sundao, orırıı eteanga osıquıyepave yuvıreco ichui, opa oyuca pucu-pucu tẽi yuvıreco.

⁵ Tũpa rembiguai rumo aipo ehi voi eté cuña upe:

—Pesıquıyeı rene. Esepıa, che aıcua pe peseca Jesús yaticapırer.

⁶ Ndıpoi eté cohave. Esepıa, ahe ocuerayevı güemimombehu rupi eté. Tapesepıa ru supagüer —ehi.

İpare aipo ehi:

⁷ —Peso poyava voi, tapemombehu semimbohe eta upe: ‘Ocuereyevı omano vahe pãhu sui iyavei ahe rane osora pe renonera Galilea ve. Aheve pesepıara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

⁸ Evocoyase cuña yuvıraso poyava voi suvıpa sui, osıquıye pãhuve rumo ovıhaño yuvıreco; Ęgüe ehi yuvınoñá iteanga imombehu yugüeru oreu.

⁹ Ahese Jesús oyemboyecua cuña upe cute omboavırave. Ahe cuña evocoyase oyemboya sese oñenopıha ipıcuhaguã imboeteısave yuvıreco.

¹⁰ Evocoyase ahe aipo ehi chupe:

—Pesiquiyeyi rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso vitesese, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco.

¹² Evocoyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco,

¹³ aipo ehiño yuvireco chupe:

—Aipo peyera ava uve: “Oroque vitesese pĩtu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—.

¹⁴ Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūrítei judío Jesús cuerayevisa reroyaēhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoyase ëgüe orohe oroso semimbohe once oroico vahe Jesús remimombehu ivi Galilea pendar ivitrive.

¹⁷ Acoi orosepiase rumo Jesús, ahese oromboetei oroico, yepe moviro tēi ore pãhu pendar ndoviroya tupri vitei yuvireco viña.

¹⁸ Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—.

¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheã; peñapiramo avei che Ru rer pipe, che rer pipe, Espíritu Santo rer pipe avei no.

²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tūpa Rahir, recocuer resendar amombehu potami pëu.

² Yipiindar Tūpa aipo ehi imombehu oñehe mombehusar Isaías rembicuachia pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipirata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tūpa upe, ahese opoãpiramora Tūpa pëu ñero ãgua pe angaipa rese” ehi ava upe.

⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoiyase tucru, eiri caha pipendar avei.

⁷ Ahe aipo ehi oñehe ava upe oico: “Che raquicuei oura seco pirata catu vahe che sui, sese cheu ndiyai chira ayeaivi ipitaquisã yora ãgua.

⁸ Che supi eté opoãpiramo i pipe tēi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osē tecua Nazaret sui oso Galilea rupi. Aheve Juan oñapiramo iai Jordán pipe.

¹⁰ Osē ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar.

¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi.

¹³ Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tūpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico

¹⁵ aipo ehi: “Oyepota ari iyavei cõimi eté Tūpa mborerecuasa yandeu. Sese, pemboasi pe angaipa, peyevi Tūpa upe, iyavei peroya co ñehesa aviye vahe Tūpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvireco.

¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chñhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

²⁰ Ahe chupe avei: “Perio che rupi” ehi, evocoyase vu oseyá carite pipe ipitivisar reseve, yuviraso supi.

Mbia caruguar vireco vahe oyese

²¹ Oyepotase tecua Capernaum ve yuvireco mbítuhusa arí pipe, Jesús oique oporombohe tūparove.

²² Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pīratasa pipe, ndahei Moisés porocuita rese oporombohe vahe nungar.

²³ Aheve mbia ahe tecua pendar vireco vahe caruguar oyese, oñehe pīrata chupe aipo ehi:

²⁴ —¿Mahera vo ereyuño tēi cohava oreu, Jesús Nazaret pendar? ¿Ereyu vo ore mocañi água tēi? Che orocua ité, nde Tūpa suindar ndaseco marai vahe ereico —ehi chupe.

²⁵ Oñehe pīrata rumo caruguar upe aipo ehi: —¡Quiriri, esē co mbia sui! —ehi chupe.

²⁶ Evocoyase caruguar mbia rese secoi vahe omoehoha seiti ivive, sãse, osē oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pñha co? ¡Iporombohesa ipiasu vahe ité! ¡Co mbia vireco ité omborerecuasa! ¡Caruguar avei eté omboyeroya oyeupe ñehese! —ehi tēi ava yuvireco.

²⁸ Cūríteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rētave.

³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco.

³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pñtu ramosé opacatu imbaheasi vahe iyavei caruguar vireco vahe viraso yuvireco chupe imbogüera água.

³³ Opacatu ava ahe tecua pendar oñemonuha oquendipive yuvireco.

³⁴ Evocoyase setá ombogüera mbaherasi-rasi tēi vireco vahe, iyavei omboyepipi setá caruguar ava sui. Ndoipotai rumo caruguar ñehe. Esepia, ahe oicua ité evocoyase seco yuvireco.

Jesús Vu Tūpa Ñehengagüer omombehu judío tūparo rupi

³⁵ Ayihiteve Jesús oñarapuha oso ava porēhisave oyerogui água.

³⁶ Evocoyase Simón ondugüer reseve yuviraso seca.

³⁷ Osepiase,

—Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu água aheve; evocoi nungar apo água niha che ayu —ehi.

³⁹ Ëgüe ehi oguata opacatu Galilea ivi rupi, omombehu Vu Tüpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūritei! —ehi chupe.

⁴² Aipo ihe ramoseve, ocuera voi eté.

⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyevi ou tecua Capernaum ve, ahese opacatu oyandu ñepe oive secoise yuvireco.

² Cūriteimi voi eté setá ava oñemonuha yuvireco secosave. Sese ndipoi eté ava reique iri água oi pipe oquendipi rupi. Ahe rumo omombehuño ité Vu Ñehengagüer.

³ Aheseve irungatu mbia viroyepota ndoguatai vahe yuvireco chupe.

⁴ Ahe rumo ndiyai seroique água Jesús uve ava rehīsave yuvireco. Sese viroyeupi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco.

⁵ Ahe oicuaase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi:

⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tüpa ñehe nungar pipe tēi oñehe. Tüpaño ité niha oicatu ava angaipa upe oñeroi água” ehi.

⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese?

⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie?

¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondi yuvireco, omboetei Tüpa yuvireco aipo ehi:

—Yipisuive ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivi. Aheve oporombohe oyese ava rehi yemboyase.

¹⁴ Ichui uguata vitesse, osepi Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuasar iyavei ava yangaipa vahe pāhuve. Esepia, setá ava osaquicue moñaño ité yuvireco.

¹⁶ Evocoyase Jesús ocaruse ipāhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepi ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipāhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyevi ahe ava upe:

—¡Ndiyai eté ichohopri mendasave iyecuacu āgua imer oicove vitesse ipāhuve!

²⁰ Oimera rumo ari imer reraso āgua ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri āgua, ichorosa evocoyase tuvicha catu-catuño ité.

²² Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe oose mbahe pিরer cuacua vahe pipe, ombopuñora, uva ricuer evocoyase ocañipa tēira, iyavei mbahe pিরer ocañi tēi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepi mbituhusa ari pipe, Jesús uguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sãhi yuvireco.

²⁴ Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracadendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe.

²⁶ Pahi rerecuar ivate catu vahe Abiatar serer vahe recose, ahese David oique Tūpa rēta pipe pan imboeteipri Tūpa upendar reca ondugüer reseve yuvirohu āgua. Ahe chupe acoi ndipotasai ihu āgua yuvireco viña; judío

pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tūparove. Aheve oime mbia ipo co cotigüer nomii vahe.

² Aheve avei fariseo ‘¿ombogüerara pīha mbituhusa ari pīpe?’ oya omahengatu yuvireco sese ‘yaiñhengapo angahu’ oyapave tēi.

³ Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pīpe yepi: mbahe aviye vahe pīha, mbahe naporai vahe tie? ¿Yaipĩsiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco.

⁵ Evocoyase omahe ava oyese oyere tupri vahe rese vorieñhisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité.

⁶ Ahese fariseo opa yuvinose yuviraso oyemoingatu Herodes rupindar rese Jesús yuca ãgua yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi.

⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia ãgua.

⁹ Sese oyocuai güemimbohe vireco voi vaherã ñepe carite yuvireco ava omboti etepriēhi ãgua yuvireco.

¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco ãgua.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tūpa Rahir ereico! —ehi.

¹² Jesús rumo oñehe pĩrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe.

¹⁴ Ahe ipāhu pendar osenoi doce tupri güemimboherã ‘toguataño che rupi, tomombehu Tūpa Ñehengagüer opacatu ivi rupi’ oya. Ahe osero “apóstol”

¹⁵ ‘toipisi avei mborerecuasa carugar ava sui imboyepepi ãgua yuvireco’ oyapavé.

¹⁶ Evocoi doce yuvirecoi vahe, ahe: Simón (sererguã acoi omondo Pedro),

¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi);

¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer;

¹⁹ iyavei Judas Iscariote, ahe omondo vaherā Jesús yamotarēhisar upe.

“Jesús carugar pīratasa vireco oyese” ehi tēi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco.

²¹ Oyanduse imu secocuer yuvireco, oyugüeru seraso āgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipīratasa pipe tēi omboyepipi carugar ava sui” ehi yuvireco.

²³ Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña?”

²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira.

²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopi chiaveira yuvireco.

²⁶ Acoi carugar oyemboyahose ovava āgua oyeupe ae yuvireco, ndipocopi chiaveira yuvireco, ahe evocoyase secocuer ocañi tēi vaherā ité yuvireco.

²⁷ “Ndipoi eté niha ava oi que vahe que ava ipīrata etepi vahe rēta pipe imbahe rerocuapa āgua ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei.

²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apirēhi vaherā ité” ehi.

³⁰ Aipo ehi Jesús imboyevi ava upe. Esepia, “Carugar tēi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua.

³² Yivi yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pīha che si; ava pīha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta.

³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehi oyemboya yuvireco sese. Ipare oha carite imbehive tui vahe pipe. Aheve uguapi oi oñehe. Ava rumo opacatu ivi ātasa rupi opitaño yuvireco.

² Evocoyase ava mbohe āgua omboyoya tecocuer mbahe tisa rese aipo ehi:

³ “Pesendu co ñehesa: Ñepei mbia osē omaheti.

⁴ Ahe otiapi-apiise mbahe rāhi oso, moviro ovipi peri rupi. Vīrai yugüeruse rumo, opaño yuvirohu.

⁵ Iyavei moviro oiti ivi nayanai vahesave, ita pāhuve. Sese cūriteimi sori.

⁶ Ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rãhii oiti yu pãhuve; ahe yu rumo sorì poyava catu. Sese opaño oyopi. Evocoyase ahe miti ndihai eté.

⁸ Ambuae mbahe rãhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pãha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe.

¹¹ Ahe aipo ehi: “Pëu niha Tũpa oicua uca mbahe ndicuasai vahe omborecuasa resendar. Ndache reroya potai vahe upe rumo imboyoyasa mbahe ambuae mbahe rese yepi.

¹² Yepe osepia tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyevi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuaيمي vo aipo porombohesa? ¿Mara peyera ru opacatu ambuae che porombohesa cua tupri ãgua?

¹⁴ Evocoi mbahe rãhii oñoti vahe, Tũpa Ñehengagüer mombehugar nungar.

¹⁵ Amove ava recocuer inungar co mbahe rãhii seitipri peri rupi: osendu angahu Tũpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui.

¹⁶ Ambuae ava recocuer inungar mbahe rãhii seitipri ita pãhu rupi: osendu Tũpa Ñehengagüer, oipisi tupri angahu oyeupe nara vorivetesã pipe;

¹⁷ ndovirecoi rumo guapo oyese opirata ãgua. Evocoyase yuvirecoise mbahe-mbahe tẽi pipe Tũpa Ñehengagüer sui tẽi, cũriteimi seroyaẽhisave, ‘Apoira ichui’ ehi yuvireco.

¹⁸ Ambuae ava recocuer inungar mbahe rãhii ñotimbri yu pãhu rupi: osenduse ñehesa Tũpa suindar,

¹⁹ ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiête viña. Ipipe sui omocañi tẽi Tũpa Ñehengagüer. Ndoypo ucai avei mbahe eta aviye vahe evocoi nungar ava upe.

²⁰ Ambuae ava rumo osendu vahe Tũpa Ñehengagüer seroyasa pipe, oyapoño ité mbahe aviye vahe. Ahe inungar mbahe rãhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tẽi iyavei yande rupavrive nara tẽi no? Aní, tataendi imondosa ivate poroesape ãgua.

²² Ndipoi chietera mbahe ñomipri ndayasepiai vaheã curi.

²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pëu. Iharive amondo iri catura pëu.

²⁵ Vireco tupri vahe upe, imondosa catura. Acoi ndovireco tupri vahe sui, serocuasãhora” ehi.

Yembohesa mbahe rãhii rorisã resendar

²⁶ Aipo ehi iri avei Jesús: “Tũpa mborerecuasa co ivi pipe inungar que ava oñoti vahe mbahe rãhi.

²⁷ Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoyase mbahe rãhi sori poyava yuvireco. Itisar rumo ndoicuai mara ehi vori.

²⁸ Ivi rese niha oyesu miti: yipindar sori, ipare iha, ipare sãhi yuvinose sese.

²⁹ Evocoyase co mbia mbahe ha yaviyese, oipoho. Esepia, oyepota ari ipoho ãgua chupe” ehi.

Yembohesa mostaza rãhi suindar

³⁰ Iyavei aipo ehi: “¿Mara ehi vo Tũpa povri pendar co ivi pipe pẽu; mbahe rese pĩha iyacatu imboyoyasa icua ãgua?

³¹ Ahe oyoya tupri mostaza rãhi rese. Ahe tahimi catu opacatu ambuae mbahe rãhi sui.

³² Ñoti pare rumo, sori, ocuacuase tuvichá catu ambuae mbahe miti sui. Sãca tuvichá ité, sese vĩrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ëgüe ehi Jesús oporombohe Tũpa Ñhengagüer rese, omboyoya-yoya ñepi mbahe ambuae mbahe rese ava mbahecuagüer rupi.

³⁴ Nomombehui eté mbahe ambuae mbahe rese imboyoyaẽhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pĩtu ramomise, aipo ehi güemimbohe upe:

—Yaso ipa rovai —ehi.

³⁶ Evocoyase ava sui osiri yuvireco, yuviraso carite pipe. Ambuae carite pipendar avei yuviraso supi.

³⁷ Oyepotase rumo ivitu ai ipĩrata vahe, i ohitu vahe oha guasu-guasú carite pipe, omboapipo seni yuvireco chupe.

³⁸ Jesús rumo oyeatocoño, oque ou supita coti. Evocoyase omomahe voi yuvireco, aipo ehi chupe:

—¿Porombohesar! ¿Nandemahemohaimi rutei vo yande rese? ¿Opara moco yaso ipive! —ehi.

³⁹ Evocoyase aipo hese, omahe, oñehe pĩrata ivitu ai upe, ipa upe avei:

—¿Pepituhu! —ehi.

Aheseve voi opituhu tupri.

⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroa vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivitu ai, ipa avei omboyeroa —ehi tẽi yuvireco chupe.

5

Mbia Gerasa iguar vireco vahe caruguar oyese

¹ Jesús güemimbohe reseve oyepota ipa rovai Gerasa ivi rese yuviraso.

² Yuvinose pare carite pipe sui, ahese mbia caruguar rerecosar tuvipa pãhu rupi secoi vahe oso Jesús upe.

³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso.

⁴ Setá yupagüer rupi tẽi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroi vahe.

⁵ Ari, pĩtu rupi uguata, osapucai oico ivĩtri mahugüer rupi, tuvĩpa mahugüer rupi avei; ocua-ocua ita pĩpe oyese yepi.

⁶ Amombri Jesús repia ramoseve, oña senonde oñenopiha voi sovai,

⁷ oñehe pĩrata chupe:

—¡Eyepipi che sui Jesús, Tũpa seco ivate catu vahe Rahir! ¡Aporandu Tũpa rer pĩpe che mombaraisuẽhi ãgua eve! —ehi.

⁸ Aipo ehi, esepia, yipĩndar Jesús aipo ehi chupe:

—¡Carugar mbahe tẽi vahe, esẽ co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legiõn. Esepia, ore rehii eté —ehi.

¹⁰ Oporanduño chupe omondopaẽhi ãgua co ivi sui.

¹¹ Ichui namombriimi setá cuchi ocaru vahe ivĩtri rese yuvireco.

¹² Sese carugar oporandu yuvireco chupe:

—Ore mondopaño cuchi avĩterve eve —ehi yuvireco.

¹³ Evocoyase Jesús omondo carugar sã ãgua ahe mbia sui. Ahe opa yuviroique cuchi avĩterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pĩpe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave, caha pĩpe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco.

¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tẽi yuvireco.

¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco.

¹⁷ Evocoyase ava Jesús upe: “Esẽ cohava sui” ehi yuvireco.

¹⁸ Oha irise Jesús carite pĩpe, co mbia carugar rerecosarer oporandu chupe supi oso ãgua.

¹⁹ Ahe rumo,

—Esoño nde rõtave, nde mu pĩri. Aheve emombehupa Yar oporoaisusa pĩpe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tẽi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pĩpe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive.

²² Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai,

²³ aipo ehi chupe:

—Che rayri omano pota. Yaso, teremondomi tẽi nde po iharive imbogüera ãgua —ehi.

²⁴ Evocoyase oso supi. Ava rehii avei yuviraso supi.

²⁵ Ipãhuve avei oime cuña doce araviter rupi suvi yepiyere-yere vahe.

²⁶ Iparaisú iteanga, setá oporoposano vahe ndoicatu imbogüera yuvireco omomandavete catu iposanosa pĩpe yuvireco. Opa tupri tẽi omondo mbahe vireco vahe, ivate catuño rumo imbaherasisa chupe.

27 Co cuña osenduse Jesús rese ñehesa, oguata saquicuei oso ava rehi pãhuve, iturucuar rese opoco.

28 Aipo ehi oyeupe oico: “Iturucuar rese apocose rumo, acuerara” ehi.

29 Ahe ramosave voi ndasuvi yepiyere iri. Ipare oyandu güetecuer yemoin-gatu tupri, ocuerase ombaherasisa sui.

30 Jesús rumo oyandu osese opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

31 Semimbohe omboyeve yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

32 Ahe rumo omaheño vite ité ava oivindar rese ‘¿uma ité pĩha opoco che turucuar rese?’ oya.

33 Evocoyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

34 Evocoyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

35 Ñehe vitesave, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

36 Ahe rumo Jairo upe aipo ehi:

—Aní eresiquiye. Eyeroya catuño —ehi.

37 Ndoipotai rumo ambuae ava oyeupi icho ãgua; Pedro, Santiago, Juan güeraño oipota.

38 Oyepotase Jairo rētave, osepia ava yemondi oyaseho vahe.

39 Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

40 Ava rumo opucae-eteño seroyaēhisave yuvireco. Evocoyase omose opacatu ava. Ipare omoingue iyepi, ichi, oyeupindar reseve cuñatai rehögüersave.

41 Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

42 Ahe ramosave voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

43 Jesús rumo oyocuai imombehuēhi ãgua ambuae ava upe. Ipare,

—Pembocarar co cuñatai —ehi.

6

Jesús Nazaret ve secoi

1 Jesús osē co tecua sui oso güecuave; semimbohe avei yuviraso supi.

2 Oyepotase mbĩtuhusa ari, ahese oporombohe tũparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pĩha vñose co mbahecuasa co poromondiisa apo ãgua? —ehi yuvireco oyeupe—.

3 Co niha carpintero, María membri; Santiago, José, Judas iyavei Simón rĩquehir, seindri avei yuvirecove yande pãhuve —ehi.

Sese ndoviroyai yuvireco.

4 Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sęta pipendar ae rumo nomboetei yuvireco —ehi.

⁵ Ndoicatui mbahe oporomondi vahe apo āgua ava viroyaēhisa pipe, sese moviro tēi imbaheasi vahe harive omondo opo imbogüera āgua.

⁶ Ndoyembovihai ava viroyaēhisa rese.

Jesús oyocuai güemimbohe Tũpa mborerecuasa mombehu āgua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pıratasa carugar mboyepepi āgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe rıru, pan, guarepochi avei.

⁹ Iyavei pemondera pıtaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesęra pecua.

¹¹ Acoi ambuae tecua pendar ndape pısi potaise, ndosendu potaise avei pe ñehe yuvireco, peyepiñora ichui. Peipıpeteño aveira pe pııvi rātachigüer sui. Ēgüe pe hesa omboyecuar cañisa apıreñhi yuvireco chupe —ehi.

¹² Evocoyase semimbohe eta yuvıraso, “Pemboasi pe angaipa, peyevi Tũpa upe” ohe āgua yuvireco.

¹³ Iyavei setá omboyepi carugar ava sui, setá avei omondo mbahe quıra ava imbaheasi vahe rese imbogüera āgua yuvireco.

Juan Oporoāpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipırata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūrıteı ocuerayevi —ehi.

¹⁷ Herodías recocuer sui tēi niha Herodes Juan oñapıchi uca carena pipe soquenda. Esepia, co cuña Herodías yıpındar Felipe rembireco, co Felipe Herodes rıvrı viña. Herodes rumo omendaño vıvrı rembireco rese.

¹⁸ Juan aipo ehi Herodes upe: “Ndiyai eté nde ererecora nde rıvrı rem-bireco” ehi.

¹⁹ Herodías evocoyase oyuca pota Juan yamotarēhisave; ndoicatui rumo yuca.

²⁰ Esepia, Herodes osıquıyeño ichui oicuase co mbıa reco tuprı aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité.

²¹ Coıye rumo osupıti arı Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuaprı ivate catu yuvirecoı vahe rese avei.

²² Herodías membrı cuñataı oiıque carusave. Aheve opıvoı ava rovaque. Ipıvoısa avıye ai Herodes upe, ambuae ava ocaru vahe upe avei. Ichui aipo ehi cuñataı upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi.

²⁴ Ahe cuñatai osẽ oso, osi upe oporandu:

—¿Mbahe rese pĩha aporandura chupe? —ehi.

Ichĩ aipo ehi chupe:

—Eporandu Juan Oporoãpiramo vahe ãca rese —ehi chupe.

²⁵ Ipare cuñatai oña, oi que oso mborerecuar guapĩsave, aipo ehi chupe:

—Che aipota co pĩpeve voi eremboura Juan Oporoãpiramo vahe ãca poratu pĩpe cheu —ehi.

²⁶ Mborerecuar rumo ndoyembovihai tẽi. Esepia, ava ichohopri rovaque ite yipĩndar oñehe. Sese ndoicatu, “Anĩ” ohe ãgua.

²⁷ Evocoyase ipare voi mborerecuar oyocuai sundao Juan ãca reru ãgua.

²⁸ Sundao oso soquendasave, oyasia Juan ãca, seru poratu pĩpe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuvĩraso setecuer reca. Ipare vĩraso yuvireco tuvĩpave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús pĩri yuvireco. Ipare omombehu mbahe güembiapogüer, oporombohe agüer avei yuvireco chupe.

³¹ Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepĩndecuaño ite ava yugüeru chupe, sese ndiyai icaru ãgua yuvireco.

³² Evocoyase ahe güeraño apóstol reseve yuvĩraso carite pĩpe co coti ava sui.

³³ Setá rumo ava osepia ichose. Ichui opacatu ava tecua rupĩndar osaquĩcue moñaño; ahe ranengatu oyepotapa yuvireco ichui.

³⁴ Ogüeyise rumo carite pĩpe sui, osepia ava rehĩ, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese.

³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe.

³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pĩha oreu doscientos denario pan repirã ava mbocarũ ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirio pira —ehi yuvireco chupe.

³⁹ Evocoyase omboyaho-yaho ava imboguapi capihi hari rupi.

⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipisi poyandepo pan, ñuvirio pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehĩ upe imondo ãgua yuvireco. Pira ñuvirio vahe avei omboyaho-yaho opacatu ava upe.

⁴² Evocoyase opacatu ava ocaru vahe ihĩtaropa tēi yuvireco.

⁴³ Ipare semimbohe omboapipopa doce tupri iruova pan iyavei pira rumbirer yuvireco.

⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Pe ha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

⁴⁶ “Aviye” ohe pare ava upe, oyeupi oso ivitri rese oyeroku ãgua.

⁴⁷ Pĩtuse carite ipa mbiterve ité secoi. Jesús rumo ahe ae opitaño ivive.

⁴⁸ Ahese omahe güemimbohe rese iyeapicui catuẽhise. Esepia, ivitu ipĩrata vahe osovaĩchi yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vahe ã oso.

⁴⁹ Sepiase rumo ‘hãgüer tēi revo’ oya, sãse pucu-pucu i hari rupi iguatase semimbohe yuvireco.

⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquire eme che sui! —ehi güemimbohe upe.

⁵¹ Ahe ohase carite pipe, opituhu voi ivitu. Evocoyase, “¡Mara ehi rutei!” ehi tēi yuvireco.

⁵² Esepia, ndoicua vitei eté pan apo ati agüer yuvireco, yavai vite seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco.

⁵⁴ Yuvinozepa ramomiseve, ava oicua voi Jesús yuvireco.

⁵⁵ Ichui opacatu ahe ivi pipendar güeru imbaheasi vahe Jesús upe yuvireco.

⁵⁶ Oyepotase que tecuamive, anise tecua guasuve, caha pipe oi-omi rupi, ahe supi imbaheasi vahe ocar rupi vnozepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco.

² Ahese ahe osepia Jesús remimbohe ocaru ãgua iyepoiẽhise porocuita mboaviyeẽhise yuvireco, sese oñemoiro yuvireco chupe.

³ (Esepia, fariseo iyavei opacatu judío eta arachendar recocuer sui ndipoi-sai eté yuvireco, sese oyepoiẽhise ndocarui eté yuvireco yepi.

⁴ Mbahe rerocuasa sui oyevise, ndocarui oyepoiẽhi viteseve yuvireco. Iyavei tecocuer arachendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tupri sa.)

⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi arachendar recocuer ndoviroya iri yuvireco? Esepia ru, ahe ocaruño opo quihã reseve yuvireco —ehi.

⁶ Jesús rumo aipo ehi chupe:

—Pe Tũpa reroyasar angahu tēi peico vahe, supi tupri ité Tũpa ñehe mombehusar Isaías rembicuachia arachendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ëgüe peye pepoipa Tūpa porocuita sui ava recocuer aracahendar rupi tēi pe guata āgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita.

¹⁰ Esepia, Moisés aipo ehi: ‘Pemboyeroyara iyavei peipitivira pe ru, pe si avei no. Acoi ñehe mara vahe oyesupa upe ahe, Tomanño, ehi’ ehi aracahe.

¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye;

¹² pe evocoyase, aipo ehi vahe upe, ‘Ndiyai eté oyesupa pítivi āgua’ peye.

¹³ Co nungar apo pipe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehi upe.

—Peyapisaca, pesenducua tupri che ñehe:

¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui.

¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe.

¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté?

¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyēño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer.

²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa,

²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe.

²³ Co mbahe opacatu naporai vahe yuvinose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oique oi pipe, ndoyecua uca potai ava upe viña; ndoicatu rumo ava sui oñemi.

²⁵ Oime cuña vireco vahe omembri cuñatai, ahe vireco carugar oyese; ahe cuña oicuae Jesús recosa, oso voi sovai oñenopiha.

²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi.

²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyeve eso. Carugar osẽ nde membri sui —ehi chupe.

³⁰ Co cuña oyepotase güetave, osepia omembri supave; yipive rumo osẽ carugar ichui.

Jesús ombogüera mbia ndayapisai, ñehe ipiti-piti vahe

³¹ Jesús oyeve oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve.

³² Aheve mbia ndayapisai, ñehe ipiti-piti vahe rerasosar: “Emondomi tẽi nde po iharive” ehi yuvireco chupe.

³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese.

³⁴ Ipare omahe iva rese, ipituhe pucu aipo ehi: “¡Efata!” ehi (“timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei.

³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

³⁷ Evocoyase ava oyembovaha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, ñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura.

³ Amondopase sètave sieporẽhi reseve, viroviapi-api tiẽtera tieporẽhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porẽhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tũpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco.

⁷ Iyavei vireco moviro pirami yuvireco, sese avei, “Aviye ndeu” ehi iri Tũpa upe. Ichui güemimbohe upe, “Pemboyaho-yaho ava upe” ehi.

⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco.

⁹ Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe.

¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondisa rese yuvireco

¹¹ Ipare fariseo eta oyepota Jesús ñehe poepi-epi água yuvireco. Jesús recoña água, oporandu iva pendar poromondisa rese ‘¿Tũpa sui eté pĩha ou?’ oya yuvireco chupe.

¹² Sese Jesús ipituhe pucu, aipo ehi:

—¿Mahera vo co ava oipota iva pendar poromondiisa che recocuer cua ãgua yuvireco! Namboyecuai chietera rumo que ñepe evocoi nungar mbahe pëu —ehi.

¹³ Ipare oseypaña ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan viraso güemihura yuvireco.

¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruisse revo aipo ehi yandeu” ehi-ehi tēi oyeupe yuvireco.

¹⁷ Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ãgua pëu?

¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo

¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapiso vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapiso vahe yuvireco chupe ‘epocomi tēi sese’ oya yuvireco.

²³ Evocoyase oipopisi ndasesapiso vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi.

²⁴ Ndasesapiso vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri.

²⁶ Ichui Jesús omondo sètave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipo ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tūpa ñehe mombehusar mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsirosar ereico —ehi.

³⁰ Jesús rumo, “Pemombehui rene que ñepeí ava upe” ehi.

Jesús omombehu omano água

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaíta rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñhengata água.

³³ Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tupa upendar rese; ava nungar tēi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu água iyavei toguata tupri che rupi.

³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora.

³⁶ ¿Aviye ai angahu pīha ava upe opacatu mbahe ivi pipendar pisi água tēi, ahe ae tēi omocañi güecocuer yuvireco viña?

³⁷ ¿Mbovi pīha omondora ava güecocuer repirã viña?

³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Riquehir, égüe ahera acoi ayevisé che Ru reco pīrata porañetesa pipe, sembiguai rehii iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tupa mborerecuasa ipīratasa pipe yuvireco curi —ehi.

Jesús ñecuñaño agüer

² Seis ari pare, Jesús viraso Pedro, Santiago, Juan reseve ivitri ivate vahe save oyeupí. Aheve aviyeteramo tēi oñecuñaño güemimbohe rovai.

³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe.

⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinocha.

⁵ Ipare Pedro aipo ehi chupe:

—Ore mbohesar, ¡aviye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe água, aipo ehiño tēi.

⁷ Ahe ramoseve avei ogüeyi iva quiha iharive, oyopipa tupri yuvireco. Ahe ipāhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe.

⁸ Ahe ramoseve avei omahese oivi yuvireco, ndosepiai eté que ambuae ava, Jesús güeraño tupri ité osepia opāhuve yuvireco.

⁹ Ipape ogüeyi ivitri sui yuvireco, aipo ehi güemimbohe upe ou: “Ndape-mombehei chietera que ñepeí ava upe co mbahe pesepia vahe, pemombehura rumo acoi che, Ava Riquehír, acuerayevise voi” ehi.

¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pīha aipo, ‘Acuerayevira’ ehise?” ehi tēi yuvireco.

¹¹ Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu āgua. ¿Mahera arachendar icuachiapri pīpe aipo ehi: “Ava Riquehír oiporarara mbahe, yamotarēhimbri avei secoira” ehi?

¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. Ēgüe ehi opacatu yaviye arachendar icuachiapirer sese —ehi.

Jesús ombogüera chīhivahe carugar rerecosar

¹⁴ Ipape oyevi yuvireco güemimbohe recosave. Aheve osepiava ava rehii oyere guasuse yuvireco sese, iyavei oime aheve Moisés porocuita rese oporombohe vahe oiñehepoepi-epi semimbohe yuvireco.

¹⁵ Ichui Jesús repiase, opacatu yuvinoña yuviraso chupe “avirave” apo.

¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipāhu pendar omboyevi chupe:

—Porombohesar, co aru che rahír ndeu, vireco vahe carugar oyese, nomoñhengatu ucai vahe yepi.

¹⁸ Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūritei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pāhuve che ñemosasa pīpe? Peru evocoi chīhivahe cheu —ehi.

²⁰ Evocoyase ogüeru yuvireco chupe. Osepiase carugar Jesús, oiti uca iri chīhivahe ivive. Omboapayere-yere iyavei sendiriyui guasu-guasú.

²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichīhivahemi suive ité.

²² Amove co carugar oiti uca tatave, ive avei yuca pota uca āgua yepi. Sese ereicatuse, ore pītiviñomi tēi catu eve ore paraísuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pītivi ru eve nde reroya catu āgua! —ehi pīrata chupe.

²⁵ Osepiase Jesús ava rehii, oyemboyase sese, oñehe pīrata carugar upe aipo ehi:

—Carugar noñehei vahe, ndayapisai vahe, che orocuai, epoi co chīhivahe sui, ereique iri eme secocuer rese —ehi.

²⁶ Carugar sāse pucu chīhivahe yuca tupri oso. “Omano ité co chīhivahe” ehi ambuae ava yuvireco.

27 Jesús rumo oipopisi imopuha; evocoyase chihivahe opūha tupri voi eté.

28 Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pīha ndoromose catui eté carugar ichui? —ehi yuvireco.

29 Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano āgua

30 Ichui yuvinosepase, yuviraso ivi Galilea rupi. Jesús rumo ndoyemboye-cua uca potai eté que ambuae ava upe.

31 Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarēhimbar povrive, che yuca aveira yuvireco, mbosapi ari rupi rumo acuerayevira —ehi.

32 Semimbohe rumo ndosenducuai eté oyeupe ñehesa yuvireco iyavei osiquiye chupe porandu āgua yuvireco yepi.

¿Ava vo seco ivate catu vahe?

33 Ipare oyepota tecua Capernaum ve yuvireco. Yuviroique se oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

34 Ahe rumo noñehi tupri yuvireco chupe. Esepia, peri rupi, “¿Ava pīha ivate catu vahe?” ehi asi-asi oyeupe yuvireco.

35 Evocoyase oguapisave, “Periopa” ehi güemimbohe upe, aipo ehi avei:

—Oimese pe pāhu pendar oyemboivate ai vahe, ahe rumo seco ivi coti catura opacatu sui ava eta pītivii āgua —ehi.

36 Ipare oipisi chihivahe güemimbohe pāhuve senoha aipo ehi:

37 —Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarēhimbar, ahe yande mboyoyasar secoi

38 Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe carugar. Ahe rumo ndoguatai cūritei ore rupi; ore ité ndoroipotai chupe —ehi.

39 Jesús rumo,

—Aní ēgüe peye —ehi—. Esepia, ndipoi eté que ambuae oyapo vahe poromondisa che rer pipe, oicatu vaheñe raí che rese.

40 Sese ndayande amotarēhi vahe, ahe yande mboyoyasar secoi.

41 Acoi que omondo vahe i vaso pipe che rupi pe recosa pipe pēu, evocoi nungar oipisi itera porerecosa oyeupe nara —ehi.

Yaicua catura mbahe tēi apoēhi āgua

42 “Acoi que ava omboangaipa uca vahe co chihivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo āgua.

43 Sese pe po pe mboangaipa uca vahe peyasia ité peyesui. Esepia, aviye catu peiquera tecove apirēhisave ñepepe po rese, peso rāgüer sui que ñuvirío pe po rese tata guasu apirēhisave.

44 Aheve acoi uru nomanoi vahe, tata ndogüei vahe avei.

45 Pe pi pe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirío pe pi rese peique rāgüer sui tata guasu ndopai vahesave.

46 Aheve acoi uru nomanoi vahe, tata ndogüei vahe avei.

⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepepe pe resa rese Tũpa mborerecuasave que ñuvirío pe resa rese tata guasu apirẽhisave pe reique rãgüer sui.

⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe.

⁵⁰ Sese yucrí aviye ai eté. Nasehe irise rumo, ndayaicatui chira imoehe iri ãgua. Peico catu yucrí nungar mbahe tuprí pipe peyeupe nara” ehi.

10

Jesús oporombohe mendasa sui poiẽhi ãgua

¹ Ipare Jesús osẽ tecua Capernaum sui, oso Judea ivi rupi iai Jordán rovai ari sãsa coti. Aheve ava rehi oñemonuha iri yuvireco sese. Iyavei ombohe iri ava güecocuer rupi tuprí.

² Evocoyase fariseo oyemboya seco rãha ãgua tẽi yuvireco sese, “¿Aviye pĩha cuimbahe omenda vahe opoi güembireco sui?” ehi yuvireco chupe.

³ Ahe rumo omboyeví chupe:

—¿Mara ehi vo acoi Moisés porocuita pipe? —ehi.

⁴ Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi ãgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaẽhisa pipe sui pẽu.

⁶ Yipisuive ité niha, ‘Tũpa oyapo opacatu mbahe, oyapo avei cuimbahe, cuña reseve.

⁷ Sese niha cuimbahe omendase, oyepepĩra oyesupa sui güembireco rese ité yuvirecoi ãgua.

⁸ Evocoyase ñuvirío yuvirecoira ñepepe ava nungar.’ Sese ndahe iri ñuvirío, ñepepe nungar ité yuvirecoira.

⁹ Evocoyase ava Tũpa omomenda vahe oyese, ndiyai ava tẽi omboyepipi yuvireco oyesui —ehi.

¹⁰ Oive yuvirecoi vitesese, semimbohe oporandu iri co mbahe rese yuvireco chupe.

¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tẽi vahe güembireco sui.

¹² Acoi cuña opoise omer sui omendase ambuae cuimbahe rese, ahe oyemboaguasa tẽi vahe avei —ehi güemimbohe upe.

Jesús osovasa chĩhivahe

¹³ Ipare ogüeru chĩhivahe Jesús upe yuvireco sese ipoco ãgua. Semimbohe rumo, “¿Mahera vo peruño tẽi chĩhivahe?” ehi opĩha vĩracuasa pipe serusar upe yuvireco.

¹⁴ Evocoyase Jesús osepiase, ndasoriĩ güemimbohe upe aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru Tũpa mborerecuasave.

¹⁵ Supi eté, acoi ndoipisii vahe che Ru Tũpa mborerecuasa chĩhivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisí, omondo opo iharive osovasa.

Ñepepe mbia chĩhivahe imbahe eta vahe oñehe Jesús upe

¹⁷ Oguata vitesese Jesús yuvireco, aheseve mbia chĩhivahe oña oso sovai, oñenopĩha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa secói.

¹⁹ Ereicua niha Tūpa porocuita: ‘Ndereporoyucái chira, nandeaguasái chira, nandemondái chira, nanderemirai chira ambuae ava rese, ndereporombopai chira, eremboyeroyara nde ru, nde sí avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

²¹ Evocoyase omahe saísusave sese, aipo ehi chupe:

—Ñepeí mbahe rumo ipane vite ndeu: eso, emondopa rane nde mbahe; ahe seprí evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secói.

²³ Evocoyase omahe oivindar güemimbohe rese, aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique āgua ombahe eta rese tēi ipihañemoñeta vahe upe!

²⁵ Yavai rai camello upe yucuar rupi seique āgua, ava imbahe eta vahe upe rumo yavai catu che Ru mborerecuasave seique āgua —ehi.

²⁶ Aipo nungar renduse oyepihamondi guasu yuvireco. Oporandu-randu tēi oyeupe yuvireco: “¿Ava angahu pīha oñepisirora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo āgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secói —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata āgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi,

³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi.

³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano āgua

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime āgua chupe aipo ehi:

³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapī arī rupī rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaherã pēu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepei nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaherã, inungar-ra que igua iro vahe aihu vaherã viña? Iyavei, ¿peicatura pīha che āpiramosa aipisi vaherã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vaherã nungar.

⁴⁰ Co rumo ndiyai cheu che piri pe guapī āgua, che mbahe rese pocosa coti, ambuae che mbahe rese pocoēhisa coti. Che Ru Tūpa omoingatu güembiporavo upe nara oguapī vaherã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco.

⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoapirasá iteanga omborerecuasa pipe yepi.

⁴³ Pe rumo ēgüe ndapeyei chira pe yeereco. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

⁴⁴ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

⁴⁵ Aherã niha che, Ava Riquehir, ayu ndahei ava che rese ihañeco āgua; che rumo ayu ava rese che hañeco āgua, iyavei amondo vaherã che recocuer manosave ava eta repirã Carugar povri sui senose āgua —ehi.

Jesús ombogüera Bartimeo sesapisoēhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoi vahe Bartimeo serer vahe, Timoteo rahir, oguapī oī.

⁴⁷ Osenduse, “Jesús Nazaret pendar” hesa, osapucái pīrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pīrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epūha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opūha yesapiha oso chupe.

⁵¹ Evocoyase oporandu ndasesapısoi vahe upe:

—¿Mbahe vo ereipota ayapo vaherã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbıa upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapısoi vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirıvise tecua Jerusalén yuvıraso, serovicave oime ñuvırío tecuami: Betfagé, Betania avei ivıtrı Olivo ipıimi. Aheve Jesús omondo ñuvırío güemimbohe,

² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapıchimbri imoha, ava ndoyeupi vitei vahe yuvıreco sese, ahe peyorañora seru.

³ Acoi que ava: “¿Mahera vo ěgüe peye?” ehise pẽu, “Ore Yar oiporu pota, ipare niha omboyevı voiñora” peyera chupe —ehi.

⁴ Evocoyase ahe yuvıraso peri rupi. Aheve guaricu ñapıchimbri osepiara imoha yuvıreco oquendıve. Ichui oyoraño seru yuvıreco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvıreco chupe.

⁶ Ahe rumo Jesús ombohesa rupi tupri ité omboyevı yuvıreco chupe. Evocoyase, “Tovırasoño” ehi yuvıreco chupe.

⁷ Ipare vıraso guaricu Jesús upe, iyavei oturucuar omondo iharıve yuvıreco. Ahese Jesús oyeupi iharıve.

⁸ Setá ava oipıpira oturucuar peri rupi, ambuae ava evocoyase oyasıa pindo omondo peri rupi saperã yuvıreco.

⁹ Ava senonendar, saquıcuerindar avei,

—ıImboeteipri, sovasapri tasecoi ou vahe yande Yar rer pipe! —ehi pırata yuvıreco chupe—.

¹⁰ ıSovasapri yande ramoi David mborerecuasa tasecoi ou vahe oico! ııvave imboeteipri tasecoi! —ehi yuvıreco chupe.

¹¹ Ęgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepiara. Ipare yuvıraso Betania ve caharuse ité doce güemimbohe rese.

Jesús vıreco megua higuera ndıhai vahe

¹² Ahere ayıhive, yuvınosese Jesús tecua Betania sui, ndasıepoi oico.

¹³ Osepiase amombri ivıra higuera so atı vahe, oso chupe ‘¿ıha pıha?’ oyapave. Ahe rumo osepiara so pãve tẽi sese. Esepia, ahe ivıra upe ndosupıti vitei ıha água.

¹⁴ Evocoyase aipo ehi ahe ivıra upe:

—ıCo pipe suive ndipo iri chira ava nde ha yuvırohu vaherã! —ehi.

Semimbohe osendu ınehe yuvıreco.

Jesús omombopa ava mbahe mboepısar tũparo pipe sui

¹⁵ Ipare oyepota Jerusalén ve yuvıreco. Aheve Jesús oiquese judıo tũparo guasu pipe, omboıpi ava mbahe mondosar, mbahe rerocuar mombopa

tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo.

¹⁶ Ndoipotai eté que ambuae mbahe seroiquepirã tũparo pipe.

¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rēta yeruresa rētarã opacatu ava ivi pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pīha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovhai iporombohesa rese yuvireco.

¹⁹ Pĩtu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco.

²¹ Evocoyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tũpa rese —ehi—.

²³ Supi eté aipo ahe pēu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe.

²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroya itera mbahe oime vahe rã rese pēu, ahese peipisi itera.

²⁵ Acoi peyeroquise, yipindar peñero rane que pe amotarēhimbar upe, ahese ãgüe ehi aveira pe Ru iva pendar iñero pe angaipa rese pēu.

²⁶ ãgüe ndapeyeise, pe Ru iva pendar avei niñeroi chira pe angaipa rese pēu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese.

²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

²⁹⁻³⁰ Evocoyase omboyevi chupe:

—Che avei aporandura mbahe rese pēu: ¿Ava vo Juan ombou ava ãpiramo ãgua; Tũpa pīha, ava tēi tie? Pemboyevise cheu, ahese che avei amombehura pēu ava porocuita rupi eté pīha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu.

³² ‘Ava tēi remimbou’ ndayahei chiaveira chupe” ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi.

³³ Evocoyase omboyevi chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

12

Ava mbahe tēi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oi ivate vahe opacatu mbahe moha ãgua. Ipare oseya oivi ava oporaviqui vahe upe iporu ãgua. Ichui osē, oso amombri vahesa rupi.

² Oyepotase ari uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña.

³ Ahe rumo oipisiño, inupa-nupa imboyevi tupri tēi yuvireco.

⁴ Evocoyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tēiño avei yuvireco chupe.

⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepepe opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña.

⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco.

⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

¹¹ Ëgüe ehi niha yande Yar yapo.

¡Mara ehi rutei revo!’ ehi icuachiapri pipe” ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecoãha iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe.

¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tũpa remimbotar apo ãgua rese. ¿Aviyera pãha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihañhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoyase ñepepe guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tũpa upendar mbahe evocoyase pemondora Tũpa upe —ehi.

Evocoiyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseyá güembicuachiagüer yandeu aipo ehi: “Que cuimbahe omenda vahe omanose guahiêhiseve, tivri evocoiyase omen-dara sembirecocuer rese ahe viquehir omano vahecuer upe nara tahira oico.”

²⁰ Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahi eté rumo.

²¹ Ipare tivri omenda viquehir rembirecocuer rese. Ahe rumo omanoño, ndatahi avei rumo. Êgüe ehi tupri avei tivri imombosapisa.

²² Êgüe ehi co siete tupri omenda ahe cuña rese, ndatahi eté rumo yuvireco. Coiye rumo cuña omano avei no.

²³ Evocoiyase opase ocuerayevi yuvireco, ¿uma rembireco itera pïha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoiyase Jesús omboyevi chupe:

—Pe pihañemoñeta pipe peyavi. Esepia, ndapeicuai eté Tüpa ñehe icuachi-apri aracahendar, ndapeicuai avei Tüpa pïratasa.

²⁵ Supi eté omano vahe ocuerayevise, chupe ndipo iri chira mendasa. Ahe rumo Tüpa rembiguai iva pendar nungar yuvirecoira ivave.

²⁶ Co cuerayevisa resendar rumo amombehura pëu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tüpa aipo ehise chupe: ‘Che Abraham, Isaac, iyavei Jacob Tüpa aico’ ehi vahe.

²⁷ ¡Tüpa ndahei omano vahecuer Tüpa! ¡Ahe rumo oicove vahe Tüpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepe Moisés porocuita rese oporombohe vahe osendu iñehe pïratase oyeupe yuvireco, oicua avei Jesús omboyevi tuprise iñehe yuvireco chupe, evocoiyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tüpa aheño ité ñepe yande Yar secoi.

³⁰ Eresaisura nde Yar Tüpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pïratasa pipe’ ehi.

³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoiyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepe Tüpa iyavei ndipoi eté ambuae.

³³ Iyavei yasaisura Tüpa opacatu yande pihá pipe, opacatu yande yapisacasa pipe, opacatu yande pïratasa pipe, iyavei yasaisura ava yande yeaisu nungar. Ahe ité aviye catu mbahe seropovêhepri sui iyavei opacatu porerecosa sapri tēi sui —ehi.

³⁴ Evocoiyase Jesús icuase co ava pihañemoñeta tuprisa, aipo ehi chupe:

—Namombriimi ereico Tüpa mborerecuasa sui —ehi.

Ipare ndipo iri oyemonguerēhi vahe oporandu vaherã mbahe rese yuvireco chupe.

¿Ava suindar pñha Poropñisrosar?

³⁵ Jesús oporombohese tũparo pipe aipo ehi:

—¿Mahera ru Moisés porocuita rese oporombohe vahe: “Poropñisrosar David suindar ité” ehi yuvireco?

³⁶ Esepia, David ité aipo ehi Espiritu Santo pñratasa pipe:
‘Yar aipo ehi che Yar upe:

Eguapñ che acato cotñ, acoi che amondose voi eté nde amotarẽhimbar nde
povrive yuvireco’

ehi David aracahe.

³⁷ ¿Mahera ru, “Poropñisrosar David suindar secoira” peye, David teieté, “Che Yar” ehise chupe? —ehi.

Ava rehñ querẽhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepñ, iyavei oipota oyeupe ‘avirave’ apo ãgua ocar rupñ omboeteisa pipe yuvireco.

³⁹ Oseca avei tenda porañete catu vahe güenara otũparo pipe yuvireco yepñ, iyavei carusave tenda aviye catu vahesave oguapñ yuvireco yepñ no.

⁴⁰ Iyavei cuña imer mano vahecuer rẽta virocua-rocua tẽi ichui. Oarondaguã tẽi avei oyeroquñ pucu-pucu yuvireco. Ahe rumo oipñsira Tũpa ñemoirosa ipñrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeñ arñ Jesús oguapñ oñ porerecosa rñru rovai ava repñ ãgua mara ehi oporerecosa imondo ipñpe yuvireco. Aheve setá mbahe yar omondoño ité guarepochñ yuvireco.

⁴² Ahe pipeve oyepota cuña imer mano vahecuer iparaisu vahe. Ahe avei omondo ñuvñriomñ guarepochñ oporerecosa ipñpe.

⁴³ Evocoyase Jesús oñehe güemimbohe upe aipo ehi:

—Supñ eté che aipo ahe pẽu: co cuña imer mano vahecuer iparaisu vahe setá catu guarepochñ oporerecosa omondo ambuae ava eta sui co guarepochñ rñru pipe.

⁴⁴ Ambuae ava eta rumo oguarepochñ rumbñrermñ tẽi omondo oporereco ãgua yuvireco; co cuña rumo oparaisusa pipe opa ité omondo oguarepochñ —ehi güemimbohe upe.

13*“Imondurusara tũparo guasu” ehi Jesús*

¹ Jesús osẽse tũparo guasu pipe sui, ahese ñepeñ semimbohe aipo ehi chupe:
—Ore mbohesar, jeseñia oñ ita imopuhapñ, icatupñ ai! —ehi.

² Jesús rumo omboyevñ chupe:

—¿Pesepñ co oñ tuvichá vahe ité? Ndipoi chietera rumo que ñepeñ ita oyeha vñte vahe; opacatu ité imondurusara curi —ehi.

Caññ renonde mbahe oime vaherã

³ Evocoyase Jesús yuvñraso ivñtrñ Olivo ve, ahe ivñtrñ tũparo guasu rovai tupñ. Aheve Jesús oguapñise oñ, Pedro, Santiago, Juan iyavei Andrés oporandu co cotñmi mbahe rese yuvireco chupe:

⁴ “¿Mbahese vo aipo mbahe yavñyera? ¿Mbahe poromondiisa rese rane vo icuasara?” ehi.

⁵ Jesús rumo omboyevñ chupe: “Peicua catu, peyembopa ucai rene ambuae ava upe.

⁶ Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvireco.

⁷ “Pesenduse rumo ñehesa vavasa resendar cohave, iyavei que rupi, ndapeyembosiquiyei chietera. Esepia niha, ěgüe ehi rane itera; ndehi vitei chira rumo ari cañi.

⁸ Esepia, ñepei ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catu tẽi tecua rupi, tiavor avei. Co rumo omboipi ramomira mbahe tẽi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. Ěgüe peyera peñehe che recocuer rese chupe.

¹⁰ Cañi renonde rumo co ñehesa pĩsirosa resendar opacatu rane ité ava upe icua ucasara ivi rupi.

¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecua Tũpa pe ñehe āgua pẽu. Esepia, ndahei chira peyesui tẽi peñehe, Espĩritu Santo ité oñehera.

¹² Ipare rumo ava omondoñora vivri yamotarẽhisar upe ‘toyuca yuvireco’ oya. Ěgüe ehi aveira ava guahir upe; tahir avei oyamotarẽhiñora oyesupa yuca uca āgua yuvireco che recocuer rese.

¹³ Opacatu avei ava ndape ambotai chira che recocuer sui tẽi yuvireco. Acoi ava oyemoviracua vaheño rumo ari ipa vahe rupi, ahe ipĩsipropi yuvirecoira.

¹⁴ “Tũparo guasu maranehi pipe pesepiase mbahe-mbahe tẽi aposa —acoi oyeroku vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco.

¹⁵ Acoi güeta harive secoi vahe, ahe ari toi que iri eme güetave mbahe renose āgua.

¹⁶ Acoi que rupi tẽi secoi vahe, toyevi eme avei güetave oyeaosa renose āgua.

¹⁷ ¡Iparaisu itera cuña ipuruha vahe ahe ari pipe, imembi pĩtani vahe avei!

¹⁸ Peporandu Tũpa upe, toime eme co nungar mbahe sõhisa vahe pipe pẽu.

¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar.

²⁰ Iyavei yande Yar nomombituhise ari naporai vahe, ndipoi chietera oñepihiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pẽu, aní chira peroya aipo ehi vahe.

²² Esepia, yugüerura ava, ‘Che Poropĩsirosar aico’ ehi tẽi vahe, iyavei, ‘Che amombehu vahe Tũpa Ñehengagüer’ ehi angahu tẽi vahe, iyavei oyapora mbahe ava ndoyapoi vahe poromondiisa güeco pĩratasa mboyecua āgua yuvireco. Aviyeteramo ombopa aveira ava Tũpa reroyasar.

²³ ¡Peicua catura! opa aipo co senondeve amombehu pẽu” ehi.

Mara ehira Tũpa Rahir oyevise

²⁴ “Ahe ari pipe rumo co mbahe-mbahe tẽi pare ndoyecua iri chira ari, yasi avei ndosesape iri chira,

²⁵ yasitata avei opara ovipi iva sui, iyavei iva resendar mbahe oririira yuvireco.

²⁶ Ahese che, Ava Riquehir, iva quiha rese ayecua itera vitu che pĩratasa pipe che rendigüer porañetesa pipe avei.

27 Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

28 “Peyembohera ivira higuera recocuer sui: co ivira soqui ramosé, yaicua cõimi ari sacu vahe yepota água yandeu yepi.

29 Na ehi aveira niha pëu che ñehe rupi tupri mbahe pesepiase. Sese peicuara che, Ava Riquehir, cõimi eté che yevi água.

30 Supi eté yuvirecove vitera ava osepia vahe, co mbahe opase yaviye.

31 Iva, ivi opara ocañi; che ñehengagüer rumo imboaviyesa rane itera.

32 “Ndipoi eté rumo ava oicua vahe ari iyavei hora che yevi água yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

33 “Sese niha pemahemohara yepi, che rãrora peye. Esepia niha, ndicuasai che yevi água.

34 Inungar que mbia amombri oso pota água renonde, güembiguai oseyapa güeta rãro água, omondo avei ñepeipei upe iporaviqui água, iyavei omondo güeta roquendipi rãro água.

35 Pe evocoyase pemahemohara. Esepia, ndapeicuai marase che oi yar ajevira pëu, aviyeteramo pïtu ramosé, pïtu mbïter, tacura ñehese, anise añihivei.

36 Ndaipotai pemahemohaẽhiseve tẽi ajevira.

37 Che aipo ahe pëu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca água rese yuvireco

1 Ipare ñuvirío ari judío Pascua pieta água ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca água?” ehi yuvireco.

2 Ambuae rumo aipo ehi yuvireco:

—Ndiyai pieta pipe ité yaipisi ava rehi yemondiiẽhi água yandeu —ehi.

Cuña Jesús rese mbahe sãcua vahe oipiyere

3 Ahese Jesús secoi Betania ve Simón lepra vireco vahecuer rêtave. Aheve mesave chiniseve, cuña güeru mbahe sãcua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese.

4 Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe sãcua vahe?

5 Omondo vahe ité tie co tresciento ari rupindar mboraviqui reprimi rupi ava iparaisu vahe pïtivïi água viña —ehi yuvireco.

Omañeco tẽi avei ahe cuña yuvireco.

6 Jesús rumo aipo ehi ahe ava upe:

—Teheni, egüe tehiño, ¿mahera vo pemañeco tẽi? Co mbahe oyapo vahe rumo cheu aviye ité.

7 Ava iparaisu vahe niha yuvirecoiño itera pe pãhuve, iyavei peyapoño itera mbahe aviye vahe peyapo potase chupe; che rumo egüe ndahe viteñoi chira vichico pe pãhuve.

8 Iyavei co cuña oyapo mbahe ocatugüer rupi; opa voi omoiacua che rete che manoẽhi vitesese.

⁹ Supi eté aipo ahe pëu: ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarẽhimbar upe

¹⁰ Evocoyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua.

¹¹ Senduse, oyembovĩharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹² Yipindar arĩ pan ndayapepoi vahe husa pĩpe, ahese avei ovesa Pascua resendar yucapri seropovẽhesa yepi, ahe arĩ pĩpe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pĩpe i. Supi pesora,

¹⁴ seiquestave aipo peyera sêta vahe upe: ‘Ore mbohesar oporandu: ¿Uma oi pĩpe vo Pascua pieta resendar orohura che remimbohe reseve? ehi’ peyera.

¹⁵ Evocoyase ahe omboyecuarã oi guasu ivatendar imoingatupri pëu. Aheve pemoingatu mbahe yahu vaherã —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepiã mbahe yuvireco. Ichui omoingatu carusa Pascua pieta resendar yuvireco.

¹⁷ Pĩtu ramomise, Jesús doce güemimbohe rese aheve oyepota yuviraso.

¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pëu: ñepeĩ pe pãhu pendar yande pĩri ocaru vahe che mondora che amotarẽhimbar upe —ehi.

¹⁹ Evocoyase semimbohe ndoyembovĩhai tẽi yuvireco, iyavei oporandurandu tẽi ñepeĩ-peĩ chupe yuvireco:

—¿Che pĩha? —ehi yuvireco.

²⁰ Omboyevĩ rumo güemimbohe upe:

—Ñepeĩ eté pe pãhu pendar ahe co omoaquĩ pan che caro pĩpe.

²¹ Supi eté che, Ava Riquehĩr, amboaviyera icuachiapri; jiparaisu catura rumo acoi mbia che mondosar! Aviyẽ catura ahe mbia ndoyesuisse viña —ehi.

²² Yuvirocaru vitesevẽ, Jesús oipisi pan, “Aviyẽ ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua rĩru, “Aviyẽ ndeu” ehi Vu upe. Aipo ohe pare omondo güemimbohe upe, ipare opacatu yuviroihu.

²⁴ Ahese aipo ehi:

—Co che ruvi, ahe che Ru remimbotar ipiasu vahe pëu nara. Oyepiyerera ava rehĩ recocuer rese nara.

²⁵ Supi eté aipo ahe pëu: ndaĩhu iri chietera uva ricuer cheu arĩ oyepotase voi che Ru Tũpa mborerecuasave aĩhura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve.

²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pĩpe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi.

²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pĩtu pĩpeve voi eté tacura ñehe yupagüe renondeve, “Ndaicuai vahe evocoi mbia” erera mbosapĩ oyupagüer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tuprĩ tẽi avei yuvireco chupe.

Jesús oyerokuĩ Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapĩ cohava, che aso ranera ayeroquĩ peve —ehi.

³³ Aheve viraso Pedro, Santiago, Juan oyeupi. Aheve ndoyepihambovihai eté oico

³⁴ aipo ehi:

—Che cũritei ndavihai eté. Esepia, che hã oyandu ité manosa. Pepĩta rane cohava, iyavei pemahemohara pe yeroquĩ pĩpe —ehi güemimbohe viraso vahe upe.

³⁵ Evocoyase oso tenonde catumi. Aheve oyaivĩ ivĩ rese oso, oporandu Tũpa upe mbahe tasi vahe reimeẽhi ãgua oyeupe.

³⁶ Oyerokuĩ pĩpe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Aheve aipo ehi Pedro upe:

—Simón, ¿ereque? ¿Ndereñemosai eté vo que ñepeĩ hora nde ropesii upe?

³⁸ Pemahemoha, peyerokuĩ mbahe tẽi pĩpe pe viapiẽhi ãgua. Pe niha pequerẽhi ité viña, pe retecuer tẽi rumo nipiratai pẽu —ehi.

³⁹ Ichui oso iri oyerokuĩ, aipo ehi tuprĩ avei oñehe.

⁴⁰ Ipare oyevisẽ, osesapĩha iri iqueseve tẽi avei. Esepia, sopesii nomboyeroyai eté yuvireco, aheve ndoicatui eté ñehe mboyevĩ yuvireco.

⁴¹ Imombosapĩsa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehĩ, mondo ãgua ava yangaipa vahe povrive.

⁴² Pepũha, yaso. Esepia, cõimi eté che amotarẽhisar upe che mondo vaherã secoi —ehi.

Jesús ipĩsisa

⁴³ Jesús oñehe viteseseve ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahĩ eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco.

⁴⁴ Yipĩndar rumo imondosar Judas aipo ehi: “Asovaupite vahe rese peicuarã. Ahe peipĩsi tuprĩ itera seraso” ehi.

⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Aheve oipĩsi Jesús yuvireco.

⁴⁷ Semimbohe seci vahe supi ovinose oquise pucu. Ipípe oyasia pahi rerecuar ivate catu vahe rembiguai nambi.

⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye.

⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco.

⁵¹ Mbia chĩhivahe rumo turucuar pipe güerañomi oñemama vahe supive seci viña;

⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no.

⁵⁴ Pedro avei amombri rupive tẽi oi que ité oso pahi rerecuar ivate catu vahe rẽta ãchisa pipe. Aheve oguapiño mbia sundao pãhuve tata ipive oyephe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vaherã Jesús rese yamotarẽhisave yuca uca ãgua yuvireco; ndoicatui eté rumo yuvireco.

⁵⁶ Iyavei setá iteanga tẽi semira yuvireco sese; oyecopi-copi tẽi rumo güemira pipe.

⁵⁷ Amove aipo ehi tẽi yuvireco seco momara ãgua:

⁵⁸ —Ore orosendu ñehe aipo ehise: ‘Che opara amonduru co tũparo ava tẽi rembiapo. Ipape rumo mbosapi ari rupi opara amopuha. Ndahe iri chira evocoyase ava tẽi rembiapo’ ehi —ehi tẽi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesús upe:

—¿Nderemboyevĩ chira vo ñehe yuvireco chupe? ¿Mbahe vo aipo nde amotarẽhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tũpa imboeteipri Rahr? —ehi.

⁶² —Taa, ahe ité niha che aico. Pe niha che repiara peye che, Ava Riquehĩ, aguapise che Ru mbahe mboavaisarẽhi acato coti; ayevise avei iva quiha rese curi —ehi chupe.

⁶³ Evocoyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico?

⁶⁴ Yasendupa niha aipo Tũpa upe ñehe-ñehe tẽisa, ¿mara ehi aipo evocoyase pe pihave? —ehi.

Ipape opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondĩvi-ndĩvi sese iyavei osesacua, ipape yuvirocuarocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe seci. Aheve cuña oyepota ou pahi mborerecuar ivate catu vahe rembiguai chupe.

⁶⁷ Osepiase Pedro iyepesehese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osese oquendipive ohã, ahese oñehe tacura.

⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco.

² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviẽhi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pĩha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepeí ava soquendapri renose ãgua Pascua pieta pipe ava rehii porandusa rupi yepi.

⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve.

⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

⁹ Pilato rumo aipo ehi:

—¿Peipota amosé vaheñã judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise.

¹¹ Pahi eta rerecuar rumo ‘Barrabás tosẽ’ ombohe ati-ati uca ava yuvireco.

¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborerecuar rēta sui ambuae oi pipe, aheve opacatu omboetasa omonuha yuvireco.

¹⁷ Aheve omboyemonde turucuar pĩraumbi vahe pipe yuvireco, ipare yu piapri omonde ñaca rese.

¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

²⁰ Mara-mara tēi sereco pare, ovirocua iturucuar pĩraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica ãgua yuvireco.

Jesús yaticasa curusu rese

²¹ Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosíi curusu co Jesús vireco vahe rese” ehi voiño tēi yuvireco chupe.

²² Jesús oviraso Gólgota serer vahesave yuvireco (‘Ava Ñaca Cangüer’ oyapave aipo ehi).

²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté.

²⁴ Evocoyase oyatica yuvireco. Ipare sundao iguayíño Jesús turucuar rese ‘¿uma pĩha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco.

²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ.

²⁷ Supive avei yaticasa ñuvirío imonda rai vahe ñepeí mbahe rese ipocosa coti, ambuae mbahe rese ipocoēhisa coti.

²⁸ Ëgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipãhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipare mbosapi arí rupi opa irira amopuha” ere acoi cuese.

³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro.

³² ¡Poropisirosar Israel rerecuar guasu, toyeeroyi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri p̄itu ivi rupi. Ēgüe ehi las tres rupi.

³⁴ Ahese tupri avei Jesús oñehe p̄irata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoiyase ñepe imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toi hu’ oya:

—Ēgüe tehiño rane, ¿oura p̄iha Elías seroyi ãgua curusu sui? —ehi.

³⁷ Ahese Jesús sãse p̄irata. Ipare omano.

³⁸ Aheseve tūparo asiãsa turucuar ivate coti sui ovo tupri.

³⁹ Iyavei sundao rerecuar Roma iguar, ahe Jesús rehõgüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osepiã catu yuvinoha; ahe yuvirecoi María Magdalena, José si María, ahe avei Santiago chihivahe catu vahe si iyavei ambuae cuña Salomé.

⁴¹ Co cuña eta yuvirecoiño vahe ité Jesús rupi, oip̄itivã vahe avei Galilea ve yuvirecoise. Setã avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² P̄itu ramose, ahe ari pipe oyemoingatu ava yuvireco ari mbituhusa upe nara yepi,

⁴³ ahese José, tecua Arimatea pendar, porandusa ivate catu vahe pendar, acoi Tūpa mborerecuasa osãro vahe oico, oquerẽhisa pipe ité oi que oso Pilato upe oporandu ãgua Jesús rehõgüer rese.

⁴⁴ Pilato rumo oyepihamondii tẽi, “Omano” hese. Oñehe sundao rerecuar upe oporandu ãgua ‘¿marase vo ãgüe ehi?’

⁴⁵ Sundao rerecuar omombehuse chupe, ahese omondo sehõgüer José upe.

⁴⁶ Evocoiyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi.

⁴⁷ María Magdalena iyavei María, José si, osepiãño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe siãcua vahe Jesús rehõgüer rese nara yuvireco.

² Iyavei añihiveive, yipindar ari semana pipe, oyepota Jesús ruvipave icatu ramose yuviraso.

³ Aheve aipo ehi oyeupe yuvireco:

—¿Ava p̄iha co tehõgüer rovapisa virocuara yuvireco yandeu? —ehi.

⁴ Osepiãse rumo ita guasu yuvireco, ndahe irise güendave ihãi,

⁵ yuviroiquese tehõgüer ruvipave yuvireco, aheve osepiã ombahe rese pocosa coti mbia chihivahe, iturucuar pucu morochi vahe oguapise oĩ. Ahese cuña oyembosiquiye yuvireco.

⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohava. Pesepia ru supagüer.

⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi.

¹⁰ Ahe oso imombehu supindar upe. Ahe rumo oyaseho vite oviharēhisave yuvireco.

¹¹ Osenduse cuña ñehe: “Jesús ocuerayevi, che ité asepiá” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi.

¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei.

¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa písirosa resendar peico.

¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira.

¹⁷ Co mbahe poromondisa omboyecuara che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco.

¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oñ.

²⁰ Semimbohe evocoyase opa yuviraso opacatu ivi rupi ñehesa písirosa resendar mombehu. Yande Yar avei oipitivii, iyavei mbahe poromondisa pipe omboyecua uca ité ñehesa písirosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūritei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.

³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco.

⁴ Evocoiyase nde ereicua tupri ra co porombohesa supi eté vahe acoi nde mbohe agüer.

Tūpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel.

⁶ Co ñuvirío secocuer aviye tupri Tūpa upe; viroya tupri opacatu Yar porocuita yuvireco. Evocoiyase ndipoi eté que ava “mara” ehi vahe yuvireco chupe.

⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepe ari aipo osupiti icuaita tūparo pipe imboetasa reseve iporaviqui ãgua Tūpa rovaque yuvireco.

⁹ Pahi recosa ité ãgüe ehi aracahe suive, ahese iporavosa Zacarías yipindar yasiapri tūparo maranehi pipe oi que vaherã itaisi rapí ãgua.

¹⁰ Itaisi rapí viteseve aipo, opacatu ava oyerure yuvireco ocarve.

¹¹ Aheseve aipo oyemboyecua yande Yar rembiguai itaisi renda maranehi ique coti chupe.

¹² Tūpa rembiguai repiase aipo, oyembosiquiyé iteanga.

¹³ Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde sembireco Isabel imembira ndeu. Ahe nde rahir rer-ra Juan.

¹⁴ Ereviharetera sese, iyavei oyemboviharetera opacatu ava yuvireco nde rahir ohase.

¹⁵ Esepia niha, nde rahir secocuer tuvichara oico Tūpa rovaque. Ndoihi chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaēhi viteseve.

¹⁶ Ëgüe ehira omonguerēhi setá ava judío Yar Tūpa reroya iri ãgua oico.

¹⁷ Ahe virecora espíritu pīratasa oyese oyoyara Tūpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. Ëgüe ehira ava mbohe imoingatu yande Yar pisi ãgua sereco —ehi chupe.

¹⁸ Evocoiyase,

—¿Mara ahera pīha aipo reroya? Che rumo acuacuami eté vichico, iyavei che sembireco ocuacuami avei no —ehi Tūpa rembiguai upe.

19 —Aní —ehi chupe—. Che aico Tūpa rembiguai Gabriel, Tūpa rovaingar. Ahe niha che mbou ndeu che ñehe āgua iyavei co ñehesa aviye vahe mombehu āgua.

20 Nde rumo ndereroyai acoi amombehu vahe ndeu. Sese co pīpe suive ité nandēhengatui chira eico. Osupitise voi che remimombehugüer, acoi ohase nde rahir, ahese ramo ndēhengatura —ehi aipo Tūpa rembiguai chupe.

21 Osāro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pīpe sui?” ehi tēi yuvireco chupe.

22 Osēse aipo tūparo pīpe sui, niñehengatui voi eté. “Ñaro osepia mbahe tūparo pīpe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

23 Ipare omboaviyese ocuaita tūparo pīpe, oyevi oso güētave.

24 Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta:

25 “Yar Tūpa ité ēgüe ehi cheu ava che rese ñeheēhi iri āgua yuvireco” ehi vorivetesā pīpe aracahe.

Tūpa rembiguai Jesús yesu āgua omombehu

26 Coiye seis yasi pīpe Tūpa omondo güembigui Gabriel tecua Nazaret ve ivi Galilea rupi

27 cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suingar José serer vahe rese.

28 Tūpa rembiguai oique co cuña rētave aipo ehi chupe:

—¿María, Tūpa nde rovasa, erereco mbahe icatupri vahe pītiiviisa Yar Tūpa suingar! Tūpa nde rese ité secoi; nde rovasa catu opacatu cuña sui —ehi chupe.

29 Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opīhañemoñeta rereco.

30 Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua.

31 Cūritei voira rumo ndemembira: ererecora nde membri; ahe serer-ra Jesús.

32 Ahe niha secouvicha catu vaherā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe.

33 Mborerecuar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

34 Evocoyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

35 —Espíritu Santo ogüeyira nde harive iva quiha nungar; Tūpa güeco pīratasa pīpe nde momembira. Sese acoi ohase nde membri seco maranehi vahe, “Tūpa Rahir” hesara chupe.

36 Cūritei nde mu Isabel avei ocuacuami pīpe imembī oico; ahe niha ndimembī vahe yipīndar viña, cūritei rumo vireco seis yasi omembī vie pīpe.

37 Esepia niha, Tūpa upe ndipoi eté mbahe yavai vahe —ehi.

38 Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepēpi oso ichui.

María oso omu Isabel piri

³⁹ Ahese María oso voi eté ivĩri rupi tecua ivĩ Judea ve.

⁴⁰ Aheve aipo Zacarías rēta pĩpe oiquese oso, oyapo “avirave” omu Isabel upe.

⁴¹ Evocoyase Isabel rie pĩpe omĩ imembrĩ ñehe renduse. Ahese Espĩritu Santo oiuke Isabel avĩterve.

⁴² Ipare osapucai pĩrata aipo ehi chupe vorĩvetesave:

—ĩTũpa nde rovasa cuña opacatu sui, iyavei osovasa nde membrĩ!

⁴³ Noromohai eté che pĩri ereyu vaherã viña, che Yar si.

⁴⁴ Esepia, cheu “avirave” ereyapose, che membrĩ omĩ voi vorĩvetesave che rie pĩpe.

⁴⁵ ¡Sovasapri ereico! Esepia, ereroya ité ñehesa ndeundar. Iyavei Tũpa omboavĩyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cheroriveté Tũpa che Pĩsĩrosar rese.

⁴⁸ Esepia, ahe omahe che rese che reco yemominisa pĩpe seroyasar che recosave.

Co pĩpe suive, ‘Sovasapri secoi’ ehira opacatu ava yuvĩreco cheu.

⁴⁹ Esepia niha, Tũpa mbahe mboavaisarēhi, oyapo mbahe tuvichá vahe cheu. ¡Tũpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Vĩroyi mborerecurar seco pĩrata vahe pĩratasa sui; ava seco mbegüemi vahe rumo osecomboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipĩtivĩi niha opacatu vĩroyasareta judío yuvĩrecoi vahe.

Esepia, ndasesarai eté poroparaisuerecosa mondo ãgua

⁵⁵ güemimombehugüer rupi yande ramoi aracahendar Abraham upe, ichuindar upe avei yepi no” ehi vorĩvetesa pĩpe omu Isabel upe.

⁵⁶ Ipare María opĩta Isabel pĩri mbosapĩ yasi rupi. Ichui oyevi oso güētave.

Juan Oporoãpiramo vahe haragüer

⁵⁷ Osupitise ari Isabel upe, imembĩra. Ahe imembrĩ cuimbahemi.

⁵⁸ Imu iyavei icotĩndar oyanduse Tũpa rembiapo mbahe avĩye vahe, aipo ehi yuvĩreco chupe: “Avĩye ai catu Yar Tũpa secoi co cuña rese” ehi vorĩvetesave yuvĩreco.

⁵⁹ Ocho ari pĩpe aipo, ahe pĩtani ombocircuncida yuvĩreco judío porocuaita mboyeroyasa pĩpe. Ipare aipo omondo pota iyesupa Zacarías rer yuvĩreco sese viña,

⁶⁰ ichĩ rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvĩreco chupe.

⁶² Evocoyase aipo omahe pĩtani yesupa rese yuvĩreco ‘¿mbahe pĩha ahe omondo pota sererguã viña?’ oyapave yuvĩreco.

⁶³ Evocoyase aipo iyesupa oporandu ivĩrapemi rese sese serer oicuachía vaherã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tēi oyeupe yuvĩreco.

⁶⁴ Ahese ramo Zacarías ñehengatu, omboĩpi Tũpa upe osapucai oico.

⁶⁵ Opacatu aipo sêta cotindar oyembosiquiye têi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco.

⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pîha aipo pîtani oyapora curi?” ehi. Esepia niha, supi eté Tûpa osovasa.

Zacarías sapucaí agüer

⁶⁷ Zacarías, Espíritu Santo pîratasa pipe, oñehe Tûpa oyeupe ñehesa pipe aipo ehi:

⁶⁸ “¡Yande Yar Tûpa imboeteipri tasecoi!

¡Esepia niha, ahe ou yande judío yaico vahe pîsîro ãgua!

⁶⁹ Ombou niha Poropîsîrosar güembiguai David suindar yandeu.

⁷⁰ Êgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pîsîrora yande amotarêhimbar sui.

⁷² Êgüe ehi Tûpa imbou oporoparaisuerecosa yande ramoí aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoí Abraham upe aracahe

⁷⁴ yande renose ãgua yande amotarêhimbar povri sui ‘tache mboetei osiquiyeêhisa pipe yuvireco’ oya;

⁷⁵ ‘toyuvirecoi che rembiepiave güeco ñîvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahîr, ‘Co Tûpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pîsî ãgua senondeve eico.

⁷⁷ Supi eté nde niha eremboyecua opacatu ava Tûpa upendar yuvirecoi vahe upe angaipa sui ñeroisa pîsî ãgua ñîpîsîro ãgua.

⁷⁸ Esepia, yande Ru Tûpa, oporoparaisuerecosa pipe ombou oporoesapesa íva pendar yandeu yande reco mbopiasu ãgua

⁷⁹ iyavei ava Tûpa cuaparêhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pîtumimbisave yuvirecoi vahe, ocañî têi vahe ña yuvireco”

ehi Zacarías.

⁸⁰ Ichui pîtani ocuacua iyavei vireco pîratasa Espíritu suindar oyese. Ipare rumo oso oyemboerecua ívi iporupirêhi rupi. Coiye oyemboyecua omu Israel pendar upe oico.

2

Jesús yesu agüer

¹ Yîpîndar mborerecuar guasu Augusto oporocuai oico, “Tayecuachiasa opacatu tecua rupi” ehi.

² Ahe yîpîndar yecuachiasa mborerecuar Cirenio, Siria pendar rêise.

³ Opacatu ava yuvîraso güecua yacatu rupi oyecuachía ãgua yuvireco.

⁴ Sese José avei osê Nazaret, Galilea ívi rupi sui oso ívi Judea rupîndar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi.

⁵ Êgüe ehi oyoya yuvîraso güembirecovi María rese oyecuachía ãgua. María rumo imembira pota ité oico.

⁶ Aheve oyepota ramose, osupiti ari imembira água.

⁷ Aheve oha imembri yipindar vahe cuimbahemi. Aheve María oyao omembri turucuar pipe, água ehi imoñoeno imondo mbahe mimba rembihi riru pipe. Esepia niha, ndoyosui eté oque água aheve yuvireco.

Tūpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco.

⁹ Aviyeteramo tẽi oyemboyecua Tūpa rembiguai iva pendar chupe. Tūpa porañetesa avei sendi yivĩi chupe yuvireco. Ahe sepiase, oyembosiquiyé iteanga tẽi yuvireco ichui.

¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu água pẽu pe mbovĩharete água iyavei opacatu ava mbovĩharete água avei no.

¹¹ Co pipe oha David recua Belén ve Poropĩsĩrosar pẽu nara. Ahe niha Tūpa Rembiporavo, pe Yarguã secoi.

¹² Icuã água peyosura pĩtani yaopri tupriimi vahe tui mbahe mimba rembihi riru pipe” ehi.

¹³ Aviyeteramo tẽi oyemboyecua ambuae setá Tūpa rembiguai iva pendar yivĩi yuvireco. Tūpa upe osapucái yuvireco aipo ehi:

¹⁴ “¡Imboetepri tasecoi Tūpa ivave!

¡Ivive ava Tūpa rembiaisu toyuvirecoi tupri oyeaisusa pipe!” ehi osapucái yuvireco.

¹⁵ Opase oyevi Tūpa rembiguai ivave yuviraso, aheve ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi icua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pĩtani avei yuvireco cute. Ahe pĩtani omoñoenomi mbahe mimba rembihi riru pipe ino.

¹⁷ Ipare yuvinose omombehu-mbehu ambuae ava upe Tūpa rembiguai remimombegüer pĩtani resendar ñehesa yuvireco.

¹⁸ Evocoyase opacatu ava oyepihamondii co ñehesa renduse yuvireco.

¹⁹ María rumo opacatu co mbahe rese oyapisacaño; ahe ehiño ité ipihañemoñetasa.

²⁰ Oyeveise ovesa rãrosar yuviraso, omboetei iyavei osapucái Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pĩtani seropovẽhesa Tūpa upe tũparo pipe

²¹ Ocho ari pipe ahe pĩtani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembĩehi viteseve.

²² Ipare omboaviyese ohari güëtave oñemoatiro água, ahe aipo água ehi Moisés porocuita rupi yuvireco yepi, aheve vinose pĩtani seraso tecua guasu Jerusalén tũparo pipe seropovẽhe água Yar upe yuvireco.

²³ Água ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pĩtani cuimbahe mini yuviroha vahe ipehasara Tūpa upe nara yepi” ehi.

²⁴ Yuviraso oporerecosa reropovẽhe água yuvireco yande Yar porocuita rupi: “Ñepey oyoaichor reseve picuhi, anise ñuvirío apicasu peropovẽhera” ehi vahe.

²⁵ Ahe pîpe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tûpa upe, osâro vahe avei Israel recua pendar Pîsîrosar imombehupri. Ahe secoi vahe ité Espîritu Santo rese.

²⁶ Ahe chupe Espîritu Santo opa uca oicua “eresepia rane itera Poropîsîrosar Tûpa remimbou nde mano renondeve” ehi vahe.

²⁷ Ahe ari pîpe Espîritu Santo viroguata tûparove. Oyepotase José, María reseve yuvireco tûparove Jesús pîtani reropovêhe âgua Tûpa porocuaita rupi tupri,

²⁸ ahese Simeón oyemboya oso sese, osupi ichi sui, viroyeroqui Tûpa upe señoa aipo ehi:

²⁹ “Che Yar, cûritei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

³⁰ Asepia ité niha Poropîsîrosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecua mbahe supi eté vahe ava ndahei vahe judío yuvirecoi vahe upe,

iyavei omondara poromboeteisa nde recua Israel pendar judío yuvirecoi vahe upe”

ehi oyeruqui.

³³ José iyavei María ndoyembovîhai têi yuvireco pîtani rese Simeón yeroqui renduse.

³⁴ Evocoyase Simeón osovasa ahe pîtani iyésupa reseve. Ipare aipo ehi ichi María upe:

—Esendu, co pîtani reroyaêhisa pîpe setá yande mu judío oviapira mbahe têi pîpe yuvireco; ambuae rumo seroya pîpe sovasapri yuvirecoira. Ahe avei omboyecua mbahe ava upe. Amove rumo viroïroñora yuvireco.

³⁵ Ipîpe sui ava pîhañemoñetasa icuasara curi. Iyavei co opacatu mbahe tasira nde pîha pîpe inungar quise pucu osasara nde pîha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi têi omer rese siete aravîter rupive.

³⁷ Cûritei secoi omer mano pare ochenta y cuatro aravîter. Nosei eté tûparo pîpe sui oico. Êgüe ehi yande Yar mboetei pîtu, ari rupi oyecucusa pîpe iyavei oyeruresa pîpe avei oico no.

³⁸ Ahe evocoyase ahesa reseve avei ou pîtani upe, “Aviye ndeu” ehi Tûpa upe. Ipare oñehe secocuer rese opacatu ava Jerusalén pendar osâro vahe güecua pîsîro âgua upe oico.

Jesús pîtani reroyevi agüer Nazaret ve

³⁹ Evocoyase opacatu Moisés porocuaita mboaviyere, opa oyevi Galilea pendar güecua Nazaret ve yuvireco.

⁴⁰ Ahese pîtani ocuacua catumi imbahecua-ecua irimi eté oico iyavei ipîrata catu irimi. Esepia, Tûpa osovasa ité sereco no.

Jesús chîhivahe tûparo pîpe secoi

⁴¹ Iyesupa yuviraso aravîter yacatu Jerusalén ve Pascua pieta repia yepi.

⁴² Jesús doce aravîter vîrecose, ahese vîraso iyésupa Jerusalén ve oyeupi pieta repia yuvireco. Esepia, êgüe ehi eté judío recocuer pietase yuvireco yepi.

⁴³ Ahe pieta pare voi, oyevise yuvireco güecosave, ahese Jesús opîtaño Jerusalén ve; ichi rumo iyavei tu José ndoicuai eté ipîtase yuvireco.

⁴⁴ “Ouño revo ava pãhu rupi” ehi yuvireco chupe viña; aipo ehiño ité ñepeí ari pipe yuvireco chupe. Oseca tẽise rumo omu pãhu rupi, iyavei omboripar pãhu rupi avei no,

⁴⁵ ndoyosui eté yuvireco. Ahese oyeví iri tẽi Jerusalén ve seca yuvireco.

⁴⁶ Imombosapisa ari pipe oyosu ramo tũparo pipe yuvireco. Aheve oguapí ava Tũpa porocuita rese oporombohe vahe pãhuve oĩ; oyapisaca ñehe rese iyavei oporandu-randu ahe ava upe Tũpa Ñehengagüer rese oĩ.

⁴⁷ Evocoyase opacatu ava ndoyembovihai tẽi imbahecua vaisa rese yuvireco. Esepia, oporanduse mbahe rese yuvireco chupe, omboyeví tupri voi-voiño ité ñehesa.

⁴⁸ Oyosuse iyésupa, oyepihamondi yuvireco. Ahese ichi aipo ehi chupe:

—Che membri, ¿mahera vo ěgüe ere eico oreu? Nde recasa tẽi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tẽi peye peico? ¿Ndapeicuai vo che Ru rēta pipe aico vaherã? —ehi osi upe.

⁵⁰ Iyésupa rumo ndosenducuai eté aipo oyeupe hesa yuvireco.

⁵¹ Evocoyase oyeví Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité.

⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tũpa upe iyavei ava eta upe avei no.

3

Juan Oporoãpiramo vahe secoi ivi iporupirẽhisã rupi

¹ Quince araviter pipe mborereciar guasu Tiberio recose, Poncio Pilato evocoyase mborereciar secoi Judea rupi, Herodes avei mborereciar secoi Galilea ve, tivri Felipe evocoyase mborereciar secoi Iturea ve iyavei Tracónite ve, Lisaniás avei mborereciar secoi Abilinia ve.

² Anás iyavei Caifás ahe pahí rereciar ivate catu vahe yuvirecoi. Ahese Tũpa, “Emombehu che ñehe ava upe cute” ehi Zacarías rahir Juan upe oico ivi iporupirẽhisave.

³ Juan evocoyase oso opacatu iai Jordán ivi oico, supi aipo ehi ava upe: “Pemboasi pe angaipa, peyeví Tũpa upe, ahese opoãpiramora Tũpa pẽu ñero água pe angaipa rese” ehi.

⁴ Co yaviye ité Tũpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirẽhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perĩ ipãri vahe, ahe imohivisapara; perĩ ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pĩsirosa resendar Tũpa remimbou yuvireco cute’ ehi vahe” ehi.

⁷ Ava rehí yuvínosepa chupe ‘tayande ãpiramo’ oyapave yuvireco viña. Ahe rumo aipo ehi: “¡Pe mboi mboetasa tẽi peico! ¿Ava vo, ‘Pesera Tũpa ñemoirosa ou vaherã sui’ ehi tupri tẽi pẽu?”

⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tẽi peñepisiro água. Esepia, Tũpa oicatuño ité co ita sui Abraham suindar nungar tupri apo água oyeupe nara yepi.

⁹ Hacha niha imoingatusa voi eté opacatu ivira iha naporai vahe sapo rupi yasia água yepi. Yasiapri evocoyase imondosapara tatave” ehi.

¹⁰ —¿Mbahe p̄ha evocoyase oroyapora ore recocuer recuñaro água oroico? —ehi ava reh̄i oporandu yuvireco chupe.

¹¹ —Pe pereco vahe ñuvirio pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi t̄i ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rerocuar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora T̄pa rupi ore guata água oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Aní perocua catu iri guarepochi p̄u imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chiera que mbahe ambuae ava sui, ndapeñehe-ñehe t̄i chira ava upe sembiapoẽhi rese, iyavei peyembovihanora pe poraviqui repri rese —ehi sundao upe.

¹⁵ Ava rumo, “¿Ndahei p̄ha co Porop̄s̄irosar s̄arombri secoi?” ehi t̄i Juan upe yuvireco.

¹⁶ Juan rumo aipo ehi opacatu ava upe: “Che opoãpiramo i pipe t̄i; oura rumo ambuae che raquicuei, ahe pe ãpiramora Esp̄ritu Santo tata nungar pipe. Ahe seco p̄rata catu vahe secoi che sui. Sese cheu ndiyai eté ahe ip̄taquisã yora água ichui” ehi.

¹⁷ “Ahe güeru trigo mbovevesa ihigüer sui ipeha água. Sãh̄i evocoyase yapocatusa, ihigüer rumo imondosa tata ap̄r̄h̄i vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguer̄hi güecocuer recuñaro água yuvireco’ oya.

¹⁹ Ipare rumo Juan oñehe p̄rata mborereciar Herodes upe secocuerai rese. Esep̄a, vivri Felipe rembireco Herodías rese secoi, iyavei setá ambuae mbahe naporai vahe sembiapo.

²⁰ Sese Herodes oyapoño ambuae mbahe t̄i: seroyaẽhisa pipe osoquenda ucaño Juan sereco.

Jesús ãpiramosa

²¹ Yipindar rumo voquenda viteẽhiseve Juan oñapiramo setá ava oico, aheseve avei oñapiramo Jesús. Jesús yerure v̄teseve, aviyeteramo t̄i oyemboi tupri iva.

²² Ipare Esp̄ritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rah̄ir ereico, che rembiaisu; sese av̄ha ité nde rese —ehi.

Ava eta oyesu vahe Jesucristo yesu renondeve

²³ Jesús v̄recose treinta arav̄ter, ahese ramo omboipi oporombohe. Ahe icuapri vahe ité José rah̄ir secose viña. José Elí rah̄ir secoi,

²⁴ Elí evocoyase Matat rah̄ir, ahe Matat evocoyase Leví rah̄ir, Leví evocoyase Melqui rah̄ir, ahe Melqui evocoyase Jana rah̄ir, Jana evocoyase José rah̄ir,

²⁵ ahe José Matatías rah̄ir, Matatías evocoyase Amós rah̄ir, ahe Amós evocoyase Nahúm rah̄ir, Nahúm evocoyase Esli rah̄ir, ahe Esli Nagai rah̄ir,

²⁶ Nagai evocoyase Maat rah̄ir, ahe Maat Matatías rah̄ir, Matatías evocoyase Semei rah̄ir, ahe Semei evocoyase Josec rah̄ir, Josec evocoyase Judá rah̄ir,

²⁷ ahe Judá Joanán rahír, Joanán evocoyase Resa rahír, ahe Resa evocoyase Zorobabel rahír, Zorobabel evocoyase Salatiel rahír, ahe Salatiel Neri rahír,

²⁸ Neri evocoyase Melqui rahír, ahe Melqui Adi rahír, Adi evocoyase Cosam rahír, Cosam evocoyase Elmadam rahír, Elmadam evocoyase Er rahír,

²⁹ ahe Er Jesús rahír, Jesús evocoyase Eliezer rahír, ahe Eliezer Jorim rahír, Jorim evocoyase Matat rahír,

³⁰ ahe Matat Leví rahír, Leví evocoyase Simeón rahír, ahe Simeón evocoyase Judá rahír, Judá evocoyase José rahír, ahe José Jonam rahír, Jonam evocoyase Eliaquim rahír,

³¹ Eliaquim Melea rahír, ahe Melea Mena rahír, Mena evocoyase Matata rahír, ahe Matata evocoyase Natán rahír,

³² Natán David rahír, ahe David evocoyase Isaí rahír, Isaí Obed rahír, ahe Obed evocoyase Booz rahír, Booz Sala rahír, ahe Sala evocoyase Naasón rahír,

³³ Naasón Aminadab rahír, ahe Aminadab evocoyase Admin rahír, Admin evocoyase Arni rahír, Arni evocoyase Esrom rahír, ahe Esrom evocoyase Fares rahír, Fares evocoyase Judá rahír,

³⁴ ahe Judá Jacob rahír, Jacob evocoyase Isaac rahír, ahe Isaac Abraham rahír, Abraham evocoyase Taré rahír, Taré evocoyase Nacor rahír,

³⁵ ahe Nacor Serug rahír, Serug evocoyase Ragau rahír, ahe Ragau evocoyase Peleg rahír, Peleg Heber rahír, ahe Heber evocoyase Sala rahír,

³⁶ Sala Cainán rahír, ahe Cainán evocoyase Arfaxad rahír, Arfaxad evocoyase Sem rahír, ahe Sem evocoyase Noé rahír, Noé evocoyase Lamec rahír,

³⁷ ahe Lamec Matusalén rahír, Matusalén evocoyase Enoc rahír, Enoc evocoyase Jared rahír, ahe Jared Mahalaleel rahír, Mahalaleel evocoyase Cainán rahír,

³⁸ ahe Cainán evocoyase Enós rahír, Enós evocoyase Set rahír, ahe Set Adán rahír, Adán evocoyase Tūpa rahír.

4

Jesús recoãhasa

¹ Jesús Espíritu Santo rese ité secoi. Ahe osẽ iai Jordán sui oso. Ipare Espíritu viroguata ivi iporupirẽhisa rupi.

² Aheve cuarenta arĩ secoise Carugar osecõha. Ndocarui avei oico. Sese ndasiepoi eté.

³ Carugar evocoyase aipo ehi chupe:

—Tūpa Rahír ité nde recose, co ita sui eyapo pan cūritei —ehi.

⁴ Evocoyase Jesús omboyevĩ chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Carugar upe.

⁵ Ipare Carugar viraso ivate vahesave. Aheve ñepei reseve opacatu avava tẽi mborerecuasa ivi pipendar omboyecua chupe.

⁶ Ipare aipo ehi chupe:

—Che amondora opacatu ivi rupindar mborerecuar pĩratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheã ava upe che remimbotar rupi.

⁷ Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tẽi Carugar chupe.

8 –Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi –ehi Caruguar upe.

9 Ipare Caruguar viraso oyeupi tecua guasu Jerusalén ve. Aheve oviroyeupi tūparo apiterve. Aheve Caruguar aipo ehi chupe:

–Tūpa Rahir ité nde recose, eviapi cohave sui.

10 Esepia niha, icuachiapri pipe:

‘Tūpa oyocuairea güembiguai eta nde rãro ãgua.

11 Ahe nde mopuhara yuvireco que ñepeí ita nde momara rãgüer sui’ ehi –ehi Caruguar chupe.

12 Evocoiyase omboyevi Caruguar upe:

–¡Aní! Icuachiapri pipe niha aipo ehi avei: ‘Ndereseoãhai chira nde Yar Tūpa’ ehi –ehi chupe.

13 Ahese Caruguar ndoicatu iri eté Jesús recoãha ãgua oico. Ipare oyepepiño raimi tēi oso ichui.

Jesús omboipi oporombohe Galilea rupi

14 Jesús, Espíritu Santo reco pĩratasa pipe, oyevi oso Galilea ve. Ipare serãcua oguata opacatu tecua-tecuami rupi.

15 Esepia, ahe oporombohe judío tūparo pipe oico. Ahese opacatu ava omboetei yuvireco.

Jesús oyevi Nazaret ve

16 Ichui Jesús oyevi Nazaret ve ocuacua agüerve. Aheve judío mbĩtuhusa ari pipe oique tūparove inungar oyapo yepi. Ahese opũha ‘tayeroqui icuachiapri maranehi pipe’ oya.

17 Evocoiyase tūparo rese ñangarecuar pĩtivĩisar omondo Tūpa ñehe mombehusar Isaías rembicuachía chupe. Oyorase ahe cuachiar, oyeruqui icuachiapri aipo ehi vahe pipe ohã:

18 –“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivriye yuvirecoi vahe senose ãgua ichui, iyavei ava ndasesapisoí vahe ambosarecora; iyavei che cuaita ava mbahe-mbahe tēi rasícuer oiporara vahe sui senose ãgua,

19 iyavei ‘cũritei Yar oyemoingatu oporovasasa mondo ãgua pēu’ he ãgua” ehi icuachiapri pipe

–ehi oyeruqui.

20 Sese oyeruqui pare, oyapoapipa cuachiar imondo tūparo rese ñangarecuar pĩtivĩisar upe. Ipare oguapi oĩ ava rembiepiave. Ahese opacatu tūparo pipendar omahe ati yuvireco sese.

21 Evocoiyase ahe oñehe aipo ehi:

–Cũritei yaviye co icuachiapri pipendar opacatu pe rovaque –ehi.

22 Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

–¿Ndahei vo acoi co José rahir tēi? –ehi yuvireco chupe.

23 Ahe rumo aipo ehi ava upe:

–Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ãgüe ere avei eyapo cohave nde recua pipe ité’ peyera cheu –ehi.

24 –Supi eté, ndipoi eté niha que ñepeí yepi Tūpa ñehe mombehusar oipisi tupri vahe güecua pipe yuvireco yepi.

25 Supi tupri ité Tūpa ñehe mombehusar Elías recose, iñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

26 Tūpa rumo nomondoi Elías cuña imer mano vahecuer Israel pendar upe ipitivi ñgua. Ēgüe ehi rumo omondo cuña ndahei vahe Israel pendar ipitivi ñgua. Ahe cuña tecua Sarepta pendar, ahe Sarepta Sidón ipimindar.

27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

28 Ahese opacatu ava judío tūparo pipendar oñemoiró iteanga yuvireco sese aipo mbahe renduse.

29 Sese opa voi eté opūha Jesús reraso ñgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña.

30 Jesús rumo ipāhu sui osé tupriño oso.

Jesús ombogüera mbia caruguar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe.

32 Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

33 Aheve judío tūparo pipe oime mbia vireco vahe caruguar oyese, ahe oñehe pīrata Jesús upe:

34 —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi ñgua tēi? Che orocua ité. Nde niha seco maranehi vahe ereico Tūpa suindar —ehi chupe.

35 Evocoyase,

—¡Quiriri, esē co mbia sui! —ehi oñehe pīrata caruguar upe.

Ahese caruguar omboviapi ahe mbia ava rovai, osē ocua ichui; nomomarai eté rumo.

36 Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai caruguar ava sui imose ñgua! —ehi yuvireco.

37 Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

38 Evocoyase Jesús osē judío tūparo pipe sui oso, oique Simón Pedro rētave. Simón rembireco si sohí iteanga ou. Evocoyase oñehe ahe pendar sese Jesús upe ‘tombogüerami tēi’ oyapave yuvireco.

39 Evocoyase Jesús oyeaivi oso chupe sohí sui imbogüera ñgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

40 Ari so ramomise opacatu ava imbaheasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepei-peí imbogüera.

41 Iyavei setá ava sui opa omose caruguar. Evocoyase caruguar osapucaí tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osẽ tecua pipe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã.

⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñhengagüer yuvireco.

² Aheve oime ñuvirío carite imbehi popive. Ahe ava pira mbohasar opa yuvinose evocoi carite pipe sui yuvireco. Ipare opira mbohasa oyosei yuvinoi.

³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tẽi chĩhi coi coti iai popi sui” ehi. Ipare oguapĩ oĩ carite pipe. Aheve ombohe ava cute.

⁴ Oñehe pare aipo ehi Simón upe:

—Yaso ipa tipĩ catu vahesave. Aheve erembohara pira —ehi.

⁵ Simón rumo omboyevi chupe:

—Porombohesar, orosãha tẽi niha pĩtu momba pira mboha oroico. Nde porocuaita pipe rumo amondo irira pira mbohasa ive —ehi.

⁶ Ëgüe ehise, pira rehii omondoromi ombohasa yuvireco.

⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive.

⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepipimi tẽi che sui, che Yar! ¡Esepia, che yangaipa vahe tẽi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco.

¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ãgüe ere aveira ava reca cheu nara —ehi.

¹¹ Evocoiyase opa vinose carite ivi ãtasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepei ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cũritei! —ehi chupe.

Aipo ihe ramoseve voi eté ocuera.

¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavêhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese ñehe rendu ãgua ‘tayande mbogüerami tēi yande mbaherasisa sui’ oyapave yuvireco.

¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepeí arí Jesús oporombohe oico. Yar Tūpa pĩratasa vireco oyese ava mbogüera ãgua. Aheve avei oguapí yuvinoi fariseo, Moisés porocuita rese oporombohe vahe avei ipĩri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no.

¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña;

¹⁹ ndoicatui eté rumo seroique yuvireco ava rehii pãhu rupi. Evocoyase viroyeupi yeupisa rupi ahe oi ípe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai.

²⁰ Ahe oicuae co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipiñañemoñeta atí voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero ãgua” ehi tēi oyeupe yuvireco.

²² Ahe rumo oicuaño ité ahe ava piñañemoñetasa. Evocoyase aipo ehi chupe:

—¡Mahera vo pepiñañemoñeta rai tēi che rese!

²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pĩha, anise: ‘Epũha, eguata’ hesa tie?

²⁴ Tapeicua ru che, Ava Riquehír, areco ité mborerecuasa co ivi pipe ava angaipa upe che ñero ãgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opũha voi ava rovaque, osupi vupagüer. Ipare osapucái oso güētave Tūpa upe.

²⁶ Ahese opacatu tupri ité ava, “¡Too! ¿Mara ehi rutei pĩha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiaí vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoyase Leví opũha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuasar iyavei ambuae ava ocaru yuvinoi ipiri.

³⁰ Pieta repiasar fariseo yuvirecoi vahe rumo iyavei ipãhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¿Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

³² Esepia, che ndayui ava seco catupri vahe reca; che rumo ayu ava yangaipa vahe reca Tũpa uve iyevi ãgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipãhuve.

³⁵ Oimera rumo ari imer reraso ãgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi ãgua:

—Ndiyai eté ava upe virocuva vaherã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—.

³⁷ Iyavei no, ndiyai eté ñoñasa uva ricuer piasu mbahe pirer cuacua pipe no. Esepia niha, ãgüe ehise, uva ricuer piasu evocoyase opara ombopu mbahe pirer cuacua viña, ãgüe ehira oyepiyerepa, mbahe pirer avei evocoyase ocañi tēira viña.

³⁸ Uva ricuer piasu rumo yamondora mbahe pirer piasu pipe.

³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepe mbituhusa ari pipe Jesús viroguata güemimbohe mbahe miti pãhu rupi. Semimbohe evocoyase oipoho-poho yuviraso trigo rãhi. Ipare oyequii opo pipe sãhi yuvireco igua.

² Evocoyase fariseo osepiase, aipo ehi yuvireco semimbohe eta upe:

—¿Mahera peporaviquiño tēi co mbituhusa ari pipe peico! —ehi.

³ Jesús rumo omboyevi chupe:

—Peicua tēi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha oique ité Tũpa rēta pipe, opoco pan imboeteipri Tũpa upendar rese evocoi pahí upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oi que judío tūparo pipe oporombohe oico. Aheve mbia yasu coti ipo nomii vahe secoi.

⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pīha co mbia mbituhusa ari pipe?’ oya; ‘yaiñhengapo angahu’ oyapave tēi yuvireco.

⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohava terehã ava pãhuve —ehi.

Ahe mbia evocoyase opūha, opita aheve ohã

⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaipĩsiro pīha ava recocuer; yamocañi uca tēi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité.

¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara ãgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitri ve, oyerure pĩtu momba tupri Vu upe oico.

¹³ Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi.

¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé;

¹⁵ Mateo, Tomás, Santiago Alfeo rahir; Simón, ava güecua rese secatēhí vahe pãhu pendarer;

¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco.

¹⁸ Acoi espíritu naporai vahe remimombaraisu avei ocuera tupri yuvireco.

¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pĩratasa pipe oico.

Ava sorivete vahe iyavei ava ndoyembovihai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tūpa mborerecuasa pēu nara ité secoi.

²¹ “Perorivete catu cūriteindar ndasiepoi vahe. Esepia niha, pehĩtarora peico curi.

“Perorivete catu pe acoi ava cūritei oyaseho vahe. Esepia niha, peviharetera coiye peico.

²² “Perorivete catu pe acoi ava pe amotarēhise, pe mboyepepiñose avei oyesui yuvireco, iñehe-ñehe tēise yuvireco pēu pe amotarēhisave, iyavei acoi viroĩrose pe rer mbahe tēi pipe che, Ava Riquehir, recocuer sui tēi yuvireco.

²³ Peyembovihãño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Êgüe ehi tupri avei evocoi ava ramo aracadendar mara-mara tẽi Tũpa ñehe mombehusar sereco yuvireco” ehi.

²⁴ “¡Peparaisu catu rumo cũritei mbahe yar peico vahe! ¡Esepia niha, pemboaviye pe rorivetesã peico!

²⁵ “¡Peparaisu catu acoi pe ihĩtaro vahe cũritei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cũritei! ¡Esepia, peyasehora pe viharẽhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tẽi sui! ¡Esepia niha, êgüe ehi tupri tamoi Tũpa ñehe mombehusar angahu tẽi vahe upe yuvireco aracahe!” ehi.

Iyacatu yasaisu yande amotarẽhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarẽhimbar; peyapo tupri mbahe aviye vahe ava nape ambotai vahe upe.

²⁸ Peoporandu Tũpa porovasasa rese ava pẽu iñehe-ñehe tẽi vahe upe nara; peyerure Tũpa upe pẽu mbahe tẽi oyapo vahe recocuer rese.

²⁹ Acoi que pe amotarẽhimbar pe rovapetese, co cotindar avei pemoporẽhiñora chupe. Iyavei acoi que ava virocuaño tẽise pe yeaosa pe sui, tovirasõ avei pe yemondesa güemimbotar rupi” ehi.

³⁰ “Acoi oporanduse que pe mbahe rese yuvireco pẽu, pemondoño avei chupe. Iyavei acoi que ava virocuaño tẽise pe mbahe pe sui, ndapeporandui chira pẽu imboyevi ãgua rese.

³¹ Acoi mbahe peipota vahe ambuae ava oyapo vaherã pẽu, ahe tupri avei peyapora chupe.

³² “Acoi ava pe raisupar güeraño pesaisu catu tẽise, ndipoi eté mbahe aviye vahe ipipe. Esepia niha, ava naporai vahe êgüe ehi yuvireco yepi.

³³ Anise, acoi ava mbahe tupri ai oyapo vahe pẽu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei êgüe ehi yuvireco yepi.

³⁴ Acoi pemondoño tẽise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar êgüe ehi avei yuvireco.

³⁵ Pe rumo pesaisu catura ava pe amotarẽhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi ãgua vichico’ ndapeyei chietera. Ahese oimera porerecosa aviye catu vahe pẽu. Pe evocoyase Tũpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei.

³⁶ Pe peporoparaisuereco inungar pe Ru Tũpa oporoparaisuereco yepi” ehi.

Ndiyai ambuae ava seroĩrosa

³⁷ “Ndiyai, ‘Oyavi ité mbahe’ peye voiño tẽi ambuae ava upe. Evocoyase Tũpa, ‘Oyavi mbahe’ ndehi chira pẽu. Pemocañi uca tẽi eme ambuae ava. Evocoyase Tũpa ndape mocañi tẽi chira. Peñeroño catu ambuae ava upe, ahese Tũpa iñero itera pẽu.

³⁸ Pemondose mbahe ava upe, evocoyase Tũpa omondoño itera mbahe aviye vahe pẽu inungar-ra omondo pe mbahe riru pipe pẽu sãhambri tupri aviye vahe viña. Êgüe ehira mbahe imondo pẽu. Tũpa oicua tupri itera pẽu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu p̄iha ñepei ndasesap̄iso i vahe ambuae ndasesap̄iso i vahe reroguata? ¡Aní eté! Esepia, oyoya voi ov̄iapira que iv̄icuar pipe yuv̄ireco viña.

⁴⁰ Ñepei yepe niha ava oyembohe vahe ndahei eté iv̄ate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiav̄imi rese t̄ei pemahe? Iya rumo peyese rane mbahe tuv̄icha catu vahe pesepiara.

⁴² Ndiyai p̄eu, ‘Che torop̄itiv̄ii mbahe nde rembiav̄i rese’ peye vahe r̄a chupe. Esepia, pe peyav̄i guasu catu mbahe. ¡Pe T̄upa reroyasar angahu t̄ei peico vahe! Penose uca rane pe rembiav̄i tuv̄icha catu vahe peyesui, ahese ramo ambuae ava rembiav̄i tah̄imi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Iv̄ira av̄iye vahe icuasa iha rese. Esepia, iv̄ira av̄iye vahe, iha av̄iye avei; iv̄ira naporai vahe, iha naporai avei no. Supi eté ndipohosai iv̄ira s̄achi at̄i vahe sui higuera ha, iyavei ndahipohosai uva, yu p̄ahu sui.

⁴⁵ Ēḡue ehi avei ava upe. Ava av̄iye vahe oyapo mbahe tupri. Esepia, ahe v̄ireco mbahe tupri op̄iha pipe yepi. Iyavei acoi ava ndaseco p̄orai vahe oyapo mbahe t̄ei. Esepia niha, ahe v̄ireco mbahe t̄ei eté op̄iha pipe yepi. Esepia niha, pe p̄iha pipe sui t̄ei os̄e pe ñehe āgua” ehi.

Ava oyemov̄iracua vahe iyavei ndoyemov̄iracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye t̄ei peico cheu; ipare ndapeyapoi eté mbahe che remimombehu?

⁴⁷ Amombehura rumo mbahe p̄eu uma nungar tupri ité acoi ava ou vahe cheu che ñehe rese oyap̄isaca vahe, iyavei oyapo ité vahe mbahe che remimombehu:

⁴⁸ ahe inungar tupri ité acoi ava oyapo vahe ḡüetara ita har̄ive yepi. Yip̄indar rumo oyoh̄o picucu rane ité ita har̄ive imopuha āgua. Yepe ahe oi upe oyepota t̄ei iv̄itu ai, amarusu reseve oinupa p̄irata t̄ei, nomboyerocuai eté rumo. Esepia niha, v̄ireco ité ov̄iracuasa.

⁴⁹ Acoi ava che ñehengaḡuer rese ndoyap̄isacai vahe rumo, ahe ndoyav̄ii acoi ava oyapo vahe ḡüetara iv̄i cuhi har̄ive t̄ei, ndov̄irecoi eté ov̄iracuasa. Ipare amar, iv̄itu ai reseve oinupa p̄iratá, opaño omonduru; ocañi t̄ei eté evocoyase” ehi Jesús ava mbohe.

7

Jesús ombogüera ch̄ihivahe sundao rerecuar Roma iguar remimboacua

¹ Jesús oñehepase ava upe oico, oso Capernaum ve.

² Ahe tecua pipe sundao rerecuar ndahei vahe judío secoi v̄ireco vahe güemimboacua güembiaisu. Ahe imbaheasi guasu ité ou; omano pota ité.

³ Jesús rer̄acua anduse rumo, oyocuai mov̄iro t̄ei ombor̄ipar judío imboeteipri chupe ñehe āgua ‘toumi t̄ei che remimboacua mbogüera’ oyapave.

⁴ Ahe judío evocoyase oyemboya Jesús rese yuv̄ireco iyavei oporandu yuv̄ireco chupe aipo ehi:

—Ore mbor̄ipar sundao rerecuar oipot̄a nde ereyapomi t̄eira mbahe icatupri vahe chupe viña.

⁵ Esepia niha, ore raisu iyavei ahe teieté oyapo uca t̄uparo oreu nara —ehi yuv̄ireco chupe.

⁶ Evocoyase oso ahe yuv̄irecoi vahe rupi. V̄irovise rumo s̄eta yuv̄ireco, ahese sundao rerecuar omondo ambuae ombor̄ipar chupe. Imbor̄ipar

evocoiyase omombehu ñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rêta pîpe nde reique ãgua.

⁷ Sese niha che teieté ndasoí nde reca. Nde ñehe pîpe tẽi rumo che remimboacua erembogüerara.

⁸ Esepia, che avei niha areco che cuaita. Iyavei areco sundao che voya. Eso peve, ahese ñepei upe, ahe evocoiyase oso voi eté; ambuae upe: Erio, ahese, ou voíño ité cheu. Ipare, Ereyapora co mbahe, ahese che rembiguai upe, ahe evocoiyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:
—Supi eté ndasepiai vahe ité co mbia che reroya tupri vahe nungar judío eta pãhuve —ehi.

¹⁰ Yuviroyevipase sundao rerecuar mboripar sêtave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no.

¹² Virovise tecua oso, osepia tehögüer ava virocuase yuvireco ñoti ãgua. Ahe cuña imer mano vahecuer membri ñepei vahe ité viña. Tecua pîpendar setá iteanga ava yuviraso supi.

¹³ Cuña repiase rumo, oiparaisuereco. Ipare aipo ehi chupe:
—Ereyaseho eme —ehi.

¹⁴ Evocoiyase oyemboya oso, opoco tehögüer riru rese. Sese ovosii vahe evocoiyase viropitaño yuvireco chupe. Ipare aipo ehi tehögüer upe:
—Mbia chñivahe, che aipo ahe ndeu: ¡Eñarapuha! —ehi.

¹⁵ Evocoiyase omano vahecuer oñarapuha oñ iyavei oñehe no. Ichui Jesús omondo ichi upe.

¹⁶ Opacatu tupri ité ava oyembosiquiye sepiase yuvireco:
—Cũritei oyemboyecua Tũpa ñehe mombehusar seco ivate vahe yande pãhuve cute —ehi yuvireco.

Iyavei,

—Tũpa niha ou güecua pñivii ãgua oico —ehi avei yuvireco.

¹⁷ Ipare co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca ãgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe.

¹⁹ Evocoiyase omondo ñuvirío vupindar Jesús upe mbahe rese porandu ãgua ‘¿nde ité vo Tũpa Rembiporavo aipo sãrombri ereico, anise oime tie ambuae orosãro vaherã?’ oyapave.

²⁰ Evocoiyase oyepota yuviraso Jesús upe aipo ehi yuvireco chupe:
—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tũpa Rembiporavo ereico imombehupri ereyu vaherã, anise ambuae pñha orosãrora oroico? —ehi yuvireco chupe.

²¹ Ahe arí pîpeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoí vahe setá ombogüera.

²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoí vahe osareco tupri cũritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei

yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa” peyera chupe.

²³ ¡Oviharetera acoi ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porẽhisave, capihiata ivitu ombovambova vahe nungar pĩha?

²⁵ Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi.

²⁶ ¿‘Mara ehi secocuer’ peye vo chupe? ¿Tũpa ñehe mombehusar ité pĩha? Ahe ité, iyavei evocoi niha ivate catu vahe Tũpa ñehe mombehusar sui.

²⁷ Ahe chupe ité Tũpa icuachiapri aracahendar pipe aipo ehi: ‘Amondora che ñehe mombehusar nde renondeve nde raperã moingatu ãgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

²⁹ “Co iñehe renduse opacatu ava, opacatu guarepochi rerocuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tũpa aviye vahe ité’ ehi eté yuvireco cute.

³⁰ Fariseo eta rumo iyavei Moisés porocuaite rese oporombohe vahe ahe noñeapiramo uca potai vahe Juan upe yuvireco, ahe viroĩroño Tũpa remimbotar oyeupendar yuvireco.

³¹ “¿Mbahe rese pĩha amboyoyara ava recocuer cũriteindar? ¿Mara ehi pĩha secocuer?

³² Ahe inungar chĩhivahe iguayi tẽi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tẽi mimbĩ pẽu, ndapepivoi eté rumo; iyavei orosapucái tẽi sapucaisa viharẽhisa resendar pẽu, ndapeyasehoi avei’ ehi.

³³ Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbia caruguar vireco vahe’ peye tupri tẽi chupe no.

³⁴ Coiye che ayu, Ava Riquehir, acarú iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tẽi iyavei ava guarepochi rerocuasar mboripar tẽi’ peye avei cheu.

³⁵ Ava Tũpa mbahecuasa vireco vahe rumo icuasara sembiapo rese” ehi.

Fariseo Simón serer vahe rêtave Jesús secoi

³⁶ Fariseo Simón serer vahe oñehe Jesús upe: “Terecarumi che piri” ehi. Jesús evocoyase oso sêtave uguapi oĩ mesave.

³⁷ Ahese cuña angaipa viyar evocoi tecua pendar secoi vahe oyandu ichose Simón rêtave icaru ãgua. Sese viroyepota aheve mbahe sãacua vahe siru pipe seraso sepirusu vahe chupe.

³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe sãacua vahe ipi rese.

³⁹ Sepiase fariseo, ipihañemoñeta tẽi: “Co mbia Tũpa ñehe mombehusar itese, oicuaño itera co cuña opoco vahe oyese ndipihai vahe viña” ehi tẽi fariseo chupe.

⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepeí virocua guarepochi quiniento tupri mboraviqui repirã ichui. Ambuae evocoyase cincuenta rupive virocua.

⁴² Ipare ndoicatu irise ité imboyeví ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

⁴³ —Cheu ndoyaví guarepochi virocua catu vahe ichui —ehi Simón.

—Taa, supí eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aiquese acoi nde rêta pipe, nde nderembouimi eté i che písei ãgua cheu; co cuña rumo güesai pipe oyosei che pí. Ipare omombiru oha aprí pipe ae no.

⁴⁵ Iyavei nde ndache rovarupítei eve; co cuña rumo, acoi nde rêta pipe che reique ramomiseve che pírupíte voi eté.

⁴⁶ “Nde nderemondoí mbahe síacua vahe che ãca rese; co cuña rumo opa tupri voi oipichi mbahe síacua vahe che pí rese.

⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri uguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi písirosa. Sese eso tupriño eico —ehi.

8

Cuña oipítiví vahe Jesús yuvireco

¹ Ipare Jesús uguata opacatu tecua rupi, omombehu ñehesa avíye vahe Tũpa mborerecuasa resendar oico. Doce vahe apóstol supive yuvirecoi.

² Cuña avei yuviraso supí, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María secoi, Magdalena serer yoapisa vahe, ahe ichui osẽ vahecuer siete tupri carugar;

³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipítiví mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia ãgua yuvireco. Ipare oñemonuha guasuse yuvireco, ahese Jesús setá mbahe rese omboyoyayoya oporombohe aipo ehi:

⁵ “Ñepeí mbia osẽ omaheti oico. Ahe otiapi-apíise mbahe rãhii oso, moviro oití perí rupi. Ahe opa tẽi oicambe yuvireco, iyavei vírai opa tẽi yuvirohu.

⁶ Iyavei moviro tẽi oití iví nayanai vahesave ita pãhuve. Sese cūritei sorí; opaño rumo ipiru. Esepia niha, iví nañaquii chupe.

⁷ Iyavei ambuae oití yu pãhuve. Ipare oyoya tupri sorí yuvireco; yu rumo opaño oyopi.

⁸ Ambuae rumo oití iví avíye vahesave. Ipare sorise, iha vai eté yuvireco; ahe iha retacuer amove cien tupri ité ñepeí-peí mbahe miti sui osẽ” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pĩha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi.

¹⁰ Evocoiyase omboyeví chupe: “Pẽu Tũpa oicua uca ité mbahe ndicuasai vahe omborerecuasa resendar; ambuae ava rumo ambohe tẽi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tĩsa resendar

¹¹ “Co yembohesa resendar aipo oyapave aipo ehi: Mbahe rãhii ahe inungar Tũpa Ñehengagüer;

¹² iyavei mbahe rãhii perí rupi seitipri, ahe inungar acoi ava osendu tẽi vahe Tũpa Ñehengagüer yuvireco oyapave. Ipare rumo ou vĩrai chupe, ahe inungar caruguar ou vahe chupe opaño oyaracua mocañi Tũpa Ñehengagüer sui ‘toviroya eme iyavei toñepisiro eme yuvireco’ oyapave tẽi.

¹³ Acoi mbahe rãhii seitipri ita mahugüer rupi, ahe inungar acoi ava osendu tẽi vahe Tũpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe guapo ovĩracua ãgua; viroya raimi tẽi yuvireco. Oyepotase rumo mbahe tẽi chupe, oyepipi voĩño yuvireco ichui.

¹⁴ Acoi mbahe rãhii seitipri yu pãhu rupi, ahe inungar acoi osendu tẽi vahe. Ipare rumo oyemboyepipi uca mbegüeño ambuae mbahe rese opihañemoñetá iteangasa pipe tẽi, ombahe eta rese iyavei güemimbotarai mbahe tẽi potasa pipe avei. Ëgüe ehi ahe ava inungar mbahe miti ndihai vahe ité.

¹⁵ Acoi mbahe rãhii seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tũpa Ñehengagüer rese oyapisaca ãgua yepi; viroya tupri ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape ãgua.

¹⁷ Esepia, ndipoi eté mbahe ñomipri, ndayasepiai vaherã curi. Iyavei yaposa vahe imombehupirẽhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherã yuvireco ava rehii sui.

²⁰ Oime rumo ambuae ava imombehusar chupe,

—Nde si, nde rivireta reseve nde repia pota tẽi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

22 Ñepeí ari Jesús oha carite pípe güemimbohe eta reseve. Ipare aipo ehi:
—Yaso peve ípa rovai —ehi.

Evocoiyase ahe yuviraso.

23 Yuviroguata viteseve, oqueño Jesús ou. Ahese ípa pípe aviyeteramo tēi ivítu ai omboha guasu-guasú carite pípe í, omondo pota ité ípive viña.

24 Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ípive! —ehi yuvireco.

Ahese omahe. Ipare oñehe pĩrata ivítu ai upe iyavei í ohítu vahe upe: “¡Pepítuhu!” ehi. Aheseve voi opítuhu tupri.

25 Evocoiyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyéño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pĩha co mbia! Esepia niha, ivítu ai, para guasu avei omboyeroa —ehi tēi oyeupe yuvireco.

Mbia Gerasa iguar vireco vahe carugar oyese

26 Coiye oyepota yuviraso Gerasa ívi rese cute, ahe ambuae ípa coti ívi Galilea rovai.

27-29 Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopítai vahe ité oi pípe yepi; ēgüe ehi rumo ahe tehögüer ruvípa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pípe sereco, ípi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoiyase Jesús osēse carite pípe sui, osovaichi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepipi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

30 —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve.

31-32 Oimese rumo cuchi setá ocaru vahe ivitri ruambesave, carugar evocoiyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pípe’ oyapave viña. “Peiqueño sese” ehi carugar upe.

33 Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ípa pípe. Aheve ípive opa tēi eté ocañi yuvireco.

34 Cuchi rãrosar osepiase ahe mbahe yuvireco, opa yuvinoña yuviraso co mbahe mombehu tecua pípe ava upe, cove rupi avei no.

35 Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepiase ahe mbia carugar rerecosarer oguapi oĩ ñipiimi, oyemonde tupri, yaracua tupri avei oico. Ahese oyembosiquiye tēi yuvireco.

36 Acoi ava osepiase vahecuer, ahe opa mbahe omombehu yuvireco co mbia carugar rerecosar cuera agüer.

37 Ahese opacatu ava Gerasa pendar, yivirindar avei Jesús upe, “Esiri cohava sui” ehi yuvireco. Esepia niha, osiquiyé iteanga yuvireco ichui. Evocoiyase oha carite pípe. Ipare osoño.

³⁸ Yipindar rumo evocoi mbia caruguar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tūpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevisé Jesús ipa rovai oso, aheve ava rehi oviharetesa pipe oipisi tupri yuvireco. Esepia niha, ava opacatu ité osāro yuvireco.

⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave.

⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve peri rupi ava rehi yuvirasoño supi; oyemboti tupri ité yuvireco.

⁴³ Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuera eté rumo.

⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui.

⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehi mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

⁴⁷ Ahe cuña ndoicatui oñemi. Sese oriri oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupri apocose iturucuar rese’ ahe ndeu” ehi.

⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñeheviteseva, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase ñeheviteseva aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoi uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua.

⁵² Aheseve opacatu ava oyaseho ati, ndoyembovihal tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña.

⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocarú” ehi iyepotase.

⁵⁶ Iyesupa evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

9

Jesús doce güemimbohe omondo Vu Tūpa mborerecuasa resendar mombehu āgua

¹ Jesús opa omonuha güemimbohe doce vahe oyeupe. Ipare omondo opĩratasa opacatu upe carugar ambuae-ae tēi vahe imboyepepi āgua ava sui iyavei ava mbogüera āgua imbaherasisa sui.

² Opa omondo Vu Tūpa mborerecuasa resendar mombehu āgua, ava imbaheasi vahe mbogüera āgua avei.

³ Yipĩndar rumo aipo ehi chupe:

—Ndaperasoí chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso.

⁴ Pepitami ranera ñepeí oi pipe güeraño tecua yacatu peico.

⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñhengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pīha?” ehi tēi. Esepia niha, aipo, “Juan ocuerayevi” ehi yuvireco chupe.

⁸ Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tūpa ñehe mombehusar arachendar revo, ahe tēi ocuerayevi” ehi yuvireco viña.

⁹ Herodes rumo aipo ehi:

—Che niha ayasia uca Juan āca —ehi—. ¿Uma rerācua pīha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehi sui, viraso ivi iporupirēhisave tecua Betsaida cotive.

¹¹ Ahe ava rehi rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco.

¹⁶ Evocoyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco.

¹⁷ Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropĩsirosar secoi” ehi

¹⁸ Ñepe ari pipe Jesús oyeruqui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehúsar aracahendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropĩsirosar ereico —ehi Pedro imboyevi chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi.

²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaíta rese oporombohe vahe remiamotarēhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua ari yacatu rupi iyavei toguata tupri che rupi.

²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora.

²⁵ Esepia, ¿aviye ai angahu pñha ava upe opacatu mbahe co ivi pipendar pisi ãgua tēi, ahe ae tēi omocañise güecocuer yuvireco viña?

²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ãgüe ahera ichui acoi ayevise che reco pñratasa pipe, che Ru reco pñrata porañetesa pipe avei sembiguai rehii iva pendar maranehi reseve curi.

²⁷ Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi.

²⁹ Oyerure viteseve, oñecuñaro sepiaca. Iturucuar evocoyase sendi, morochí eteanga.

³⁰ Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei.

³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe.

³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesi yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivíi no.

³³ Evocoi mbia oyepepise ichui yuvireco, ahese Pedro aipo ehi chupe:
—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara — ehi.

Pedro rumo ndoicuai eté aipo ohesa.

³⁴ Iyavei ñehe viteseva, aviyeteramo tēi iporēhi iva quíha, oyopipa tupri ité. Evocoiyase osiquiye tēi yuvireco.

³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chihivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovañchi yuvireco.

³⁸ Ahese mbia ava pãhuve aipo ehi pĩrata voi eté:
—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

³⁹ caruguar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui.

⁴⁰ Amombehu tēi niha nde remimbohe upe ‘tomboyepemi tēi caruguar ichui’ che yapave viña; nomboyepēi eté rumo ichui yuvireco —ehi.

⁴¹ Ahe omboyeví:
—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

⁴² Chihivahe oyemboyase rumo sese, caruguar omboviapi voi imondo ivive, imoeõha iri. Jesús rumo oñehe pĩrata caruguar upe imose ãgua chihivahe sui. Ahese chihivahe ocuera tupri ité. Ipare omboyeví tu upe.

⁴³ Ahese opacatu ava, “¡Mara ehi rutei!” ehi tēi yuvireco Tũpa pĩratasa rembiapo avíye vahe repiase.

Jesús omombehu iri omano ãgua

Opacatu ava ndoyembovihal viteseva yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tũpa ndoipotai eté senducua ãgua chupe; osiquiye chupe oporandu ãgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pĩha ivate catu vaherã curi?’ oyapave.

47 Jesús rumo oicuaño ipihañemoñetasa yuvireco. Evocoyase oipisi chihivahemi seru oipive imoha.

48 Ipare aipo ehi güemimbohe eta upe:

—Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pãhu pendar, ahe aviye catu vahe —ehi.

Acoi yande mboyoyasar; ahe ndahei yande amotarëhisar

49 Evocoyase Juan aipo ehi chupe:

—Ore mbohesar, orosepia niha mbia ombogüera vahe caruguar pĩratasa sui ava nde rer pipe oico; ore rumo ndoroipotai chupe evocoyia seco ãgua. Esepia niha, ndahei yande rupindar secoi —ehi.

50 Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarëhisar; ahe rumo yande mboyoyasar —ehi güemimbohe eta upe.

Jesús oñhengata Santiago upe, Juan upe avei

51 Virovise rumo ari ivave Jesús so ãgua, ahese ahe aipo ehi: “Yaso ru Jerusalén ve cūrítei” ehi.

52 Evocoyase omondo ava güenonera. Ahe yuviraso tecua Samaria ivi rupi ipituhu ãgua moingatu viña;

53 Samaria iguar rumo nomoingue potai eté güëtave yuvireco. Esepia, oicua Jerusalén ve ichose yuvireco.

54 Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

55 “¡Aní!” ehi oyemboyere chupe.

56 Ipare yuviraso ambuae tecuave.

Oguata pota vahe Jesús rupi

57 Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

58 Ahe rumo aipo ehi:

—Aguara vireco güëtara, vĩrai avei vireco guaiti; che rumo, Ava Riquehĩ, ndarecoi que che rēta che pituhu ãgua —ehi chupe.

59 Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

60 —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tũpa mborerecuasa resendar ava upe —ehi.

61 Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rēta mbahe moingatu che so ãgua —ehi.

62 —¡Aní! —ehi ahe mbia upe—. Esepia, inungar acoi oipisi vahe ivi mboyeresá imohivi tupri ãgua, omahese rumo guaquicuei coti, evocoi nungar naporai Tũpa mborerecuasave yuviroique vaheerã —ehi.

10

Jesús oyocuai setenta y dos tupri güemimbohe

1 Ipare yande Yar oiporavo setenta y dos ava ñepei-peí tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi.

³ “Peso, opomondo ovesami nungar ava mbahe mimba oñaro vahe nungar pãhuve.

⁴ Perasoi rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi.

⁵ Acoi peiquese que oi pipe, yipindar rumo peyapo ranera: ‘Avirave. Tūpa tape rovasa’ peyera.

⁶ Acoi aheve oimese ava aviye vahe, ahe oipisira Tūpa porovasasa; anise evocoyase ndipoi chira porovasasa chupe nara.

⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepe oi pipe güeraño pepitañora.

⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui.

⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera.

¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

¹¹ ‘¡Co pe recua pipendar ivi chimborer oya vahe ore pi rese oroipipete oyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe.

¹² Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi promondisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu avei omondora oãca rese oangaipa mboasisa pipe yuvireco viña no.

¹⁴ Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye.

¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoyase che mbousar avei omboyepipiño oyesui” ehi güemimbohe eta upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetasave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha carugar rerecurar ovipise iva sui overa vahe nungar.

19 Che niha amondo pĩratasa pẽu peguata vaheerã mboi iyavei mbahe rumbiquĩape hari rupi opacatu pe amotarẽhisar pĩratasa reroyĩ ãgua, que mbahe pe momaraẽhi ãgua avei.

20 Peyembovĩharetei rene cariguareta pe mboyeroyase. Iya rumo peyembovĩha pe rer iva pendar icuachiapri rese —ehi güemimbohe eta upe.

Jesús ovĩharete

21 Ahe pipeve voi Jesús, Espĩritu Santo rese, vorĩvetesa pipe aipo ehi: “Che Ru, che oromboetei. Nde niha iva Yar, ivĩ Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivĩ pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

22 “Opacatu mbahe che Ru ombou cheu. Iyavei ndipoi ava che cua vahe tahĩr che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

23 Evocoyase omahe güemimbohe eta rese, chupe güeraño aipo ehi: “Perorĩvete catu co mbahe pesepia vahe rese.

24 Esepia niha, setá etepri ava Tũpa ñehe mombehusar yuvirecoi vahe iyavei mborerecuar guasu eta aracahendar osepiã pota tẽi mbahe pe rembiepia; ndosepiã eté rumo yuvireco. Osendu pota tẽi co pe remiendu yuvireco; ahe rumo ndosendi avei yuvireco” ehi güemimbohe upe.

Jesús porombohesa Samaria iguar recocuer sui

25 Iyavei no Tũpa porocuaita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

26 Ahe omboyevi:

—¿Mara ehi vo Moisés porocuaita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

27 Evocoyase oporombohe vahe omboyevi:

—“Eresaisura nde Yar Tũpa opacatu nde pihã pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaita —ehi chupe.

28 —Supi eté —ehi—. Eremboyevi tupri ndeyeupe porandusa cheu. Eremboavĩyese evocoi, ahese ererecora tecovesa apirẽhi vahe —ehi co mbia upe.

29 Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

30 Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvĩnose ava ndipihai vahe yuvireco chupe. Ahe vĩrocuapa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipare oyuca seni seya peri rupi yuvĩraso.

31 Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso.

32 Egũe ehi tupri avei ambuae mbia pahi pĩtivĩisar levita, osepiase, oñacuasa tupriño avei oso no.

33 Ipare rumo mbia sepia potapirẽhi Samaria iguar oso ahe peri rupi avei. Ahe osepiase, oiparaisuereco.

³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese.

³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprimi tẽi co ava cheu. Acoi ndehañeco catuse sese, amboepi catu irira che yevise ndeu” ehi sãta vahe upe.

³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rõtave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güẽta pipe.

³⁹ Icupihir evocoyase María serer. Ahe oguapi Jesús pive ñehe rendu oĩ.

⁴⁰ Marta rumo oyembopihaviracua opacatu mbahe rese oico. Ipare oyemboya oso Jesús rese opihaviracua pipe aipo ehi chupe:

—Che Yar, ¿aviye ai vo evocoi che cupihir chini tẽi nde piri che poraviqui viteseve? Emombehu chupe, tou, tache pitivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tẽi setá mbahe apo ãgua eico?

⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tẽi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tũpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarẽhimbar upe.

Ore mboangaipa ucai rene eve, ore renose catu mbahe tẽi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sõtave pitu mbiter rupi aipo peyera chupe: ‘Che mboripar, emboumi tẽi mbosapi pan cheu tamboyevire ndeu.

⁶ Esepia, ambuae che mboripar oyepota ou che rõtave; ndarecoi eté rumo mbahe amondomi vaherã chupe’ peyera chupe.

⁷ Ipare ahe, ‘Che mañeco tẽi rene eve. Esepia, opa ayoquenda, iyavei co che rahir opa aropituhu seru. Sese ndiyai apũha mbahe mondo ndeu’ ehiñora pẽu viña.

⁸ Supi eté, yepe nopuhai chietera mbahe mondo pëu pe mboripar secose viña, opũhaño itera rumo 'tache mañeco iri eme' oyapave. Ipare omondoño itera opacatu mbahe pe porandusa pëu.

⁹ Sese aipo ahe pëu: Pe porandura mbahe rese Tũpa upe, ahese omboura pëu; peseca ahe mbahe, ahese peyosura; inungar pemota oquenda, ãgũe peyera peyeroquisa pipe Tũpa upe, ahese imboisara mbahe mbou ãgua pëu.

¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tũpa upe, chupe imboisara.

¹¹ "Oimese tahi vahe pe pãhuve, tahir oporanduse pira rese vu upe, ¿omondora pĩha mboi tẽi guahir upe viña?

¹² anise, ¿omondora pĩha oporanduse mbahe rupiha rese, mbahe rumbiquiãpe tẽi chupe viña?

¹³ ¡Aní! Esepia, pe yepe ava ndaseco põrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!" ehi güemimbohe eta upe.

"Jesús vireco carugar pĩratasa oye" ehi tupri tẽi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehii sepiase, ndoyembovĩhai tẽi yuvireco.

¹⁵ Amove rumo ava aipo ehi tẽi yuvireco: "Beelzebú, carugar rereciar pĩratasa pipe revo omboyepipi carugar oico" ehi tẽi yuvireco chupe.

¹⁶ Ambuae ava secoãhasa pipe oporandu yuvireco chupe: "Eyapo ru mbahe nde rembiapo iva pendar nde recocuer cua ãgua" ehi tẽi.

¹⁷ Ahe rumo oicuaño ipiãhañemoñetas. Evocoyase aipo ehi chupe:

"Que mborereciar guasu povri pendar ovava-vavase oyeupe oyeamotarẽhisave yuvireco, ahese evocoi mborereciar pĩratasa ocañi tẽira. Iyavei ava omu rese ae oyeamotarẽhi vahe, oyemocañi aveira yuvireco no.

¹⁸ ãgũe ehi avei niha carugar. Esepia, sereciar omboyepipise opovri pendar, ovavara oyeupe yuvireco viña. Ahese oyemocañi tẽira yuvireco. Co ñehesa aipo ahe pëu. Esepia pe, 'Beelzebú pĩratasa pipe tẽi opa omose carugar ava sui oico' peye tẽi cheu.

¹⁹ ãgũe ahese rumo viña, ¿ava pĩratasa pipe ru evocoyase pe voya omboyepipi carugar ava sui? Pe voya ae omboyecua pe ñehe pe rembiavi yuvireco pëu.

²⁰ Che rumo Tũpa pĩratasa pipe carugar amboyepipi ava sui. Sese cũritei Tũpa mborerecuasa oyepota ité pëu.

²¹ "Inungar oime ava ipĩrata etepri vahe, iyavei vireco oyeroyasa. Ipipe osãro güeta opacatu mbahe ipipendar avei icañiẽhi ãgua.

²² Acoi ouse rumo ambuae ipĩrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

²³ "Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndosecai vahe ava cheu, ahe omosai tẽi yuvireco che sui" ehi.

Carugar oyevi iri güeco agüerve

²⁴ "Acoi osese carugar ava sui, uguata tẽi iva ipiru vahe rupi opituhu ãgua reca. Ipare rumo ndoyosuise, ipiãhañemoñeta oyeupe, 'Ayevi irira che reco agüerve vicho' ehi.

²⁵ Aheve oyevisse, osepia iri secocuer inungar oi sahuvapri tupri.

²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pihá pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

Tũpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehii pãhu pendar oñehe pĩrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei viroya vahe ité, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco põrai vahe oporandu poromondiisa rese yuvireco

²⁹ Ava rehii oyere ati vitese Jesús rese yuvireco, ahe aipo ehi: “Pe cũriteindar ava ndaseco põrai vahe, peporandu tēi poromondiisa che recocuer cua ãgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara.

³⁰ Inungar Jonás poromondiisa secoi ava Nínive pendar upe, ěgüe ehi aveira niha Ava Riquehir reco pipe oimera poromondiisa ava cũriteindar upe.

³¹ Acoi ari cañi pipe cuña mborerecuar guasu irohí coti secua vahe porandusave omombehura co ava cũriteindar cañipa ãgua. Esepia, ahe ou amombri ivi sui Salomón mbahecuaasa rendu ãgua; cũritei rumo oime ivate catu vahe cohava Salomón sui.

³² Iyavei ari cañi pipe ava tecua Nínive pendar porandusave omombehura ava cũriteindar cañipa ãgua. Esepia niha, omboasise oangaipa, oyevi Tũpa upe yuvireco Jonás omombehuse Tũpa Ñehengagüer chupe; cũritei rumo oime ivate catu vahe Jonás sui pe pãhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondo chiaveira que mbahevrive. Iyacatu rumo yamondora ivate tataendi rendave ‘tosape opacatu ava oi que vahe oi pipe’ yande yapave.

³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pĩtumimbi vahe nungar tēi.

³⁵ Sese peicua catu co poroesapesa pereco vahe, tape rereco eme pĩtumimbi vahe nungar.

³⁶ Co supi eté vahe osesape tuprise opacatu pe pihave, ndipoise que pĩtumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pĩtu vahe pēu” ehi.

Jesús omombehu fariseo iyavei Moisés porocuaita rese oporombohe vahe recocuerai

³⁷ Opase oñehe Jesús, fariseo viraso güētave imbocarú. Oiquese sētave oso, oguapi mesave oĩ.

³⁸ Ócaru renondeve ndoyepoise rumo, ahese fariseo ndoyembovihai tēi nomboaviyese judío porocuaita.

³⁹ Ahe rumo aipo ehi fariseo upe:

—Inungar igua rĩru iyavei tembihu rĩru icupe rupi tēi yoseipri, ipipe rumo iquihá opitaño ité, ěgüe ehi tupri avei pe recocuer pe monda raisave mbahe-mbahe tēi pe reco pipe.

⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?

⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepi-pe diez vahe sui Tūpa upe viña, pe rumo ndaperoyai teco ñvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi āgua tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvipa icuaēhise ava oguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe,
—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipitiviimi eté ahe ava imboaviye āgua rese yuvireco.

⁴⁷ “¡Peparaisu! Esepia, pemoingatu Tūpa ñehe mombehusar ruvipagüer peico Tūpa mboeteisa angahu pipe tēi. Pe ramoi teieté rumo oyuca yuvireco.

⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tūpa ñehe mombehusar yuvireco. Pe evocoyase cūritei pemoingatu vite suvipagüer peico.

⁴⁹ “Sese Tūpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi.

⁵⁰ Esepia, ava ndiporeroyai vahe cūriteindar upe ité omondora oñemoirosa opacatu oñehe mombehusar yucagüer rese aracahe suive, cūriteindar avei oyucase yuvireco.

⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tūpa opara omondo oñemoirosa ahe yuca agüer rese ava ndiporeroyai vahe cūriteindar upe curi.

⁵² “¡Peparaisu pe Moisés porocuita rese oporombohe tēi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua” ehi chupe.

⁵³ Ipare Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe,

⁵⁴ oseoāha-āha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasu yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo.

² Esepia, yaposa vahe imombehupirēhi cūrītei icuasaño itera curi. Iyavei mbahe ñomipri icuasaño aveira no.

³ Supi eté opacatu mbahe pemombehu vahe pītumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

¿Uma sui pīha siquiyera?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pēu.

⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepei sui.

⁷ Tūpa niha oicua ñepei-peí yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehír, ‘Co che reroyasar secoi’ aipo ahera che Ru upe sembiguai rovaque.

⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehír, rese, ahe chupe oimeño ñeroisa. Acoi que ava iñehe-ñehe tēi vahe rumo Espiritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoāha āgua yuvireco, anise mborerecuar mbahe moingatutar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira.

¹² Esepia niha, ahe pipeve voi Espiritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

Ñearosa mbahe pota raisa sui

¹³ Ñepei mbia ava rehí pāhu pendar aipo ehi Jesús upe:

—Porombohesar, emombehumi che riquehír upe, tomboyahomi tēi mbahe che mombaesa cheu —ehi.

¹⁴ Ahe rumo omboyeví chupe:

—Che mboripar, che ndachecuitai mbahe moingatu āgua, mbahe mboyaho-yaho āgua avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati āgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbia mbahe yar, iha tupri ai eté semiti.

¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi.

¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhí opacatu mbahe areco vahe avei no.

19 Evocoiyase aipo ahera cheyeupe: Che mboripar, oime setá mbahe cheu araviter momba-momba ãgua; sese cūritei apituhura vichico, acarura, acahura iyavei ayemboviharetera no, ahera' ehi.

20 Tūpa rumo aipo ehira chupe: 'Mbia, nandearacuai eté eico, co pĩtu pipeve voi eté eremanora. Co mbahe nde rembiapocatu, ¿ava mahera pĩha evocoiyase?' ehira chupe.

21 Ëgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque" ehi ahe mbia upe.

Tūpa osãro opacatu guahir

22 Ipare aipo ehi Jesús güemimbohe upe: "Co amombehura pēu: Ndapeyemomahenduha guasu ai chira pe remihura rese pe recove ãgua, pe turucuarã rese tēi avei no.

23 Yande recovesa rumo aviye catu vahe tembihu sui; yande retecuer avei aviye catu turucuar sui no.

24 Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhi rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui!

25 Ndipoi eté que ñepepe pe pāhu pendar oicatu vahe opihañemoñetá iteangasa pipe tēi güecocuer mbosasaviño ãgua.

26 Supi eté ndapeicatuise yapo, ndiyai peyemomahenduha guasu ai mbahe rese.

27 "Pemahecua ru mbahe potri caha pipendar rese: ndoporaviqui eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

28 Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe!

29 Sese, '¿Mbahe pĩha yahura, mbahe pĩha yamondera?' ndapeyei chira pe yemomahenduha guasu aisa pipe.

30 Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe.

31 Aviye catu rumo pesecara pe Yar Tūpa povrive pe reco ãgua, ahese omboura que mbahe ipane vahe pēu" ehi.

Ivave mbahe eta oime vahe yandeu

32 "Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco ãgua.

33 Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiquei chira ñomi ãgua pe sui iyavei mbahe rasoi nomomari chiaveira.

34 Esepia, pe mbahe pe rembiereco setá catu vahesa rupi-rupi pe pihanemoñeta yepi" ehi.

Peyemoingatu Tūpa Rahir yevi ãgua

35 "Peyemoingatu tupri che yevi ãgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe.

36 Peico imboacuapri güerecuar osãro vahe nungar mendasa sui iyevise, oquenda imotase, omboi voi vahe yuvireco chupe.

³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú.

³⁸ Yepe serecuar oyepotara pĩtu mbiter ou viña, anise añihiveive, ahe rumo osãroño itera chupe imboi ãgua yuvireco. Evocoyase serecuar aviye ai etera chupe.

³⁹ Peyapisaca tupri co rese: acoi oi yar oicuase mbahe hora imonda vahe yepota ãgua, ahese opitara imonda vahe rãro güeta pipe sui mbahe renosehi ãgua.

⁴⁰ Ëgüe peye aveira peyemoingatu che yevi ãgua. Esepia niha, che, Ava Riquehir, aporoesapaha tẽira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:

—Che Yar, ¿oreuñomi pĩha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseyá icuaitarã güeta pipendar rese hañeco ãgua ‘tembihi tomondo che rẽta pipendar upe che porocuita rupi’ ohesave.

⁴³ Acoi omboaviyese ocuaita, ahese oviharetera güerecuar yevise.

⁴⁴ Supi eté niha, serecuar oyocuirá opacatu ombahe rese hañeco ãgua.

⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tẽi sereco iyavei ocaru, oihu tẽi osavaipo-ipoño avei oico.

⁴⁶ Ipare rumo serecuar oyepotara imahemohaẽhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tẽise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara.

⁴⁸ Acoi mbiguai nomboaviyei vahe ocuaita icua tupriẽhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarẽhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya.

⁵⁰ Aique ranera rumo mbahe tẽi che recoãhasa pipe, jẽgüe ahera che paraisú itera imboaviye ãgua!

⁵¹ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che ayu che sui ava yeamotarẽhi ãgua.

⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarẽhira yuvireco che recocuer sui: mbosapi oyamotarẽhira ñuvirío vahe, ñuvirío vahe evocoyase oyamotarẽhira mbosapi vahe yuvireco.

⁵³ Que ava oyamotarẽhira guahir, anise tahir evocoyase oyamotarẽhira vu; cuña oyamotarẽhira omembri, imembri evocoyase oyamotarẽhira osi; sovayar oyamotarẽhira vovayar” ehi güemimbohe upe.

Iva pendar poromondiisa mboyecuada

⁵⁴ Ipare Jesús aipo ehi ava rehí upe: “Pe pesepiase mbahe pĩtu arí sosa coti sui opũhase, ahese, ‘Oquirá’ peye. Ëgüe ehi eté oqui.

⁵⁵ Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ěgüe ehi eté.

⁵⁶ ¡Pe Tūpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūrtei oime vaherā mombehu peico!” ehi.

Peñero pe amotarēhimbar upe

⁵⁷ “¿Mahera napesāha ranei pe ae ité co mbahe supi eté vahe?

⁵⁸ Acoi que ava nde amotarēhisar nde soho ucase nde mondo āgua mborerecuar rovai, emoingatu tupri voi mbahe eico chupe tenondeve nde rera-soēhi āgua sovai; anise, mborerecuar nde mondora ava naporai vahe rarōsar upe. Ahe evocoyase nde roquendara.

⁵⁹ Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ěgüe ehi mbahe chupe viña.

³ ¡Aní rumo! Acoi ndapemboasiise pe angaipa Tūpa upe pe yevi āgua, pe avei opara pecañi tēi.

⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no.

⁵ Aní rumo; acoi ndapemboasiise pe angaipa Tūpa upe peyevi āgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese.

⁷ Ahese aipo ehi mbia oco rārosar upe: ‘Esendu, che ayu pihi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihāi tupri tēi cohava’ ehi.

⁸ Ico rarōsar rumo omboyevi chupe aipo ehi: ‘Che rerecuar, ěgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese.

⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe.

¹¹ Aheve oime cuña imbaheasi vahe, dieciocho araviter rupi ahe mba-herasisa vireco, carugar tēi omboyepami uca sereco. Sese ndoicatui opūha tupri uguata.

¹² Osepia rumo Jesús, “Erio” ehi chupe.

—Cuña, cūrtei nanembaheasi iri eico cute —ehi.

¹³ Evocoyase omondose opo sese, aheseve voi cuña oyemohivi. Ipare omboetei Tūpa oico.

14 Judío tũparo rerecuar rumo oñemoiro ahe cuña mbogüerasa rese mbituhusa arĩ pipe. Sese aipo ehi ava eta upe:

—Oime niha seis arĩ mboravĩqui ãgua; ahe arĩ pipe peyura peposano ãgua, ndahei chira mbituhusa arĩ pipe —ehi.

15 Evocoyase ahe mbĩa upe omboyevĩ aipo ehi:

—Pe Tũpa reroyasar angahu tẽi peico vahe, ¿nomboihui vo pe pãhu pendar acoi güeimba tĩvi iyavei guaricu mbituhusa arĩ pipe yuvireco yepi no?

16 Co rumo cuña, Abraham suindar Carugar omombaheasi vahe dieciocho aravĩter suive sereco, ¿ndiyai eté pĩha evocoyase imbogüerasa mbituhusa arĩ pipe? —ehi tũparo pendar rerecuar upe.

17 Aipo ehise, opacatu yamotarẽhisar yuvinochi tẽi yuvireco ichui. Ambuae ava rumo oyembovĩaño opacatu Jesús rembiapo osepiase yuvireco.

Yembohesa mostaza rãhĩ suindar

18 Evocoyase Jesús aipo ehi avei: “¿Mbahe nungar pĩha Tũpa povri pendar, iyavei mbahe rese vo amboyoyara?”

19 Oyoya tupri ité mostaza rãhĩ rese, inungar acoi mbĩa oñoti vahe oco pipe. Ichui ocuacua, tuvichá iteanga. Ahe sãca rese vĩrai rehĩ oyapo guaitirã” ehi oporombohe.

Yembohesa pan mboapeposa sui

20 Evocoyase Jesús aipo ehi iri: “¿Mbahe rese pĩha amboyoyara Tũpa povri pendar?”

21 Oyoya tupri co pan mboapeposa rese, acoi cuña omboyeseha tupri vahe mbosapĩ sãhambri trigo cuhĩ rese opacatu imboapepo ãgua yepi” ehi oporombohe.

Jesús perĩ icãhimi vahe nungar

22 Ipare Jesús osoño Jerusalén ve, opita-pita tecua yacatu rupi oporombohe oico.

23 Ahe supi ichose, ñepi mbĩa oporandu chupe aipo ehi:

—Che Yar, ¿supi eté pĩha moviromi tẽi ava oñepĩsirora yuvireco? —ehi.

Ahe evocoyase omboyevĩ chupe:

24 —Peyemoviracua tupri catu peique ãgua oquendipĩ cãhimi rupi. Esepia niha, supi eté setá ava osãha tẽira yuviroique vaherã ahe oquenda rupi yuvireco viña, ndoyuviroique catui chira rumo yuvireco.

25 Supi eté ahe inungar oi yar ouse oquenda mboya viña. Amove ava evocoyase ocarve yuvirecoi vite vahe omota tẽira oquenda, ‘Ore yar, emboimi tẽi oreu’ ehi tẽira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe.

26 Evocoyase ahe aipo ehi tẽira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tẽira yuvireco chupe.

27 Ahe rumo aipo ehira: ‘Ñepi reseve niha acoi, Ndopocuai vahe, ahe pẽu. ¡Pesiri che sui, pe opacatu mbahe-mbahe tẽi aposar!’ ehiñora chupe.

28 Pe rumo imomboprira pe recocuer Tũpa povri sui, sese peyaseho tẽira, peyemoaitere tẽira peico pesepiase Abraham, Isaac, Jacob iyavei opacatu Tũpa ñehe mombehusareta yuvirecoise Tũpa povri ve ivave.

29 Iyavei ava yugüerura añihivei coti sui, caharu coti sui, norte coti sui iyavei irohĩ coti sui, ahe evocoyase yuviroguapira ocaru Tũpa mborerecuasave ipiri yuvireco.

30 Supi eté amove ava ndoyavĩ ipa tẽi vahe sei que ãgua ivave Tũpa piri viña, ahe ranengatu rumo yuviroiqueño itera ipipe iyavei amove ava tenonde

catu vahe ndoyavii ahe rane oi que va herã ivave viña. Ahe rumo ipa tẽi yuviroiquera —ehi Jesús ava rehi upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tẽi Jesús upe yuvireco:
—Eyepepiño ave sui. Esepia, Herodes niha nde yuca pota oico —ehi tẽi yuvireco chupe.

³² Ahe rumo,
—Peso, tapemombehu aipo mbia aguara nungar tẽi upe: ‘Esepia, co pipe iyavei ayihive amboyepepiñora ava sui caruguareta vichico, ambogüerañora ava imbahehasa sui, curi ayihive evocoyase amombara che cuaita’ peyera.

³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tũpa ñehe mombehusar omano co coti tẽi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tũpa ñehe mombehusar, iyavei ita pipe peyapi-yapi ava Tũpa remimbou yepi! ¡Setá rupi che opomonuha pota tẽi pe rereco, inungar tacura omonuha vahe omembri opepovrive, ãgüe ahe pota tẽi pe rereco viña, pe rumo ndapeipotai eté!

³⁵ Sese seyapirã tẽi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbítuhusa ari pipe Jesús oso ocaru mborerecuar fariseo rõtave. Aheve ambuae fariseo eta oiviro yuvireco.

² Aheve avei mbia iruru vahe secoi.

³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbítuhusa ari pipe imbaheasi vahe mbogüera ãgua; aní tie? —ehi.

⁴ Ahe rumo noñeheiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe.

⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tiví ovíapise ivícuar pipe mbítuhusa ari pipe viña? —ehi.

⁶ Ahese nomboyeví catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco.

⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachĩ tẽira yaso ipami tẽi yaguapi.

¹⁰ Yande soho ucase rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. ãgüe yahera imboeteipri yaico acoi ava yuviroguapi vahe rovaque yande piri.

¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; ěgüe ehira evocoyase mbahe imboyevipa yuvireco ndeu.

¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipāri-pāri vahe, ndasesapisoi vahe avei.

¹⁴ Esepia niha, ahe ndoicatui mbahe mboyevī yuvireco ndeu. Opase rumo ocuerayevi ava seco catupri vahe yuvireco, ahese ereviharera eico. Esepia, ereipisira mbahe aviye vahe Tūpa suindar —ehi.

Jesús oporombohe carusa rese

¹⁵ Iñehe renduse rumo, ñepei mbia yuviroguapi vahe mesave, ahe aipo ehi Jesús upe:

—¡Sovasapri catu ava Tūpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri.

¹⁷ Ipare oyepotase ari caru āgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi.

¹⁸ Opacatu rumo ava, ‘Eñemosañomi tēi cheu’ ehi pāve yuvireco. Yipindar mbia aipo ehi: ‘Che rumo arocuā ivi; iya ité aso sepia. Sese eñemosañō cheu’ ehi chupe.

¹⁹ Ambuae mbia aipo ehi: ‘Che arocuā ramo diez tupri tivī, ahe asāha ranera. Sese eñemosañō cheu’ ehi chupe.

²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi.

²¹ Oyevisē mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipāri-pāri vahe avei no’ ehi.

²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi.

²³ Evocoyase aipo ehi güembiguai upe: ‘Eguata iri ambuae perī tecua ivirindar rupi avei toyugüerumi che rētave yuvireco che piri, tomboapipopa ité che rēta yuvireco’ ehi.

²⁴ ‘Esepia niha, acoi yipindar ava aichoho uca vahe ndipoi chietera que ñepei ocaru vaherā che piri’ ehi güembiguai upe —ehi Jesús ahe mbia mbohe.

Yavai Cristo rupi guata āgua

²⁵ Ava rehī Jesús raquicuei oguata yuvireco. Sese ahe oyemboyere aipo ehi ava upe:

²⁶ “Acoi oimese que ava oipota vahe che rupi oguata āgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. ěgüe ndehise, evocoyase ndiyai chupe che remimbohe seco āgua.

²⁷ Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosī vahe viña che rupi oguata āgua, ahe chupe ndiyai che remimbohe seco āgua” ehi.

²⁸ “Que ava pe pāhu pendar omopuha potase oi, ¿ndoyapisaca ranei chira ‘¿amomba angara pīha?’ oyapave?”

²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora

³⁰ aipo ehira yuvireco: ‘Aye evocoi mbia omopuha pota tēi oi viña, ndoicatu eté rumo imboaviye’ ehira yuvireco chupe.

³¹ Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri āgua ‘¿yaicatura pīha setá catu vahe rese yavava?’ ohesave.

³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehúsar mbahe tupri rese porandu āgua chupe.

³³ Ēgüe ehi avei pe recocuer ndapeseya potaise pe mbahe opacatu, Ēgüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí aviye vahe ité yandeu; nasehe irise rumo, ndayaicatu chietera imoehe iri āgua.

³⁵ Naporai eté ivi upe nara; ndiyai avei ivi mbahe repochi resendar rese oyeseha vahe rā. Evocoyase ahe imombopri tēi vahe rā. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu āgua yuvireco.

² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroñro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³ Evocoyase Jesús omombehu ovesa resendar yembohesa:

⁴ “Que ñepei pe pāhuve virecose cien ovesa güeimba, ipare co ocañira ñepei ichui viña, oseya ranera evocoyase evocoi noventa y nueve tēi aviye vahesave seco āgua. Ipare oyevira ocañi vahe reca oso, oyosu rane itera viña.

⁵ Oyosuse, osupira oachihive vorivetesa pipe.

⁶ Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira.

⁷ Supi eté Ēgüe ehi aveira oime torivetesa guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera.

⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira.

¹⁰ Supi eté Ēgüe ehi aveira oime torivetesa Tūpa rembiguai iva pendar rehi upe que ñepei ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir.

¹² Chīhivahe catu vahe aipo ehi oyeseha upe: ‘Che ru, embou mbahe che mombahesa cheu’ ehi. Iyeseha evocoyase omboyaho ombahe imondo chupe.

¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pīpe.

¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tēi oico.

¹⁵ Evocoiyase oso mboraviqui reca mbia piri aheve. Ahe mbia evocoiyase omondo ocove güeimba cuchi rāro āgua.

¹⁶ Aheve oyemohitaro pota tēi cuchi rembihu pīpe oico viña. Ndipoi eté rumo omondo vahe chupe.

¹⁷ Evocoiyase oyemomahenduha tēi güēta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rieporēhi che rereco cohave!

¹⁸ Sese ayevira che ru rētave. Aipo ahera chupe: Ayemboangaipa Tūpa rese, nde rese avei no.

¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi.

²⁰ Evocoiyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei.

²¹ Ahese tahir aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahir che reco āgua’ ehi.

²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuā penda sese, pitaqui avei.

²³ Iyavei guaca iquirá catu vahe peyuca. ¡Yayapora pieta guasu!’ ehi.

²⁴ ‘Esepia, co che rahir aviye omano vahe secoi viña, cūritei rumo oyevi iri cheu’ ehi. Ēgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevisé ou güēta rerovicave, osendu voi ipieta guasu vahe yuvireco.

²⁶ Evocoiyase oporandu mbiguai upe mbahe oime vahe rese.

²⁷ ‘Nde rivri mo co oyevi tupri iri ou. Sese nde ru oyuca uca guaca iquirá vahe iyevisa resendar’ ehiño.

²⁸ Evocoiyase tiquehir oñemoirosa pīpe, ndoi que potai oyesupa uve oi pīpe; tu rumo osēño ité ocarve ‘eique’ oya chupe.

²⁹ Evocoiyase tahir omboyevi chupe aipo ehi: ‘Che niha setá araviter rupi oropitivii vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta āgua’ ehi vu upe.

³⁰ ‘Indó, cūritei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquirá vahe chupe’ ehi.

³¹ “Evocoiyase tu: ‘Eyapisacaño, che rahir, nde niha nderesiri vahe che sui. Opacatu che areco vahe rumo nde mbahe ité yepi.

³² Cūritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu.

² Evocoiyase sereciar ñepei opĩtivĩisar omondo seca, ahe güeruse, ‘¿Mbahe vo aipo ereyapo eico; ayandu cũritei nde rerãcua? Emoingatupa tupri voiño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe.

³ Evocoiyase mbahe rese ñangareciar: ‘¿Mara ahera pĩha co evocoiyase vichico imombopri che recose che poraviquisa sui? Ndareco iri rumo pĩratasa cheyese ivi rese che poraviqui ãgua. Achĩ eteanga aveira rumo mbahe rese che porandu ãgua’ ehi tẽi.

⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherã oyepiri’ ehi.

⁵ Evocoiyase oñehe ñepei-peĩ güereciar sui mbahe vinose tẽi vahe rese chupe. Yipindar vahe upe oporandu: ‘¿Mbovi mbahe erenose tẽi yande rereciar sui?’ ehi.

⁶ ‘Cien tupri chereve aceite siru tuvichagüe vahe rese’ ehi. Evocoiyase, ‘Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año’ ehi chupe.

⁷ Ichui ambuae mbahe vinose tẽi vahe upe oporandu no: ‘¿Mbovi mbahe vo erenose tẽi yande rereciar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiara rumo tresciento veinte quintar rupindar’ ehi.

⁸ Evocoiyase sereciar oyanduse, ‘Too, oicua ité mbahe apo’ ehi ombopasa rese ombahe rese ñangareciarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tũpa oicua catu mbahe moingatu ãgua oyeupe Tũpa reroyasar sui.

⁹ “Sese che aipo ahe pẽu: peiporu pe guarepochi pereco vahe co ivi pipe pe mboripar reime ãgua. Ichui opa tẽise pe guarepochi, oimera pe pisi vaherã teco apirẽhisave.

¹⁰ “Acoi ava mbahe tupri chíhi oyapo vahe, ahe oyapo tupri catura mbahe tuvichá vahe. Iyavei acoi ãgüe ndehi vahe chíhi vahe rese, ãgüe ndehi chihaveira mbahe tuvichá vahe rese.

¹¹ Evocoiyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco ãgua.

¹² Iyavei acoi ndapemboaviye tupriise pe cuaita ambuae ava mbahe rãro pipe, ¿ava pĩha evocoiyase omondora pe mbahe ité pẽu viña?

¹³ “Iyavei ndipoi chietera ñepei mbiguai omboyeroya vahe ñuvirío güereciar. Esepia, ñepei osaisu catura imboyeroya pipe, ambuae evocoiyase ndoyambotai chira imboyeroya potaẽhisa pipe. Ëgüe peye avei ndapeicatui Tũpa mboyeroya guarepochi pota raisa pipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco.

¹⁵ Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tũpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recocuer viña, Tũpa uve rumo mbahe tẽi eté” ehi.

Mborocuaita iyavei Tũpa mborerecuasa rese ñehesa

¹⁶ “Yipisuive Moisés porocuaita iyavei Tũpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tũpa mborerecuasa resendar, sese ava iquerẽhi catu cũritei aheve yuviroique vaherã.

¹⁷ “Yavai catura que ñepei Tũpa porocuaita mboaviyeẽhi ãgua co iva, ivi opa vaherã sui” ehi.

Jesús oporombohe mendasa sui poiēhi āgua

¹⁸ “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe.

²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive.

²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco.

²² Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ “Ahese oso Tūpa ñemoirosave. Aheve oparaisuse, omahe ivate coti, osepia amombri aracadendar Abraham Lázaro reseve.

²⁴ Evocoyase osapucaí pĩrata: ‘¡Che ramoi Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuã pipe. Esepia, che paraisu etepri co tata pĩratagüer pipe vitu’ ehi.

²⁵ Evocoyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cũritei rumo Lázaro oviharete oico cohava, nde evocoyase nde paraisu eipeve eico.

²⁶ Iyavei oime co ivicuar ipicucu vahe rasaēhi āgua oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro

²⁸ che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi.

²⁹ Abraham rumo, ‘Vireco niha Moisés porocuita iyavei Tūpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe.

³⁰ Evocoyase, ‘Taa, che ramoi Abraham, que omano vahecuer pāhu pendar rumo yuvirasose chupe, ahe evocoyase omoingatura güecocuer yuvireco viña’ ehi.

³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehe mombehusar remimombehu rese no, ndoviroyai chaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti āgua. ¡Ahe imboangaipa ucasar rumo iparaisu itera!

² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo āgua chihivahemi nungar mboangaipa uca rāgüer sui.

³ ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevisse güecocuer tupri pipe, ahese peñerora chupe.

⁴ Supi eté acoi que ambuae ava pe amotarēhi vitesse rumo siete yupagüer ñepeí ari pìpe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pīratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

⁶ Evocoyase yande Yar omboyeví chupe:

—Supi eté, Tūpa rese pe yeroyasa, yepe ndoyavíi chira mostaza rāhií tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tūpa rese pe yeroyasa pìpe, ahe evocoyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporaviquí vahe ivi mboyere cove, anise que guaca rāro yuví rupi viña; ichui iyevíse, ¿‘Eique, eguapí terecaru’ ehira pīha sereciar chupe?

⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipare nde erecarura, ereihura’ ehira chupe.

⁹ ‘Avíye ndeu’ ndehi chietera icuai pare chupe.

¹⁰ Ēgüe peye avei mbiguai nungar pe opacatu Tūpa pe cuaitarā ombou vahe mboavíyere, ‘Yande niha mbiguai tēi yaico. Esepia, yande cuaita mboavíyesar tēi yaico’ peyeñora” ehi.

Jesús ombogüera diez tupri ava lepra pìpe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi.

¹² Oyepotase tecuamive oso, ahese yuvínose diez ava lepra pìpe imbaheasi vahe yuvireco chupe. Amombríve rumo opitaño yuvireco ichui.

¹³ Osapucaí yuvireco chupe aipo ehi:

—¡Jesús, Porombohesar, ore paraísuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyeví, peso, tapeyemboyecua pahi eta yuvirecoi vahe upe —ehi.

Oyevíse rumo yuvíraso, opa ocuera tupri ombaherasisa sui yuvireco.

¹⁵⁻¹⁶ Evocoyase ñepeí ipāhu pendar, Samaria pendar, osepiase ocuerala, oyeví chupe osapucaí pīrata Tūpa upe imboeteisave. Oñenopiha oso sovai, oyaiví, “Avíye ndeu” ehi Jesús upe.

¹⁷ Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe?

¹⁸ ¡Co mbíia ambuae ivi pendar güeraño rumo oyeví ‘avíye ndeu’ ohesave Tūpa uve! —ehi.

¹⁹ Evocoyase aipo ehi ahe mbíia upe:

—Eñarapuha, eso tupriño. Nde poreroyasa pìpe niha erecuera eico —ehi Jesús chupe.

Tūpa mborerecuasa yande pāhuve secoi

²⁰ Ñepeí ari pìpe fariseo eta, “¿Marase vo aipo oura Tūpa omborerecuasa pìpe mbahe moingatu āgua?” ehi Jesús upe yuvireco. Ahe omboyeví chupe:

—Tūpa mborerecuasa ndahei acoi yasepia vahe.

²¹ ‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

²² Ipare aipo ehi güemimbohe eta upe:

—Oimera ari pe peipota tēira aico vaheṛā pe piri que ñepei ari rupi che, Ava Riqueh̄ir, che recosa pipe; ndache repiai chira rumo peye.

²³ Iyavei ava, ‘Co secoi, aheve aipo secoi’ ehi tēira yuvireco cheu. Ndape-saquicue moñai chira rumo.

²⁴ Esepia, inungar acoi overa vahe osesape guasu iva rese ocua yepi, ěgüe ahera che, Ava Riqueh̄ir, vitu ari osupitise che yevi āgua curi.

²⁵ Yipindar rumo co ivi pipe che paraisu ranera ava cūrteindar mara-mara tēi che rerecose yuvireco che repia potaēhisave.

²⁶ Inungar ava Noé recose yuvirecoi aracahe, ěgüe ehi tupri aveira che, Ava Riqueh̄ir, yevi āgua renonde.

²⁷ Esepia, ocaru, oihu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pipe. Ambuae ava rumo opa ocañi tēi yuvireco.

²⁸ ěgüe ehi avei aracahe Lot recose, ava ocaru tēi, oihu tēi, virocua tēi mbahe omahera yuvireco iyavei mbahe mondosar tēi, mbahe t̄sar tēi, oi aposar tēi avei yuvirecoi oyapisacaēhisa pipe.

²⁹ Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava reh̄i aracahe.

³⁰ ěgüe ahe aveira aviyeteramo tēi che, Ava Riqueh̄ir, ayemboyecuaru curi.

³¹ “Ahe ari pipe acoi ava güēta harive secoi vahe, ahe toi que iri eme güēta pipe ombahe renose. Iyavei ava que rupi tēi secoi vahe, toyevi iri eme güētave.

³² Sese peyemomahenduha co aracahendar Lot rembireco rese.

³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

³⁴ “Ahe p̄itu pipe oimera que ñuvirío ava vupave yuviroque vahe yugüeru: ñepei acoi che reroyasar serasosara, ambuae rumo opitara.

³⁵ Ahese avei ñuvirío cuña ohichora yuvireco: ñepei serasosara, indugüer rumo opitara.

³⁶ ěgüe ehi aveira ñuvirío ava amombri güecua sui yuvirecoi vahe: ñepei serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo ěgüe ehira mbahe curi? —ehi.

Ahe evocoyase,

—Mbahe rehōgüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño āgua ari yacatu rupi

² aipo ehi: “Ñepei tecuave oime mb̄ia mborerecuar mbahe moingatusar ndosiquiyei vahe Tūpa sui, ambuae ava sui avei.

³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe.

⁴ Yipindar rumo noip̄itiv̄i potai. Coiye catu rumo cuña ombop̄ihav̄iracua tēise, ip̄ihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité,

⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu p̄ihiēhi āgua’ ehi op̄ihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese.

⁷ Tũpa avei niha omoingatura mbahe güembiporavo oyeupe yeruresar ari, pĩtu rupindar upe yepi. Nosaro tẽi chiranera opĩtivii ãgua yuvireco.

⁸ Supi eté Tũpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevisẽ co ivi pipe vıtu, oimera ava moviromi tẽi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroiro ambuae ava.

¹⁰ “Ñuvirio ava yuviraso tũparove oyerogui. Ñepi ava fariseo, ambuae evocoyase ava sui guarepochi rerocuasar.

¹¹ Evocoyase fariseo oso tenonde ava rembiepiave oyerogui aipo ehi: “Tũpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tẽi vahe. Iyavei ndahei eté che recocuer co mbia ava sui guarepochi rerocuasar nungar tẽi aico no.

¹² Iyavei ñuvirio yupagüer ñepi semana pipe ayecuacu ité nde recocuer rese, iyavei ñepi-peĩ cien guarepochi che poraviqui repri aipisi vahe sui amboyaho diez che porerecosa ndeu’ ehi.

¹³ Ava sui guarepochi rerocuasar rumo opitaño amombri ichui. Aheve nomahei iva rese oyerogui ãgua oangaipa mboasisa pipe. Oyepochihanupanupa aipo ehi: ‘¡Tũpa, che paraisuerecomi eve, che angaipa viyar aico!’ ehi oyerogui” ehi.

¹⁴ “Sese aipo ahe pẽu: co mbia ava sui guarepochi rerocuasar opa oipisi ñerosa Tũpa suindar güetave oso. Fariseo rumo anı eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chĩhivahe eta

¹⁵ Iyavei chĩhivahe güeru Jesús uve yuvireco sovasapirã. Evocoyase semimbohe osepiase yuvireco, “¿Mahera vo peruño tẽi chĩhivahe?” ehi opihaviracuasa pipe serusar upe yuvireco.

¹⁶ Jesús rumo aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru Tũpa povrive.

¹⁷ Supi eté acoi ndoipisii vahe che Ru Tũpa mborerecuasa chĩhivahe nungar yuvireco, ahe evocoyase ndoyuviroiquei chietera ipipe —ehi.

Ñepi mbia mborerecuar imbahe eta vahe omoñeta Jesús

¹⁸ Ñepi mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirẽhi vahe rereco ãgua? —ehi.

¹⁹ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepi aviye vahe ité, ahe Tũpa secoi.

²⁰ Ereicua niha co porocuita aipo ehi vahe: ‘Nandeaguasai chira, ndereporoyucái chira, nandemondai chira, nanderemirai chira ambuae ava rese, eremboyoyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipave vite mbahe ndeu —ehi—. Emondopa rane nde mbahe, ahe sepi evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihal tēi. Esepia niha, mbahe yar ité secoi.

²⁴ Sese omahe aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi—.

²⁵ Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁶ —¿Ava angahu pīha evocoyase oñepisiora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoyase aipo ehi güemimbohe upe:

—Supi eté acoi oseya vahe que güēta, güembireco, viquehir, vivri, oyesupa, que guahir Tūpa mborerecuasa rese,

³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano ãgua

³¹ Evocoyase yande Yar opa viraso co cotimi doce güemimbohe. Aheve aipo ehi: “Cūrtei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riquehir, resendar ñehesa.

³² Che imondopri aicora ndahei vahe yande mu upe mara-mara tēi che rereco ãgua. Che reroiro-irora iyavei ondivi-ndivira yuvireco che rese” ehi.

³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai eté senducua ãgua yuvireco chupe.

Jesús ombogüera ñepe mbia ndasesapiso vahe

³⁵ Evocoyase Jesús ovirovise tecua Jericó oso, aheve mbia ndasesapiso vahe oguapi oñ peripive porerecosa oyeupe mondo ãgua rese.

³⁶ Osenduse ahe ndasesapiso vahe ava rehi piambu, ahese, “¿Mbahe vo pēu?” ehi ava upe.

³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe.

³⁸ Evocoyase ahe güendapeve oñehe pīrata:

—¡Jesús, David suindar, che paraisuerecomi tēi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pīrataño ité chupe.

⁴⁰ Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapiso vahe upe:

⁴¹ —¿Mbahe vo ereipota ayapo vaherā ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramosëve ndasesapiso vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tūpa yuvireco.

19

Zaqueo osepia pota Jesús

¹ Ichui Jesús oi que tecua Jericó pipe oguata oico.

² Aheve mbia mbahe yar Zaqueo serer vahe secoi. Ahe ava sui guarepochi rero cuasar rerecuar.

³ Osepia pota tēi Jesús ‘taicua ité’ oya viña. Ndoicatu rumo opucuēhise ava rehi pāhuve sepia āgua.

⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oī senonera.

⁵ Evocoyase oyepotase, omahe Zaqueo rese ivate chinise, aipo ehi chupe: —Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramosëve, Zaqueo ogüeyi voi vorivetesá pipe oipisi.

⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe.

⁸ Evocoyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboeyi āgua —ehi chupe.

⁹ —Co pipe Tūpa oipisiro ité co mbia. Esepia, ahe niha Abraham suindar avei secoi.

¹⁰ Esepia, che, Ava Riquehir, ayu co ivi pipe ava ocañi tēi vahe pīsiro āgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer re- sender rese. Esepia, virovi Jerusalén, “Oyepota voi etera revo Tūpa mborere- cuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaherā amombri oivi pendareta rerecuarā oyevisé.

¹³ Oso āgua renonde oichohopa uca diez tupri güembiguai. Ahese opa omondo ñepepepe upe guarepochi sepirusu vahe, aipo ehi chupe: ‘Pepo- raviqui co guarepochi rese imboeta āgua che yevise nara’ ehi. Ipare oso.

¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā secoi āgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya.

¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi.

¹⁷ Evocoyase mborerecuar guasu omboeyi chupe: ‘Mbiguai aviye vahe ereico, nde cuaita co nde poraviquisa chíhimi vahe eremboaviye ité. Sese ereicora diez tecua guasu pendar rese hañeco āgua’ ehi chupe.

¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe.

¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco āgua’ ehi.

20 “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco.

21 Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe.

22 Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase ēgüe che hesa viña,

23 evocoiyase, ¿mahera ru ndereyapocatui che guarepochi guarepochi apocatusave che yevise voi senose āgua cheu imboyevi catumi āgua viña?’ ehi.

24 Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe.

25 Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe.

26 Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi.

27 ‘Acoi ava che amotarēhimbar, ndache potai vahe mborerecuarā yuvireco, ahe opara peru cohava che rovai yucapa āgua’ ehi” ehi Jesús ava eta upe.

Jesús oique Jerusalén pipe

28 Jesús aipo ohe pare, uguata vite oso Jerusalén coti.

29 Evocoiyase coiye catu tecua Betfagé iyavei Betania rerovicave, ivitri Olivo ipimi, aheve omondo ñuvirio güemimbohe

30 aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbrí imoha ava ndoyeupi vitei vahe yuvireco sese. Ahe peyorañora seru.

31 Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñora chupe —ehi güemimbohe upe.

32 Evocoiyase semimbohe yuviraso, semimombehu rupi tupri ité osepi mbahe yuvireco.

33 Evocoiyase oyorase guaricu,

—¿Mahera vo peyora ore reimba? —ehi iyar yuvireco.

34 —Yar oiporu pota —ehiño yuvireco chupe.

35 Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso āgua.

36 Oyeupise oso guaricu harive, oipipira ava oturucuar peri rupi senonera imboetei guasusave yuvireco.

37 Ovirovise ivitri Olivo sui ogüeyi āgua oso, opacatu ava seroyasar supi uguata vahe omboipi osapucal yuvireco vorivetesave mbahe poromondiisa sembiapogüer rese Tūpa upe

38 aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

39 Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi uguata vahe upe imonguiriri āgua —ehi tēi yuvireco.

40 Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucal pīratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese

⁴² aipo ehi: “¡Pesenducua tarahu co co ari pipe teco tuprisa amondo pota vahe pëu viña, cūrītei rumo ocañi tupriño pe sui, ndapeicatui eté sepia!” ehi oyaseho.

⁴³ “Oimera rumo ari imombehupri naporai vahe pëu curi. Pe amotarēhimbar oñachi irira pe recua. Ipare oyere tuprira yuvireco pe rese pëu ovava āgua.

⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepe oya vahe ambuae rese. Esepia, ndapeicuai eté Tūpa ouse pëu pe pīsīro āgua” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oique judío tūparo guasu pipe. Aheve omboipi ava mbahe mondosar mombopa tupri ocarve oico

⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvireco chupe.

⁴⁸ Ndoicatui rumo yuvireco. Esepia, ava rehī oyapisaca iporombohesa rese yuvireco.

20

Jesús mborerecuasa

¹ Ñepe ari Jesús judío tūparo guasu pipe güecose, ombohe ava eta, omombehu ñehesa pīsīrosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei

² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā? —ehi ahe ava yuvireco chupe.

³ Ahe omboyevi chupe:

—Che avei aporandura mbahe rese pëu. Pemboyevira cheu —ehi—.

⁴ ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

⁵ Ahese, “¿Mara yahera pīha?” ehi-ehi tēi oyeupe yuvireco. “‘Tūpa’ yahese chupe, ‘¿Mahera ru ndaperoyai?’ ehira yandeu.

⁶ Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco.

⁷ Evocoyase ahe ava, “Ndoroicuai rumo Juan mbousar, que sui oporoāpiramo oico” ehiño yuvireco chupe.

⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pëu —ehi mborerecuar guasu upe.

Ava mbahe tēi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi.

¹⁰ Evocoyase oyepotase ari uva pohosa, ahese omondo ñepe güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeve tupri tẽi yuvireco sereciar upe.

¹¹ Ipare ambuae güembigui omondo iri no. Ahe oinupa-nupaño, iñehe mara-mara tẽi avei ipogüer tẽi imboyeve imondo yuvireco.

¹² Ichui omondo iri tẽi imombosapisa rese ambuae güembigui no. Ahe oyapicha-pichaño imosẽ imondo yuvireco.

¹³ “Coiye miti yar aipo ehi: ‘¿Mara ahera pñha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi.

¹⁴ Evocoyase ahe ava tahir repiase, ‘Co aipo oipisira vu mbahe. Yayaña. Yandeu nara pãve topita co ivi’ ehi oyeupe yuvireco.

¹⁵ Evocoyase ovinose miti pãhu sui, oyuca ite yuvireco.

“¿Mbahe vo evocoyase oyapora ivi yar ahe ava naporai vahe upe?

¹⁶ Oura evocoyase ahe ava mocañipa ãgua, omondora ambuae ava upe oivi rese oporaviqui vaheã” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rereciar guasu iyavei oporombohe vahe Moisés porocuita rese, iñehe vitesese, oipisi pota tẽi Jesús yuvireco. Esepia, osenducua ite oyesendar iporombohesa yuvireco. Osiquiyẽño rumo ava rehii sui yuvireco.

Judío rereciar osecõha iri tẽi Jesús guarepochi rese yuvireco

²⁰ Ahe judío rereciar evocoyase omondo ava ndaseco asiimi angahu vahe iviro, chupe iñehe ãgua ‘toyavi angahu oñehe’ oya viraso vaheã mborereciar Pilato rovai.

²¹ Ahe evocoyase,

—Porombohesar, ore oroicua nde ñehe iyavei nde porombohesa supi ete vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tũpa recocuer rese.

²² ¿Aviyera pñha yamondo guarepochi Roma pendar mborereciar ivate catu vahe upe viña? ¿Ani tie? —ehi yuvireco chupe.

²³ Opa rumo oicua iñehe porombopasa tẽi. Sese,

²⁴ —Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborereciar guasu —ehiño yuvireco chupe.

²⁵ —Taa, pemondo ru mborereciar uve chupendar, iyavei Tũpa upendar pemondoño ite Tũpa upe —ehi ahe ava upe.

²⁶ Ndoyavi uca catui ete iñehe ava rovaque ipisi ãgua yuvireco. Ahe rumo oyeupe imboyeve, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiehiseve, tivri evocoyase omen-dara sembirecocuer rese. Ahe viquehir omano vahecuer upe nara tahira oico’ ehi.

²⁹ Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiehiseve.

³⁰ Ichui tivri omenda sese. Ahe omanoño avei guahiehiseve.

³¹ Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar ēgüe ehi tupri avei omanopa yuvireco guahiehiseve.

³² Coiye cuña avei omano cute.

³³ Evocoyase opase ocuerayevi yuvireco, ¿uma rebireco itera pñha omen-dase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi.

³⁵ Ocuerayevi pare oicatu vahe ivave yuviroique vaherã, chupe ndipo iri chira mendasa.

³⁶ Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco.

³⁷ Moisés rebicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi.

³⁸ ¡Tūpa ndahei omano vahe Tūpa! ¡Ahe rumo oicove vahe ité Tūpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu ãgua yuvireco chupe.

¿Ava suindar pñha Poropĩsirosar?

⁴¹ Evocoyase Jesús aipo ehi ahe ava upe:

—¿Mahera ru, “Poropĩsirosar David suindar ité” ehi yuvireco?

⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti

⁴³ acoi che amondose voi eté nde amotarēhimbar ñenopiha ãgua nde povrive yuvireco’ ehi David aracahe.

⁴⁴ ¿Mahera ru, “Poropĩsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu vitesese, Jesús aipo ehi güemimbohe upe:

⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otūparo pipe, carusave avei oseca tenda aviye catu vahe yuvireco.

⁴⁷ Iyavei virocua-rocuãño tēi cuña imer mano vahecuer rēta ichui. Oarondaguã tēi avei oyeroqui pucu-pucu yuvireco. Ahe rumo oipisira Tūpa ñemoirosa ipĩrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riruru pipe yuvireco.

² Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

³ Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

⁴ Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco āgua Tūpa upe —ehi.

Jesús omombehu tūparo guasu monduru āgua

⁵ Evocoyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cūritei pesepia vahe pipe ndipoi chitera que ñepe ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa ìva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucari rene catu. Esepia, setá ava yugüerura, ‘Che niha Poropisrosar aico, cūritei osupiti ari imombehupri yandeu’ ehi tēira yuvireco. Ndaperoyai chira rumo ava aipo ehi vahe.

⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepe ìvi pipendar ovavara ambuae ìvi pipendar rese oyeupe yuvireco.

¹¹ Ahese avei oimera ìvi riri tuvichá vahe, tiavor, mbaherasisa opacatu-catu tēi tecua rupi. Iyavei pesepiara ìva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ìvate catu vahe rovai avei yuvireco che recocuer sui tēi.

¹³ Ipipe pemombehura che recocuer chupe yuvireco.

¹⁴ ‘Aipo ahera añehe’ ndapeyei chira pepihañemoñeta rereco pe yeepi āgua.

¹⁵ Esepia, che amondora che mbahecuasa pe ñehe āgua. Ndoicatui chitera evocoyase pe amotarēhimbar imboyevi yuvireco pēu.

¹⁶ Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco.

¹⁷ Opacatu ava ndape ambotai chira che recocuer sui tēi yuvireco.

¹⁸ Nocañi chitera rumo que ñepe pe ha pe āca sui.

¹⁹ ¡Peyemoviracua evocoi nungar mbahe upe pe ñepisiro āgua!

²⁰ “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tēi reime āgua yuvireco chupe.

21 Evocoiyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvínose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

22 Esepia, ahe ari oimera Tūpa ñemoirosa. Ahe omboaviyera icuachiapri aracahendar pipe imombehupri.

23 ¡Iparaisu itera ahe ari pipe cuña ipuruha vahe, imembi pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese.

24 Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvirecoi chupe” ehi.

Ava Riquehir yevisa

25 “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse.

26 Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaheñã sui. Ahese avei iva resendar opacatu mbahe oririira.

27 Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe.

28 Omboipise evocoi nungar mbahe, peyemonguerēhi catura, peyemopase pe querēhisa pipe. Esepia, pe renosesa pihavira mbahe tēi sui” ehi.

29 Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei.

30 Co ivira soqui ramose, yaicua cōimi ari sacu vahe yepota ãgua yandeu yepi.

31 Na ehi aveira pēu che ñehe rupi tupri mbahe pesepiase. Sese peicuara Tūpa mborerecuasa cōimi eté secoise.

32 “Supi eté yuvirecove vitera ava osepia vahe co mbahe opase yaviye.

33 Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

34 “Peicua catu, aní pemboavai etepri pe mbahe reroya ãgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoiyase topoesapiha eme

35 inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe.

36 Sese peyemoingatu, peyeroqui ari rupi co mbahe tēi sui pe yepepi ãgua, pe yemboyecua tupri ãgua che, Ava Riquehir, rovai” ehi güemimbohe eta upe.

37 Ëgüe ehi Jesús oporombohe ari rupi tūparo guasu pipe. Pītu pipe evocoiyase opita ivitri Olivo rese.

38 Iyavei opacatu ava yuviraso añihiveive tūparo guasu pipe iñehe rendu ãgua yepi.

22

Yemomborandusa Jesús yuca ãgua

1 Ovirovise Pascua pieta pan ndayapepoi vahe hu ãgua,

2 ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tēi Jesús yuca ãgua yuvireco.

3 Evocoiyase Carugar oique Judas paha pipe, ahe acoi doce tupri semimbohe pāhu pendar Iscariote serer vahe.

⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi.

⁵ Ahe evocoyase oyembovicharete yuvireco. “Yamondo guarepochi chupe” ehi voi eté yuvireco.

⁶ Judas evocoyase, “Aviye” ehi. Oseca voi ava porēhiseve Jesús mondo āgua yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu āgua. Ahe pipeve avei ovesa Pascua pieta resendar yucapri seropovēhesa yepi.

⁸ Evocoyase Jesús omondo güemimbohe Pedro, Juan reseve aipo ehi: —Peso, tapemoingatu yande caru āgua Pascua pieta resendar —ehi.

⁹ Semimbohe rumo, —¿Que vo ereipota oromoingatura? —ehi yuvireco chupe.

¹⁰ Evocoyase aipo ehi: —Peyepotase tecua pipe, aheve pesepiara mbia vireco vahe cambuchi pipe i. Pesora sētave supi.

¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera.

¹² Evocoyase ahe omboyecua o guasu, ivatendar pēu. Aheve pemoin-gatura yande caru āgua —ehi güemimbohe upe.

¹³ Ipare ahe yuviraso, semimombehu rupi tupri ité osepi mbahe. Aheve omoingatu carusa Pascua pieta resendar yuvireco.

¹⁴ Osupitise icaru āgua apóstol reseve yuviroguapi mesave.

¹⁵ Evocoyase aipo ehi: —¡Cueseve tēi eté niha aipota acarú vahe rā pe piri Pascua pieta resendar rese che mano āgua renonde!

¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi: —Co amondora pēu, perova-rova peyacatu.

¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pēu nara, ahe che ruvi ipiyerepirā pe recocuer rese nara.

²¹ Cūritei rumo oime mbia mesave yande piri che mondo vahe rā che amotarēhimbar upe.

²² Supi eté imboaviyesa itera che, Ava Riquehir, rese ñehesa yipive imombe-hupri. ¡Iparaisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tēi oyeupe: “¿Ava pīha ēgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

²⁵ Evocoyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco.

26 Pe rumo ãgüe ndapeyei chira. Acoi oyemboivate pota vahe, toye-mochihivaheño güeco mbegüesa pipe. Acoi ava cuaisar, tihañeco catu ambuae ava rese.

27 ¿Uma pñha ivate catu vahe: co mesave uguapi vahe ocaru yuvireco? ¿Sese ihañeco vahe tie? Acoi mesave uguapi vahe niha. Che rumo co aico pe pñhuve inungar pe rese ihañeco vahe.

28 “Pe rumo peico vahe che rupi yepi opacatu che recoñhasa pipe.

29 Sese che amondo pñu pe mborerecuasa inungar che Ru ombou cheu che mborerecuata ãgua.

30 Esepia, pecarura iyavei peihura che mborerecuasave che pñi. Iyavei peguapira opacatu judío recocuer rese porandu ãgua” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

31 Aipo ehi avei yande Yar:

—Simón, Simón, esendu: Carugar oporandu pe recoñha ãgua rese.

32 Che rumo ayeroqui nde rese nde yeroyasa paneñhi ãgua. Ereyevise cheu, emonguerñhi catu ambuae nde rivireta imoviracua uca ãgua yuvireco oyese —ehi Pedro upe.

33 —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

34 —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoñha ãgua

35 Evocoyase Jesús oporandu güemimbohe eta upe:

—Opomondose acoi mbahe riru porñhi, guarepochi riru porñhi, ambuae pe pñtaqui ndugüer rerasoñhise, ¿ipane vo acoi mbahe ahese pñu? —ehi.

—Aní eté —ehi yuvireco chupe.

36 Evocoyase,

—Cñritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã.

37 Supi eté amombehu pñu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pñrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

38 Evocoyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyeroqui Getsemani ve

39 Ipare Jesús osé oso ivitri Olivo ve. Ahe ivitrive oso yepi, aheve semimbohe yuviraso yuvireco supi.

40 Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoñhi ãgua —ehi.

41 Ipare oyepipi güemimbohe sui, inungar ita imombosa vahe amombrimi, aheve oñenopñha, oyeroqui

42 aipo ehi: “Che Ru, ereipotase, che renose eve co mbahe tñi sui; tayapo eme che remimbotar tñi, nde remimbotar rupira rumo” ehi.

43 Evocoyase oyemboyecua Tñpa rembiguai chupe, seco momirata ãgua.

44 Mbahe-mbahe tñi porarasa pipe oyeroqui catu. Ahese sacuvor inungar tuví osé ichui otiqui ivive.

45 Oñarapuhase oyeroquisa sui, oyevi oso güemimbohe uve. Ahe rumo opaño yuviroque yuvirocua oviharñhisa pipe.

⁴⁶ Evocoyase,
—¡Mahera opaño peque! Peñarapuha, peyeroqui catu pe viapiêhi ãgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe vitesese, oyepota ati ava yuvireco chupe. Judas doce semimbohe pâhu pendar tenonde secoi. Ahe oyemboya oso sese sovaupite ãgua.

⁴⁸ Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarêhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepeï rumo supindar, pahi rerecuar ivate catu vahe rembiguai nambi yasu cotindar oyasia.

⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi.

⁵² Ichui aipo ehi güecasar opacatu pahi eta rerecuar upe, tũparo rãrosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

⁵³ Aicose tũparo pipe pe pâhuve ari yacatu rupi, na ndapeyapoi eté co nungar cheu. Aviyeyño rumo, oyepota ité niha pēu imombehupri Carugar pĩratasa pipe mbahe-mbahe tēi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso.

⁵⁵ Aheve ñachimbri pipe oyatapi yuvireco, oyere tupri tata rese oyephe yuvinoi. Aheve avei Pedro ipãhuve chini.

⁵⁶ Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepeï hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe vitesese, oñehe tacura.

⁶¹ Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese.

⁶² Ahese osē, oyasehó iteanga oso.

Sãrosar mara-mara tēi Jesús vireco yuvireco

⁶³ Evocoyase ava Jesús rãrosar iguay tēi yuvirocua-rocua yuvireco sese.

⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvireco Jesús reraso uca ãgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pẽu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pẽu, pe avei ndapemboyevii chietera cheu viña no.

⁶⁹ Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvireco chupe:

—Evocoyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23*Jesús serasosa mborerecuar Pilato rovai*

¹ Evocoyase opacatu ava opũha yuvireco Jesús reraso ãgua mborerecuar Pilato rovai.

² Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cũritei co Judea ve ãgũe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pĩha co mbia Galilea iguar?” ehi.

⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve.

⁸ Herodes sorivete Jesús repiase. Esepia, setá ari osepia pota tẽi serãcua anduse yepi. Evocoyase oipota ité poromondisa oyapo vaherã oyeovaque viña.

⁹ Sese oporandu ati mbahe rese chupe. Nomboyevii eté rumo Herodes upe.

¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta tẽi sese Herodes rovaque yuvireco.

11 Evocoiyase Herodes osundao eta reseve iñehe mara-mara tēi Jesús upe sese oguayĩ tēisa pipe yuvireco. Omboyemonde avei turucuar iporañete vahe pipe yuvireco. Ëgüe ehi imboyevĩ Herodes Pilato upe.

12 Ahe arĩ pipe suive oyemborĩ Pilato Herodes rese. Ndoyembotai vahe tie yipĩndar yuvireco viña.

“¡Tayaticasa!” ehi Jesús upe yuvireco

13 Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

14 Ipare aipo ehi chupe:

—Pe niha peru co mbia cohave cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

15 Herodes avei, ‘Ndipoi mbahe sembiapo naporai vahe imano ãgua’ ehi. Sese omboyevĩño Jesús imbou cheu.

16 Ainupa ucara rumo. Ipare amoseñora —ehi Pilato.

17 Pascua pieta pipe iya ité Pilato ava upe ñepei soquendapri mose ãgua.

18 Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

19 Co mbia Barrabás tecua pipe mbahe tēi mopuhasa sui iyavei opo-rapichisa sui oyeoquenda uca vahe.

20 Pilato rumo omose pota Jesús viña. Sese oporandu iri ava upe imose ãgua.

21 Ahe rumo osapucaĩ pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

22 Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tēira rumo. Ipare amoseñora —ehi.

23-24 Ava rehĩ rumo osapucaĩ pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoiyase semimbotar yuvireco” ehiño Pilato ava eta upe.

25 Ëgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

Jesús yaticasa curusu rese

26 Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosĩ curusu rese Jesús raquicuei” ehi voiño tēi yuvireco.

27 Ava rehĩ yuviraso saquicuei. Cuña avei setá oyaseho oviharēhisave yuvireco sese.

28 Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrĩ rese avei.

29 Esepia, oura arĩ naporai vahe. Ahese aipo peye tēira: ‘Aviye catu acoi cuña nimembĩ vahe iyavei ndoicuai vahe imocambu omembrĩ’ peye tēira.

30 Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco.

31 Esepia, Ëgüe ehise ivira yivive vitesse, ¿mara ehira vo catu oipise? —ehi cuña eta upe.

32 Iyavei viraso ñuvirío mbia ndaseco pōrai vahe supive yaticapirã yuvireco.

³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepe mbahe rese ipocosa coti, ambuae evocoyase mbahe rese ipocoëhisa coti.

³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayñño Jesús turucuar rese oyeupe imboyaho-yaho ãgua yuvireco.

³⁵ Ava rehii osepia yuvireco; mborerecuareta avei seroïrosave aipo ehi yuvireco chupe:

—Oipïsiro ambuae ava, toñepïsiro ru ahe ae ité cute Tüpa Rembiporavo Poropïsirosar güecosa pipe —ehi yuvireco.

³⁶ Iyavei sundao seroïropare omondo vinagre itoihu yuvireco,

³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepïsiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oï: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropïsirosar ereicose, eñepïsiro ru nde ae, ore avei ru ore pïsiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tüpa sui? Nde avei niha ocañi tēi vaherã.

⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoëhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pïtu ivi rupi; las tres pipe rumo opa icatu.

⁴⁵ Ari avei ogüe tupri, turucuar guasu tūparo asiasa avei mbiter rupi tupri ovo.

⁴⁶ Evocoyase Jesús oñehe pïrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tüpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco.

⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiaño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar seci. Ahe mbia viroya vahe ité Tüpa ombou vaherã omborerecuasa

pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco.

⁵² Evocoyase ahe oso Pilato rêtave oporandu ãgua Jesús rehögüer rese.

⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco.

⁵⁴ Esepia, ahe ari omoingatu mbahe mbıtuhusa ari upe nara, ahe mbıtuhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatuse yuvireco.

⁵⁶ Oyevise güetave yuvireco omoingatu mbahe sıacua vahe tehögüer resendar ipichi ãgua.

24

Jesús ocuerayevi

Ahe cuña opituhu mbıtuhusa ari pipe judío porocuita reroyasave yuvireco. ¹ Cõhe ramomise domingu pipe, oyeve yuviraso tuvipave mbahe sıacua vahe reseve.

² Oyepotase yuvireco tuvipave, osepia soquendasa ita guasu ndipo irise güendagüerve.

³ Evocoyase yuviroique voi tuvipa pipe. Ndoyosui rumo yande Yar rehögüer yuvireco.

⁴ Ndoyembovıhai tõi; ndoicatu iri. Ahese avıyeteramo tõi osepia ñuvirío mbıa iturucuar sendı vahe oıpıve yuvireco.

⁵ Opaño ñaca ivıso ivı cotı yuvireco osıquıyepave. Evocoyase co mbıa aipo ehi yuvireco chupe:

—ıMahera peseca tuvıpa pãhu rupi ava oıcove vahe!

⁶ Ndıpoi mo cohave; ocuerayevi mo ahe. Peyemomahenduha ñehengagüer ivı Galilea rupi omombehu vahecuer rese,

⁷ “Che, Ava Rıquehır, imondoprıra ava angaıpa viyar povrıve, iyaveı che atıcara curusu rese yuvireco. Mbosapı ari pare rumo acuerayevıra” ehi acoı —ehı cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco.

⁹ Oyevise tuvıpa sui yuvireco, omombehu opacatu co once apóstol yuvirecoı vahe upe, opacatu ambuae upe aveı.

¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago sı María iyaveı ambuae cuña eta no.

¹¹ Apóstol upe rumo oyeupe mombehuse avıye aipo ehi tõi vahe; ndovıroyai eté yuvireco.

¹² Pedro rumo yandu ramoseve voi, osẽ, oña oso tuvıpave. Omahese tuvıpa pipe, turucuar güeraño osepia co cotımi tıse. Evocoyase oyepıhamondıı tõi ‘¿mara ehi ruteı pıha?’ oya oyeveı oıve oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui.

¹⁴ Ahe perı rupi oñemoñeta yuviraso opacatu co mbahe oıme vahecuer rese.

¹⁵ Oñemoñeta vıteseve, Jesús teıeté oyemboya sese, oguata supı.

¹⁶ Yepe osepia tõi, ahe rumo ndoyepıacua ucai eté chupe.

¹⁷ Evocoyase Jesús oporandu chupe:

—¿Mbahe rese vo pe ñehıe eteprı pe guatasa rupi peıco? —ehı.

Aipo hese, opıta, ndovıhai yuvınoha.

¹⁸ Ipãhu pendar Cleofas serer vahe omboyeveı chupe:

—Nde güeraño revo Jerusalén ve ereico vahe ndereicuai mbahe oime vahe tecua pıpe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tüpa ñehe mombehusar seco pırata vahe opacatu mbahe apo água, mbahe mombehu água avei Tüpa rovaque iyavei opacatu ava rovaque.

²⁰ Omondo pahı rerecuar iyavei yande rerecuareta yamotarëhisave yuca uca água curusu rese yuvireco.

²¹ Ore rumo oroyeroya ité sese. “Ahe yande pısirora yande amotarëhimbar sui” orohe chupe viña. Cūrítei rumo opa mbosapı arı yucare.

²² Ore pāhu pendar cuña ndore mbovıhai eté oyevıse suvıpa sui yuvireco. Esepia, yıpındar yuvırasose añihiveive tuvıpave,

²³ ndoyosui eté sehögüer yuvireco. Ahese aipo osepia Tüpa rembiguai aipo ehi vahe yuvireco chupe: “Jesús mo oicove cūrítei” ehi. Ahe evocoyase yugüeru imombehu oreu.

²⁴ Iyavei ambuae ore ndugüer yuvırasose tuvıpave cuña remimombehu rupi tuprı avei. Ndosepiai eté rumo Jesús yuvireco —ehi Cleofas chupe tuprı ité.

²⁵ Evocoyase aipo ehi ahe ñuvırío mbıa upe:

—ıNdapeicuai eté rumo pe pıha pıpe seroya tuprı água opacatu Tüpa ñehe mombehusar remimombehugüer!

²⁶ ¿Ndapeicuai vo Poropısirırosar iparaisu rane itera mbahe-mbahe tēi vırecosa pıpe güecua porañetesave güeique água renondeve? —ehi.

²⁷ Ipare opa omombehu icuachiaprı Moisés cuachiar pıpendar iyavei opacatu Tüpa ñehe mombehusar cuachiar pıpendar oyese ñehe agüer.

²⁸ Oyepotase ahe tecuave yuvıraso, Jesús rumo aviye oguataño vıte vaherã senonde.

²⁹ Co mbıa rumo oñehe yuvireco chupe:

—Epıtāño ore pıri, caharu eteprı. Pıtura moco ndeu —ehi yuvireco chupe.

Evocoyase oique, opıtāño ipıri yuvireco.

³⁰ Oguapıse yuvınoı mesave, oıpısi pan, “Avıye ndeu” ehi Tüpa upe. Ipare ombohı co ñuvırío mbıa upe imondo.

³¹ Ahese voi semimbohe omahecua ramo yuvireco sese, ahe rumo cūríteimi ndoyemboyecua iri sovai chupe.

³² Evocoyase aipo ehi oyeupe yuvireco:

—Yande mbopıhañemoñeta pıratami eté perı rupi oñehese yandeu co tecocuer icuachiaprı rese —ehi yuvireco.

³³ Ipare ndopıta pucu iri; oyeviño voi yuvıraso tecua Jerusalén ve. Aheve osepia once tuprı vahe apóstol, omboetasa avei.

³⁴ Ahese oñemonuha vahe aipo ehi yuvireco:

—Supı eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase perı rupi. Ombohıse pan ore pıri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe vıteseve yuvireco co tecocuer rese, ahese Jesús oyemboyecua chupe aipo ehi:

—Avırave, mbahe tuprı pıpe tapeico —ehi güemimbohe eta upe.

³⁷ Ahe rumo oyembosıquiye guasu yuvireco ‘hãgüer revo’ oyapave.

38 —¡Mahera pesiquiye! ¡Mahera pereco vite pe poreroyaẽhisa pe piha pipe!

39 Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

40 Aipo ohe vitesese omboyecuapa opo, opi avei chupe.

41 Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

42 Evocoyase omondo pira apiremi oyi vahe yuvireco chupe.

43 Ipare oipisi, ohu opacatu güemimbohe rovaque.

44 Ipare aipo ehi:

—Co rese acoi añehe vichico cuese pe rese aico vitesese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar yuvirecoi vahe rembicuachiagüer pipe, Salmo pipe avei —ehi.

45 Ëgüe ehi evocoyase opacatu osenducua uca aracahendar icuachiapirer güemimbohe upe

46 aipo ehi:

—Co icuachiasa Poropĩsirosar iparaĩsura omano ãgua. Ipare mbosapi ari pare ocuerayevira.

47 Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pẽu ñeroi ãgua” hesara.

48 Pe niha peico opacatu co nungar mbahe repiasar imombehu ãgua.

49 Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pĩratasa iva suindar —ehi güemimbohe eta upe.

Ivave Jesús so agüer

50 Evocoyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime ãgua chupe.

51 Ipare oyepipi güemimbohe sui. Ahe ramoseve serasosa ivave.

52 Semimbohe evocoyase osapucaĩ imboetisave. Ipare oyevi Jerusalén ve vorivetesa pipe yuvireco.

53 Iyavei ahe ari yacatu rupi yuviraso tũparo guasu pipe osapucaĩ Tũpa mboetisave yuvireco yepi. Aipo rupive.

JUAN REMBICUACHIA JESUS RECOCUER RESENDAR SAN JUAN

Tũpa Ñehe oyeapo ava

¹⁻² Jesús yĩpĩsuiwe ité Tũpa Ñehe secoi. Ahe oicove mbahe apoẽhi viteseve Tũpa rese. Esepia, ahe niha Tũpa secoi.

³ Ipĩpe avei Tũpa opacatu mbahe oime vahe oyapo; ndipoi eté mbahe sembiapoẽhi.

⁴ Jesús niha vireco tecovesa apĩrẽhi vahe oyese. Ahe tecovesa tesapesa nungar secoi opacatu ava upe.

⁵ Ahe tesapesa omboyecua tecocuer supi eté vahe pĩtumimbi nungar mbahe naporai vahe aposar pãhuve. Ahe mbahe tẽi aposar rumo ndoicatu eté secopi yuvireco.

⁶ Oime mbia Tũpa remimbou. Ahe Juan serer vahe.

⁷ Ahe rumo ou co tesapesa cua uca ãgua ‘toviroya opacatu ava yuvireco’ ohesave.

⁸ Ahe rumo ndahei eté tesapesa; imombehugar tẽi rumo secoi.

⁹ Co tesapesa supi eté vahe osesape opacatu ava. Ahe ou ité co ivi pĩpe.

¹⁰ Yepe tie ipĩpe yapopri opacatu ava viña, sembiapo rumo ndoicuai co ivi pĩpe secoise yuvireco.

¹¹ Supi eté ouse güecuave, secua pendar ae rumo ndoipĩsii yuvireco.

¹² Opacatu rumo acoi oipĩsi vahe seroyasave yuvireco, ahe chupe omondo ñecuñarosa Tũpa rahir seco ãgua yuvireco.

¹³ Ndahei rumo co ivi pĩpendar rahir nungar que oha vahe ambuae ava remimbotar pĩpe tẽi. Ahe rumo Tũpa rahir ité yuvirecoi.

¹⁴ Ipare ahe Tũpa Ñehe, oyeapo ava, oicove yande pãhuve co ivi pĩpe oporoaisusave mbahe supi eté vahe aposa pĩpe. Iyavei orosepia ité seco porañetesa. Co seco porañetesa oipĩsi vahe Vu sui Tahir ñepei vahe güeco pĩpe.

¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vahe rã che raquicuei, ahe ivate catu vahe che sui. Esepia, yĩpĩve ité secoi che yesuẽhi viteseve’ ahe” ehi.

¹⁶ Esepia, opacatu ité yaipĩsiño iporovasasa tuvichá vahe ombouño vahe ité yandeu ari yacatu rupi yepi.

¹⁷ Mborocuaíta yaipĩsi Moisés sui; porovasasa rumo iyavei mbahe supi eté vahe, ahe güeru Jesucristo yandeu.

¹⁸ Ndipoi eté ava osepia vahe Tũpa; Tahir ñepei vahe, secoi vahe ité ipĩri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipĩtivĩsareta imondo Juan uve ‘¿Ava vo nde? tehi yuvireco chupe’ oyapave icua ãgua.

²⁰ Ahe rumo oyemombehu ité aipo ehi:

—Che ndahei eté Poropĩsirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tũpa ñehe mombehugar ou vahe rã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaheerã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirẽhisa rupi aipo ahe: ‘Pemoingatu pe recocuer yande Yar yepotase nara’ ahe pẽu. Ahe inungar acoi Tũpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi,

²⁵ oporandu yuvireco chupe:

—Evocoyase ndahei niha aipo nde Poropĩsirosar, ndahei avei Elías, ndahei eté Tũpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe.

²⁷ Ahe co ivi pipe ou vaheerã che raquicuei. Che rumo ndahei eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, ïai Jordán rovai añihivei coti. Aheve Juan oporoãpiramo yepi.

Tũpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tũpa remimbou Ovesa nungar seropovẽhepirã opacatu ava angaipa mocañi ãgua!

³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese.

³¹ Che rumo yipindar ndaicuai ahe yande remiaro ou vaheerã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espiritu Santo ogüeyise ïva sui inungar apicasu, opita tupri iharive” ehi.

³³ “Yipindar rumo ndaicuai eté. Tũpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi.

³⁴ Che niha asepia ité. Sese, ‘Co Tũpa Rahir ité secoi’ ahe pẽu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve.

³⁶ Jesús ore cuãse, Juan aipo ehi oreu:

—¡Pesepia, ndo co mbia Tũpa remimbou Ovesa nungar seropovẽhepirã! —ehi oreu.

³⁷ Aipo ihe ramoseve, oroguata voi eté supi.

³⁸ Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

⁴⁰ Simón Pedro rivri, Andrés, ahe che ndugüer ahese.

⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

⁴² Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguã rumo Cefas —ehi ('Pedro' oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi.

⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higuerravrive ereicose —ehi Natanael upe.

⁴⁹ —Porombohesar, ¡nde niha Tũpa Rahir ereico, Israel iguar rereciar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrive” che he sui tẽi eve! Eresepia ara rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tũpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

¹ Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve,

² iyavei Jesús ore semimbohe oroico vahe reseve ore soho avei yuvireco aheve.

³ Ègüe ehi rumo opa tẽi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichí rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepeipei cambuchi pipe oiique cincuenta litro, amove oiique setenta litro i ipipe. Ahe judío oiporu piétase oyepoi ãgua yuvireco Tũpa porocuita mboaviye ãgua yepi.

⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco.

⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ègüe ehi eté yuvireco.

⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osẽ ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe

¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipare acoi ava hitaropase yuvireco, omondo ndasepi vahe. Nde rumo ereyapocatupaño aviye catu vahe, ahe cūritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboye-cua güeco pīratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipare judío upendar Pascua pieta yepota senise, Jesús oso Jerusalén ve.

¹⁴ Aheve osepia tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi.

¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo.

¹⁶ Apicasu mondosareta uve aipo ehi:

—¡Penosepa co mbahe cūritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri arachendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi ãgua oreu cūritei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi.

²² Ocueraevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombe-hugüer.

Jesús oicua opacatu ava recocuer

²³ Jesús secoi vitesa Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepia, opacatu ité ava recocuer oicua.

²⁵ Ndipoi eté que ambuae ava pīhañemoñeta mombehu ãgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pāhuve secoi vahe.

² Ahe oso Jesús piri pītu pipe, aipo ehi chupe:

—Porombohesar, oroicua ité Tũpa nde mbose ore mbohe ãgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoẽhise —ehi.

³ Evocoyase,

—Supi eté aipo ahe ndeu: acoi ava ndoyesu piasu iri vahe, ndoi quei chietera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pĩha osi aviterve oi que oyesu iri ãgua? —ehi Jesús upe.

⁵ Jesús omboyevĩ chupe:

—Supi eté aipo ahe ndeu: acoi ava i pipe iyavei Espĩritu pipe ndoyesui vahe, evocoi nungar ndoyuvĩroi quei chira Tũpa mborerecuasave.

⁶ Acoi oyesu vahe co ivi pipendar oyesupa sui, inungar tupri avei ahe; Espĩritu pipe oyesu vahe rumo, ahe espĩritu.

⁷ Ereyepĩhamondi rene, ‘Peyesu piasu irira’ ahese ndeu.

⁸ Co rumo inungar ivitu oi peyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgũe ehi avei ava oyesu vahe Espĩritu pipe —ehi Jesús chupe.

⁹ —¿Mara ehi pĩha aipo evocoyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducai eté rumo co nungar mbahe! —ehi chupe—.

¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu.

¹² Añehe tẽi niha mbahe co ivi pipendar rese pẽu; ndache reroyai eté rumo peye. Tahetru revo mbahe iva pendar amombehuse pẽu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehĩr, iva sui agüeyi vahe pẽu.

¹⁴ Inungar Moisés osupi ivate mboi rahanga ivi iporupirẽhisa rupi aracahe. Ëgũe ehi aveira che, Ava Riquehĩr, rerecosa ivate che rupira yuvireco

¹⁵ opacatu ava che reroyasar tecovesa apirẽhi rereco ãgua yuvireco” ehi Jesús Nicodemo upe.

Tũpa poroaisusa ava upe nara

¹⁶ “Supi eté Tũpa osaisú iteanga opacatu ava. Sese ombou Guahĩr ñepe vahe ‘tocañi tẽi eme che Rahĩr reroyasar yuvireco’ oya, ‘tovireco tecovesa apirẽhi vahe’ ohesave.

¹⁷ Esepia, nomboui Tũpa Guahĩr co ivi pipe ava mocañi tẽi ãgua; ahe rumo ombou ava pĩsiro ãgua.

¹⁸ “Ava viroya vahe Tũpa Rahĩr, ndahei eté ocañi tẽi vaherã; acoi ava ndoviroyai vahe rumo, oipisi itera cañisa yuvireco Tũpa Rahĩr ñepe vahe reroyaẽhisa pipe.

¹⁹ Ëgũe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pĩtumimbi vahesave güeco ãgua yuvireco.

²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaẽhisave.

²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tũpa remimbotar oyapo vahe cua uca ãgua opacatu ambuae ava upe —ehi.

Juan Oporoãpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secói pucu raimi oporoãpiramo.

²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca água.

²⁴ Co rumo mbahe yaposa Juan roquendaëhi viteseve.

²⁵ Evocoiyase Juan remimbohe omboipi ambuae omu judío rese oyeecopi-copi vaheã i pipe ñeapiramosa resendar sui tẽi yuvireco.

²⁶ Sese yuviraso Juan uve aipo ehi:

—Ore mbohesar, acói secói vahe nde rese iai Jordán rovai, sese acói ereñehe oreu, cūrítei ahe oporoãpiramoño tẽi iyavei opacatu yuviraso supi — ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatui mbahe apo Tũpa nombouise chupe.

²⁸ Pesendu tupri ité che ñehe cuese: “Che ndahei Poropĩsĩrosar aico, che rumo senonde imboupri tẽi aico” ahese pẽu.

²⁹ Esepia, acói mendasa oimese, vireco vahe güembirecovi ahe imevi, osenduse rumo imboripar iñehe yivii ohã, oyembovĩharete sese. Ëgüe ahe avei che cūrítei, ayembovĩharete Jesús rese.

³⁰ Ahe niha seco ivate catu-catuño itera ari rupi oico; che rumo ivi coti catu aicora ichui — ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tẽi oñehe. Acoi ou vahe rumo iva sui, ivate catu ité opacatu sui.

³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco.

³³ Acoi ava viroya vahe rumo iñehe, “Supi tupri ité Tũpa omombehu mbahe” ehi.

³⁴ Co Tũpa remimbou niha omombehu Tũpa ñehe. Esepia, Tũpa omondo ité oEspíritu sese.

³⁵ Tũpa osaisu Guahĩr iyavei opacatu mbahe omondo ipove.

³⁶ Opacatu ava viroya vahe Tũpa Rahĩr, vireco ité tecovesa apirẽhi; acói ndoviroyai vahe rumo, ndovirecoi chietera co tecovesa. Ahe rumo oipisira Tũpa ñemoĩrosa ipĩrata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui

² (ndahei eté rumo Jesús oporoãpiramo; semimbohe tẽi rumo ëgüe ehi yuvireco).

³⁻⁴ Jesús oicuase aipo nungar, osẽ Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahĩr José upe aracahe.

⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús uguapi mbiter ari potase ocueraise oĩ.

⁷⁻⁸ Semimbohe eta rumo opacatu yuviraso tecuave mbahe tembihu rocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chĩhi nde i taihu —ehi.

⁹ Cuña, Samaria pendar, rumo omboyevĩ chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehi vahe ité ava Samaria pendar upe yuvireco yepi.)

¹⁰ Evocoyase omboyevĩ cuña upe:

—Ereicuase Tũpa porrecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose ãgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—.

¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pĩha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe—.

¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriẽhi ãgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer.

¹⁸ Esepia, cinco tuprĩ erereco nde mer iyavei cũritei erereco vahe nde resendar tẽi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tũpa ñehi mombehusar ereico cheu —ehi—.

²⁰ Ore ramoi eta omboetei Tũpa co ivitri rese yuvireco. Pe rumo, judío peico vahe, “Jerusalén ve yamboeteira Tũpa yepi” peye —ehi.

²¹ —Che reroya eve cuña, virovi ari pẽu peso iriẽhi ãgua Tũpa mboetei co ivitri rese iyavei Jerusalén ve.

²² Pe Samaria pendar peico vahe pemboetei tẽi pe rembiguaẽhi. Ore rumo oroicua oromboetei vahe. Esepia, ñepisiroso ou judío sui.

²³ Oyepota rumo ari cute, ahe ité co cũritei co pĩpe suive supi eté Tũpa omboetei vahe, Tũpa Espĩritu pĩpe omboeteira yuvireco. Supi eté Tũpa, “Ëgũe tehi che mboetei yuvireco” ehi.

²⁴ Esepia, Tũpa niha Espĩritu secoi. Sese acoi omboetei vahe oyapora Espĩritu pĩpe supi tuprĩ vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropĩsirosar yu ãgua (ahe ‘Cristo’). Acoi ahe ouse, omombehu tuprĩra opacatu mbahe yandeu —ehi cuña chupe.

²⁶ —Che niha ahe aico añehi vahe ndeu —ehi cuña upe.

²⁷ Aheseve semimbohe eta oyevi yuvireco, nombovihaiprĩ güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehi co cuña upe?” ehi vahe yuvireco chupe.

²⁸ Ahese cuña oseya tuprĩño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tuprĩ vahe che recocuer cheu. ¿Ndahei pĩha ahe Poropĩsirosar? —ehi omu eta upe.

³⁰ Evocoyase ava rehĩ yuvĩnose tecua sui, yuvĩraso Jesús recosave sepia.

³¹ Ava yepotaẽhi viteseseve, semimbohe eta,

—Ore mbohesar, ecarumi —ehi tẽi yuvireco chupe.

32 —Oimera rumo ambuae mbahe cheu che moviracua ãgua. Ahe ndape-
icuai vahe —ehi güemimbohe eta upe.

33 Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

34 Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei
amboaviye rane itera iporaviqui —ehi—.

35 Esepia, pe aipo peye: ‘Ipane vite irungatu yasi mbahe miti ha monuha
ãgua’ peye yepi; che rumo aipo ahe pēu: pemahe pe ivirindar ava eta rese.
Opa ité opiha omoingatu yuvireco, ahe inungar mbahe miti ha yaviye vahe.

36 Acoi oporaviqui vahe Tūpa upe ava hã pisi ãgua rese, ahe oipisira sepri
yuvireco iyavei semimonuha tecovesa ndopai vaheve nara ité yuvirecoira.
Evocoyase ava upe oñehe vahe iyavei oipisi vahe ava hã ivave nara, oyoya
guasu oviharetera ipisipri rese yuvireco.

37 Supi eté co ñehesa aipo ehi vahe: ‘Ñepei eté omaheti vahe; imonuhasar
rumo ambuae ité’ ehi.

38 Che opocuai ava hã pisi ãgua ambuae ava poraviquisave; yipindar rumo
ambuae oporaviqui ité yuvireco sese. Pe evocoyase peique iporaviqui agüer
rupi —ehi güemimbohe eta upe.

39 Setá ava tecua Sicar pendar Samaria pipe viroya cuña ñehe sui yuvireco,
“Opacatu mbahe che rembiapo omombehu cheu” ñhesa sui.

40 Evocoyase ava rehi Samaria pendar yuviraso chupe ‘epitami ore piri’
oya. Evocoyase opita ipiri ñuvirío ari rupi.

41 Setá catu iri ava viroya yuvireco ñehe ité renduse.

42 Evocoyase ava eta aipo ehi cuña upe yuvireco:

—Cūritei oroviroya ité cute, ndahei nde ñehe suiño oroviroya. Esepia, ore
ité orosendu ñehe cute, oroicua avei ahe supi eté opacatu ava pīsīrosar ou
vahe —ehi ava eta cuña upe yuvireco.

Jesús ombogüera mborerecuar rahir

43 Ñuvirío ari pare, Jesús osē ivi Samaria sui, osoño ivi Galilea ve.

44 Ahe ae ité aipo ehi: “Tūpa ñehe mombehusar ndasaisusai ivi rese
yuvireco yepi” ehi.

45 Oyepotase oivi Galilea ve, ahe pendar ava oipisi tupri yuvireco. Esepia,
setá osepia opacatu mbahe sembiapo Pascua pietase Jerusalén ve.

46 Evocoyase oyevi iri tecua Caná ve Galilea ivi rese, aheve acoi i tēi oyapo
uva ricuer. Tecua Capernaum ve oime mbia mborerecuar guasu ivirindar.
Ahe vireco guahir imbaheasi vahe.

47 Oyanduse co mbia mborerecuar Jesús yepota Judea sui ivi Galilea ve, ahe
ramoseve oso voi seca ‘toso che rētave, tombogüerami che rahir omano pota
vahe cheu’ oya.

48 Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe promondiisa che
rembiapo —ehi.

49 —Che Yar, eyu poyavañomi tēi che rahir mano viteēhiseve —ehi mborere-
cuar chupe.

50 —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave.

51 Amombri seco vitesese, yuvinoña voi sovaichi sembiguai imombehu:

—¿Nde rahir oicove! —ehi yuvireco chupe.

52 Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ãgua ivi Judea sui oyevis Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso.

² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve.

³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi.

⁴ Esepia, amove tēi Tūpa rembiguai ogüeyi ahe ivicuarve i momi ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe.

⁵ Aheve oime mbia ombaherasisa vireco vahe treinta y ocho araviter rupi.

⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epūha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ãgüe ehi.

¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosi ãgua —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tēi ndoyecua iri ava rehii pãhuve.

¹⁴ Coiye rumo Jesús osepia iri tūparove ahe mbia, aipo ehi chupe:

—Ereicua co nde cuerasa cūritei, aní ereyemboangaipa iri mbahe tēi catu reime iri ãgua ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che mbogüera’ oya.

¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi.

¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

19 Evocoyase Jesús aipo ehi judío upe: “Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi.

20 Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tēi āgua chupe.

21 Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi.

22 Iyavei Tu nomondo iri ava upe sembiapo reprí. Esepia, ombou Guahir upe opacatu piratasa ava upe sembiapo reprí mondo āgua.

23 Ēgüe ehi Guahir upe opacatu ava imboetei āgua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

24 “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa.

25 Supi eté aicua uca pēu: oura ari imombehupri, cūrítei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera.

26 Esepia, Tu vireco tecovesa oyese. Ēgüe ehi avei Guahir upe imondo tecovesa rereco āgua.

27 Ombou avei imborerecuā āgua chupe ava recocuer rese iporandu āgua. Esepia, ahe Ava Riquehir secoi.

28 Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe.

29 Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rerecuar upe.

Jesús omboyecua tupri omborerecuasa

30 “Che ndaicatui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo.

31 Que cheyese ae tēi añehese, ahese ndache reroyai chira peye viña.

32 Oime rumo ambuae che mombehusar. Ahe supi eté che mombehu pe seroya āgua; ahe Juan.

33 Pe niha, pemondo ava chupe imboporandu mbahe rese. Ahe semi-mombehu niha supi tupri vahe ité.

34 Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pēu.

35 Juan niha inungar tataendi, ēgüe ehi omboyecua mbahe supi eté vahe. Sese pe peyembovaha raimi tēi iporombohesa tesapesa nungar pipe peico.

36 Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar.

37 Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté.

³⁸ Ññehengagüer icuachiapri avei ndoiquei eté pe rese. Ipípe niha ndache reroyai eté peye che Ru che mbose.

³⁹ Pe peicua tupri pota icuachiapri 'icuapa tupri pípe revo tecovesa apirēhi yarecora' peye viña. Co rumo cuachiar che mombehu vahe:

⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ “Ndaipisii eté ava che mboeteisa tēi.

⁴² Iyavei opocua Tūpa ndapesaisuisse.

⁴³ Che niha ayu che Ru rer pípe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara.

⁴⁴ Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepei vahe suindar yemboeteisa.

⁴⁵ Ndapepíhañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu āgua.

⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa.

⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipáre Pascua pieta ípimi aipo Jesús osasa ípa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi.

⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã.

⁷ Evocoyase Felipe omboyevi chupe:

—Doscientos denarios pan ndosupitii chietera que chíhi-chíhimi ava retacuer viña —ehi.

⁸ Aipo hese, ñepei semimbohe pãhu pendar, Simón Pedro rivri, Andrés aipo ehi chupe:

⁹ —Co chíhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava.

¹¹ Evocoyase oipisi cinco vahe pan, “Aviye ndeu” ohe pare Vu Tūpa upe, opa ombohi-mbohi imondo ava rehii upe. Ēgüe ehi avei pira upe, imondopa semimbotar rupi-rupi yuvireco.

¹² Opase ava ihitaro,

—Pemonuhapa sumbirer iyemombucaēhi āgua —ehi güemimbohe upe.

¹³ Evocoyase omonuha doce iruova sumbirer yuvireco pan cincomi vahe sui.

¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tūpa ñehe mombehusar ivi pípe” ehi icuachiapri arachendar pípe —ehi yuvireco.

¹⁵ Jesús rumo oicuase ava opĩratasa pipe tẽi güeraso pota ãgua mborerecuar guasu vireco ãgua oyeupe nara yuvireco, ahese oyeupi iri oso ivate catu. Aheve ahe ae güeco ãgua.

Jesús oguata i hari rupi

¹⁶ Pĩtu ramosẽ ogüeyi yuviraso Jesús remimbohe ipave,

¹⁷ yuviroha carite pipe sasa ãgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté.

¹⁸ Ahese oipeyu pĩrata ivitu, i avei ohitu pĩrata.

¹⁹ Yuviraso pucumi tẽi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui.

²⁰ Ahe rumo aipo ehi güemimbohe upe:

—¿Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tẽi oyepota yuviraso oyuvirasosave.

Ava eta oseca Jesús

²² Ahere ayihive ava rehii opĩta vahe sovai yuvireco, “Semimbohe año rumo yuviraso ñepe vahe carite pipe. Jesús rumo ndosoi eté güemimbohe rupi” ehi tẽi yuvireco.

²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave.

²⁴ Evocoyase ava rehii oicuase Jesús semimbohe reseve iporẽhise yuvireco, yuviroha yuviraso ãgua co ambuae carite pipe tecua Capernaum ve seca.

Jesús, pan nungar, tecovesa apirẽhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohava? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pẽu. Pe rumo che reca peye che pe mbocarusa rese tẽi,, ndahei co che poromondiisa reroyasave ité peico pota che rupi.

²⁷ Peporaviqui eme catu tembihu ndasecosei vahe rese; iyacatu rumo peporaviqui tembihu secose vahe rese omondo vahe tecovesa apirẽhi. Co tembihu che, Ava Riquehir, amondora pẽu. Esepia, che Ru Tũpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tũpa upe? —ehi yuvireco.

²⁹ —Tũpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaheã nde reroya tupri catu ãgua?

³¹ Esepia, aracahe ore ramoi eta yuvirohu ivi iporupirẽhisa rupi. Icuachi-apri aracahendar pipe omombeu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombeu pẽu: ndahei Moisés omondo pan iva pendar chupe, che Ru rumo omondo chupe. Cũritei che Ru ombou pẽu pan supi eté vahe iva sui.

³³ Esepia, co pan ombou vahe Tũpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pìpe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo ãgua. Acoi ou vahe cheu ndiyumbiasì iri chietera iyavei acoi che reroya vahe ndihusei chiaveira.

³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye.

³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui.

³⁸ Esepia, ndayui ìva sui mbahe che remimbotar apo ãgua tēi; ayu rumo che mbousar porocuita apo ãgua.

³⁹ Che Ru che mbousar ndoipotai que ñepeì ava ombou vahe cheu amocañira. Ahe semimbotar rumo che ambogüerayevira ahe arì ipa vahe pìpe.

⁴⁰ Che Ru oipota avei opacatu ava oyeroya vaherã che, Tūpa Rahir, che recosa rese. Ipìpe vireco aveira tecovesa apirēhi vahe yuvireco. Supi eté ambogüerayevira arì ipa vahe pìpe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe ìva sui” ihesa rese

⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe ìva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che reroirosa sui.

⁴⁴ Ndipoi chietera que oicatu vahe ou cheu, nomonguerēhiise che Ru che mbousar; omonguerēhi vahe rumo oicatu yugüeru cheu. Ahe ambogüerayevira arì ipa vahe pìpe.

⁴⁵ Tūpa ñehe mombehusar cuachiar pìpe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeì ava osepia vahe che Ru; acoi ichui ou vaheño ité, ahe güeraño tupri ité osepia.

⁴⁷ Supi eté aipo ahe pëu: acoi che reroya vahe vireco tecovesa apirēhi.

⁴⁸ Che pan nungar aico amondo vahe tecovesa.

⁴⁹ Aracahe pe ramoì eta niha yuvirohu ité tembihu maná serer vahe ìvi iporupirēhisà rupi. Ahe rumo opa iriño ité omano yuvireco.

⁵⁰ Che rumo añehe pan ìva sui ogüeyi vahe rese, acoi ava ohu vahe, nomanoi chietera.

⁵¹ Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirēhi vaherã ité. Co pan amondo vaherã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rereciar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pëu: ndapehuisse Ava Riquehir rete, ndapehuisse avei suvi, ndaperecoi chietera tecovesa.

⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüerayevira arì ipa vahe pìpe.

⁵⁵ Esepia, che rete supi eté vahe tembihu; che ruvi supi eté vahe avei ìgua.

⁵⁶ Acoi ohu vahe che rete, oihu vahe avei che ruvi, secoi che rese, che avei aico sese.

⁵⁷ Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera.

⁵⁸ Añehe pan ìva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vahe rã ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirêhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya água; ¿ava vo viroya tẽira viña? —ehi yuvireco.

⁶¹ Jesús rumo oicua voi eté ñehe-ñehe tẽise co mbahe rese yuvireco, evocoyase oporandu:

—¿Pemboasiño tie che ñehe?

⁶² ¿Mara peyera pãha che repiase peye che, Ava Riquehir, ayeupise che reco agüerve vicho viña?

⁶³ Espíritu ité niha omondo tecovesa; yande retecuer rumo egüe ehi tẽi vahe. Co amombehu vahe pẽu ahe espíritu iyavei tecovesa.

⁶⁴ Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe

⁶⁵ aipo ehi:

—Sese niha acoi aipo ahe pẽu: “Ndipoi chietera que ava ou vahe rã cheu che Ru nomonguerêhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi.

⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirêhi vahe.

⁶⁹ Ore nde reroyasar ité oroico iyavei oroicua nde ndaseco marai vahe, Tũpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepi rumo pe pãhu pendar caruguar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarêhimbar upe.

7

Jesús ndoviroyai tivri yuvireco

¹ Ipare Jesús oguata ìvi Galilea rupi. Ndoico potai eté ìvi Judea rese. Esepia, aheve ava judío eta oseca ité ‘yayuca’ oya yuvireco.

²⁻³ Virovise judío pieta guasu teyupa apo água yuvireco, ahese tivri aipo ehi yuvireco chupe:

—Erepita eme cohava. Eso ìvi Judea ve; ahe pendar nde rupi oguata vahe avei tosepia poromondiisa nde rembiapo yuvireco.

⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaẽhisave tẽi avei tivri aipo ehi yuvireco chupe.

⁶ Evocoyase vivri upe aipo ehi:

—Ndehi v̄itei rumo ari che so ãgua. Pe guata ãgua rumo opacatu ariño t̄ei aviye.

⁷ Esepia, pe ndape amotar̄ehi eté ava co ivi pipendar; che rumo che amotar̄ehi ité yuvireco. Esepia, che amboyecua ité mbahe sembiapo naporai vahe chupe.

⁸ Pesoño pe pieta repia; che rumo ndaso v̄itei chira. Esepia, ndosupiti v̄itei ari cheundar —ehi v̄ivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoymboyecuai eté rumo ava upe.

¹¹ Judío eta oseca t̄ei yuvireco pietasave aipo ehi:

—¿Que p̄iha acoi mb̄ia? —ehi t̄ei yuvireco.

¹² Ava reh̄i p̄ahuve setá iteanga oñehe yuvireco sese. Amove aipo ehi yuvireco: “Ahe mb̄ia aviye vahe”; ambuae rumo aipo ehi: “Ndahēi aviye vahe; ahe rumo ombopa t̄ei vahe ava” ehi yuvireco.

¹³ Nomboyecuai eté rumo oñehe yuvireco sese güereciar sui osiquiyepave.

¹⁴ Pieta mb̄iterse, Jesús aviyeteramo t̄ei oi que ava p̄ahuve t̄uparo pipe ava mbohe.

¹⁵ Judío eta rereciar evocoyase,

—¡Too, mara ehi rutei! —ehi t̄ei—. ¿Mara ehi vo co mbahecuá iteanga? ¡Ndoymbohēi vahe niha yande yeroquisave! —ehi t̄ei yuvireco.

¹⁶ Judío rereciar upe rumo aipo ehi:

—Che porombohesa ndahēi cheyesuindar t̄ei, ahe rumo che mbousar suindar —ehi—.

¹⁷ Que ñepēi pe p̄ahu pendar oyapo potase T̄upa remimbotar, oicua che porombohesa ndahēi vahe che suindar, ahe T̄upa suindar ité.

¹⁸ Esepia, acoi ava oñehe vahe oyesui t̄ei, ahe ‘tache mboetei ava yuvireco’ ohesave t̄ei ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo t̄ei mborocuāita p̄eu. Que ñepēi pe p̄ahu pendar rumo ndipoi eté omboyerōya vahe. ¿Mahera ru che yuca pota peye?” ehi.

²⁰ —¡Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mb̄ituhusa ari pipe, ahese, “¡Too, mahera ãgüe ehi!” peyeño acoi cheu.

²² Pe avei rumo amove peporav̄iqui mb̄ituhusa ari pipe peporombocircuncidase porocuāita Moisés omondo vahe reroyasave. (Ahe circuncisión rumo ndahēi Moisés suindar, ahe rumo yip̄ive vahe pe ramōi suindar ité.)

²³ Oyepotase rumo ch̄ihivahe mbocircuncida ãgua mb̄ituhusa ari pipe tupri p̄eu, peyapoño rane ité mborocuāita mboaviye ãgua. ¿Mahera ru cheuño pemboasi ñepēi mb̄ia mb̄ituhusa ari pipe ambogüera tupri vahe rese?

²⁴ “Oyavi evocoi” peye voi rene catu ava upe; peicua tupri rane ‘¿supi eté p̄iha?’ pe yapave —ehi Jesús ava eta upe.

Jesús oñehe güecocuer T̄upa suindar rese

²⁵ Evocoyase amove Jerusalén pendar mb̄ia aipo ehi oyeupe yuvireco:

—¿Ndahēi vo acoi co oseca t̄ei yuca ãgua yuvireco? —ehi—.

²⁶ Ahe ité co niha co ava p̄ahuve oñehe oico, ndipoi eté que mara ehi vahe yuvireco chupe. ¿Omoha p̄iha mborereciar co mb̄ia Porop̄is̄irosar seco ãgua yuvireco?

²⁷ Yande rumo yaicua que sui turi. Acoi ouse rumo Poropĩsĩrosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe viteseve tũparove, oñehe pĩrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tẽi. Oime rumo che mbousar, ahe seroy-apri ité. Ahe pe ndapeicuai vahe.

²⁹ Che rumo aicua ité. Esepia, che ichui ayu iyavei ahe ité che mbou pẽu —ehi.

³⁰ Aipo ihese, oipisi pota yuvireco soquenda ãgua viña. Aní eté rumo. Esepia, ndoyepota vitei ihari chupe.

³¹ Setá iteanga rumo ava viroya iyavei aipo ehi yuvireco:

—Ouse Poropĩsĩrosar, ¿oyapo catura pĩha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi ãgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rereciar omondo sundao tũparo rãrosar Jesús pisi ãgua yuvireco.

³³ Jesús rumo aipo ehi:

—Aicove vitemira pe rese chĩhi rupive. Ipare voi ayevira che mbousar piri vicho —ehi—.

³⁴ Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pĩha aipo osora yande sui seca iriẽhi ãgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe ãgua?

³⁶ ¿Mara oya pĩha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheã che recosave’ ehi yandeu? —ehi-ehi tẽi oyeupe yuvireco.

Espíritu ïai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—.

³⁸ Esepia, inungar aipo ehi vahe icuachiapri pipe, che reroyasar pĩha sui osẽra ïai ndopai vahe nungar —ehi.

³⁹ ‘Che reroyasar oipisira Espiritu curi’ ohesave aipo ehi. Espiritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tũpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropĩsĩrosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropĩsĩrosar viña? —ehi—.

⁴² Icuachiapri pipe rumo aipo ehi Poropĩsĩrosar oyesura mborereciar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tẽi.

⁴⁴ Amove ava vıraso pota tēi yuvıreco soquenda; ndipoi eté rumo ěgüe ehi vahe yuvıreco chupe.

Judío rerecuar ndovıroyai Jesús yuvıreco

⁴⁵ Sundao tũparo rãrosar oyeveı yuvıreco Jesús recosa sui. Fariseo eta iyavei pahi eta rerecuar evocoyase oporandu yuvıreco chupe aipo ehi:

—¿Mahera vo ndaperui! —ehi yuvıreco chupe.

⁴⁶ Sundao tũparo rãrosar evocoyase aipo ehi:

—¡Ndipoi eté que ava oñehe vahe ahe mbıa nungar! —ehiño yuvıreco.

⁴⁷ Fariseo eta iyavei mborerecuareta evocoyase aipo ehi yuvıreco:

—¿Pe avei eté rumo peyembopa uca chupe? —ehi—.

⁴⁸ Ndipoi eté niha ore mboetasa mborerecuar iyavei fariseo vıroya vahe yuvıreco.

⁴⁹ Co ava rehi tēi ěgüe ehi yuvıreco. Ahe rumo ndoicuai vahe Tũpa porocuita yuvıreco, sese iñemoirosavıve ité yuvırecoi —ehi sundao tũparo rãrosar upe yuvıreco.

⁵⁰ Evocoyase Nicodemo, acoi oso vahe pıtu pipe Jesús pıri, ahe avei eté fariseo pãhuve secoi, ahe aipo ehi:

⁵¹ —Yandeundar porocuita mboaviye ãgua ndiyai, “Ereyaveı mbahe” yahe voıño tēi que ava mbahe sembiapocuaēhi vıteseve —ehi.

⁵² Evocoyase omboyevı yuvıreco:

—¿Nde avei tie ereico Galilea pendar? Eyembohe tuprı icuachiaprı pipe. İpıpe eresepiara ndipoi eté que ñepeı ou vahe Galilea sui Tũpa ñehe mombehusar —ehi mborerecuareta Nicodemo upe yuvıreco.

Cuña oyemboaguasa tēi vahe resendar

⁵³ İpare opa yuvıraso ñepeı-peı güēta rupı.

8

¹ Jesús rumo oso ivıtrı Olivo ve.

² Ahere ayıhive cõhese, oyeveı tũparove. Ahese opacatu ava oyemboya yuvıreco sese. Ahe evocoyase oguapı oı oporombohe.

³ Evocoyase Moısés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvıreco ava rehiı rovai,

⁴ aipo ehi yuvıreco chupe:

—Porombohesar, co cuña iyemboaguasase cuimbahe rese osesapıha ñepeı ava.

⁵ Moısés porocuita rumo ore cuai co nungar cuña yuca ãgua ita pıpe. ¿Mara ere vo catu nde co nungar upe? —ehi fariseo eta yuvıreco chupe.

⁶ Ahe rumo secoãhasave tēi aipo ehi yuvıreco ‘toyaveı angahu oñehe yandeu’ oya tēi. Ahe rumo oyaıveı, ombahecuachıa ocuã pipe ivı rese.

⁷ Evocoyase oporandu vıtese ava yuvıreco, opũha aipo ehi:

—Que ñepeı pe pãhu pendar ndoyemboangaıpai vahe, ahe rane toyapı ita pıpe —ehi.

⁸ Oyaıveı irı, ombahecuachıa ivı rese.

⁹ Osenduse rumo judío rerecuareta, omboıpı ñepeı-peı yuvınose yuvıreco, cuacua catu vahe sui rane yuvınose. Opacatu yuvınosepase, Jesús güerañomi cuña rese opıta yuvıreco.

¹⁰ Evocoyase opũhase, ahese aipo ehi chupe:

—Cuña, ¿que que ru ava? ¿Ndipoi eté que ñepeı opıta vahe nde mocañı ãgua? —ehi

¹¹ —Anı eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté.

¹⁵ Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoi nungar mbahe apo.

¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ěgüe ahe, che Ru, che mbousar rumo secoi che rese.

¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi.

¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tūparo pipe, guarepochi monuhapri riru ipive oporombohe ohã. Ndipoí eté rumo ahese osoquenda vaherã. Esepia, ndoyepota vitei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pmano pe angaipa reseve. Che sosave ndapeicatui chietera peso vaherã —ehi.

²² Aipo ihese, judío eta aipo ehi yuvireco:

—¿Oyeyucara pñha ahe ae; ayeve pñha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico.

²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pmanoñora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuipe niha acoi amombehu vichico pēu.

²⁶ Setá iteanga areco che ñehe ãgua pēu mbahe pe rembiavi rese. Che mbousar niha supi eté vahe. Ahe ñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese ñehese yuvireco.

²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohese güeraño.

29 Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

30 Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

31 Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

32 Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

33 Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

34 Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco.

35 Mbiguai tēi ndahei güerecuar rēta pipe nara ité; tahir rumo opitaño itera güēta pipe nara.

36 Sese Tahir pe renosese mbiguai tēi pe recosa sui, supi eté ndapeico iri mbiguai nungar.

37 Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe.

38 Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

39 —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña.

40 Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe!

41 Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

42 Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou.

43 ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese.

44 Peyesupa niha Carugar ité, sese niha pe ahe tupri avei peico. Peyapo pota mbahe semimbotar tēi. Esepia, Carugar yipisuive ité oporoyuca serai vahe. Ndoypoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe.

45 Che rumo añehese mbahe supi tupri vahe rese, ndache reroyai eté peye.

46 ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye?

47 Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropīsīrosar yipive catu vahe Abraham sui

48 Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye.

⁵⁰ Iyavei che ndasecai ava che mboetei āgua. Oime rumo ñepe i oipota vahe. Ahe niha omondora ava rembiapo repri chupe.

⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyevī yuvireco chupe aipo ehi:

—Cūrītei oroicua ité cute nde ererese caruguar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere?

⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye.

⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe.

⁵⁶ Esepia, pe ramoi Abraham oyembovīha ‘asepiara ihari oyepotase’ oya cheu. Osepia ité niha. Sese ovīharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi vīteise cincuenta aravīter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vīteseve —ehi.

⁵⁹ Aipo ihese, oipīsipā ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbīa ohasa suive ndasesapīsoi vahe

¹ Jesús oguatase ocar rupi, osepia mbīa ohasa suive ndasesapīsoi vahe.

² Ore semimbohe oroico vahe, oroporandu chupe:

—Ore mbohesar, ¿mahera pīha co mbīa ndasesapīsoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua.

⁴ Sese oime vītese ari yandeu che mbousar poravīquīsa apo āgua, iya ité ahe yayapo. Esepia, pītura, ahese ndayaicatui chietera mbahe apo.

⁵ Co ivī pipe che recove vītese rumo, che aico ava upe tesapesa nungar —ehi oreu.

⁶ Aipo ohe pare, ondivī ivīve, güendi pipe omoaqui vahe ivī omondo ndasesapīsoi vahe resa rese.

⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapīsoi vahe evocoyase oso, oyovai. Oyevīse ichui, omahe tupri ité.

⁸ Evocoyase sēta ivīrindar iyavei ava oicua vahe sesapīsoēhise oporanduse guarepochi rese aipo ehi yuvireco:

—¿Ndahei vo acoi co oguapī oī guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Avíye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapiso vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapiso vahe mbogüera água. Sese viraso ndasesapiso vahecuer fariseo eta rovai yuvireco.

¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa.

¹⁷ Sese oporandu iri ndasesapiso vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndovroyai eté icuera yuvireco, oichoho uca rane ité iyesupa yuvireco.

¹⁹ Chupe oporandu aipo ehi:

—¿Pe rahir ité vo co? ¿Ndasesapiso oha? ¿Mara ehi vo co cūritei osareco no? —ehi iyesupa upe yuvireco.

²⁰ —Ore rahir ité niha co, ndasesapiso oha.

²¹ ¿Mara ehi vo catu co cūritei osareco? iyavei ¿ava vo catu ombogüera? ¡Ndoroicuai eté! Peoporandu chupe. Ocuacua niha; ahe ae oicua uca pēu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropisrosar secoi” ehi vahe oñemonuhasa sui ñepeí reseve imombo água.

²³ Sese niha iyesupa aipo ehiño yuvireco: “Peoporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapısoi vahecuer aico; cūrıteı rumo asareco —ehi.

²⁶ Evocoyase oporandu iri yuvıreco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvıreco chupe.

²⁷ —Amombehu niha acoi pēu. Pe rumo ndache reroyai eté peye. ¿Mahera vo peipotı amombehu vıte vaherã pēu? ¿Pe avei tie peguata pota supı? —ehi fariseo eta upe.

²⁸ Ahese oñehe rai tēi yuvıreco chupe:

—Nde ahe mbıa rupındar tēi ereıco. Ore rumo yande ramoı aracahendar Moısés rupı oroguata vahe.

²⁹ Esepia, oroıcua ité Tūpa oñehese Moısés upe. Aıpo mbıa rumo ndoroıcuaı eté que sui osē —ehi yuvıreco chupe.

³⁰ —¿Mara peye ruteı pe ndapeıcuaı que suındar ahe! Che rumo che mbosareco.

³¹ Supı eté, yaıcua Tūpa ndosendui eté ava angaipa viyar ñehe; ava omboeteısar iyaveı vıroyasar ñehe güeraño ité niha osendu.

³² Esepia, ndıpoi eté que avaño tēi ava oyesu sui ndasesapısoı vahe ombogüera vahe.

³³ Ahe rumo ndaheıse Tūpa suındar ou vahe vıña, ndoıcatui chıetera revo mbahe apo vıña —ehi fariseo eta upe.

³⁴ Evocoyase fariseo eta aıpo ehi yuvıreco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeı reseve oñemonuhasa sui yuvıreco.

Jesús reroyasarēhi ndasesapısoı vahe nungar tēi

³⁵ Jesús oıcua ndasesapısoı vahecuer mombosa. Vupıtıse aıpo ehi chupe:

—¿Ereyeroıa nde Ava Rıquehıı rese? —ehi.

³⁶ Mbıa evocoyase aıpo ehi chupe:

—Che mbohesar, emombehumi cheu; tayeroıa catu ru sese —ehi.

³⁷ —Eremahe niha co sese; che ité ahe aıco —ehi ndasesapısoı vahecuer upe.

³⁸ Evocoyase mbıa oñenopıha sovai:

—Orovıroıa, che Yar —ehi chupe.

³⁹ Ichui aıpo ehi:

—Che ayu co ıvı pıpe mbahe supı tuprı vahe apo ãgua; ava ndasesapısoı vahe nungar upe mbahe supı eté vahe che Ru suındar mboyecua ãgua iyaveı ava oıcua tēi vahe mbahe Tūpa suındar mboesapısoēhi iri ãgua —ehi.

⁴⁰ Evocoyase ambuae fariseo eta yuvırecoı vahe cōımi ichui osenduse aıpo ñehesa, oporandu yuvıreco chupe:

—¿Ore aveı tie ndasesapısoı vahe nungar oroıco? —ehi.

⁴¹ Evocoyase omboyevı ahe fariseo upe:

—Peıcose ndasesapısoı vahe nungar vıña, “Peyavı mbahe” ndehı chıetera Tūpa pe angaipa rese pēu vıña. Pe rumo, “Ore oroıcua tuprı Tūpa suındar mbahe” peye tēi. Sese Tūpa, “Peyavı mbahe” ehi eté pēu —ehi Jesús fariseo eta upe.

10

Jesús ovesa rãrosar nungar

¹ “Supı eté aıpo ahe pēu: acoı ava co cotı rupı tēi yuvıroıque vahe ovesa rēta pıpe, ahe imonda rai vahe tēi yuvırecoı.

² Oıque vahe rumo oquendıpı rupı eté, ahe sãrosar ité secoı.

³ Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose ãgua sêta sui. Ahe evocoyase oicua iñehe yuvireco.

⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco.

⁵ Ndoguatai eté rumo oyarêhi rupi yuvireco; yuvinoña-noñaño ichui. Esepia, ndoicuai eté iñehe” ehi

⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoyase Jesús aipo ehi iri: “Supi eté, aipo ahe pëu: che año ité oquendipi nungar aico ovesa upe.

⁸ Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco.

⁹ Che rumo oquenda nungar aico. Acoi oique vahe che rupi, ahera ipĩsiropirã yuvirecoi. Iyavei inungar acoi ovesa oique vahe güeta pipe, ichui osē capihí reca ãgua igua yepi, ãgüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco’ ava tecovesa ndopai vaherã ité yuvireco’ viya.

¹¹ Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã;

¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoyase mahembiar oñaro ai vahe omondi-mondi eté ipisi ãgua.

¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco.

¹⁶ Areco avei ambuae ité che reimba ovesa. Ahe avei aru pota che mboyeroya vaherã yuvireco. Ahese ñepi reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira.

¹⁸ Ndoicatui chira ava ahe ae tēi che yuca ãgua; che teieté rumo amondora che récocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco.

²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboe-sapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tũparo rovasagüer pieta oyepota.

²³ Ahese Jesús oguata oico tũparo Salomón oyapo vahecuer rocupe ivi rupi.

²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepei reseve oreu —ehi yuvireco chupe.

²⁵ —Amombehu niha acoi pẽu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa;

²⁶ pe rumo ndache reroyai eté peye. Esepia, pe ndahei eté che remiaro ovesa peico.

²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi uguata yuvireco.

²⁸ Amondo avei tecovesa apirẽhi yuvireco chupe icañiẽhi ãgua; ndipoi chietera que ava virocua iri vaheã che sui.

²⁹ Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepei ava oicatu vahe serocua che Ru sui.

³⁰ Che Ru iyavei che oroico ñepeiño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua.

³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ãgũe orohera ndeu. Esepia, nde ereñehe rai tẽi Tũpa rese. Nde moco ava tẽi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pẽundar mborocuita icuachiapri pipe niha aipo ehi: ‘Che aipo ahe pẽu: pe tũpa pãve ité peico’ ehi.

³⁵ Yaicua niha icuachiapri pipendar ndiyai yayamotarẽhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pĩsisar upe.

³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tẽi Tũpa rese’ peye cheu, ‘Che Tũpa Rahir aico’ ahese pẽu?

³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña.

³⁸ Yepe ndache reroyai chira che recocuer rese peye viña, mbahe ayapose rumo ahe tẽi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarẽhimbareta upe.

³⁹ Osoquenda pota iri yuvireco viña; Jesús rumo osoño ipãhu sui.

⁴⁰ Oyevi iai Jordán rovai. Aheve acoi Juan yipindar oporoãpiramo. Aheve opita.

⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agũer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve.

² Ahe María, oipiyere vahe mbahe s̄iacua vahe yande Yar p̄i rese. Ipare oiquiti oha p̄ipe.

³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ãgua ité. Ëgüe ehi rumo Tũpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña,

⁶ oyanduse rumo Lázaro mbaherasisa, opita viteño ité ñuvirio ari güecosave.

⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi t̄ei acoi judío rerecuareta ahe pendar nde yuca pota ita p̄ipe yuvireco; ¿cũritei co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari p̄ipe ndoyepiapi eté. Esepia, osepia ité co ivi resapesa;

¹⁰ acoi oguata vahe rumo p̄itu p̄ipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque t̄ei. Che rumo amomahera —ehi.

¹² Evocoyase ore aipo orohe chupe:

—Ore Yar, oque t̄eise, ocuerara —orohe.

¹³ ‘Omano ité’ oyapave t̄ei aipo ehi. Ore rumo orep̄ihañemoñeta: “Oque t̄ei revo” orohe chupe viña.

¹⁴ Ipare rumo omombehu tupri ité aipo ehi oreu:

—Lázaro omano ité.

¹⁵ Aviharete che ndaicoise aheve. Esepia, ãgüe ehise ité aviye catura p̄eu pe che reroya ãgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherã supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cũritei irungatu ari opa Lázaro t̄ire” ehi vahe.

¹⁹ Setá judío yuviraso Marta iyavei María p̄iri iquivri mano agüer sui imbov̄iha ãgua.

²⁰ Oicuase Marta Jesús yepota seni, oso voi eté sapeve; María rumo opitaño oi p̄ipe.

²¹ Evocoyase Marta aipo ehi voi chupe:

—Che Yar, ehi cohav̄e ereicose, nomanoi chietera revo ore quivri viña.

²² Che rumo aicua Tũpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe p̄ipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano t̄eira viña, oicoveño itera rumo.

²⁶ Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

²⁷ —Oroviroya ité, che Yar. Nde niha Poropĩsĩrosar ereico Tũpa Rahĩr, ore remiario ereyu vaheĩ co ivi pĩpe oreu nara —ehi Marta Jesús upe.

Jesús oyaseho Lázaro ruvĩpa rovai

²⁸ Aipo ohe pare, Marta oso ocupĩhir María reca, chupeñomi aipo ehi: —Porombohesar oicove cohove, “Tou” ehi ndeu —ehi chupe.

²⁹ Evocoyase María oso voi eté sepia.

³⁰ Jesús rumo ndoique vitei eté tecua pĩpe; Marta rese oyoeplasave viteño ité secoi.

³¹ Osepiase María sē poyava, judío eta sētave yuvĩrecoi vahe imbovĩhasar yuvĩraso voi saquicuerive, “Oquĩvri ruvĩpave revo osora oyaseho” ehi yuvĩreco viña.

³² Evocoyase María oyepotase chupe, oñenopiha sovai aipo ehi: —Che Yar, ehi revo ereicoveño itese cohove, che quĩvri nomanoi chietera viña —ehi María chupe.

³³ Osepiase María yaseho iyavei judío eta yuvĩraso vahe supi, opĩha pĩpe oyandu ité ovĩharēhisa.

³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvĩreco chupe:

—Ore Yar, erio, teresepia —ehi.

³⁵ Ahese Jesús oyaseho.

³⁶ Judío evocoyase aipo ehi yuvĩreco:

—¡Esepia, osaisu ité! —ehi oyeupe yuvĩreco.

³⁷ Ambuae rumo ipãhu pendar aipo ehi yuvĩreco:

—Co mbia omomahe vahe acoi mbia ndasesapĩsoi vahe, ¿ndoicatui chira pĩha Lázaro manoēhi ãgua mbahe apo cuese rahe viña? —ehi yuvĩreco.

Lázaro mbogüerayevi agüer

³⁸ Jesús oyemboya suvĩpave ovĩharēhisa pĩpe; ahe suvĩpa ita hopri, sovapĩsa ita avei.

³⁹ —Perocua sovapĩsa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tũpa pĩratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, vircua ita yuvĩreco ichui. Evocoyase omahe ĩva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe.

⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘tovĩroya avei nde che mbousa co ivi pĩpe yuvĩreco’ che yapave —ehi.

⁴³ Aipo ohe pare, oñehe pĩrata aipo ehi:

—¡Lázaro, esē eipeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pĩsi ãgua yuvĩreco

⁴⁵ Osepiase co poromondiisa, judío eta yuvĩraso vahe María rupi setá ité Jesús vĩroya yuvĩreco.

⁴⁶ Ipãhu pendar rumo moviro yuviraso voi ava fariseo rerecuareta uve sembiapo mombehu ãgua.

⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

⁴⁸ Ndayayapoise mbahe chupe, opacatu tiëte ava viroyara yuvireco viña iyavei aviyeteramo mborerrecuar Roma iguar yanduse, yugüerura yande tũparo mondurupa iyavei omocañi tõi uca aveira yande recua yande sui —ehi oyeupe yuvireco.

⁴⁹ Ñepei rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe,

⁵⁰ ndapesenducuai avei co tecocuer; aviye catura ñepei mbia omanose yande recocuer rese, ndahei que opacatu yande mocañi tõi ãgua —ehi omboetasa eta upe.

⁵¹ Ahe rumo ndahei oyesui tõi aipo ehi; Tũpa ité aipo ombohe uca. Esepia, ahe ité mborerrecuar guasu chini ahese. Sese aipo ehi: “Jesús omanora yande recocuer rese” ehi.

⁵² Iyavei ndahei chira ahe ava reseño, omanora opacatu ava Tũpa Rahir oñemosai tõi vahe ñepei reseve imonuha ãgua.

⁵³ Ëgüe ehi ahe arí pipeve judío eta rerecuar oyemoingatupa voi yuca ãgua yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei ãgua renondeve.

⁵⁶ Oseca tõi Jesús yuvireco. Ipare tũparove yuviroiquese, oporandu-randu oyeupe yuvireco:

—¿Mara peye pe, oura pĩha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

12

Ñepei cuña omondo Jesús rese mbahe sñacua vahe

¹ Seis arí ipane vitesse Pascua pieta ãgua, Jesús oso tecua Betania ve, aheve acoi Lázaro ombogüerayevi.

² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri.

³ Evocoyase María güeru medio litro mbahe sñacua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sñacúa iteanga evocoyase opacatu oi pipe.

⁴ Evocoyase ore mboetasa Judas Iscariote, ahe acoi omondo vaheerã ava yamotarẽhimbar uve, aipo ehi:

⁵ —¿Mahera vo ndimondosai co mbahe sñacua vahe tresciento denario rupi ava iparaisu vahe pĩtiví ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tõi. Setá rupi guarepochi virocua güembiporuguã tõi.

⁷ Evocoyase Jesús aipo ehi:

—Toyapoño cheu. Esepia, ahe che mano ãgua renonde Ëgüe ehi cheu.

⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahi rerecuar oyamotarêhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, êgüe ehi rumo imbogüerayevipri Lázaro repia avei.

¹⁰ Evocoyase pahi rerecuar, “Yayuca avei Lázaro” ehi yuvireco oyeupe.

¹¹ Esepia, ahe ichui tēi niha setá iteanga judío oyepepi pahi rerecuar sui Jesús reroya ãgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco.

¹³ Ahese oyasia pindo yuvireco. Oyacatu viraso Jesús rovaïchi ãgua, osapucái yuvireco chupe:

—¡Imboeteipri, sovasapri seci ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri arachendar rupi tupri ité aipo ehi vahe:

¹⁵ “Pesiquirene, Sión pendar; pesepia, pe rerecuar guasu guaricumí harive ou pēu” ehi.

¹⁶ Yipindar, ore semimbohe eta, ndorosenducuai eté co arachendar imombehupri. Ipare rumo oyevisé güecosa porañetesave, ahese oremahenduha arachendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepiá vahecuer, ahe opa omombehu-mbehu ambuae ava upe yuvireco.

¹⁸ Sese ava eta yuvínose voi sovaïchi ipisi ãgua. Esepia, oicua ité ahe mbahe poromondisa guasu yapose yuvireco.

¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūritei yuvireco supí! —ehi yuvireco.

Oime griego oseca vahe Jesús yuvireco

²⁰ Griego oime ava rehii pãhuve yuviraso vahe pieta repia Tũpa mboetei ãgua tecua Jerusalén ve.

²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu.

²³ Evocoyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave.

²⁴ Supi eté aipo ahe pēu: inungar acoi trigo rãhii nañotisaise, ahese ndihai chietera; ñotise rumo, ahese iha vaira.

²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi.

²⁶ Acoi ava che mboyeroa pota vahe, toguata che rupi yuvireco. Esepia, acoi che mboyeroasar yuvirecoi vahe, ahe avei yuvirecoira che piri ivave. Che Ru Tũpa evocoyase omboeteira ahe sereco —ehi chupe.

Jesús omombehu omano ãgua

²⁷ “¿Cũritei ayandu ité mbahe-mbahe tēi oime vaherã cheu! ‘¿Mara ahera pĩha?’ ahe tēi. ¿Aipo ahera: ‘Che Ru, che pĩsĩro eve cũritei cheu oime vaherã mbahe tēi sui’ ahera viña? ¿Che rumo aicua evocoi nungarã ité ayu!

²⁸ Che Ru, emboyecua nde pĩratasa nde rer porañetesa mboetei ãgua” ehi oyerogui.

Ichui oyeendu iva sui ñehesa aipo ehi vahe: “Ëgüe ahe niha amboyecua che pĩratasa vichico, ãgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava, —Tũpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pẽundar.

³¹ Cũritei oimera ñemoirosa co ivi pĩpendar ndache reroyai vahe upe, cũritei avei imombosara Carugar co ivi pĩpendar imborerecuasa sui.

³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano.

³⁴ Aipo ihese ava eta aipo ehi:

—Ore rumo orosendu mborocuaita icuachiapri pipe aipo ehi vahe: “Poropĩsĩrosar apirẽhi vaherã ité” ehi. ¿Mahera ru aipo nde: “Ava Riquehĩr osupira ivate yuvireco” ere no? ¿Uma ru aipo Ava Riquehĩr, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chĩhi rupive tesapesa pe pãhuve. Peguata catu supi seime viteseve. Aviyeteramo pe resapiha tẽira pĩtumimbi vahe. Esepia, acoi uguata vahe pĩtumimbisa rupi, ndoicuai que güecosa.

³⁶ Peroya co tesapesa cũritei pereco viteseve, ipipe ité pe reco ãgua —ehi.

Aipo ohe pare, Jesús osẽ ava rehĩ pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondĩisa judío rerecuar rovaque viña, ahe rumo ndoviroyai eté yuvireco.

³⁸ Esepia, imboaviesya rane itera Tũpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pĩratasa eremboyecuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tũpa nomboesapĩsoi ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera ãgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepi reseve yuvireco’ oya.

⁴³ Esepia, ahe oipota catu ava tēi suindar yemboeteisa Tũpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesa ava rehi upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco.

⁴⁵ Iyavei acoi che repia vahe, che mbousar avei osepia.

⁴⁶ Che tesapesa aico. Ayu co ivi pipe ava che reroyasar pĩtumimbisave yuvirecoiẽhi ãgua.

⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi ãgua, che rumo ayu ipĩsiro ãgua.

⁴⁸ Acoi ava che reroĩro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaẽhisa pipe oyemocañi ucara ari ipa vahe pipe.

⁴⁹ Esepia, che nañehei eté cheyesui tẽi; che Ru, che mbousar rumo che cuai che ñehe ãgua, che porombohe ãgua avei.

⁵⁰ Che aicua co cheundar porocuaita güeru tecovesa apirẽhi ava upe. Sese niha amombehu che Ru che cuaisa” ehi Jesús ava rehi upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya ãgua oso vahrã Vu piri. Ahe osaisu vahe ité ava oyeupendar co ivi pipe yepi. Ëgüe ehi saisu ari ipa vahe rupi.

²⁻⁴ Carugar oi que ité Simón rari; Judas Iscariote, piha pipe imondo ãgua yamotarẽhimbar uve. Jesús rumo oicua ité Vu Tũpa sui ousa, oicua avei oyevi iri ãgua Vu Tũpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opũha, osequi oturucuar yohasa. Ipare omunde ambuae turucuar vumbicuasa rese.

⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cũritei. Ipare rumo eresenducuaa —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ãgua peye —ehi.

¹¹ Ahe aipo ehi: “Ndaopacatui rumo ãgua peye” ehi. Esepia, oicua ité uma omondora yamotarẽhimbar upe.

¹² Güemimbohe pi sei pare, omunde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pẽu? —ehi—.

¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico.

14 Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi.

15 Che niha 'na tehi avei yuvireco' viya opombohe pe rereco, ãgüe ahe pëu.

16 Supi eté aipo ahe pëu: ava mbiguai tã, ahe ndahei ivate catu güerecuar sui; ãgüe ehi avei imbouprí ndahei ivate catu secoi ombousar sui.

17 Pesenducuase co nungar mbahe, peyapo tuprise, ahese peviharete catura peico –ehi.

18 “Che nañehi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe.

19 Senondeve amombehu pëu. Evocoyase ãgüe ehise ité cheu, che reroyara peye che ité niha aipo ahe vahe vichico.

20 Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepeí pe pãhu pendar che mondora che amotarëhimbar upe” ehi

21 Aipo ohe pare, Jesús ndoyembovïhai eté iyavei mbahe oime vaherã omboyecua tupri ité,

–Supi eté aipo ahe pëu: ñepeí pe pãhu pendar che mondora che amotarëhimbar upe –ehi.

22 Evocoyase ore oromahe-mahe tã oreyese, “¿Ava upe pãha aipo ehi?” orohe tã oreyeupe.

23 Che sembiaisu catu yípive acarú vïte.

24 Ipare Pedro oyaiti-iti ‘¿Ava upe vo aipo ere? tehi chupe’ oyapave cheu.

25 Evocoyase che asiri catu irimi yípive, aporandu chupe:

–Che Yar, ¿ava ité vo? –ahe.

26 Ahe aipo ehi cheu:

–Cũritei amoaquira pan rahicuer imondo tohu, ahe ité che mondora –ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe.

27 Judas oipisise pan, oguapi voi eté Caruguar sese. Evocoyase aipo ehi Judas upe:

–Evocoi ereyapo pota vahe, eyapo voiño ité ru –ehi chupe.

28 Que ñepeí rumo mesave orocarú vahe, ndorosenducuai eté aipo ihesa.

29 Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “ ‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

30 Pan pisi pare, Judas osë voi eté oso pītuse.

Porocuita ipiasu vahe

31 Judas sã pare, Jesús aipo ehi:

–Cũritei oyecuara che, Ava Riquehir, reco porañetesa. Che Ru Tũpa reco porañetesa avei oyecuara che rese.

32 Acoi amboyecuase che Ru Tũpa reco porañetesa, ahe avei omboyecuara che reco porañetesa, ãgüe ehira imboyecua pihavi.

33 Che rahireta, che rembiaisu, ndaico pucu iri chira pe rese. Che reca tãira peye; inungar acoi judío rerecuar upe aipo ahe: “Ndiyai chietera peso che sosave” ahe.

³⁴ Sese co amondo porocuaita ipiasu vahe pëu ñepei-pei peyeaisu ãgua inungar che opoaisu.

³⁵ Peyeaisuse ñepei-pei, opacatu tupri ité ava oicuara yuvireco che remimbohe supi eté pe recosa —ehi.

Jesús, “‘Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cūrítei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so ãgua? ¡Ayemoingatu ité amano vaherã nde rese! —ehi Pedro chupe.

³⁸ —¿Supi eté pīha ereyemoingatu ité che rese nde mano ãgua? Nde rumo cōhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya.

² Esepia, che Ru rētave setá oime pe reco ãgua; ãgüe ndehise rumo, namombehui chira aipo pëu viña. Sese che asora pe recuarã moingatu.

³ Imoingatu pare ayevira pe reca che recosave pe reraso ãgua cheyepiri.

⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha perí aico supi eté vahe iyavei tecovesa. Che rupi güeraño ité peyepotara che Ru upe —ehi—.

⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá arí aico pe rese, ¿ndapeicua vīteí eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vīte cheu no?

¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—.

¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—.

¹² Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—.

¹³ Acoi peporanduse que mbahe rese che rer pipe, che amondoño itera pëu. Ipípe che amboyecuará che Ru reco pīratasa.

¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuaita.

16 Che aporandura che Ru upe ombou vaherã Espíritu supi eté vahe pe p̃itivii ãgua, ahe secoi vaherã ité pe rese.

17 Ava Tũpa ndoicuai vahe rumo, ndoicatu chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe p̃iha p̃ipe.

18 “Ndopoeyai chira pe güeraño t̃ei; ayevíra niha pe rese aico vaherã.

19 Ch̃ihi t̃ei oime vite ari che reroyasar̃ehi che repia vite vaherã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei.

20 Ahe ari p̃ipe peicuara che Ru rese che recosa, che rese pe recosa avei iyavei che aicose pe rese.

21 Acoi oicua vahe che porocuita, omboyeroa vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

22 Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasar̃ehi upe? —ehi chupe.

23 Evocoyase aipo ehi Judas upe:

—Acoi che raisu vahe, omboyeroa vahe che ñehe yuvireco, che Ru evocoyase osaisura iyavei che Ru reseve oroyura oroico vaherã sese.

24 Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui t̃ei; ahe rumo che Ru, che mbousar suindar —ehi.

25 “Pe rese che reco vitesse, opa co mbahe amombehu vichico p̃eu.

26 Espíritu Santo rumo, Porop̃itiviasar, che Ru ombou vahe che rer p̃ipe, ahe pe mbohera opacatu mbahe aviye vahe rese. Pe momahenduha aveira opacatu p̃eu che ñehe agüer rese.

27 “Aseya teco tuprisa p̃eu, ahe che reco tuprisa; ndahei rumo avañõ t̃ei rembiapo nungar amondo p̃eu. Aní, ‘¿Mara yahera p̃iha?’ peyera; aní chiaveira pesiquiye.

28 Pesendupa niha acoi, ‘Asora, ipare ayeví irira pe rese aico vaherã’ che hesa. Supi eté che raisuse peye, peviharetera peicuase che Ru p̃iri che sosa. Esepia, ahe ivate catu vahe ité che sui.

29 Sese amombehupa voi co mbahe tenondeve p̃eu, ãgüe ehise ité, ahese peroyara.

30 “Namombehu pucu iri chira mbahe p̃eu. Esepia, ou ité co ivi p̃ipe oporocuai t̃ei vahe. Ahe rumo ndahei ivate catu vahe che sui

31 ‘toicua ava che reroyasar̃ehi che Ru raisusa yuvireco’ che hesa p̃ipe. Ayapõño ité che Ru che cuaita.

“Pep̃uha. Yaso cohava sui” ehi güemimbohe eta upe.

15

Jesús uva hi nungar

1 Ipare Jesús õñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi.

2 Ahe oyasia sãca ndihai vahe ichui yepi; iha vahe rumo omoatiro tupri iha catu ãgua.

3 Pe pe recocuer imoatiropri ité che pe mbohesa p̃ipe.

4 Peicoño ité catu che rese inungar che aicoño ité avei pe rese. Uva rãca oise oh̃i sui, ndiha iri ahe ae t̃ei; pe avei ãgüe peyera peyepise che sui” ehi oreu.

⁵ “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, ãgüe ehira ahe. Supi eté ndapeicatui chietera che porẽhi mbahe apo.

⁶ Acoi ndasecoi vahe che rese, ahe imombosara inungar acoi uva rãca yipi vahe. Ipare imonuhasa sapi ãgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pẽu” ehi.

⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa.

⁹ Che opoaisu ité, inungar che Ru che raisu. Sese peicoño ité catu che poroaisusa pipe.

¹⁰ Esepia, pemboyeroyase che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pẽu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe.

¹² Co che porocuita: Peyeaisu ñepeí-peí, inungar che opoaisu.

¹³ Ndipoi eté que poroaisusa ivate catu vahe co sui omondose que ava güecocuer omboripar rese nara.

¹⁴ Pe che mboyeroyase peye, ahese che mboripar peico.

¹⁵ ‘Pe mbiguai peico’ ndahe iri pẽu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pẽu. Esepia, aicua ucapa ñehesa che Ru cheu omombehu vahe pẽu.

¹⁶ Pe niha ndache poravoi peye. Che rumo opoporavo iyavei opocuai peporaviqui vaherã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pẽu.

¹⁷ Co rese opocuai: Peyeaisu catu ñepeí-peí peyacatu” ehi Jesús güemimbohe upe.

Jesús amotarẽhimbar; supindar amotarẽhimbar avei

¹⁸ “Acoi ava ndoicuai vahe Tũpa pe amotarẽhise, peicuaño che rane che amotarẽhi yuvireco yipindar.

¹⁹ Pe peico vitesese ava Tũpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tẽi ndape ambota iri yuvireco. Esepia, pe ndahe iri ipãhu pendar peico.

²⁰ Peyemomahenduha pẽu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarẽhimbrĩ aico, pe avei pe amotarẽhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco.

²¹ Co opacatu mbahe che recocuer sui tẽi ãgüe ehira pẽu. Esepia, ndoicuai niha che mbousar yuvireco.

²²⁻²⁴ “Che ndayuse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tũpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarẽhiño, che Ru avei oyamotarẽhi yuvireco. Sese, ‘Pereco ité mbahe pe rembiavi peyese’ ehi Tũpa chupe. Esepia, acoi che amotarẽhi vahe, che Ru avei oyamotarẽhi yuvireco.

²⁵ Co rumo ãgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoẽhi pipe sui tẽi che amotarẽhi yuvireco’ ehi vahe.

²⁶ “Acoi ambouse rumo Porop̄itiv̄isar, Esp̄ritu supi eté vahe che Ru sui p̄u, ahe omombeura che recocuer.

²⁷ Pe avei pemombeura che recocuer. Esepia, ȳip̄isuive ité peico che rupi” ehi.

16

¹⁻² “Pe mocañehi āgua che rese pe yeroyasa aipo ahe opacatu co mbahe imombehu p̄u: pe mombora judío rerecuar oñemonuhasa sui yuv̄ireco, pe yuca aveira yuv̄ireco. Ahe rumo omohara, ‘Tūpa uve nara revo na yahe’ ehira yuv̄ireco viña.

³ Evocoi rumo ēḡue ehira yuv̄ireco che Ru cuaēhi p̄ipe iyavei che cuaēhi p̄ipe yuv̄ireco.

⁴ Amombehu aipo p̄u acoi ēḡue ehise, peyemomahenduhara che remimombehuḡer rese.

Esp̄ritu Santo rembiapo

“Ȳip̄isuive rumo namombehui co mbahe p̄u. Esepia, aicoveño ité pe rese.

⁵ Cūritei rumo asora che mbousar p̄iri iyavei ndipoi que ñepe pe p̄ahu pendar ‘¿que vo aipo eresora?’ ehi vahe cūritei cheu.

⁶ Pe rumo ndapeyembov̄ihaiño aipo mbahe amombehuse p̄u.

⁷ Supi eté rumo aipo ahe p̄u: av̄iye catura p̄u che asose. Esepia, ndasoise viña, ndoui chietera pe rese Porop̄itiv̄isar. Asose rumo, che amboura p̄u.

⁸ Ouse ahe, oicua ucara ava che cuaēhisar upe yangaipa, oicua uca aveira tecocuer ñ̄visa iyavei cañisa ndaseco p̄orai vahe upendar.

⁹ Oicua ucara yangaipa chupe ndache reroyaise yuv̄ireco;

¹⁰ oicuara rumo che reco ih̄ivi tupri vahe yuv̄ireco. Esepia, asora che Ru recosave, ahese pe ndache repia iri chietera peye;

¹¹ iyavei oicuara Tūpa poromocañisa. Esepia niha, Caruguar, ahe co iv̄i p̄ipendar rerecuar oip̄isira che Ru Tūpa ñemoirosa.

¹² “Setá iteanga mbahe oime amombehu vaheṛã p̄u. Pe rumo ndapeicatu chira cūritei senducua.

¹³ Ouse rumo Esp̄ritu supi eté vahe, ahe pe mbohera mbahe supi eté vahe rese. Esepia, noñehi chira oyesui t̄ei, ahe rumo omombeura mbahe osendu vahe ḡueraño, oicua uca aveira mbahe coiye oime vaheṛã.

¹⁴ Ahe che mboeteira. Esepia, oicua ucara opacatu mbahe cheundar p̄u.

¹⁵ Opacatu mbahe che Ru v̄ireco vahe, che mbahe. Sese niha, ‘Esp̄ritu oip̄isira opacatu mbahe cheundar, oicua uca aveira p̄u’ ahe.

¹⁶ “Av̄iyeteramo t̄ei ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndov̄ihai chira viña, coiye catu rumo ov̄iharetera yuv̄ireco

¹⁷ Evocoyase ore oroporandu-randu t̄ei oreyeupe aipo orohe:

—¿Mara oya p̄iha: ‘Av̄iyeteramo t̄ei ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu p̄iri no?

¹⁸ ¿Mara oya vo aipo: ‘Av̄iyeteramo t̄ei’ ehi? Ndayasenducuai mo aipo iñehesa —orohe oreyeupe.

¹⁹ Ipare rumo ‘oporandura co mbahe rese yuv̄ireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he aḡer rese co pe porandu v̄ite peyeupe? —ehi—.

²⁰ Supi eté aipo ahe p̄u: peyasehora pe v̄iharēhisa p̄ipe, ava angaipa viyar rumo ov̄ihareteñora yuv̄ireco. Yepe pe, ndapev̄ihai chira viña, coiye catu rumo pev̄iharetera.

21 Inungar acoi que cuña imembira potase, tasi chupe oyepotase ari imembira água; pītani oha pare rumo, nimahenduha iri tasi cuer rese; soriveteño omembri rese.

22 Ēgüe peye avei; pe cūrītei tasi avei pēu, ayevī irira rumo pe repia água, ahese pevīharetera. Ahe vīharetesa ndipoi chīetera que ava vīrocua vahe rā pe sui.

23 “Ahe ari pīpe, ndapeporandu iri chīetera mbahe rese cheu. Supi eté aipo ahe pēu: che Ru omboura opacatu mbahe pēu che rer pīpe peporanduse.

24 Cūrītei rumo ndapeporandu vītei mbahe rese che rer pīpe. Peporandu catu sese, ahese peipīsira. Ipīpe sui perorivete catura.

Jesucristo mbahe-mbahe tēi recopisar

25 “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar.

26 Ahe ari pīpe pe peporandura mbahe rese che rer pīpe; che rumo, ‘Ayerquirā pe rese che Ru upe’ ndahei pēu.

27 Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye.

28 Asē che Ru sui co ivi pīpe vitu; cūrītei rumo asevara co ivi, ayevīra che Ru upe” ehi oreu.

29 Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu.

30 Supi eté ereicua opacatu mbahe, ereicua avei ore porandusa. Evocoiyase ndiya iri ore porandu água mbahe rese ndeu. Sese oroviroya Tūpa sui nde yusa —orohe chupe.

31 —¿Evocoiyase che reroya ité peye? —ehi—.

32 Supi eté oyepota ari cute, co pīpe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese.

33 Amombehu co opacatu pēu che rese mbahe tupri pīpe pe reco água. Peparaisu itera co ivi pīpe; peyemonguerēhi catura rumo. Esepia, che opa ité asecoi co ivi pīpendar mbahe tēi —ehi.

17

Jesús oyeruqui güemimbohe rese

1 Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipīpe sui avei che nde Rahir toromboetei.

2 Supi eté niha, nde erembou che mborerecua água opacatu ava ivi pīpendar harive iyavei tecovesa apirēhi mondo água opacatu ava nde cheu erembou vahe upe.

3 Co niha tecovesa apirēhi, tande cua nde Tūpa ñepeī supi eté vahe nde recose yuvireco, tache cua avei nde che mbose yuvireco.

4 “Che niha oromboetei co ivi pīpe, iyavei ayapo nde che cuaisa.

5 Sese che Ru, embou irimi cūrītei che reco porañete água, inungar acoi yipīndar areco vahe nde rese ivi apoēhiseve.

6 “Co nde rembiporavo ava co ivi pīpendar pāhu sui erembou vahe cheu; orocua ucapa chupe. Yipīndar ndeundar yuvirecoi. Ipare nde erembou cheu. Ahe vīroya ité nde ñehe yuvireco.

7 Cūrītei oicuapa opacatu mbahe nde suindar cheu erembou vahe yuvireco.

8 Esepia, amombehu ité nde ñehe erembou vahe cheu; ahe vīroya ité yuvireco, vīroya avei nde che mbousa yuvireco.

9 “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarēhi rese.

10 Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

11 “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco maranehi vahe, esãro nde pĩratasa pipe nde remimbou cheu oyese yuvirecoi tupri ãgua inungar yande yaico.

12 Aicose co ivi pipe, asãro tupri nde rer pĩratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepeí ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ãgüe ehi.

13 “Cũritei asora nde recosave. Co ivi pipe che reco vitesa rumo, amombehu co mbahe chupe ‘tovireco che viharetesa yuvireco’ che yapave.

14 Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico.

15 ‘Enose ava Carugar povri pendar pãhu sui’ ndahei ndeu, che rumo aipota eresepira Carugar sui.

16 Inungar che ndahei Carugar povri pendar aico, ãgüe ehi avei ahe yuvireco.

17 Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité.

18 Inungar nde che mbou eve ava co ivi pipendar pãhuve, ãgüe ahe avei che imondo ava pãhuve yuvireco.

19 Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

20 “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaheã rese.

21 Aporandu avei ndeu toyuvirecoi tupri ité yuvireco oyese inungar ñepeí vahe, ãgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco.

22 Che reco porañetesa nde erembou vahe cheu, ahe tupri avei amondo yuvireco chupe ñepeí vahe nungar yuvirecoi ãgua, inungar yande ñepeí vahe yaico.

23 Che aico yuvireco sese, nde evocoyase ereico che rese ahe yuvirecoi tupri ãgua inungar ñepeí vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

24 “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaheã teco porañetesa cheu erembou vahe yuvireco. Nde niha yipive ité che raisu eve ivi apoẽhiseve.

25 Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco.

26 Orocua uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyoeroqui gũemimbohe recocuer rese.

18

Jesús oipisi yuvireco

1 Aipo ohe pare, Jesús ore renose ore reraso iembĩ Cedrón rovai. Aheve oime mbahe miti rêta, ipipe Jesús ore roeroique ore reraso.

² Iyavei Judas omondo vaherã yamotarẽhimbar upe oicua avei aheve secosa. Esepia, setá rupi Jesús rese oroñemonuha aheve yepi.

³ Sese Judas oyepotaño ité aheve sundao rehii reseve iyavei sundao tũparo rãrosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuvirasos.

⁴ Yipive ité rumo oicua oyeupe mbahe oime vaherã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyeví yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo ãgua yamotarẽhimbar upe.

⁶ “Che niha ahe aico” ehise ava upe; guaquicuei coti pãve opa oviapi yuvireco.

⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye ãgua ãgüe ehi: “Acoi che Ru ombou vahe cheu, nocañii eté que ñepeí che sui” ehi.

¹⁰ Evocoyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai.

¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua.

¹³ Yipindar virasos Anás rõtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi.

¹⁴ Caifás ité aipo ehi omboetasa upe: “Yandeu aviye catu itera que ñepeí mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rãta pipendar opa ité che cua yuvireco. Sese aiqueño ité Jesús raquicuei mborerecuar rõtave vicho.

¹⁶ Pedro rumo opitaño oquendipi ocarve. Che rumo pahi eta rerecuar che cua ité yuvireco. Evocoyase asẽ, aporandu oquendipi rãrosar uve Pedro reique ãgua rese.

¹⁷ Evocoyase oquendipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

¹⁸ Sõhisá iteanga ahe pĩtu pipe. Evocoyase mborerecuar rembiguai iyavei sundao eta oyatapi yuvireco oyephe ãgua. Pedro avei aheve ipãhuve oyephe tata ipive ohã.

Pahi eta rerecuar ivate catu vahe oporandu Jesús upe secocuer rese

19 Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe.

20 Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añehe vaheerã.

21 ¿Mahera vo evocoyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

22 Aipo ihese, ñepe mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyeve? —ehi chupe.

23 Evocoyase omboyeve ahe mbia upe:

—Añehese mbahe tẽi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

24 Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

25 Ahese Pedro oyepeheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

26 Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rãta pipe supi! —ehi chupe.

27 Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

28 Evocoyase viraso Jesús Caifás rãta sui Roma pendar mborerecuar guasu recosave yuvireco. Cõhe potase ãgüe ehi. Judío rumo ndoyuviroiquei eté mborerecuar recosave oyemboangaipaẽhi ãgua. Esepia, ahe icuaita yuviroiquei, ndiyai chietera Pascua resendar ovesa roho hu ãgua yuvireco chupe viña.

29 Sese Pilato osẽ ava upe aipo ehi:

—¿Mbahe vo sembiapo naporai vahe? —ehi.

30 Ahe omboyeve yuvireco chupe:

—Seco catuprise, ndorogüerui chietera ndeu viña —ehi yuvireco chupe.

31 Evocoyase aipo ehi ava upe:

—Peraso, pe ae peyapo mbahe pẽundar ité porocuita rupi sese —ehi.

Judío rerecuar evocoyase omboyeve yuvireco:

—Ore judío oroico vahe upe rumo ndipotasai oroyuca vaheerã que ava —ehi.

32 ãgüe ehi Jesús ñehe imano ãgua resendar yaviye.

33 Ahese Pilato oique iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

34 —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

35 —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

36 —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarẽhimbar upe che repisave yuvireco viña. Che mborerecuasa rumo ndahei eté coha pendar —ehi.

37 Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi.

³⁹ Pe rumo peicua amose ñepeí ava soquendapri Pascua pieta pipe yepi; ¿peipota amose vaheerã judío rerecuar? —ehi.

⁴⁰ Aipo ihese, opacatu osapucaí pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

¹ Evocoyase Pilato oporocuai Jesús nupa ãgua.

² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco.

³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osẽ iri ava upe aipo ehi:

—Pesepia, anose pẽu pe icua ãgua che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuita. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu.

⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñehe chupe.

¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca ãgua, mbahe tẽi sui nde renose ãgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose ãgua; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemborerecua tẽi vahe, ahe evocoyase mborerecuar ivate catu vahe amotarẽhimbar tẽi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vīnose uca Jesús ocarve, oguapī mborerecuar guasu renda harīve. Ahe mbahe rese porandusa rer hebreo ñehe pipe Gabata ‘ita apopri’ oya.

¹⁴ Mbīter ari Pascua pieta āgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaī pīratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyevī yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca āgua. Ichui vīraso yuvireco.

Jesús yaticasa curusu rese

¹⁷ Evocoyase Jesús vīnose curusu seraso “Ava Ācagüer” serer vahesave (ahe serer hebreo ñehe pipe Gólgota).

¹⁸ Aheve oyatica yuvireco. Seseve avei oyatica ñuvirío ava yuvireco, ñepeipei yique ivi.

¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi.

²⁰ Setá iteanga ava oyeriqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui.

²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevī:

—Co aicuachía vahe, ēgüe ehiño itera oī —ehi.

²³ Jesús atica pare evocoi irungatu sundao, omonuha iturucuar oyeupe imboyaho āgua yuvireco. Oipisi avei iturucuar ivri pendar nimbovīvisai vahe, ñepeī reseve pucuño tēi vahe.

²⁴ Sundao eta aipo ehi oyeupe yuvireco:

—Yamondoro eme; aviye catu yandeguayīño sese, ¿ava ité pīha oipisira? —ehi yuvireco.

Ēgüe ehi icuachiapirer imboaviye yuvireco aipo ehi vahe: “Omboyahoyaho ava che turucuar iyavei iguayī yuvireco sese” ehi vahe. Supi tupri ité ēgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei.

²⁶ Osepiase osi iyavei che repiase yipive, che güembiaisu, aipo ehi osi upe:

—Che si, evocoi nde membirā ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoungue ichi che rētave asāro vaherā.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye āgua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oī. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco.

³⁰ Osupite pare aipo ehi:
—Opa yaviye cute —ehi.
Ipare voi ñaca iviso omano.

Sundao oñaruca cutu lanza pipe Jesús

³¹ Ñepei ari Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vahe ña sundao curusu rese yaticapri rētima mope ãgua ‘tomanó’ oyapave curusu sui setecuer reroyipa ãgua yuvireco.

³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco.

³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepei sundao rumo oicutu yiqueve lanza pipe. Ahe ramoseve voi osē suvi, i reseve.

³⁵ Che asepia vahe ité; supi eté aipo ahe. Evocoyase amombehu pēu pe seroya ãgua.

³⁶ Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepei icangüer” ehi vahe aracahe.

³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasa judío eta upe pahi rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer.

³⁹ Nicodemo avei oipitivi, acoi oso vahe Jesús upe pituse. Ahe güeru mbahe sñacua vahe mirra, áloe rese oyeseha vahe, treinta kilo, sehögüer rese nara.

⁴⁰ Ëgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe tñ ãgua yuvireco yepi.

⁴¹ Namombrii Jesús aticasa sui oime mbia remitirēta. Aheve ité oime tuvipa ita hopri, ipiasu vahe iporupirēhi.

⁴² Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovi ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pñtu vitemiseve. Ahe osepia ita tuvipa rovapisa ndahe irise güendave ihñi.

² Evocoyase ahe cuña oña oso Simón Pedro upe, cheu avei aipo ehi:
—¡Viraso tuvipa sui yande Yar yuvireco! ¡Ndroicuai que vo catu omondo yuvireco! —ehi.

³ Evocoyase Pedro rese oroña oroso tuvipave.

⁴ Che rumo aña catu Pedro sui. Che rane evocoyase ayepota tuvipave.

⁵ Aiviro tēi, turucuar güeraño rumo asepia aheve. Ndaiquei rumo ipipe.

⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi.

⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou.

⁸ Evocoyase che avei aique; asepia ãgüe ehi vahe. Ahese aroya voi eté.

⁹ Ore rumo ndorosenducua vïtei eté icuachiapri: “Ocueraevïra omano vahe pâhu sui” ehi vahe.

¹⁰ Ipare oroyevïpa oroso ore rêtave.

Jesús oyemboyecua María Magdalena upe

¹¹ María rumo, ore raquicuei ou vahe, opïtaño ité tuvïpa ipïve, oyaseho. Oyasehoseve oivïro iri tuvïpa pïpe,

¹² ahese osepia ñuvïrío Tũpa rembiguai iturucuar morochí vahe oguapï yuvïnoi sehõgüer rupagüerve. Ñepei oguapï oï ñaca rupagüer cotï, ambuae ipï rupagüer cotï.

¹³ Ahe Tũpa rembiguai oporandu yuvïreco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehõgüer vïraso yuvïreco iyavei ndaicuai que vo catu omondo yuvïreco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe.

¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rêta rãrosar revo’ oya viña, aipo ehi chupe:

—Nde ererasose sehõgüer, emombehuñomi tõi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pïpe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi vïtei che Ru recosave. Esoño, emombehu che reroyasar upe: “Jesús oyeupira Vu Tũpa recosave” erera chupe. Che Ru, pe Ru avei; che Tũpa, pe Tũpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pïpeve, domingu pïpe, pïtuse, ore ore ñemonuhasave oroyeo-quenda tupri judío rerecuareta sui ore siquiyepave. Ahese Jesús oique ore pâhuve. Ore mboavïrave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahese orerorïvete yande Yar repiase oroico.

²¹ Ipare aipo ehi iri:

—¡Peico tupri! Inungar che Ru che mbou, ãgüe ahe aveira co che pëu —ehi oreu.

²² Ichui ore peyu:

—Peipïsi Espïritu Santo —ehi—.

²³ Peñeroise que ava upe, ahese ahe oipïsira ñeroisa; napeñeroise rumo que ava upe, ahe evocoyase ndoipïsi chira ñeroisa —ehi oreu.

Tomás osepia yande Yar icuerayevise

²⁴ Ñepei ore mboetasa rumo Tomás icõi vahe, ndipoi eté ore pâhuve Jesús oyemboyecuase oreu.

²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerẽhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tũpa! —ehi chupe.

²⁹ Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiaẽhi pipe che reroya vahe! —ehi chupe.

Co icuachiapri Jesús reroya ãgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe.

³¹ Co rumo aicuachía ‘toviroya Jesús, Poropĩsirosar, Tũpa Rahir secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve.

² Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe.

³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, orohe carite pipe. Ahe pĩtu pipe rumo ndorombohai eté pira.

⁴ Cõhe potase rumo, Jesús oyemboyecua imbehĩ ivi. Ore rumo ndoroicuai eté Jesús secose.

⁵ Evocoyase aipo ehi oreu:

—Mbĩa chĩhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovĩnose catui eté ipi sui pira mbohasa oroico. Esepia, savapipo tupri ité pira ipipe.

⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipĩndar nani secoi; opo ive oso chupe.

⁸ Ore evocoyase oroviroyepota ité carite ndatipĩmisave, oroichoho pira rehĩ imbohasa pipe seraso, cien metro tẽi oroico imbehĩ sui.

⁹ Orovinosese ivi ãtasave, orosepia tãtapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoiyase Simón Pedro oha carite pipe, oichoho ndatipisave pira guasu rehi imbohasa pipe, ciento cincuenta y tres tupri; yepe setá viña, imbohasa rumo ndosoroí eté.

¹² Evocoiyase aipo ehi:

—Perio, tapecarumi rane —ehi oreu.

Ndipoi eté que ñepei ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose.

¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esãro tupri che reroysar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihal eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tupri catu che reroysar rese —ehi—.

¹⁸ Supi eté aipo ahe ndeu: nde chihivahe catu vite, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoiyase nde mboyemondera, nde reraso aveira nde so potaehisave —ehi.

¹⁹ Jesús rumo omboyecua aipo ohe pipe mara ehira Pedro omano Tũpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yipive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia.

²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoiyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroysar ipihañemoñeta tẽi aipo che namanoi chiva-herã ité yuvireco viña. Jesús rumo ndahei ‘nomanoi chietera’ ohasave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tũpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

² Ocuerayevire, ivave oso renondeve, Jesús omombehu oporocuita Espiritu Santo pĩratasa pipe güembiporavo apóstol upe sembiaporã.

³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tũpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesëi rene Jerusalén sui. Tomboaviye rane che Ru Tũpa güemimombehu, ahe acoi amombehu pëu. Juan niha pe ãpiramo i pipe tõi; Tũpa rumo Espiritu Santo pipe pe ãpiramora. Movïromi tõi ari ipane vite imondo ãgua pëu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿rembou irira vo cūritei Israel iguar upe pĩratasa iyeyecuai ãgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua ãgua pëu. Esepia, Tũpa año ité vireco omborerecuasa ahe mbahe apo ãgua.

⁸ Peipisira rumo Tũpa pĩratasa oiquese Espiritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tũpa viraso ivave. Ichui Jesús oi que iba quiha pãhuve. Evocoyase ndosepia iri eté yuvireco cute.

¹⁰ Omahe vitesseve yuvinoha ivave ichosa rese, aviyeteramo tõi ñuvirío mbia, iturucuar morochí vahe, oyemboyecua apóstol ipive yuvinoha

¹¹ aipo ehi yuvireco chupe:

—Galilea iguar, ¿mahera vo pemahe vite iba rese pehã? Evocoi Jesús, inungar Tũpa viraso ivave pe sui, ãgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuviraso Jerusalén ve ivitri Olivo sui, ahe ihamombrigüer ñepei kilómetro tõi. Supivemi imombehusa judío guata ãgua mbituhusa ari pipe yepi.

¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi.

¹⁴ Co opacatu ari yacatu rupi oñemonuha oyoya guasu oyeroqui ãgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepei ari pipe oñemonuha guasu ciento veinte ava yuvireco. Ipãhuve Pedro opũha aipo ehi ava upe:

¹⁶ “Che mu eta Jesucristo reroyasar, iya ité co imboaviyesa Tũpa Ñehengagüer Judas recocuer resendar. Ahe imombehupri David upe Espiritu

Santo pipe aracahe. Evocoi Judas vıraso vahe Jesús amotarēhimbar ipisi uca āgua.

¹⁷ Ahe acoi secoi yande pāhuve co mboraviquisa rese yande pı̄tivıi āgua avei viña.

¹⁸ Evocoi güembiapo ai repri pipe omboepi ivi. Ipare ñaca ivıso oviapi oso ivıve, oyetiapiipa.

¹⁹ Opacatu ava Jerusalén pendar oicua Judas recocuer yuvıreco. Sese co ivı upe, ‘Acéldama’ ehi yuvıreco oñehe pipe ‘ıvi Tuvı resendar’ oyapave.

²⁰ Esepia, icuachiapri Salmo pipe aipo ehi:

‘Taseyasa sēta yuvıreco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pısi āgua’ ehi vahe.

²¹ “Evocoyase cohava oime ava yande Yar Jesús secoi vıtese yande pāhuve

²² ñapiramosa suive yuvırecoiño vahe ité yande rupi iyavei ivave ichosa osepia vahe avei yuvıreco. Ahe tiporavosa ñepeı ipāhu pendar yande rupi icuerayevi agüer mombehu āgua” ehi omboetasa upe.

²³ Evocoyase oıporavo ñuvırıo mbıa yuvıreco: ahe José Barsabás, serosa Justo; ambuae rer Matías.

²⁴ Ipare oyerogui yuvıreco aipo ehi: “Nde, ore Yar, opacatu ava pıha ereicua. Emboyecua cohava nde rembıporavo oreu; ¿uma vo ereipota

²⁵ eremondo vaherā icuaitarā apóstol seco āgua Judas recuñara? Ahe oangaıpa pipe oyemocañı uca tēı vahe oico” ehi Tūpa upe yuvıreco.

²⁶ Evocoyase osāha iporavo yuvıreco. Matías ité vınose iporavopri sui yuvıreco. Ichui tupri ité oiıque once apóstol pāhuve.

2

Espıritu Santo güeyı agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvıreco.

² Aheve oi pipe avıyeteramo tēı ivıtu ipırata vahe nungar sıapu guasu ou ıva sui. Ahe sıapugüer oyendupa tupri oi pipe.

³ Ahese oyecua tata rendıgüer nungar opacatu aheve yuvırecoı vahe harıve.

⁴ Ahese avei Tūpa omoıngue evocoi ava pıha pipe oEspıritu Santo. Ichui ahe Espıritu omoñehe uca ambuae ñehesa pipe yuvıreco.

⁵ Ahe arı pipe setá iteanga judıo yuvırecoı Jerusalén ve omboavıye vahe ocuaita Tūpa mboeteısa, ahe oñemonuha vahe opacatu ivı rupındar yuvıreco.

⁶ Mbahe sıapu guasu vahe renduse, oñemonuha atı tēı yuvıreco oyese. Ndoyemboaracuı tēı yuvıreco ambuae ava oñehe pipe ñehese.

⁷ “ıToo!” ehi tēı oyepıhamondiısa pipe yuvıreco. Sese aipo ehi oyeupe:

—¿Ndahei vo acoı co ava Galilea iguar oñehe vahe yuvıreco?

⁸ ¿Mahera pıha co ñepeı-peı oñehe yande ñehe pipe yuvıreco? —ehı tēı oyeupe yuvıreco—.

⁹ Esepia, cohava yuvırecoı vahe: Partıas pendar, Media pendar, Elam pendar, Mesopotamia pendar, Judea pendar, Capadocıa pendar, Ponto pendar, Asia pendar,

¹⁰ Frıgia pendar, Panfılia pendar, Egipto pendar, Libıa cotındar, ahe Cirene cōquıvotındar. Iyavei Roma pendar,

¹¹ judıo yuvırecoı vahe, ambuae judıo aracuasa reroyasar avei, Creta pendar, Arabia pendar. ıYande yasendu opacatu yandeu iñehe yuvıreco yande ñehe pipe Tūpa rembiapo icatupri vahe! —ehı.

12 Opacatu oyepihamondii, ndoicuai opihañemoñeta ãgua yuvireco.
—¿Mara ehi pñha co na oya yuvireco? —ehi-ehi tñi yuvireco oyeupe.

13 Ambuae ava rumo seroñrosa pipe aipo ehiño yuvireco:
—¡Osavaipo mo evocoi yuvireco! —ehi.

Pedro oñhe ava upe

14 Evocoiyase Pedro opñha opacatu once vahe apóstol pñhuve, oñhe pñrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheñ pñu; peyapisaca tupri che ñehe rese:

15 ndosavaipoi moco co mbia yuvireco. ¿Ndapesepiai vo añihivei vite cñritei?

16 Co niha Tñpa ñehe mombehusar Joel oicuachía vahe aracahe:

17 ‘Tñpa aipo ehi:

Coiye, ari cañi renonde, amondora che Espíritu Santo opacatu ava upe.

Ipñratasa pipe pe rahir, pe rayri oñhehera yuvireco.

Mbia chñhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

18 Supi eté ahe ari pipe amondora che Espíritu che rembiguai cuimbahe upe,
che rembiguai cuña upe avei.

Ipape oñhehera yuvireco che rese ipñratasa pipe.

19 Amboyecua poromondiisa iva rese.

Ëgñe ahe aveira poromondiisa mboyecua ivi pipe:
tuvia, tata iyavei tñtachi.

20 Yande Yar ari tuvichá vahe imboeteipri renonde ohara pñtu, yasi oyeapora
tuvia nungar.

21 Opacatu ava, che Yar che pñtivii eve, ehi vahe, ahe oñepisirora yuvireco’ ehi
Joel icuachía aracahe.

22 “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tñpa pñratasa pipe pe pñhuve güeco marañhi mboyecua ãgua. Ahe niha peicua opacatu.

23 Ipape rumo evocoi Jesús imondosa pñu yuca ãgua. Ahe rumo Tñpa remimbotar rupi. Esepia, yipive ité Tñpa oicua pe peipisira yuca uca ãgua curusu rese ava naporai vahe upe.

24 Tñpa rumo ombogñerayevi manosa sui. Esepia, manosa ndoicatui sereco
ãgua.

25 Supi eté mborerecuar guasu David oñhe Jesús recocuer rese aracahe
aipo ehi:

‘Che aicua che Yar che rese secoi che acato coti mbahe tñi pipe che viapiñhi
ãgua yepi.

26 Sese avihañ ité vichico, asapucái avei che rorivetesá pipe.

Iyavei che yeroya tuprisave asñrora mbahe aviyé vahe che recove iri ãgua.

27 Esepia, nde ndereseyai chira che hñ omano vahe pñhuve, nderemonduyui
ucaí chiveira nde rembiguai seco marañhi vahe retecuer.

28 Co tecovesa ereicua uca cheu.

Che mbovihara eve nde rese che recose’ ehi David aracahe.

29 “Che mu eta, supi eté yande ramoi David omano, ñotisa ita hopri pipe
aracahe. Ahe suvipa ouve vite cohava yande pñhuve.

30 David rumo Tñpa ñehe mombehusar, oicua Tñpa oyeupe aipo ehi vahe:
‘Supi eté aipo ahe ndeu: nde suindar oimera mborerecuar guasu nde
recuñara’ ehi vahe.

31 Ahe ndoyavii osepiá vahe ité Poropñisrosar cuerayevisa. Evocoiyase
aipo ehi oñhe sese: ‘Thñ ndopñtai chira omano vahe pñhuve iyavei setecuer
ndituyui chira’ ehi aracahe.

³² Evocoi Jesús, Tūpa remimbogüerayevi secoci. Ahe imombehusar opacatu ore oroico.

³³ Ipare Tūpa vīraso oacato coti imboguapi. Ahe oipisi imombehupri Espiritu Santo Vu sui. Evocoiyase ahe opa omondo co ava yuvirecoi vahe upe. Ahe pesepia, pesendu avei cūritei peico.

³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che piri.

³⁵ Asecopipa uca ranera nde amotarēhimbar ndeu, ehi Yar che Yar upe’ ehi David aracahe.

³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatīca vahecuer, ahe Tūpa omoingo opacatu yande Yarā iyavei yande pīsīro āgua” ehi Pedro ava rehi upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espiritu Santo pēu.

³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepipi co ava secocuer co coti tēi vahe sui! —ehi chupe.

⁴¹ Acoi ava vīroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús vīroya vahe rese.

⁴² Opacatu vīroya tupri ité apóstol porombohesa. Opacatu guasu avei oyeaisu tupri yuvireco, oyerocuī iyavei oñemonuha oyeupe pan mboyahoyaho āgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oypave.

⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara.

⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi.

⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovīhasa pipe, opihañemoñeta tuprisa pipe avei.

⁴⁷ Osapucái yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepīsīro āgua Jesucristo vīroya vahe pāhuve.

3

Ndoguatai vahe cuerasa

¹ Ñepei ari aipo, caharuse las tres pipe, Pedro, Juan reseve oyoya yuvirasu judío tūparove. Ahe hora pipe judío oyerocuī yuvireco yepi.

² Ahe tũparο roquendipĩ rer Porañete. Aheve ari yacatu rupi vĩraso ñepeĩ ava oyesu suive ndoguatai vahe ‘tomondo guarepochi ava tũparove yuviroique vahe yuvireco chupe’ oyapave.

³ Ahe ndoguatai vahe omahe Pedro, Juan rese tũparove seique potase, oporandu guarepochi rese chupe.

⁴ Pedro, Juan avei rumo omahengatu yuvireco sese. Pedro aipo ehi chupe: –Emahe ore rese –ehi.

⁵ Evocoyase ahe mbia omahengatu sese ‘omboura revo que mbahe cheu’ oya viña.

⁶ Aipo ehi rumo ndoguatai vahe upe:

–Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epũha, eguata –ehi chupe.

⁷ Evocoyase oipĩsi ipo yasu cotindar imopuha. Ahe ramoseve opa tupri ipi, ipiñuha avei ovĩracua.

⁸ Evocoyase opũha, opo, oguata; oique oso tũparove supi. Opo-opo vorivetesave iyavei osapucai Tũpa upe.

⁹ Opacatu ava osepia yuvireco iguatase iyavei Tũpa upe isapucaise.

¹⁰ Omahecuase sese, “¡Too!” ehi tẽi yuvireco. Iyavei ndoyembovihai aviyeteramo tẽi icuerase yuvireco. Esepia, evocoi ava oicuapa tũparο roquendipĩ Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tũparο Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tũparο Corero Salomón serer vaheve yuvirecoise.

¹² Pedro evocoyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pĩratasa pipe tẽi iyavei Tũpa rese ore pihañemoñeta tuprisa pipe tẽi orombogũera vahe co mbia pẽu viña.

¹³ Tũpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoĩ eta avei no, ahe niha omondo gũeco pĩratasa tuvicha catu vahe Guahir Jesús upe. Pe rumo acoi pemondoño mborerrecuar Pilato povrive. Acoi omose potase, pe evocoyase ndapeipotaiño imose ãgua chupe.

¹⁴ Ahe seco maranehi vahe, seco ïvi vahe renose rãgũer pipe, peporandu: ‘Tosẽ oporapichi vahe’ peye.

¹⁵ Ëgũe peye acoi tecovesa ombou vahe yuca. Tũpa rumo ombogũerayevi omano vahe pãhu sui. Ahe niha ore oromombehu oroico pẽu.

¹⁶ Co Jesús rer rese yeroya pipe itẽ niha oipĩsi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe itẽ niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipĩtivii vahe pe rereciar Jesús yuca uca ãgua pe icua tupriẽhi pipe cuese.

¹⁸ Ëgũe ehi Tũpa imboaviye arachendar opacatu oñehe mombehusar upe gũemimombegũer: ‘Che Rembiporavo Poropĩsirosar oiporarara mbahe-mbahe tẽi rasicuer omano’ ehi vahe.

¹⁹ Sese pemboasi pe angaipa; peyevi Tũpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa ãgua,

²⁰ ombou aveira Jesús, ahe yipĩsuive iporavopri pe pĩsiro ãgua.

²¹ Cũritei rumo Jesucristo ivave vite secoi acoi Tũpa opase voi omoingatu opacatu mbahe iyevi ãgua. Aipo ehi acoi imoñehe uca arachendar oñehe mombehusar ndaseco marai vahe.

²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepei oñehe mombehusar pe pãhuve che nungar. Ahe ñehe pesendura, pemboyeroya catu aveira.

²³ Opacatu ndoviroyai vahe ñehe Tūpa omocañira güembiporavo pãhu sui’ ehi.

²⁴ “Ëgüe ehi opacatu Tūpa ñehe mombehusar Samuel suive aracahe omombehu avei co ari cūrítei yasepia vahe yuvireco.

²⁵ Pëu nara niha Tūpa ñehe mombehusar remimombehugüer arachendar. Pëu nara avei acoi Tūpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pïpendar ahe sovasapri yuvirecoira nde suindar sui’ ehi.

²⁶ Acoi Tūpa Guahir ombogüerayevise, pëu rane ombou pe rovasa ãgua ‘toseyapa ñepei-peï güecocuerai yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahi eta, tūparo rãrosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi.

³ Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tēi osoquenda yuvireco.

⁴ Setá rumo ava ñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe,

⁶ pahi rerecuar ivate catu vahe Anás, Caifás, Juan, Alejandro, opacatu omu reseve.

⁷ Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espiritu Santo pïratasa pipe, aipo ehi chupe:

—Pe, mborerecuareta co tecua pïpendar, pe avei pahi rerecuar:

⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—.

¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tūpa rumo ombogüerayevi iri omano vahe pãhu sui.

¹¹ Co Jesús pe remieroïro, ahe rumo yande vïracuasa. Pe evocoyase inungar oi mopuhasar omomboño vahe ita avïye catu vahe oi movïracuasa rãgüer yepi.

¹² Ndipoi que ambuae ava sui poropïsirosa, Jesús güeraño ité oicatu oporopïsiro. Esepia, Tūpa nomboui ambuae ava tēi co ivi pipe yande pïsiro ãgua —ehi.

¹³ Mborerecuar osepiase iyembosiquiyeëhisa yuvireco, “¿Mara ehi pïha co mbïa? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco.

¹⁴ Iyavei acoi ava semimbogüeragüer supive ité secoise, sese ndoicatu chupe oñehe mara ãgua yuvireco.

¹⁵ Ipare, “Pesē ocarve” ehi mborerecuareta yuvireco chupe. Ahe güeraño evocoiyase opita oi pipe oñemoñeta yuvireco sese

¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondisa oyapose yuvireco. Ndiyai eté, “Ēgüe ndehi” yahe chupe.

¹⁷ Yambosiquiye ava upe Jesús rer rese iñehe iriēhi āgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe.

¹⁹ Omboyeviño rumo oñehe yuvireco chupe:

—¿Mara ehi pe pihave? ¿Uma pīha aviye catu Tūpa rovai? ¡Pe porocuita tie oroviroya catura Tūpa ore cuaisa sui!

²⁰ Ndiyai rumo mbahe ore rembiepia, mbahe orosendu vahe avei mombehuēhi āgua oreu —ehi.

²¹ Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tūpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe.

²² Evocoi ava oipisi vahe Tūpa poromondisa ocuera āgua, ahe oñaro catu cuarenta araviter vireco vahe sui.

Jesús reroyasar oporandu Tūpa upe siquiyeēhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco.

²⁴ Aipo rendu pare, oyoya guasu oyerogui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico.

²⁵ Nde Espíritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi āgua’ ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropisīrosar Jesús, seco maranehi vahe, amotarēhi āgua.

²⁸ Ēgüe ehi yapo opacatu nde pihañemoñeta aracahendar rupi tupri ité yuvireco.

²⁹ Iyavei cūritei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyeēhisa pipe nde ñhengagüer mombehu vite āgua.

³⁰ Ipare, nde pīratasa pipe, embogüera imbaheasi vahe iyavei eyapo mbahe poromondisa yavai vahe nde rembiguai Jesús rer maranehi pipe” ehi yuvireco oyerogui.

³¹ Iyerogui pare, Tūpa omboriri opacatu mbahe iñemonuhasave yuvireco chupe. Ahese Espíritu Santo opa oique yuvireco sese. Sese osiquiyeēhisa pipe omombehu tupri Tūpa Ñhengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe.

³³ Jesucristo apóstol omombehu vite ipĩratasa pipe icuerayevi agüer yuvireco. Ipipe Tũpa osovasa catu vite opacatu yuvireco.

³⁴ Ndipoi eté ipãhu pendar mbahe ndovirecoi vahe. Esepia, opacatu ivi vireco vahe iyavei oi omondo,

³⁵ ahe sepri omondo apóstol upe yuvireco yepi. Ahe evocoyase omboyahoyaho opacatu upe mbahe ipane vahe rupi-rupi yuvireco.

³⁶ Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘poromboviharasar’ oya aipo ehi),

³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco.

² Ahe mbia rumo omboyaho sepri, ñepeiyahocuer vireco oyeupe nara, ambuae iyahocuer viraso apóstol upe, sembireco avei oicua tẽi opacatu.

³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa água, eremboyahoño tẽi nde ivi repri guarepochi ndeyeupe nara!

⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tũpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tẽi yuvireco.

⁶ Ipare mbia chĩhivahe yugüeru, osupi sehögüer, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano.

⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha água yande Yar Espiritu! Coi yugüeru nde mer tĩsarar. Nde avei nde reraso água yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chĩhivahe yuviroiquese, oipoque voiño ité sehögüer seraso imer ivi ñoti água yuvireco.

¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tũpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tũparo ique, Salomón serer vahesave yuvireco.

¹³ Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco.

¹⁴ Oyemboeta catu yande Yar reroyasar setá cuimbahe, setá avei cuña.

¹⁵ Iyavei ava rehii vīnose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihāgüer. Ahese revo ombogüerara” ehi yuvireco oyeupe.

¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave.

¹⁸ Sese oipisi osoquendapa uca yuvireco.

¹⁹ Ipare rumo, pītu pipe, Tūpa rembiguai i va pendar ou omboi oquenda, vīnose ichui, aipo ehi chupe:

²⁰ “Peso tūparo guasuve, pemombehu avei ava upe co ñehesa tecocuer piasu resendar” ehi chupe.

²¹ Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe āgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha āgua ivate catu vahesave; omondo yuvireco güembiguai apóstol reru āgua soquendasa sui aheve nara viña.

²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu

²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tūparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe.

²⁵ Aheseve ñepei mbia oyepota imombehu:

—Evocoi pesoquenda vahecuer, ahe mbia cūritei oporombohe tūparove yuvireco —ehi chupe.

²⁶ Evocoyase tūparo rãrosar rerecuar, sembiguai avei yuviraso seru āgua mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco.

²⁷ Viroyepotase yuvireco ñemonuha ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroya —ehi yuvireco chupe—.

³⁰ Yepe peyatica, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogüerayevi.

³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropĩsirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe.

³² Ore Tūpa rembiapo repiasarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyu-capá pota opacatu apóstol yuvireco viña.

³⁴ Mborerecuar pāhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opūha oporocuai, “Toyuvínose raimi ocarve apóstol” ehi.

³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—.

³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa.

³⁷ Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—.

³⁸ Sese cūritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opīratasa pipe tēi yuvireco.

³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco.

⁴⁰ Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco.

⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi.

⁴² Ipare ndopoi eté ari yacatu Poropīsīrosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītiviī āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tupri ore mu imer mano vahecuer rese ari yacatu mbahe poropītiviisa imondosase chupe” ehi oñehe yuvireco.

² Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītiviisa mondo āgua rese tēi —ehi yuvireco—.

³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa rese yuvireco.

⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa.

⁶ Ichui vırasopa apóstol upe yuvıreco. Ahe omondo opo iharıve oyeruqui yuvıreco sese.

⁷ Ahese Tūpa Ñehengagüer oyemosai catu tecua pıpe. Ichui oyemboeta catu iri avei Jesús reroyasar yuvıreco Jerusalén ve. Setá avei judío pahi vıroya iñehengagüer yuvıreco.

Esteban pısis

⁸ Co mbıa, Esteban, vıreco ité Tūpa pıratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pãhuve.

⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivırındar yuvırecoi vahe reseve oiñhepoeıpe-epı Esteban yuvıreco.

¹⁰ Ndoicatui rumo iñehe recopi ãgua yuvıreco. Esepia, ahe oñehe mbahe-cuasa Espıritu Santo omondo vahe pıpe.

¹¹ Evocoyase yamotarēhimbar omboepı ambuae ava upe semira tēi ãgua sese yuvıreco. “ ‘Ore orosendu co mbıa oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvıreco chupe.

¹² Evocoyase ahe ava oyamotarēhi uca opacatu ava mborerecuar reseve iyavei judío porocuaita rese oporombohe vahe upe avei yuvıreco. Ichui oipısi yesapıha Esteban seraso mborerecuar uve porandusa ivate catu vahesave yuvıreco.

¹³ Iyavei oseca mbıa semira tēi vahe oñehe vaherã sese yuvıreco. Ahe aipo ehi:

—Co mbıa oñehe-ñehe tēi yande tūparo guasu imaranehi vahe amotarēhisave, Moisés porocuaita amotarēhisave avei.

¹⁴ Ore orosendu iñehe: “Jesús Nazaret pendar omocañıra tūparo guasu iyavei Moisés yande mbohesa avei aipo osecuñarora” ehi —ehi yuvıreco chupe.

¹⁵ Ahese opacatu mborerecuar oñemonuha vahe yuvınoi aheve omahe Esteban rese yuvıreco. Omahese aipo yuvıreco sese, ndoyavıi sepiaca Tūpa rembiguai ıva pendar rova.

7

Esteban oñehe oyeepısa pıpe

¹ Evocoyase pahi rerecuar ivate catu vahe oporandu chupe: “¿Supı eté vo aipo nde ñehe mara eico?” ehi chupe.

² Ahese omboyevı chupe: “Che mu eta, peyapısaca che ñehe rese: Tūpa imboeteıprı oyemboyecua yande ramoı Abraham upe aracahe. Mesopotamia ve secoı vıtese, icho renondeve Harán ve seco ãgua,

³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuarı ndeu’ ehi Tūpa chupe.

⁴ Evocoyase osē Caldea ivı sui oso tecua Harán ve güeco ãgua. Omano pare tu Harán ve, Tūpa ombou cohava yande recosave.

⁵ Yepe oyepota tēi cohava aracahe, Tūpa rumo nomondoımi eté que chıhi ivı chupendar chupe. ‘Co ivı amondora ndeu nde mano pare nde suındar upe nara’ ehi Tūpa chupe (ahe rumo ndatahi vıtei ahese).

⁶ Tūpa aipo ehi avei chupe: ‘Nde suındar yuvırecoıra ambuae ava recua rupı, ahe pendar ava secua vahe rembiguarıã semınombarıısugua tēi avei yuvırecoıra cuatrociento aravıter rupı’ ehi.

⁷ Tūpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri ãgua cohava yuvireco’ ehi Tūpa chupe aracahe.

⁸ Tūpa oyocuai güemimbotar pipe Abraham guahir mbocircuncida ãgua rese. Sese Abraham ombocircuncida guahir Isaac iha pare ocho ari pipe. Isaac ãgüe ehi avei guahir Jacob upe. Jacob ãgüe ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoi Jacob rahir omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese.

¹⁰ Ichui vinose opacatu iparaisusa sui. Omondo ombahecuasa chupe iyavei seco aviye tupri ãgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco ãgua opacatu ava ivi Egipto pendar cuai ãgua iyavei güeta pipendar cuai ãgua avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco.

¹² Oyanduse rumo Jacob Egipto ve oime vitese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco.

¹³ Ichui yuviraso yupagüe irise Egipto ve, ahese José oyecua uca viquehir upe. ãgüe ehi faraón upe oicua uca uma sui oyesu.

¹⁴ Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri.

¹⁵ ãgüe ehi Jacob yuviraso Egipto ve yuvirecoi ãgua opacatu guahir reseve. Aheve omano iyavei opacatu yande ramoi eta omano yuvireco aracahe.

¹⁶ Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecuar upe.

¹⁷ “Ipare, virovise ari ipapapri Tūpa Ñhengagüer Abraham upendar, ahese yande ramoi setá catu-catu iri oyesu Egipto ve yuvireco aracahe.

¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José.

¹⁹ Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe.

²⁰ Aheseve avei aipo Moisés oha. Ahe pītani aviye ité Tūpa uve. Ihare, iyesupa mbosapi yasimi rupive vireco oyese güetave yuvireco.

²¹ Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso güetave, omboacua omembri nungar ité sereco.

²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipĩrata ité oñehese iyavei oyapose mbahe.

²³ “Virecose rumo Moisés cuarenta araviter, ipihañemoñeta: ‘Tasepia rane che mu israelita cohava yuvirecoi vahe’ ehi.

²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave.

²⁵ Ahe rumo, ‘Oicua revo che mu Tūpa vinose uca ãgua Egipto sui yuvireco cheu’ ehi viña. Imu rumo nomohai eté Moisés vinose ãgua yuvireco evocoi ava po sui.

²⁶ Ahere ayihive oso omu pãhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero ãgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe.

²⁷ Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu ãgua?’ ehi chupe.

²⁸ ‘¿Che yuca pota avei tie eve inungar ereyuca evocoi Egipto pendar irapipe!’ ehi chupe.

²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ “Omboaviyese cuarenta araviter Madián ve, Tūpa rembiguai oyemboycua ivitri Sinaí rerovicave ivi iporupirēhisave caha rese tata rendigüer pãhuve chupe.

³¹ Osepia mbahe sendi vahe oyepihamondii, oyemboya catu sese sepia tupri ãgua viña. Ahese osendu Yar ñehe aipo ehi vahe:

³² ‘Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés oririi osiquiyesa pipe nomahe pota iri sese.

³³ Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe.

³⁴ ‘Che asepi tupri ité Egipto ve nde mu che rebiporavo paraisuse; asendu avei ipoãse tēisa yuvireco yepi. Sese agüeyi ndeu nde oromondora aheve senosepa ãgua’ ehi Tūpa Moisés upe aracahe.

³⁵ “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu ãgua?’ ehiño yuvireco chupe, Tūpa ité rumo oyocuai güembiguai imbogüeyi tata rendigüer pãhuve imoñehe Moisés upe iporocuai ãgua, ava renosepa ãgua avei ivi Egipto pendar mborerecuar povri sui.

³⁶ Ipare ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tūpa yuvireco’ oya, para guasu Pira vaheve avei oyapo poromondiisa iyavei ivi iporupirēhisa rupi avei cuarenta araviter rupi.

³⁷ Ahe avei aipo ehi israelita upe: ‘Tūpa vinosera pe pãhu sui ñepepe oñehe mombehusar che nungar’ ehi.

³⁸ Ahe avei acoi ivi iporupirēhisa rupi ava pãhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou ãgua.

³⁹ “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi ãgua rese yuvireco.

⁴⁰ Evocoyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata ãgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvireco aracahe.

⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaherã yuvireco iyavei oyembovaha pieta apo yuvireco güembiapo ucagüer rese tēi.

⁴² Sese Tūpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe: ‘Pe peico vahe israelita, ndahei cheu peyuca mbahe mimba seropovēhe ãgua cuarenta araviter pipe ivi iporupirēhisa rupi.

43 Pe rumo che mboeteiēhisa pīpe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguã.

Sese che opovinosera pe recua sui pe mondo Babilonia cupe coi coti' ehi Tūpa chupe aracahe.

44 “Ivi iporupirēhisa rupi yande ramoi eta vireco Tūpa porocuita rēta oyeupive yuvireco aracahe mbahe mīmba pīrer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca.

45 Ahese coiye catu yande ramoi eta vireco co oi Tūpa rēta mbahe pīrer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe.

46 Ahe David aviye ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya.

47 Tahir Salomón rumo omopuha ité ahe tūparo.

48 Tūpa rumo, seco ivate vahe, ndasecoi vahe tūparo ava tēi rembiapo pīpe. Inungar acoi omombehu vahe Tūpa ñehe mombehusar aracahe aipo ehi:

49 ‘Iva che renda iyavei ivi che pīrunga.

¿Mbahe nungar oi vo peyapora cheu? ehi yande Yar.

¿Que vo evocoyase che pītuhu āgua?

50 Che niha opacatu co mbahe aposar aico’ ehi Tūpa icuachiapri pīpe” ehi mborerecuar upe Esteban.

51 Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipīpe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi.

52 ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūrītei ou ndaseco marai vahe cute. Pe avei evocoyase ahe yuca uca āgua peporocuai.

53 Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

54 Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco.

55 Esteban rumo vireco ité Espíritu Santo oyese. Evocoyase iva rese omahese, osepia Tūpa porañetesa. Osepia avei Jesús opūha ohã Tūpa acato coti.

56 Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihã —ehi.

57 Mborerecuareta rumo osapucuai pīrata, oyopiño oapisacuar yuvireco ichui. Ahese yuvinoña guasu yuvireco chupe.

58 Viraso güecua ivi yuvireco. Aheve oseya oyeaosa Saulo pive ‘tosãro’ oya yuvireco chupe. Ipare oyapi-yapi ita pīpe yuca yuvireco.

59 Oapi-apiseve, Esteban oyerure Tūpa upe: “Che Yar Jesús, eipisi che hã” ehi.

60 Ipare oñenopiha, oñehe pīrata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

8

1 Iyavei Saulo, “Peyuca ité” ehi catu-catu aheve ohã.

Saulo oseca Jesús reroyasar mocañipa ãgua oico

Ahe ari pipeve omboipi Jesús amotarêhimbar seroyasar reca mara-mara tēi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco.

² Oime ava Tūpa mboeteisar yuvirecoi vahe, ahe víraso Esteban rehögüer ñoti yuvireco. Ití pare, oyasehó iteanga yuvireco sese.

³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaēhi ãgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco.

⁵ Felipe oso Samaria rupi. Aheve omombehu ava upe: “Evocoi Jesús Tūpa Rembiporavo ava pĩsiro ãgua” ehi.

⁶ Ahese ava rehii oñemonuha Felipe ñehere rendu ãgua yuvireco. Oyapisaca tupri ñehere rese yuvireco. Esepia, osepia mbahe sembiapo poromondiisa.

⁷ Iyavei setá ava carugar rerecosar sui omose carugar. Osēse ava sui, sãse yuvireco. Iyavei setá ava nomii vahe, ndoguatai vahe avei ombogüera.

⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye quiye ava Samaria pendar. “Che seco ivate vahe aico” ehi angahu ava mbopa.

¹⁰ Evocoyase opacatu ava, cuacua vahe iyavei chihivahe catu vahe oyapisaca tupri ñehere rese, aipo ehi yuvireco: “Co niha Tūpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi.

¹² Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipape oñeapiramo ité yuvireco cuimbahe, cuña avei.

¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiyai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoyase omondo aheve omboetasa Pedro iyavei Juan yuvireco.

¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya.

¹⁶ Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco.

¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe,

¹⁹ aipo ehi:

—Cheu avei pemboumi tēi evocoi pĩratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaheñã nde guarepochi pipe viña —ehi chupe—.

²¹ Ndeu ndiyai co nungar mbahe apo ãgua. Esepia, nde pihañemoñetasa ndahei ihivi vahe Tūpa rovaque.

22 Sese epoi nde p̄ihañemoñeta raisa sui, eyerure Tūpa upe. Aviyeteramo iñerora ndeu —ehi—.

23 Aicua nde p̄iha naporai vite iyavei nde p̄ihañemoñeta raisa p̄ipe vite ereico —ehi chupe.

24 Evocoyase Simón omboyev̄i chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

25 Yande Yar ñehesa mombehu pare ahe tecua pendar upe, apóstol omombehu-mbehu co ñehesa p̄isirosa resendar Samaria p̄ipendar tecua rupi yuvireco. Ēgüe ehi oyepota yuviroyev̄i Jerusalén ve yugüeru.

Felipe omombehu Jesucristo recocuer Etiopía pendar upe

26 Ipare Tūpa rembiguai oyemboyecua Felipe upe aipo ehi chupe: “Epūha, eso irohi coti nde yepota āgua evocoi per̄i ogüeȳi vahe oso Jerusalén sui, Gaza ve” ehi. Evocoi Gaza piar osasa iv̄i iporupir̄eh̄i rupi oso.

27 Evocoyase opūha oso per̄i rupi. Aheve osovañchi ñepeí ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mb̄ia oso vahe Jerusalén ve Tūpa mboetei āgua.

28 Oyevis̄e ocāreto p̄ipe, oyerocūi Tūpa ñeh̄e mombehusar Isaías rembicuachiagüer rese ou.

29 Evocoyase Esp̄iritu aipo ehi Felipe upe: “Eyemboya cāretomi rese” ehi.

30 Evocoyase v̄irovis̄e ahe ava, osendu iyeroqūi Isaías rembicuachiagüer p̄ipe oĩ. Ahese oporandu chupe:

—¿Eresenducua aipo Tūpa Ñehengagüer nde yeroquis̄a eĩ? —ehi chupe.

31 Etiopía pendar mb̄ia omboyev̄i chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguap̄i cohava che p̄iri” ehi Etiopía pendar chupe.

32 Ahe Isaías rembicuach̄ia oyerocūi vahe p̄ipe aipo ehi:

“Inungar ava v̄iraso ovesa yuca āgua, Ēgüe ehi avei ahe mb̄ia seraso yuca āgua yuvireco.

Iyavei inungar ovesa nasasei eté guagüer rerocuase, Ēgüe ehi avei ahe mb̄ia noñeh̄i eté.

33 Osecomomini yuvireco, ndipoi ava sep̄isar.

Ndipoi ichuindar.

Esep̄ia, omocañi co iv̄i sui yuvireco” ehi Isaías rembicuach̄ia p̄ipe.

34 Oyerocūi pare ahe Etiopía pendar oporandu chupe:

—Emombehumi cheu: ¿Ava rese p̄iha aipo Isaías oñeh̄e: oyese ae p̄iha, ambuae ava rese tie? —ehi.

35 Evocoyase co ñehesa sui omombehu ñehesa av̄iye vahe Jesús recocuer resendar Etiopía pendar upe.

36 Ipare oguata catuse yuvireco, Etiopía pendar osep̄ia i. Aheve ahe aipo ehi chupe:

—Esep̄ia co i tui. ¿Ndiyai vo cohava che ãpiramomi t̄ei eve viña? —ehi.

37 Ahese omboyev̄i chupe:

—Eroya itese opacatu nde p̄iha p̄ipe, iya ité ndeu —ehi.

—Aroya ité niha Jesucristo ahe Tūpa Rah̄ir secoi —ehi.

38 Evocoyase omomb̄ita uca ocāreto, ichui ogüeȳi ive yuviraso. Aheve Etiopía pendar Felipe oñapiramo.

39 Yuvinosese i sui, yande Yar Esp̄iritu v̄iraso ahe Etiopía pendar sui. Ahese ndosepia iri; Ēgüe ehiño vorivete oso per̄i rupi.

⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ëgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe,

² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohava nde rer pipe” ehi, “evocoyase eremombehura cuachiar pipe Damasco pendar tūparo rerecuar upe” ehi pahi rerecuar ivate catu vahe upe.

³ Ëgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe.

⁴ Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe.

⁶ “Epūha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiaí eté ivate oñehe vahe yuvireco.

⁸ Ipare Saulo opūha, omahe tēi; ndoicatu rumo mbahe repia. Ichui supindar oipisi iyiva rese seraso Damasco ve yuvireco.

⁹ Aheve mbosapi ari ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

¹¹ Evocoyase yande Yar aipo ehi chupe: “Epūha, eso calle Ihívi serer vahe rupi. Eporandu Judas rētave Saulo, tecua Tarso pendar, rese. Ahe oyerogui cūritei.

¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyevi chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve.

¹⁴ Cūritei ou rutei ahe mbia pahi rerecuar porocuita rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vahe rã ava ndahei vahe judío upe iyavei serecuar guasu yuvirecoi vahe upe, judío upe avei.

¹⁶ Che ae amboyecua setá mbahe tēi chupe oiporara vahe rã che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri āgua. Toique avei catu Espíritu Santo nde rese —ehi Saulo upe.

18 Ahese voi eté pira pirer nungar mbahe oviapipa sesa sui. Ahese voi sesapiso iri. Ichui opūha. Ipare voi Ananías oñapiramo.

19 Ipare Saulo ocaruse, ipĩrata catu iri. Moviro ari tēi opita iri Jesús reroyasar piri Damasco ve.

Saulo omombehu Jesús recocuer Damasco ve

20 Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoi” ehi ahe pendar ava upe.

21 Ava opacatu osendu vahe iñehe,

—¿Mara ehi pĩha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar pisi āgua serasopa āgua avei Jerusalén ve pahi rerecuar upe viña? —ehi yuvireco chupe.

22 Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava pĩsiro āgua secosa. Sese ndoicatu judío iñehe mboyevı yuvireco.

Saulo oñemi omu sui oamotarēhise

23 Setá ari pare judío ahe pendar omboguai yuca āgua Saulo yuvireco viña.

24 Ahe rumo oyandu omboguaisa judío osārose tecua āchisa roquendipive ari, pĩtu momba yuvireco yuca āgua viña.

25 Jesús reroyasar rumo pĩtu pıpe tecua tapia āchisa oyere tupri vahe tecua rese, icupe rupi ombogüeyı iruova guasu pıpe imoñemi imondo yuvireco.

Saulo Jerusalén ve secoi

26 Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco.

27 Ipare rumo Bernabé vıraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeēhisa pıpe Damasco ve Jesús recocuer rese” ehi.

28 Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeēhisave.

29 Oiñehopoepi avei secocuer rese judío griego pıpe oñehe vahe yuvireco. Ichui rumo oyuca potaño yuvireco.

30 Oicuae rumo Jesucristo reroyasar yuvireco, vıraso voi eté Saulo Cesarea ve. Ichui omondo Tarso ve yuvireco.

31 Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemovıracua tupri catu yuvireco yande Yar mboeteisa pıpe, Espıritu Santo oipıtivıi iyemboeta catu āgua yuvireco.

Eneas mbogüera agüer

32 Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

33 Aheve osepia mbia Eneas serer vahe, ahe ndoguatai vahe. Vupave tēi tui vahe ocho aravıter rupi.

34 Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi.

³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe seci, griego ñehe pipe rumo Dorcas serer. Ahe Jesucristo reroyasar seci. Ahe secocuer aviye vahe oporopitivii yepi.

³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahe save seraso yuvireco.

³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe.

⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ.

⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe.

⁴² Serãcua oyanduse opacatu Jope rupi yuvireco, setá ava yande Yar viroya yuvireco.

⁴³ Evocoyase Pedro opita setá ari aheve, mbia mbahe pিরer mopítasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe seci, ahe cuartel Italiano serer vahe pendar cien sundao rerecuar.

² Ahe mbia omboetei Tüpa opacatu guahir, güembireco reseve yepi. Iyavei omondoño ité judío pítivií água guarepochi, oyerogui avei Tüpa upe yepi.

³ Ñepi ari, caharuse las tres rupi, osepiya oquer nungar pipe Tüpa rembiguai güecosave aipo ehi chupe: “¡Cornelio!” ehi.

⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepiya avei nde poroparisuerecosa” ehi chupe.

⁵ “Emondo mbia Jope ve Simón reca. Ahe serer avei acoi Pedro.

⁶ Ahe seci ambuae Simón, mbahe pিরer mopítasar piri. Ahe sêta para guasu popive chini” ehi chupe.

⁷ Orose Tüpa rembiguai ichui, Cornelio oñehe ñuvirío güembiguai upe iyavei ñepi sundao Tüpa mboeteisar upe, sese acoi oyeroya vahe yepi.

⁸ Opacatu Tüpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyerogui água.

¹⁰ Vïeporêhise ocaru pota viña. Omoingatü viteseve rumo semihura yuvireco, aviyeteramo tēi osepiya mbahe oquer pendar nungar:

¹¹ ahese osepiya iva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe.

¹² Ahe turucuar pipe, osepia opacatu mahembiar vai, mboi, v̄irai vai t̄ei avei.

¹³ Ahese osendu ñehesa aipo ehi vahe: “Pedro, ep̄uha, eyuca, ichui ehu” ehi chupe.

¹⁴ Pedro rumo omboyev̄i chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe.

¹⁵ Osendu iri ñehesa aipo ehi vahe chupe: “T̄upa remimbocatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ēḡüe ehi mbosapi oyupaḡuer rupi chupe. Ip̄are turucuar oyev̄i ivave oso.

¹⁷ Pedro ip̄ihañemoñeta v̄itese mbahe osepia vahecuer rese oquer nungar pipe: “¿Mbahe rese p̄iha co oyemboyecua cheu?” ehi v̄ite oico. Aheseve Cornelio remimondo oporandu-randu pare yuvireco, oyepota Simón r̄eta roquendip̄ive yuvireco.

¹⁸ Oñhehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ip̄ihañemoñeta v̄iteseve Pedro mbahe oyemboyecua vahecuer rese, Esp̄iritu Santo aipo ehi chupe: “Pedro, esendu rane, pe mbosapi mb̄ia nde reca yuvireco.

²⁰ Eyemoingatu, eḡüeȳi chupe, eso supi. ‘¿Asora p̄iha?’ erei rene. Esepia, che ambou evocoi mb̄ia nde reca” ehi Esp̄iritu Santo Pedro upe.

²¹ Evocoyase oḡüeȳi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyev̄i iñhehe yuvireco chupe:

—Ore oroyu sundao rerecuar Cornelio ore cuaisa pipe, ahe mb̄ia seco ñ̄vi vahe, T̄upa mboeteisar opacatu judío osaisu, oipota rai yuvireco. T̄upa rembiguai oyocuai nde rese ereso vaherã s̄etave, ahe osendu vaherã nde ñehesa —ehi yuvireco Pedro upe.

²³ Evocoyase omoinguepa, omomb̄itapa oyep̄iri ñ̄pei p̄itu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso s̄etave. Cornelio rumo os̄aro opacatu omu eta rese yuvireco iyavei ombor̄iparete güembisoho reseve avei.

²⁵ Oyepotase s̄etave oso, Cornelio rane os̄e voi, osovañchi, oñenop̄iha sovai imboeteisa pipe.

²⁶ Pedro rumo aipo ehi chupe:

—Ep̄uha, che niha nde nungar avei aico —ehi chupe.

²⁷ Evocoyase ahe omoñeta seroique seraso oi pipe. Aheve ava oñemonuha vahe setá osepia yuvireco.

²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío p̄iri. Aní chiaveira pembor̄i evocoi ava peico” ehi acoi —ehi Cornelio r̄eta pipendar upe—. T̄upa rumo omomb̄ehu cheu che quer nungar pipe: “‘Ava remimbotarēhi peico’ erei rene ambuae ava upe” ehi cheu.

²⁹ Pe pemondo ava che reca. Che evocoyase nacheat̄ehi che yu ãgua p̄eu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che r̄etave aicose, ndacarui eté che yerure ãgua T̄upa upe. Aheseve oyemboyecua mb̄ia T̄upa rembiguai iturucuar rendí iteanga vahe cheu.

³¹ Ahe aipo ehi cheu: “Cornelio, T̄upa osendu nde yeruresa iyavei oicua avei nde poroparaisuerecosa.

³² Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pírer mopítasar. Ahe sêta para guasu popíve chini” ehi cheu.

³³ Sese amondo voi eté nde reca ãgua. Aviye nde ereyu cohava. Cũritei co opacatu yaico cohava Tũpa rovaque. Orosendu pota opacatu nde ñehe yande Yar nde cuai vahe nde ñehe ãgua oreu —ehi Cornelio chupe.

Pedro oñehe Cornelio rêtave

³⁴ Evocoyase Pedro aipo ehi chupe:

—Aicua cute, supí eté Tũpa nomboyahoi yande raisu.

³⁵ Sese ambuae ivi pĩpendar omboetei vahe Tũpa, oyapo vahe avei mbahe tupri yuvireco, ahe oipísira Tũpa.

³⁶ Aracahe Tũpa oñehe avei Israel suindar upe, omombehu ñehesa tupri yeamotarêhiñehisa resendar Jesucristo rembiaporã sui, ahe opacatu ava co ivi pĩpendar yuvirecoi vahe Yar.

³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare.

³⁸ Peicua revo Tũpa omondo Jesús Nazaret pendar upe opĩratasa, oEspíritu Santo avei. Ipare Jesús oguata opacatu rupi mbahe tupri apo oico. Om-bogüera avei opacatu ava iparaisu vahe carugar povrive yuvirecoi vahe. Esepia, Tũpa secoi sese.

³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco.

⁴⁰ Tũpa rumo ombogüerayevi imombosapisa ari pipe. Ipare omboyecua iri oreu.

⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare.

⁴² Iyavei ahe ore cuai: “Pemombehu ava upe. Co che Jesucristo, Tũpa Rembiporavo, aico opacatu ava recocuer rese porandu ãgua oicove vite vahe, omano vahe avei” ehi oreu.

⁴³ Ahe secocuer avei opacatu Tũpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tũpa ñeroisa serer pipe angaipa rese yuvireco” ehi —ehi Pedro Cornelio rêta pipe yuvinoi vahe upe.

Espíritu Santo oique ava ndahei vahe judío piha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese.

⁴⁵ “¡Too! Evocoyase ndahei vahe judío upe avei Tũpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco.

⁴⁶ Esepia, osendu ahe oñehese ñehesa ndicuasai vahe pipe yuvireco Tũpa upe.

⁴⁷ Evocoyase aipo ehi vupindar upe:

—¿Oime piha ndoipotai vahe co ava ñeapiramo ãgua yande pãhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramosa Jesucristo rer pipe yuvireco —ehi.

Ipare Cornelio rêta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco.

² Oyevisé rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco,

³ aipo ehi:

—¡Mahera eresño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui.

⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—.

⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu.

⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe.

⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu.

¹⁰ Ēgüe ehi mbosapi oyupagüer rupi cheu. Ipare opacatu oyevi iri ivave oso.

¹¹ Aheseve avei mbosapi mbia imboupri Cesarea sui oyepota yuvireco che recosave che reca.

¹² Espiritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroi que Cornelio rētave.

¹³ Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua.

¹⁴ Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—.

¹⁵ Añehe ramoseve chupe, Espiritu Santo ou sese yuvireco inungar yande rese ou aracaco.

¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe.

¹⁷ Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer reñaño āgua, tecovesa apirēhi vahe rereco āgua! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco.

²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco.

²¹ Yande Yar pĩratasa viroco yuvireco. Evocoyase setá ava viroya; oseyá ité yipĩndar güembieroya yuvireco yande Yar reroya água.

²² Serãcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve.

²³ Oyepotase aheve, osepia Tũpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco.

²⁴ Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca.

²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepei araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipĩndar, “Cristo reroyasar” ehi yuvireco.

²⁷ Aheseve Tũpa ñehe mombehusar yugüeru Antioquía ve Jerusalén sui.

²⁸ Ñepei ipãhu pendar, Agabo serer vahe, opũha aipo ehi Espiritu Santo pĩratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose).

²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pĩtivii água yuvireco ocatugüer rupi.

³⁰ Ēgüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu.

² Ahese oyuca uca quise pucu pipe Santiago, ahe Juan riquehir.

³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi.

⁴ Pedro roquenda pare omondo irungatu imar sui irungatu-ngatu sundao omondo sãro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña.

⁵ Evocoyase Pedro opita voquendasave sãrombri tupri chini. Jesús reroyasar rumo oyerogui pĩrata Tũpa upe yuvireco sese.

Tũpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive.

⁷ Aviyeteramo tẽi Tũpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epũha poyava!” ehi chupe. Ipũhase, opa voi oyera carena ipo sui.

⁸ Ahese Tũpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Ēgüe ehi oso saquicuei. Ahe rumo ndoicuai Tūpa rembiguai oyeupe ēgüe ehise. Ndoyavii iquerve tēi ēgüe ehi vahe chupe.

¹⁰ Ichui yuvínose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvínose água yuvireco. Ahe oquenda oyemboi ahe ae ité chupe yuvireco. Ipare yuvínose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tūpa ombou cheu güembigui che renose água Herodes povri sui. Tūpa che pĩsiro judío rerecuar che yuca rãgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyeroqui yuvireco sese.

¹³ Oñehese Pedro oquenda ocar cotindarve, cuñatai, Rode serer vahe, osē imboi água chupe.

¹⁴ Osenduse rumo Pedro ñehe, oquenda omboi rãgüer sui, oña oi que oi pipe vorivetesave, omombehu: “Pe Pedro ihãi oquendipive” ehi oi pipendar upe.

¹⁵ Ahe rumo,
—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tēi sepiase yuvireco.

¹⁷ Pedro rumo opo omopuha imonguiriri água. Ichui opa omombehu yande Yar opĩsiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi. Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pĩha Pedro?” ehi tēi oyeupe yuvireco.

¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sãrosar yucapa água. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaherã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca água rese yuvireco. Esepia, Herodes porocuita sui oipisi mbahe güemihura yuvireco.

²¹ Herodes evocoyase omombehu ari oñehe vaherã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehii upe.

²² Evocoyase ava rehii osapucái pĩrata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave.

²³ Ava aipo iheseve voi, ñepeí Tūpa rembiguai oyapo mbaherasi guasu chupe. Ichui mbahe rasoí ocaru yaviter rupi yuvireco. Esepia, nombotei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuita mboaviye pare, viroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboraviqui apo āgua

¹ Evocoyase Jesús reroyasar Antioquía pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo.

² Ñepeí ari opacatu Jesús reroyasar oñemonuhase yande Yar mboetei āgua, oyecuacu avei, ahese Espíritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Espíritu Santo yuvireco chupe.

³ Evocoyase oyerogui pare, omondo opo yuvireco iporavopri āca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

Apóstol yuvirecoi Chipre rupi

⁴ Evocoyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pāhu Chipre ve.

⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipitivi āgua.

⁶ Opase ité oguata caha pāhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe.

⁷ Ahe ipaye vahe oicove Chipre pendar mborerecuar Sergio Paulo serer vahe pri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe.

⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe.

⁹ Evocoyase Saulo, Pablo serer vahe, vireco ité vahe Espíritu Santo opiha pipe, omahe tupri sese.

¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroirosa sui.

¹¹ Eyapisaca, cūritei yande Yar nde mombaraisura. Nande mboesapisoí chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe.

¹² Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso.

¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapi yuvinoi.

¹⁵ Oyerogui pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vaheṛã co ava monguerẽhi ãgua, pemombehumi yandeu cūrītei —ehi.

¹⁶ Evocoyase Pablo opũha ohã. Omopuha avei opo ‘toyapısaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tũpa mboeteisar, pesendu che ñehe —ehi—.

¹⁷ Israel iguar Tũpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opĩratasa pipe vınosepa ahe ivi sui aracahe.

¹⁸ Ipare Tũpa oñemosañõ yande ramoi reco ai upe cuarenta araviter rupi, oguatase yuvireco ivi iporupirẽhisa rupi.

¹⁹ Ipare omocañi ava eta Canaán pipendar siete tupri yuvirecoi vahe serecur reseve-seve. Ipare omondo Canaán ivi yande ramoi upe nara.

²⁰ Ëgüe ehi cuatrocientos cincuenta araviter rupi yapo yuvireco —ehi.

“Ipare Tũpa ombou ava recocuer moingatusar oporocuai vaheṛã. Ipa vahe ipãhu pendar serer Samuel aracahe. Ahe Tũpa ñehe mombehusar avei.

²¹ Ahese yande ramoi eta oporandu yuvireco Tũpa upe mborerecur guasu rese. Evocoyase Tũpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico.

²² Ipare Tũpa virocua imborerecuasa ichui; omondo David upe yande ramoi cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuaita’ ehi Tũpa.

²³ Ahe David suindar sui, Tũpa ombou Jesús Israel iguar pĩsĩro ãgua. Aracaheve Tũpa omombehu co yande ramoi upe.

²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tũpa upe pe ñeapiramo ãgua’ ehi chupe.

²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pĩsirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipĩtaquisã yora ãgua ipi sui’ ehi Juan” ehi judío tũparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tũpa mboeteisar, opacatu yandeu nara ombou Tũpa co ñehesa pĩsĩrosa resendar.

²⁷ Jerusalén pendar rerecur avei ndoicuai evocoi Jesús Tũpa remimbou secoise yuvireco. Iyavei ndosenducuai Tũpa ñehe mombehusar cuachiar pipe oyerõquise mbĩtuhusa ari yacatu yuvireco. Ichui ahe ae oyuca uca yuvireco. Ëgüe ehi imboaviye Jesús rese Tũpa ñehe mombehusar rembicuachiagüer pipendar yuvireco.

²⁸ Yepe ndoyosui mbahe sembiapo rai yuca uca ãgua yuvireco viña, ahe rumo oporanduño Pilato upe yuca uca ãgua rese yuvireco” ehi.

²⁹ “Ichui omboaviyese opacatu icuachiapri pipendar yuvireco, ovĩroyi uca curusu sui ñoti ãgua yuvireco.

³⁰ Tũpa rumo ombogüerayevi iri.

³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrītei ahe ava ité omombehu Jesús recocuer ava upe yuvireco” ehi tũparo pendar upe.

³² “Sese che mu eta, cūrītei oromombehu pẽu evocoi ñehesa aviye vahe Tũpa omondo vahe yande ramoi upe aracahe.

³³ Tũpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo

moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe.

³⁴ Tūpa omombehu avei güemimbogüerayevi sete tuyuēhi āgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi.

³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi.

³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvipave imu pāhuve yuvireco. Ahe setecuer rumo opaño ité ituyu” ehi.

³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu.

³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumí pēu. Moisés porocuita sui ndipoi ñeroisa angaipa rese yande reco mohivi āgua.

³⁹ Jesús recocuer sui rumo oime ñeroisa ñepeipei viroya vahe upe” ehi.

⁴⁰ “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroñrosar peico vahe. Peyepihamondi, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera pēu che rembiaporã viña, pe rumo ndaperoyai chietera’ ehi Tūpa” ehi Pablo tūparo pendar upe.

⁴² Yuvínose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbítuhusa ari pipe oreu” ehi yuvireco chupe.

⁴³ Yuvínosese ava rehi tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

⁴⁴ Ambuae mbítuhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua.

⁴⁵ Osepiase ava rehi, judío rereciar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco.

⁴⁶ Evocoyase Pablo, Bernabé reseve oñehe yuvireco judío upe osiquiyeēhisave:

–Tūpa ore cuai pēu rane ore ñehe āgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoyase orosora, oroñehe ava ndahei vahe judío upe.

⁴⁷ Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe písirrosa reroguata āgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco.

⁴⁹ Evocoyase Tūpa Ñehengagüer omombehu opacatu ahe ivi rupi yuvireco.

⁵⁰ Judío rumo omonguerēhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave.

⁵¹ Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve.

⁵² Jesús reroyasar rumo oviharete yuvireco, vireco ité Espiritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío.

² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua.

³ Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opīratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave.

⁴ Ahe tecua pendar rumo ipihañemoñeta yoivi yuvireco: ñepe judío pihañemoñetasa rupindar; ambuae evocoyase apóstol pihañemoñetasa rupindar yuvireco.

⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña.

⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei.

⁷ Supi omombehu ñehesa aviye vahe Jesús resendar yuvireco.

Pablo yapí-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oñ

⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua.

¹⁰ Evocoyase aipo ehi pīrata chupe:

—¡Epūha! —ehi.

Ahese opo, opūha, oguata voi.

¹¹ Osepiase ava rehí mbahe sembiapo yuvireco, osapucaí pīrata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehe vahe.

¹³ Ahese co tūpa Zeus pahí güeru tiví, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tiví Pablo, Bernabé mboetei āgua yuvireco viña.

¹⁴ Oicuae rumo Bernabé, Pablo, ahese omondo oturucuar yuvinoña ava pāhuve; oñehe pīrata yuvireco:

¹⁵ —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe íva, ívi, para guasu, opacatu ipor reseve.

¹⁶ Aracahe rumo Tūpa, “Ēgüe tehi oguata ndahei vahe judío oipihñemoñetasa rupi yuvireco” ehi viña.

¹⁷ Tūpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetesa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tiví oyuca yuvireco chupe imboetei água viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivi. Ipihñemoñeta: “Yayuca ité” ehi yuvireco chupe viña.

²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvínose oyeví yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyeví yugüeru Listra rupi, Iconio rupi avei, oyepota Antioquía ve yuvireco.

²² Ahe supí omonguerêhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique água” ehi yuvireco Jesús reroyasar upe.

²³ Ipare oiporavo ava Jesús reroyasar rāro água ñepeipei ñemonuhasa rupi. Oyeroquí iyavei oyecuacu. Ipare viropovêhe yande Yar upe iporaviqui água yuvireco.

Pablo, Bernabé oyeví yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese.

²⁵ Omombehu Tūpa Ñehengagüer yuvireco Perge ve. Ipare yuviraso Atalia ve.

²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo água. Aheve tupri avei imboaviye pare oyeví yuvireco.

²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe.

²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oyocuai Moisés yande ramoí cuai água: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuvireco. “Cūritei acoi êgüe ndapeyese Jesús reroyasar upe, noñepisiroi chietera yuvireco” ehi Antioquía pendar upe yuvireco.

² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu água yuvireco.

³ Êgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguata rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata água yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco.

⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye āgua yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco.

⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropisirosa resendar mombehu āgua ava ndahei vahe judío upe ‘toviroya yuvireco’ oyapave.

⁸ Tūpa oicua ité opacatu ava pihañemoñetasa. Chupe avei omondo Espíritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—.

⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe.

¹⁰ ¡Pe tie pesecoāha pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatu Tūpa porocuita mboaviye āgua yuvireco, yande avei ēgüe yahe —ehi—.

¹¹ Co rumo, yaroyase yande Yar Jesucristo, yande pīsirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondiisa Tūpa oyapo uca ava ndahei vahe judío pāhuve yuvireco chupe.

¹³ Osendupase ñehhe yuvireco, ahese Santiago aipo ehi:

—Che mu, Jesús reroyasar, peyapisacami che ñehhe rese:

¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—.

¹⁵ Oyoya tupri Tūpa ñehhe mombehusar rembicuachiagüer rese. Ñepeipāhu pendar oicuachía aracahe aipo ehi:

¹⁶ ‘Coiye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporā icuapri aracahe suive’ ehi Tūpa ñehhe mombehusar aracahe.

¹⁹ “Sese chepihañemoñeta iya ndayayocuai chira Moisés porocuita rupi oñecuñaro vaherā ndahei vahe judío Tūpa rupi uguata āgua yuvireco” ehi.

²⁰ “Aviye rumo yaicuachias chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi.

²¹ “Esepia, opacatu tecua rupi yuvirecoi ava omombehu vahe Moisés porocuita ñepeipei-mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco.

²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei.

²⁴ Oroyandu amove ava ore pãhu pendar pe mañeco tẽi aipo oporombohesa pipe yuvireco. Ahe ava ndahei ore ocuaita pipe yuviraso pẽu pe pihañemoñeta rova.

²⁵ Sese oyoya orepahañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pẽu.

²⁶ Ahe acoi oyemondo vahe mbahe-mbahe tẽi povrive yande Yar Jesucristo recocuer rese yuvireco.

²⁷ Oromondo Judas, Silas avei pẽu: ahe teieté omombehura opacatu cuachiar pipendar pẽu yuvireco.

²⁸ Aviye Espiritu Santo upe, oreu avei co porocuita güeraño oromondo vahe rese pẽu. Ndape cuaisa pota iri rumo ambuae mborocuita rese.

²⁹ Pehui rene mbahe mimba yucapri seropovẽhepri mbahe rahanga tẽi upendar, ndapehui chiaveira mbahe ruvi, mbahe mimba yucapri suvi renosepirẽhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pẽu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe.

³¹ Ahe cuachiar rese oyeroquise, oyemboviharete yuvireco.

³² Judas, Silas Tũpa suindar ñehesa mombehusar avei yuvirecoi. Sese omboviharete catu iyavei omonguerẽhi catu avei ahe ava yuvireco oñhe pipe.

³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.

³⁴ Silas rumo opita potaño ité aheve.

³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pãha ahe yuvireco? —ehi.

³⁷ Ahese Bernabé viraso pota Juan Marcos oyeupi viña.

³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyano oyepotase yuvireco Panfilia ve. “Taipitiviño iporaviquisa rese” ndehi chupe.

³⁹ Nomoingatuise mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve.

⁴⁰ Pablo rumo oiporavo Silas oyeupi icho ãgua. Yuvinose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo.

⁴¹ Ipare yuviraso Siria, Cilicia rupi Jesús reroyasar monguerẽhi catu ãgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego.

² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe.

³ Pablo viroguata potaño ité Timoteo oyeupi. Sese seroguata renondeve, ombocircuncida uca seroñroēhi ãgua judío yuvirecoi vahe upe. Esepia, opacatu oicua Timoteo ru griego secose yuvireco.

⁴ Evocoyase opacatu tecua iguatagüer rupi omombehu ahe mborocuaite apóstol, Jesús reroyasar rãrosar Jerusalén pendar ombou vahe yuvireco chupe.

⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tũpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaheã Tũpa Ñhengagüer mombehu ãgua. Sese oyahuva yuviraso Frigia rupi, Galacia rupi avei.

⁷ Ëgüe ehi oyepota Misia popive yuvireco. Ichui yuviraso pota tēi Bitinia ve. Jesús Espiritu rumo ndoipotai icho ãgua supi.

⁸ Ahese osasaviño yuviraso Misia sui carite guasu yemboyasa Troas ve oyepota ãgua yuvireco.

⁹ Oyepotase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivii ãgua viña” ehi ohã chupe.

¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pĩsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve.

¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico.

¹³ Mbituhusa ari pipe orosē evocoi tecua sui iai popive. “Aheve oñemonuhara judío oyeroqui ãgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe.

¹⁴ Ñepeï imboetasa, Lidia serer vahe, Tiatira pendar, oyapisaca ore ñehe rese oĩ. Ahe Tũpa mboeteisar secoci, turucuar suendi vahe mbovendesar avei secoci. Yande Yar omohivi ipihañemoñetasa iyapisaca ãgua Pablo remi-mombehu rese.

¹⁵ Sese ñapiramosa, opacatu sēta pendar reseve. Ipare ore mombita pota güētave.

—Che reroyase peye yande Yar reroyasar che recose, pepitara che rētave —ehi oreu.

Ëgüe ehi ore monguerēhi. Sese oropita sētave ipiri.

¹⁶ Ipare ambuae ari oroso irise oroyeroqui ãgua, cuñatai ore rovaichi, ahe cuñatai carugar pĩratasa pipe mbahe mombehusar. Oicatu ava upe mbahe oime vaheã mombehu. Omombehuse mbahe, setá oipisi sepri guarepochi güerecuar yuvirecoi vahe upe nara yepi.

17 Ahe cuñatai ou ore raquicuei,
—¡Co ava Tūpa ivate catu vahe upendar oporaviqui yuvireco omombehu:
“Na ehira Tūpa yande pīsīro” ehi yuvireco! —ehi pucu-pucu ore mombehu
ava upe.

18 Setá arī ēgūe ehi oico oreu. Omañeco tēise rumo Pablo, oyemboyere
chupe cute, aipo ehi icaruguar upe:

—Che orocuai Jesucristo rer pipe: esē co cuñatai sui —ehi.

Aheseve voi caruguar osē ichui.

19 Evocoyase cuñatai rerecuar oyanduse, “Ndoipisi uca iri chira guare-
pochi yandeu” ehi yuvireco. Imboasipave oipisi Pablo, Silas mborerecuar
upe ocarusuve seraso yuvireco.

20 Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboai-
vasu tēi yuvireco yande recua pipe.

21 Oporombohe güecocuer rese yuvireco. Secocuer rumo naporai oreu.
Ore Roma iguar oroico, sese ndoroicatui secocuer moña āgua —ehi yuvireco
mborerecuar upe.

22 Evocoyase ava eta oyamotarēhi Pablo iyavei Silas yuvireco iyavei mbor-
erecuar, “Pesequi iturucuar ichui. Ipare peinupara ivira pipe” ehi.

23 Inupá iteanga pare, osoquenda yuvireco. Oyocuai pīrata soquendapri
rārosar yuvireco, “Esāro tupri” ehi yuvireco chupe.

24 Aipo oyeupe he ramoseve, soquendapri rārosar omoingue Pablo, Silas oi
ava nose catui vahesa pipe. Aheve omopaha cepo pipe.

25 Ahe pītu mbit̄er rupi rumo Pablo, Silas oyerogui, osapucāi Tūpa
mboeteisave yuvireco. Ambuae ava soquendapri evocoyase osenduño tēi
yuvireco isapucāi.

26 Ahese aviyeteramo tēi ivi orirīi eteanga. Opa omomara ava roquen-
dasa moviracuasa, opacatu oquenda oyemboi iyavei opacatu carena oyera
soquendapri sui.

27 Ahese soquendapri rārosar omahe yesapiha. Osepiase oquenda im-
boipri, ahese vinose oquise pucu siru sui oyeyuca āgua viña. Esepia niha,
“Opacatu ité revo soquendapri yuviraso” ehi viña.

28 Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohavel
—ehi pucu soquendapri rārosar upe.

29 Evocoyase soquendapri rārosar, “Emboumi tataendi” ehi ondugüer upe.
Ichui oña oi que, orirīi, osiquiyepave oñenopiha Pablo, Silas rovai oso.

30 Vinose pare soquendasa sui oporandu chupe:

—Mbia, ¿mara ahera vo che ñepisīro āgua vichico? —ehi chupe.

31 —Eroya yande Yar Jesucristo. Ichui ahe nde pīsīrora, nde rēta pendar
avei —ehi yuvireco chupe.

32 Ahese omombehu yuvireco Tūpa Ñhengagüer soquendapri rārosar upe,
opacatu sēta pendar upe avei.

33 Ahe pītu pipeve avei soquendapri rārosar viraso oyeupi, yapichasa
oyoseipa chupe. Ahese Pablo, Silas oñapiramo guārosarer, sēta pendar avei
yuvireco.

34 Viraso pare sārosar güētave, ombocarū. Ahe sēta pendar avei oviharete
ité yuvireco Tūpa reroyasa rese.

35 Cōhese mborerecuareta omondo sundao ava rese icuapri soquendasave
yuvireco. Oyepotase yuvireco, aipo ehi: “Emosepa evocoi mbia judío” ehi.

36 Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose ãgua —ehi soquendapri rãrosar upe.

³⁸ Ipare sundao ava rese icuaipri omombehu güerecuareta upe Pablo ñehes. Oyanduse Pablo, Silas romano secose, osiquiyé iteanga yuvireco.

³⁹ Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe.

⁴⁰ Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pãhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tũparo.

² Secocuer rupi eté mbituhusa ari pipe Pablo oi que judío tũparove, oñemoñeta ava eta upe mbosapi mbituhusa ari rupi Tũpa Ñehengagüer rese.

³ Omboyecua tupri imombehu Tũpa Rembiporavo ava pĩsiro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tũpa Rembiporavo ava pĩsiro ãgua —ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco.

⁵ Judío rumo ndoviroyai vahe oñemoĩrombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboai vu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vīnose pota ava rehi pãhuve yuvireco viña.

⁶ Ndoyosuse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūritei oyepotapa yuvireco cohave!

⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocua ita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondi guasu ava eta, mborerecuar avei tecua pipendar yuvireco.

⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tũpa Ñehengagüer Berea ve yuvireco

¹⁰ Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tũparo pipe.

11 Berea pendar ava aviye catu ava Tesalónica pendar sui. Ĕgüe ehi ipisi ohãpisiẽhisa pipe ñehesa yuvireco iyavei ari yacatu rupi osecu Tũpa Ñehengagũer pipe ‘¿supi eté pĩha Pablo ñehesa?’ oyapave yuvireco.

12 Evocoyase setá avei Pablo ñeheseroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei.

13 Judío Tesalónica pendar rumo oyandu yuvireco Pablo porombohesa Tũpa Ñehengagũer rese Berea ve. Sese yuviraso aheve imboavũ guasu tẽi uca ãgua ava upe yuvireco.

14 Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco.

15 Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñeheseroyasar Silas upe iyavei Timoteo upe avei yuvireco yuviraso voi ãgua Pablo piri ahe tecuave yuvireco.

Pablo Atenas ve secoi

16 Pablo osãro viteveve Silas iyavei Timoteo Atenas ve oico, ndoyembovĩhai osepiase opacatu rupi tũpa rahanga-anga tẽi.

17 Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepi vahe ocarusu rupi ava ñemonuhasave ahe tecua pipe.

18 Evocoyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbia iñeheseroyasar papa rai ava upe oico? —ehi.

Ambuae aipo ehi yuvireco:

—Ndoyavĩ co mbia oñeheseroyasar vahe ambuae ava Tũpa rese tẽi —ehi yuvireco.

Esepi, omombehu Jesús recocuer iyavei cuerayevisa resendar.

19 Evocoyase ahe oyembohe vahe viroyeupi Pablo Areópago serer vahe save seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piyasu resendar oreu viña?

20 Supi eté niha eromombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

21 Atenas pendar iyavei yugũeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

22-23 Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepi pe tũpa eta pemboetei vahe. Ahese asepi ñepe tũpa upe seropovẽhepri renda. Sese asepi icuachiapri aipo ehi oĩ: “Tũpa ndicuasai vahe upendar” ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

24 “Evocoi Tũpa oyapo vahe co ivi, opacatu mbahe ipor avei. Ahe niha ivi, iba Yar secoi. Sese ndasecoi tũparo ava tẽi rembiapo pipe.

25 Ndahei ava rembiapo pipe sui tẽi oicove. Esepi, ndipoi mbahe ipane vahe chupe. Ahe ité niha opacatu upe ombou tecovesa, pĩtuhesa iyavei opacatu mbahe oime vahe ivi, ivave” ehi.

26 “Tũpa oyapo opacatu-catu tẽi ava ñepe ava sui ava yesu ãgua opacatu ivi rupi. Omondo ivi ava yemboerecua ãgua ñepe-pe upe. Ari avei omondo co ivi pipe iyemboerecua ãgua yuvireco chupe.

²⁷ Ëgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ëgüe ehi rumo Tūpa yande resevemi eté.

²⁸ Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco.

²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi.

³⁰ “Pe ramoi ndoicua tupriise yuvireco aracahe, Tūpa oñemosañño mbahe sembiapo rese chupe. Cūrtei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya.

³¹ Esepia, ahe oiporavo ari opacatu ava recocuer rese porandu uca āgua güecocuer ivi tupriisa pipe ñepei güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroñrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osē ipāhu sui oso.

³⁴ Moviro rumo mbia oyemboya sese, viroya ité vahe ñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osē Atenas sui, oso Corinto ve.

² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepei tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso,

³ opita Aquila piri oporaviqui āgua. Esepia, Pablo, Aquila avei ahe mbahe pিরer mbovīvisar pāve yuvirecoi.

⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güerañño judío eta upe aipo ehi: “Jesús niha Tūpa Rembiporavo ava písiro āgua secoi” ehi.

⁶ Ñeñe-ñeñe tēi rumo seroñrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoiyase Pablo osē judío tūparo sui, oique mbia Ticio Justo serer vahe rētave, ahe Tūpa mboeteisar avei secoi. Ahe sēta judío tūparo iqueve.

⁸ Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñepiramopa uca yuvireco.

⁹ Ñepeí pĩtu pĩpe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui.

¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahĩrã co tecua pĩpe” ehi yande Yar chupe.

¹¹ Evocoyase opĩta ñepeí aravĩter yemombĩtesa rupi Corinto ve oico. Aheve ombohe Tũpa Ñehengagũer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarẽhisave. Ichui viraso ahe mborerecuar upe porandusa ivate catusave yuvireco,

¹³ aipo ehi yuvireco chupe:

—Co mbia oipĩhañemoñeta rerova tẽi ava oTũpa mboetei ãgua. Ndahei rumo Roma pendar porocuita rupi ãgũe ehi yuvireco —ehi yuvireco seroĩrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapısaca ãgua pe remimombehu rese viña.

¹⁵ Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuita resendar rese tẽi. Pemoingatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

¹⁶ Ipare opa omboyepipi porandusa sui.

¹⁷ Ahese opacatu griego oipĩsi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo seci pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye ãgua. Ipare yuviraso carite pĩpe Siria ve.

¹⁹ Siria piar rupi yuviraso Efeso ve. Aheve opĩta Aquila, Priscila yuvireco. Ichui Pablo oi que judío tũparo pĩpe Jesús resendar ñehesa mombehu ãgua chupe yuvireco.

²⁰ Ahe pendar omombita pota vite tẽi yuvireco viña, Pablo rumo ndopĩta potai aheve.

²¹ Evocoyase, “Aviye, taso rane” ehiño chupe yuvireco. “Tũpa oipotase cheu, ayevi irira vitu pe pĩri” ehi.

Ipare oso Efeso sui carite pĩpe.

²² Oyepotase Cesarea ve, oso Jerusalén ve “avirave” apo ãgua Jesús reroyasar upe. Ipare oso Antioquía ve.

²³ Opĩta pucu pare aheve, osẽ, oguata iri Galacia rupi, Frigia rupi opacatu Jesús reroyasar monguerẽhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tũpa Ñehengagũer.

²⁵ Ahe oyembohe vahe avei yande Yar recocuer rese. Omombehu oquerẽhisa pĩpe secocuer ava upe, oporombohe tupri ai avei sese. Ahe rumo oicua Juan oãpiramo agũer gũeraño tẽi.

²⁶ Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tūpa recocuer chupe yuvireco.

²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipape oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivii seroya tupri catu āgua yuvireco.

²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi ñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pĩsiro āgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

² Evocoyase oporandu ahe ava upe:

—¿Peipisi vo Espiritu Santo pe piha pipe peroyase Jesús? —ehi chupe.

—Ore ndorosendui eté aipo Espiritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyeveise Tūpa upe. Ipape rumo omombehu ava upe: “Peroya ahe eté vahe ou vaheerã che raquicuei” ehi. Ahe ou vaheerã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñapiramo uca Jesucristo rer pipe yuvireco.

⁶ Omondose Pablo opo iharive yuvireco, ahese ogüeyi Espiritu Santo, oique ipiha pipe yuvireco. Ipape aviyeteramo tēi ñehe ambuae ñehesa pipe iyavei omombehu Tūpa suindar ñehesa yuvireco.

⁷ Ëgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyeēhisave itūparo pipe ipihañemoñeta rerova āgua Tūpa mborerecuasa resendar reroya āgua rese.

⁹ Amove rumo judío ipihaviracua ité seroyaēhi āgua yuvireco. Ipape ñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepipi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi ñehe yepi.

¹⁰ Ëgüe ehi ñuvirío araviter rupi. Sese opacatu ava Asia rupindar judío, ava ndaheñi vahe judío avei osendu yuvireco yande Yar ñehengagüer.

¹¹ Tūpa omondo güeco pĩratasa Pablo upe poromondiisa apo āgua.

¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ëgüe ehi pota avei siete

Esceva rahir mbahe apo yuvireco viña. Ahe iyepota judío pahi rerecuar secoi.

¹⁵ Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipãhuve oso. Opacatu opĩratasa pipe opa ité osecopi siete mbia yuvirecoi vahe. Omomara-mara tẽi oguayĩehisa pipe imonanipa tupri imondo.

¹⁷ Co mbahe sembiapo rẽracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco

¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri.

²⁰ Ëgüe ehi Tũpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

²¹ Ipare Pablo ipiñañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi.

²² Evocoyase omondo ñuvirio opĩtivisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese.

²⁴ Aheve mbia Demetrio serer vahe secoi. Ahe oyapo Artemisa rẽta rahanga guarepochi apopri guarepochi pisi ãgua. Ambuae ava mbahe rahanga aposar oipisi tupri avei oporaviqui repri ipiri yuvireco.

²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboavu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tũpa ité’ ohesa pipe yande rembiapo uve. Ndahei rumo cohapeño ãgüe ehi, opacatu Asia rupi ãgüe ehi avei imombehu.

²⁷ Aviyeteramo mbahe tẽi oimera yandeu yande poraviquisa mocañi tẽi ãgua, tũparo guasu Artemisa upendar aviyeteramo ocañi tẽi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroĩrora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tẽi. Osapucái vahe oipisi Gayo iyavei Aristarco, ahe ñuvirio Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave.

³⁰ Pablo oique pota tẽi ava rehii pãhuve, ambuae Jesús reroyasar rumo nomoingue uca potai yuvireco.

³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe.

³² Ñemonuhasave amove ava osapucaí pĩrata ñepei mbahe rese, amove osapucaí ambuae mbahe rese. Esepia, yaivu tẽi yuvireco. “¿Mahera vo evocoyase yañemonuha?” ehi tẽi setá ipãhu pendar yuvireco.

³³ Amove rumo ava rehii pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehii rovaque yuvireco. Alejandro evocoyase omopuha tẽi opo ava monguiriri ãgua viña. Osepi pota omu judío ava rehii rovaque viña.

³⁴ Ava rehii rumo oicuse Alejandro judío secose yuvireco. Opacatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatusave ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui ovĩapi vahe rese avei hañecosa.

³⁶ Ndipoi niha ava, ‘Aní’ ehi vaherã che remimombehu rese. Sese peyemonguiririño, peyapoi rene mbahe pe yapisacaẽhisave.

³⁷ Peruño tẽi eté co ñuvirío mbia cohava, ndoyapoi rumo mbahe tẽi Artemisa upe yuvireco. Nimondai mbahe rese itũparove, ndoviroĩroi avei serer yuvireco.

³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco.

³⁹ Pemoingatu potase que ambuae mbahe, peso ranera yemomborandusave imoingatu ãgua.

⁴⁰ Mborereciar revo oyandura yande rembiapo co pipe, ‘¿Mahera peaivu guasu tẽi? ¿Che amotarẽhimbave tie Ēgüe peye?’ ehi tiẽtera yandeu. Oporanduse yandeu, ndayaicatui chitiẽtera imboyevi ãgua iñehe chupe. Esepia niha, co yañemonuha yande remimbotar tẽi cohava” ehi chupe.

⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve.

² Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso.

³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyevi iri oso Macedonia ve ivi rupi.

⁴ Yuviraso moviro mbia supi, ipãhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi.

⁵ Evocoi mbia yuviraso Pablo renondeve sãro ãgua Troas ve.

⁶ Pieta pan ndayapepoi vahe hu pare, orosẽ tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osẽ pota ahese ayihive voi ichui.

⁸ Ahe oi ivate vahesave ñemonuhasa pipe setá tataendi.

⁹ Mbïa chîhivahe, Eutico serer vahe, metanave oguapï oï. Pablo rumo oñehe pucú iteanga. Evocoyase omboopesï ahe chîhivahe. Ipare oquë; aviyeteramo tēi oviapi oi ivate vahe mbosapïsa sui. Ahese ava ogüeyi sehögüer rupi ivi sui yuvireco.

¹⁰ Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiquiyeyi rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute.

¹² Evocoyase co mbïa chîhivahe viroyevise secosave, opacatu oyembovïha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi.

¹⁴ Oroyoepiase aheve, oha carite pipe ore pïri. Ichui oroso cute Mitilene ve.

¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve.

¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco ãgua. Sese Efeso oroñacusaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya.

¹⁸ Oyepotase yuvireco chupe, aipo ehi: “Peicua niha che recocuer aviye ité yipïsuive ari che reique ramosa resendar co Asia ve.

¹⁹ Ari yacatu rupi aporaviqui yande Yar upe pe pãhuve vichico che reco asiñhisave che yasehosa pipe. Yepe judío che mboguai etepri che recoãhasave pe recuave yuvireco viña,

²⁰ che rumo ndaicatui ñehesa aviye vahe mombehuēhi pëu mbahe aviye ãgua yepi. Che opombohe ava rehï rovaque, opombohe avei ñepeï-peï pe rëta rupi yepi” ehi.

²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tüpa upe, peroya avei yande Yar Jesús’ ahe” ehi.

²² “Cũritei asora Jerusalén ve vichico. Aheve che so ãgua Espiritu che cuai che piha pipe. ‘¿Mara ehira piha yuvireco peve cheu?’ aipo ahe.

²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda ãgua iyavei che mombaraisu ãgua yuvireco yepi” ehi.

²⁴ “Ndacherecatēhi rumo cheyese che mano ãgua. Che rumo amboaviye potaño ité che poraviquisa Tüpa upe, ahe yande Yar Jesucristo che cuai vahe co ñehesa icatupri vahe mombehu ãgua. Co Tüpa oporoaisusa pipe ombou ñepeï vahe Guahir ava písiro ãgua” ehi.

²⁵ “Opa niha Tüpa mborerecuasa amombehu pëu. Che rumo aicua ndache repia iri chira peye.

²⁶ Sese tapeicua cũritei: ndayavïi eté che cuaita mboaviye ãgua co tecocuer aviye vahe mombehu pipe pëu.

²⁷ Esepia, ndaicuacui eté Tüpa Ñehengagüer mombehu; che rumo amombehuño ité opacatu Tüpa recocuer pëu.

²⁸ Sese peñearo tupri, pesãro avei opacatu Jesús reroyasar Espiritu Santo porocuita rupi. Inungar ovesa rãrosar, ãgüe peye tuprira sãro. Ahe Tüpa

remimboepi yuvirecoi. Esepia, Jesús oipiyere vuvi opacatu ava angaipa repirã.

²⁹ Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota ãgua.

³⁰ Oime aveira que ava pe pãhu pendar pe mbopa pota aveira yuvireco pe reraso ãgua oyeupi.

³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pïtu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tũpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pẽu opacatu ambuae güembiporavo reseve.

³³ Ndahei pe guarepochi, que oro iyavei pe turucuar pota raisa pipe aso pe pãhuve.

³⁴ Peicua niha acoi che po pipe ité aporaviqui che recove ãgua, che rupindar recove ãgua avei.

³⁵ Ëgüe ahe amboyecua che recocuer pẽu. Supi avei ëgüe peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

³⁶ Oñehe pare, oñenopiha oyerure ãgua opacatu omboripar reseve.

³⁷⁻³⁸ Ndoyembovïhai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tẽi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso.

² Aheve orosepia carite oso vaheã Fenicia ve, ahe ipipe oroha, oroso.

³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoẽhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua.

⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoyase eresoi rene Jerusalén ve” ehi yuvireco chupe viña,

⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure ãgua.

⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepe ari.

⁸ Ahere ayihive oroso Cesarea ve. Aheve oroique, oropita Felipe rãta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve.

⁹ Evocoi Felipe vireco irungatu guayri ndomendai vahe. Tayri Tũpa ñehe mombehusar pãve yuvirecoi.

¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tũpa ñehe mombehusar secoi.

¹¹ Ouse ore pãhuve, virocua Pablo rumbicuasa ichui. Ipípe oñapíchi opí, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpíchi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tẽi chupe.

¹³ Omboyeví rumo oreu:

—¡Mahera peyaseho che rese, ndache mbovîhai peye! Che rumo ayemoin-gatu voi che ãpíchi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndoroicatuise ipíhañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve.

¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe oremoingue oyepíri. Ahe yípive ité viroya yande Yar oico.

Pablo omborí Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco.

¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar.

¹⁹ Pablo, “Avirave” ehi opacatu oñemonuha vahe upe. Ipare omombehu tupri yípisuipe oyeupe Tũpa mbahe oyapo uca vahe ava ndahei vahe judío pãhu rupi.

²⁰ Osenduse, omboetei guasu Tũpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerẽhi vahe Moisés porocuita arachendar mboaviye ãgua yuvireco —ehi—.

²¹ Osendu tẽi nde rembiapo yuvireco. Omombehu tẽi avei aipo nde he yande mu ambuae tecua rupindar yuvirecoi vahe upe: “ ‘Peseya Moisés porocuita. Pembocircuncida iri rene pe rahîr. Peico iri rene yande recocuer arachendar pípe’ aipo ehi tẽi oico” ehi nde mombehu yuvireco —ehi Pablo upe yuvireco—.

²² ¿Mara yahera vo? Esepia, oyandura nde yepotasa cohava yuvireco.

²³ Aviye catu ereyapora ore porocuita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tũpa upe yuvireco.

²⁴ Eraso co mbia ndeyeupi, eñemoatiro supi eso, emboepi avei mbahe Tũpa upe icuavêhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua ava semira tẽise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—.

²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tẽi upendar seropovêhepri, pehui rene mbahe ruvi, pehui rene mbahe mimba yucapri suvi renosepirẽhi vahe iyavei peguasai rene” orohe chupe —ehi yuvireco.

Judío oipisi Pablo tũparo guasu pípe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatiro. Ahese oromondo pota ndeu porerecosa Tũpa porocuita rupi icuavẽhepirã” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tũparo pipe yuvireco. Ahese omoñemoiro uca opacatu ava rehii tũparo pendar. Ipare ipisise,

²⁸ sãse yuvireco: “¡Ore mu, ore pĩtivii peye co mbia oroipisi vahe rese! Esepia, oguata opacatu rupi. Oñehe tẽi yande rese, Moisés porocuita rese, yande tũparo rese avei iyavei viroique ava ndahei vahe judío yande tũparo pipe. Sese omonguiha tẽi yande tũparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tũparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cũriteimi ava yuvinoña guasu tũparove. Oipisi Pablo ombotiriri senose tũparo pipe sui yuvireco. Ahese omboya voi guaquicuei tũparo roquenda yuvireco.

³¹ Oyuca potase yuvireco, ahese yaivu rẽracua oyepota sundao rereciar guasu upe.

³² Cũriteimi sereciar viraso sundao, yuvinoña yaivu vahe upe yuviraso. Osepia ava sundao rereciar guasu, isundao avei yuvireco, ndoyuvirocua iri Pablo rese yuvireco.

³³ Ahese ahe sundao rereciar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirio carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pẽu?” ehi judío eta upe.

³⁴ Ahese amove ava ñepe mbahe rese oñehe, ambuae, ambuae mbahe rese tẽi yuvireco. Evocoyase sundao rereciar ndoicatui supi eté vahe mbahe rendu ãgua yaivu guasu vahe pãhuve. Sese, “Peraso cuartelve” ehi.

³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui.

³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rereciar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborereciar chupe:

—¿Ereicua vo griego ñehe? —ehi—.

³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirẽhisa rupi —ehi sundao rereciar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoyase mborereciar, “Aviye” ehi chupe. Ipare opũha yeupisa harive, omopuha opo ava eta monguiriri ãgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi ãgua pẽu cũritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerokuisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tũpa mboetei ãgua rese vichico inungar pe peico cũritei.

⁴ Che yipindar aseca-seca catu ava co Tecocuer Piasu rupi oguata vahe yamotarẽhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tũparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi ãgua. Ichui tarupa cohave imombaraisu ãgua’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tẽi osesape guasu iva sui oreu.

⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarẽhi etepri eve?’ ehi vahe cheu.

⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarẽhi etepri che rereco eve’ ehi cheu.

⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco.

¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epũha, eso Damasco ve. Aheve ava opara omombehu mbahe nde rembiaporã’ ehi cheu.

¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tũpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbia aviye vahe ité’ ehi yuvireco chupe.

¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporẽhi iri mbahe cheu.

¹⁴ Ipare aipo ehi: ‘Yande ramoi rembieroya, yande Ru Tũpa, nde poravo güemimbotar cua ãgua. Oipota avei eresepia vaherã ichuindar ava seco ñvi vahe, eresendu aveira iñehe’ ehi.

¹⁵ ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu.

¹⁶ ‘Evocoyase, cũritei ndiya iri eresãro’ ehi. ‘Epũha, toroãpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tũpa che mondo ava ndahei vahe judío upe” ehi Pablo

¹⁷ “Coiye catu, ayevi irise Jerusalén ve, ayerure tũparo guasu pipe. Ahese che quer nungarve asepia mbahe.

¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu.

¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tũparo yacatu rupi’ ahe.

²⁰ Aipo ahe avei chupe: ‘Oyucase Esteban yuvireco, ahe nde recocuer mombehugar, che ahese asepiá. Chepihañemoñeta rupi aviyeyño oyucase yuvireco. Sese asãro yucasar yeaosa vihã’ ahe chupe.

²¹ Che Yar rumo omboyeví cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehíi upe.

Pablo sundao rereciar guasu povrive secoi

²² Aipo rupi osendu iñehe yuvireco. Ahese rumo osapucaí pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe.

²³ Osapuca-pucaí, osequiipa oyeaosa oñemoĩrombave yuvireco iyavei omombo-mombo ivi cuhi ivate coti yuvireco yamotarẽhimbave.

²⁴ Ahese sundao rereciar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse atĩ yamotarẽhimbave ava yuvireco chupe” ehi osundao upe.

²⁵ Oñapichise rumo inupa ãgua yuvireco, Pablo omombehu ñepeí sundao rereciar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborereciar upe.

²⁶ Osenduse iñehe, oso voi omombehu güereciar upe.

—Eicua catu, aipo mbia romano secoi —ehi.

²⁷ Evocoyase sundao rereciar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rereciar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rereciar upe.

²⁹ Ahese oinupa pota vahe osiquiyepave oyepepi yuvireco ichui; sundao rereciar guasu avei oicuae Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rereciar guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rereciar, opacatu ambuae judío rereciar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rereciar ivate catu vahe, yipi pendar uve, “Peiyurupete” ehi.

³ Ahese Pablo omboyeví chupe:

—¡Tũpa nde nupara, nde aviyey tupri tẽi angahu vahe ereico! Nde mbahe rese porandu ãgua cheu porocuaíta rupi ereĩ. Evocoyase, ¿mahera ereporocuai che yurupete ãgua mborocuaíta mboyeroyaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rereciar ivate catu vahe upe! —ehi yuvireco.

⁵ Ahese omboyeví chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuae oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaheerã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehepoepi-epi yuvireco. Sese oyemboyaho yuvireco.

⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

⁹ Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tẽi. Aviyeteramo espíritu que Tũpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pĩtu pipe, yande Yar oyemboyecua chupe aipo ehi: “Eyemonguerẽhi catu, Pablo, inungar che mombehu nde siquiyehisa pipe cohava Jerusalén ve, ãgũe ere aveira che mombehu Roma ve” ehi.

Omboguai Pablo yuca ãgua yuvireco

¹² Ahere ayihive setá judío oñemonuha, omboguai Pablo yuca ãgua yuvireco: “Tũpa rovaque ndayayucase Pablo, ndayacarui chira, ndayahui chiaveira; yayucase voi, yacarura, yahura” ehi yuvireco.

¹³ Ahe ava aipo ehi vahe retacuer setá catu cuarenta sui.

¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tũpa rovaque Pablo; ndorocarui chira ndoroyucase —ehi yuvireco chupe—.

¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osẽse, oroquẽtirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sãracua, oso cuartelve chupe imombehu.

¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tẽi co mbia chĩhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chĩhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chĩhivahe sundao rerecuar guasu upe” ehi. Co chĩhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tẽira Pablo rese seraso iri ãgua ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tẽira yuvireco ndeu —ehi—.

²¹ Ndereroyai chira ahe iporandusa yuvireco. Esepia, cuarenta sui setá catu ava oquëtiro vaherã yuvireco sese. Omboguai eté yuca água yuvireco. Ndocarui, ndoihui chira aipo ndoyucaise yuvireco. Cũritei oyemoingatu, osãro viteño nde porocuaita yuvireco —ehi mbia chĩhivahe chupe.

²² Ipare sundao rerecuar guasu omboyevĩ imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovrĩ pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaherã opĩ rese, ambuae setenta sundao cavayu harĩve iyavei doscientos tuprĩ toguata lanza resendar yuvireco. Ipare pesopara pĩtuse las nueve pĩpe” ehi.

²⁴ “Pemoingatu uca avei cavayu Pablo yeupi água. Ēgũe peye pesãro tuprĩra seraso yande rerecuar Félix upe” ehi.

²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imbooteiprĩ ore rerecuar Félix. Che, Claudio Lisias, amondo che mahenduhasa ndeu.

²⁷ Iyavei co amombehu pota ndeu: judío oipĩsi co mbia yuvireco yuca água viña. Che rumo aicua romano seco rese, ahese araso sundao sepĩ água judío eta sui

²⁸ ‘¿mbahe rese pĩha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco.

²⁹ Ahese aicua yamotarẽhisa judío porocuaita sui tẽi iyavei ndoyapoi mbahe tẽi oreu. Sese ndiyai yuca água oreu, soquenda água avei.

³⁰ Ayanduse rumo judío oquëtiro sese yuvireco, amondo voi evocoi mbia ndeu. Ipare amombehu yamotarẽhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pĩtu pĩpe sundao viroguata Pablo ocuaita rupi yuvireco, vıraso Antıpatris ve yuvireco.

³² Ahere ayihive sundao yuviraso vahe opĩ rese oyevĩ yugũeru cuartelve. Sundao cavayu arĩ pendar gũeraño rumo yuvirasoño vite.

³³ Vıroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe.

³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotındar aico” ehi.

³⁵ —Oyepotase nde amotarẽhisar yuvireco, asendura nde yoepisa —ehi Félix chupe.

Evocoyase oyocuai opĩtivıisar Pablo rãro água gũõtave Herodes rembia-pogũer pĩpe.

24

Pablo oyoepĩ mborerecuar Félix rovai

¹ Cinco arĩ pare, Ananías, ahe pahi rerecuar ivate catu vahe, tecua pĩpendar rerecuar avei yugũeru Cesarea ve. Ou avei mbia ava mbahe aposar pĩtivıisar oñehe vaherã Pablo amotarẽhi uca água, ahe serer Tértulo. Ahe yugũeru Pablo recocuer mombehu água mborerecuar Félix upe.

² Evocoyase Félix gũeru uca Pablo. Ahese Tértulo omboipĩ sese oñehe aipo ehi Félix upe:

—Nde imboyeroyaprĩ ereico. Avıye ndeu nde porocuai tuprĩsa rese. Esepia, ndipoi vavasa ore recua rupi. Ereyapo uca avei ore recua pĩpe mbahe iporañete vahe nde poroaisusa pĩpe.

³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix.

⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—.

⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—.

⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—.

⁷ Evocoi sundao rerecuar guasu Lisias rumo oyepota ore pāhuve. Ahe opĩratasa pipe vinose ore po sui,

⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi.

¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetsa pipe —ehi Félix upe—.

¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua.

¹² Co judío oicua yuvireco nañehengatai ava upe tūparo guasu pipe, namboaivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—.

¹³ Co mbia ndoicatu eté mbahe che rembiavi mombehu seroya tupri āgua yuvireco ndeu.

¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—.

¹⁵ Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye.

¹⁶ Sese ayemoviracua tupri che pihañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua.

¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehii che rupi, namboaivu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña.

²⁰ Anise, aviyeteramo co oyepota vahe cohaye yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi.

²¹ “Co rese revo oñemoiro yuvireco cheu aipo ahe pĩratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rãro ãgua: “Eremondomira rumo que mbahe semimbotar apo ãgua chupe iyavei imboripar yugüeruse, tihãñecoño yuvireco sese. Ëgüe ere sãro” ehi Félix sãrosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota ñehe Jesucristo reroyasa resendar yuvireco.

²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tũpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri ãgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osẽ ãgua’ oya viña. Sese osãro pucu tẽi. Iyavei setá oyupagüer güeru uca oyeupe oñemoñeta ãgua sese.

²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha ãgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osẽ Cesarea sui, oso Jerusalén ve.

² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe.

³ Ipare oporandu chupe: “Emboumi uca Pablo cohava oreu” ehi yuvireco ‘yayuca peri rupive’ oyapave yuvireco viña.

⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara ãgua —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu ãgua oĩ. Ahese oyocuai Pablo reru ãgua.

⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tẽi Festo upe Pablo rembiapo yuvireco, ndoicatui eté rumo seroya uca ãgua yuvireco.

⁸ Esepia, Pablo aipo ehi oyoepisave:

—Ndayemboangaipai judío porocuita rese, judío tũparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerẽhi vo Jerusalén ve ereso vaherã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeve chupe:

—Cũritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tẽi ayapo judío amotarẽhisave —ehi—.

¹¹ Ayapose que mbahe naporai vahe, aviyeño che yuca uca ãgua eve; ndayapaise rumo co judío omombehu vahe yuvireco ndeu, ndiyai che mondo ãgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu ãgua —ehi.

¹² Ahese Festo oñemoñeta opĩtĩvisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ãgua Festo upe yuvireco.

¹⁴ Opĩtase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepei mbia soquendapri oseya vahe Félix cheu —ehi—.

¹⁵ Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—.

¹⁶ Ahese aipo ahe yuvireco chupe: “Ndiyai eté romano mborerecuar omondo vaheerã que ava uve sese oñemoñeta vahe rese mbahe moingatuẽhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—.

¹⁷ Sese yugüeruse cohava yuvireco, aporandu voi pota secocuer rese chupe. Evocoyase ñepei ari pare aguapi che rendave porandusave. Ahese ayocuai che pĩtĩvisar evocoi mbia reru ãgua —ehi—.

¹⁸ Evocoyase opũha sese oñemoñeta vahe sembiapo ai mombehu ãgua. Asendu renondeve che pĩhañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—.

¹⁹ Mbahe sembieroya tẽi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

²⁰ “¿Mara ahera pĩha co sembiapo moingatu?” ahe tẽi. Sese aporandu chupe: “¿Ndequerẽhi vo Jerusalén ve mbahe nde rembiapo rese porandu ãgua ndeu?” ahe chupe —ehi—.

²¹ Pablo rumo oporandu cheu Cesar upe oso ãgua. Oipota mborerecuar ivate catu vahe oyeupe mbahe güembiapo rese porandu ãgua. Sese asoquenda ucaño vite sereco imondo ãgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ãgüe ehi yuviroique mborerecuar ñemoñetasave sundao rerecuar iyavei opacatu tecua pĩpendar ava seco ivate catu vahe reseve. Ahese Festo oyocuai opĩtĩvisar Pablo reru ãgua yuvireco,

²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapĩsaca: pesepia co mbia. Co mbia rese judío eta oñehe tẽi yuvireco Jerusalén ve iyavei cohava Cesarea ve. Osapucui pĩrata tẽi yuvireco ‘ĩtomano ité evocoi!’ oya yuvireco cheu —ehi—.

²⁵ Ndayosui rumo mbahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe.

²⁶ Ndarecoi rumo mbahe naporai vahe aicuachía vaheerã imondo ãgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—.

27 Chep̄ihañemoñeta amondose co mb̄ia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

1 Evocoyase Agripa aipo ehi Pablo upe:

—Emombehuño nde yoep̄isa cheu —ehi.

Ahese Pablo omopuha opo oñehe ãgua aipo ehi:

2 “Ore rerecuar Agripa, ayoep̄ira che rorivetesave judío che rese ñemoñeta-ñeta t̄eisa sui mbahe che rembiapoẽhi rese nde rovai.

3 Esepia, ereicua tupri opacatu judío recocuer, ip̄ihañemoñetasa avei. Sese eyap̄isacami nde reco mbegüesa p̄ipe che ñehe rese” ehi.

Pablo omombehura güecocuer oñecuñaro viteẽhisendar

4 “Opacatu judío che cua vahe yuvireco, oicua tupri che recocuer che ch̄ihivahe suive che recuave iyavei Jerusalén ve aicose yuvireco.

5 Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña.

6 Sese c̄uritei che reru nde rovai yuvireco che recocuer rese nde porandu ãgua. Esepia, aroya Tũpa remimombehugüer ore ramoi uve omombehu vahe aracahe” ehi.

7 “Doce ore ramoi suindar opacatu judío yuvirecoi, osãro vite evocoi Tũpa remimombehugüer aviye vahe yuvireco. Sese yuviroique tũparove ari, p̄itu p̄ipe avei Tũpa mboetei ãgua yuvireco. Ore rerecuar Agripa, eyap̄isaca tupri che ñehe rese. Evocoi Tũpa remimombehugüer reroyasa sui judío eta semiramira t̄ei che amotarẽhisave che rese yuvireco” ehi.

8 “Iyavei opacatu pe, ¿mahera pe avei ndaperoyai Tũpa porombogüerayevisa?” ehi.

Pablo omombehu yip̄indar Jesús reroyasar amotarẽhi agüer

9 “Yip̄indar che avei che p̄ihañemoñeta rai aracaco mbahe t̄ei apo ãgua rese ava Jesús, Nazaret pendar, rer amotarẽhisave.

10 Ëgüe ahe Jerusalén ve. Ombouse pahi rerecuar oporocuita cheu, ahese serer p̄ipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi.

11 “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa p̄ipe t̄ei. Ëgüe ahe aguata opacatu tũparo rupi, ambuae tecua rupi avei yamotarẽhisa p̄ipe” ehi.

Pablo omombehu güeco recuñaro agüer

12 “Evocoyase aso avei Damasco ve Jesús reroyasar mombaraisu ãgua, pahi rerecuar ombouse oporocuita apo ãgua cheu” ehi.

13 “Mb̄iter ari rupi rumo, aguatase Damasco piar rupi, asepia mbahe sendí vahe ìva sui. Ari sui osesape catu cheu, che rupindar upe avei.

14 Orov̄iapipase ìvive, asendu ñehesa aipo ehi vahe hebreo ñehe p̄ipe cheu: ‘Saulo, Saulo, ¿mahera vo ereyapo mbahe-mbahe t̄ei cheu? Ereyapose evocoi mbahe t̄ei, nde ae ereyemombaraisu’ ehi cheu.

15 Evocoyase amboyevi: ‘¿Ava vo nde ereico, mb̄ia?’ ahe chupe. Omboyevi cheu: ‘Che Jesús aico, che niha co che amotarẽhi eve.

16 Epũha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheerã chupe curi, viya ndeu’ ehi.

17 ‘Oropĩsirora judío sui iyavei oromondora ava ndahei vahe judío upe. Ereguatase ipãhuve, oropĩsiro aveira’ ehi cheu.

18 ‘Oromondora, tache cua yuvireco, che yapave iyavei toguata iri eme pĩtumimbi vahe nungar rupi; toguata catu tesapesa rupi yuvireco. Ipĩpe sui toyuvireco iri eme caruguar povrive yuvireco; toguata catu Tũpa rupi; ěgũe tehi che reroya yuvireco. Ahese oipĩsira ñeroisa oangaipa rese yuvireco iyavei oipĩsira Tũpa porrecosa oime vaheerã opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

19 “Evocoyase, che rereciar Agripa, che quer nungarve asepia vahe iva pendar, aroya ité.

20 Aipo ahe ava upe: ‘Pemboasi pe angaipa; peyevi Tũpa upe. Peicove tupri, ipĩpe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe.

21 Sese tẽi judío che piĩ tũparo piĩpe che yuca pota yuvireco” ehi.

22 “Tũpa che pĩtiviisa piĩpe rumo aicoveño ité supi, amombehu-mbehu vite Tũpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tẽi Tũpa ñehe mombehusar iyavei Moisés, ‘Oimera mbahe avıye vahe’ ihe agüer sui.

23 Aracahe omombehu yuvireco: ‘Tũpa Rembiporavo Poropĩsiosar omano ranera’ ehi. Ahe rumo yipindar ocuerayevi vaheerã omano vahe pãhu sui. Omombehu aveira tesapesa ñepĩsirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tẽi Agripa recocuer

24 Aipo ehise Pablo oñehe oyoepısive, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

25 Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaẽhisave —ehi Festo upe—.

26 Co mborereciar revo oicua tupri avei che remimombehu. Sese ndasiqıyeyi opacatu co mbahe mombehu ãgua chupe. Esepia, opacatu co mbahe yaposã vahe ndahei ñomipri tẽi.

27 Ore rereciar Agripa, ¿ereroya vo evocoi Tũpa ñehe mombehusar rembicuachía? Che aicua ereroya ité —ehi Agripa upe.

28 Ahese Agripa omboyevi chupe:

—Moviro tẽi ñehesa ipane cheu Jesús reroya ãgua —ehi chupe.

29 Ahe omboyevi Agripa upe:

—Ipanese que moviro tẽi, anise setã vite ñehesa ndeu iyavei opacatu osendu vahe che ñehe co piĩpe, ěgũe ehi tarahu Tũpa pẽu viña che nungar pe reco ãgua. Ndahei chira rumo soquendapirã peico —ehi.

30 Aipo ihe pare, mborereciar guasu iyavei ambuae mborereciar Berenice reseve iyavei opacatu sendusar opũha yuvireco.

31 Oyepepi pare, oñemoñeta co coti aipo ehi yuvireco:

—Evocoi mbıa ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

32 Ahese Agripa aipo ehi:

—Ahe ndoporanduse Cesar upe oso ãgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo ãgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborerecuar upendar.

² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi.

³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri ãgua yuvireco” ehi chupe.

⁴ Sidón sui orosirise, oroso Chipre ivi rupi ivitu sui ore ñemoha ãgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui.

⁵ Evocoyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaheerã Italia ve. Evocoyase ahe ipipe opa voi ore mboha.

⁷ Ichui oroguata mbegüe setá ari. Oroporaviquí iteanga oreypota ãgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ëgüe orohe oroso Creta cupe rupi.

⁸ Supi yavai rai ore guata ãgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota ãgua aheve, setá ari oromocañi. Ahese ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite ãgua. Yaguata vites, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroquatasar, carite yar avei.

¹² Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivi rupi.

¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui.

¹⁵ Oyepotase oreu, ndoroicatu iri eté sovaichi. Evocoyase, “Tayande rerasoño” orohe chupe.

¹⁶ Oroñocua caha pãhumi serer Cauda. Ahe oroñocuasave oroviroha sãi ore caritemi ore carite guasu pipe.

¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroquataño.

¹⁸ Ivitu rumo ombohítu iteanga para guasu. Sese ahere ayihive oporaviqui vahe omboipi carite vosiita mombo yuvireco.

¹⁹ Imombosapisa ari pipe, omombo vite mbahe carite resendar yuvireco.

²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya vaira peye viña, nayasēise Creta sui, ahese ndipoi chira co mbahe yandeu cūritei viña —ehi—.

²² Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira.

²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui.

²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipīsiro aveira opacatu nde rupindar carite pipendar” ehi cheu.

²⁵ Mbia, ayeroya Tūpa rese. Esepia, ahe omboaviye itera oñhesa cheu. Sese peyemonguerēhiño —ehi—.

²⁶ Yande mohañira rumo imbehi coti caha pāhumi rese yande mondo —ehi.

²⁷ Ñuvirío semana ivitu ore reroguata pare ahe pītu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya.

²⁸ Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco.

²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi.

³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco.

³¹ Pablo rumo aipo ehi sundao rereciar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cōhe ramoso Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe.

³⁴ Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañi chira iyavei que ñepepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu.

³⁶ Evocoyase opacatu ava oyemonguerēhi yuvireco ocaru āgua.

³⁷ Ore retacuer doscientos setenta y seis tupri.

³⁸ Ore caru pare, oporaviqui vahe opa omombo trigo carite vosiita para guasu pipe iposiiēhi āgua yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña.

⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pipe.

⁴¹ Oroguatase rumo, oroyapi ivi cuhi. Aheve carite opāha ité sese. Ndoica-tui eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña.

⁴³ Sundao rereciar rumo ndoipotai Pablo mano āgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.

⁴⁴ “Ambuae evocoyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

28

Caha pāhu Malta ve Pablo secoi

¹ Ore ñepisiropare, ahese ramo oroicua caha pāhu rer Malta revo rahe.

² Ahe pendar ava nihapisi ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyepemi” ehi yuvireco oreu.

³ Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu.

⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraiño ité.

⁶ Ahe pendar opacatu osāro tēi yuvireco, “Irurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rereciar secoi. Ivi namombriimi ichui. Ahe nihapisi ore repia güētave iyavei ihañeco tupri ai ore rese mbosapi ari rupi.

⁸ Aheve ore recoseve Publio yesupa sohí iteanga ou, sepochiuví avei. Evocoyase Pablo oique chupe. Ahese oyeriqui Tūpa upe sese, omondo opo iharive. Ēgüe ehi imbogüera.

⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei.

¹⁰ Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipaneēhi āgua ogüeru yuvireco oreu.

Pablo oyepota Roma ve

¹¹ Co carite mbosapi yasi osāro vahe ari mbahe tēi vahe pituhu āgua. Ipipe oroso. Ahe carite yugüeru Alejandría sui. Ahe ichi rese ñuvirío itūpa rahanga yuvireco: ñepi rer Cástor, ambuae evocoyase Pólux.

¹² Ahese oroso oroyepota yemboyasa Siracusa ve. Aheve oropita mbosapi ari.

¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve.

¹⁴ Aheve orosepia ambuae Jesús reroyasar. Ore mombita güētave yuvireco ñepi semana. Ipare oroso Roma ve ivi rupi.

¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe.

¹⁶ Oroyepotase Roma ve, sundao rerecuar co coti omondo Pablo ñepe sundao upe sãro uca ãgua.

Pablo omombehu Roma ve Tũpa Ñehengagũer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tẽi judío Jerusalén pendar upe, naroĩroi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive.

¹⁸ Ahe mborerecuar oporandu che recocuer rese yuvireco. Oicuase che recocuer, opoi pota tẽi che sui yuvireco viña. Esepia, ndoyosui eté mbahe che rembiapo che yuca ãgua yuvireco.

¹⁹ Evocoi judío rumo ndoipotaiño ité chupe. Ahese ayu pota cohava Cesar upe che yoepi ãgua. Nayamotarẽhi uca potai rumo che mu Jerusalén pendar Cesar upe —ehi—.

²⁰ Che yoepi ãgua oposoho uca. Opomoñeta pota yande remiaro rese. Co Tũpa Rembiporavo ava pĩsiro ãgua resendar reroyasa rese carena pipe ñapichimbri aico —ehi.

²¹ Ahese ahe ava omboyevi yuvireco chupe:

—Ndroipisi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—.

²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuita icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Êgũe ehi imombehu ari momba.

²⁴ Amove osendu vahe viroya yuvireco, ambuae rumo ndoviroyai eté yuvireco.

²⁵ Opihañemoñetasa nomboyoyaise yuvireco, yuvinosepa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoi upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,

ndapesenducuai chira rumo.

Iyavei pesepia tẽira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaẽhisave.

Ndoyemboapisaiño yuvireco.

Iyavei osapivii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espiritu Santo

remimombehu chupe aracahe —ehi—.

²⁸ Sese tapeicua co pipe suive Tũpa omboyecua ucara oporopĩsirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvínose ñehe rese oyecopi-copi yuviraso.

³⁰ Ipare Pablo opita ambuae ava rētave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi.

³¹ Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyehisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropĩsĩrosa resendar mombehu água.

² Tüpa niha yĩpĩsuive omombehu uca co ñehesa ava oñehe mombehusar upe icuachiapri maranehi pipe aracahe.

³ Ahe ñehesa Tüpa Rahĩr Jesucristo resendar. Ahe ava güecosa pipe ité oyesu ou mborerecuar guasu David suindar sui;

⁴ ocuerayevise oespĩritu maranehi pipe, ahese opĩratasa pipe omboyecua tupri ité Tüpa Rahĩr güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtĩvĩisa apóstol che reco água, che cuai avei ava ndahei vahe judío upe Guahĩr recocuer mombehu água opacatu ivi rupi sese yeroya uca água 'ipipe sui tovĩroya che Rahĩr yuvireco' oya.

⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaheerã. Pe niha Tüpa rembiaĩsu peico. Oipota avei pe reco catupri água oyeupe nara. Peipisi catu porovasasa, teco tupriisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yĩpĩndar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa.

⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahĩr resendar ñehesa aviye vahe vichico.

¹⁰ Aporanduño ité semimbotar rupi pe piri che so água rese chupe yepi.

¹¹ Esepia, che aso pota ité Espĩritu suindar mbahecuasa mondo pëu pe pĩtĩvĩi água 'toyemovĩracua tupri catu Cristo rese yuvireco' che yapave.

¹² Che aipota ité yande ñepeipei yañepĩtĩvĩi catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tẽisa pe piri yepi. Cũritei rumo ndaicutuĩño vite ité. Che rumo aipota, "Toime que che poravĩquisa sui Cristo rese oyemovĩracua catu vahe yuvireco ipãhuve" ahe pëu, inungar opacatu ambuae ivi rupi ãgũe ahe ava ndahei vahe judío upe vichico.

¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecuva vahe upe, nimbahecuai vahe upe avei no.

¹⁵ Sese pe Roma ve peico vahe upe avei ayemonguerẽhi voi eté co ñehesa pĩsĩrosa resendar mombehu água.

Ñehesa pĩsĩrosa resendar pĩratasa

¹⁶ Che nachĩ eté co ñehesa pĩsĩrosa resendar aviye vahe sui. Esepia, ahe Tüpa pĩratasa opacatu viroyasar pĩsĩro água, judío rane yĩpĩndar, ipare opacatu ambuae ava-ava tẽi avei.

¹⁷ Supi eté co ñehesa omboyecua Tüpa ava reco mbocatupriisa. Oyese yande yeroyasa pipeño ité ãgũe ehi yandeu. Esepia, icuachiapri aracahendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirẽhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco.

¹⁹ Ahe oicua tupri tẽi mbahe Tũpa suindar yuvireco. Esepia, Tũpa ité niha omboyecua chupe.

²⁰ Ëgũe ehi eté Tũpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tũpa ité secoi iyavei ipĩratasa apirẽhi vahe. Sese ava angaipa viyar ndiyai, “Eñemosañõ tẽi rane oreu” ehi vahe rã yuvireco chupe.

²¹ Esepia, yepe ahe oicua tẽi Tũpa yuvireco viña, nombotei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ãgũe ehi tẽi vahe rese. Ipipe sui mbahe ndosenducua catu iri eté yuvireco.

²² Yepe, “Ore mbahecua vai” ehi tẽi viña, ndoicuai eté rumo mbahe ipipe yuvireco.

²³ Esepia, ahe Tũpa nomanoi vahe seco porañete vahe mboetei rãgũer sui, omboetei ava ocañi tẽi vahe rã rahanga yuvireco iyavei vĩrai, opacatu mbahe mĩmba, mboi tẽi avei omboetei yuvireco.

²⁴ Sese Tũpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiẽhisa pipe yuvireco.

²⁵ Esepia, mbahe supi vahe reroya rãgũer sui temira tẽi viroya catu yuvireco. Iyavei Tũpa ité mboyeroia rãgũer sui omboetei catu mbahe sembiapocuer tẽi yuvireco. Yaposar ité ru timboeteisa catu yepi.

²⁶ Sese Tũpa opoi eté ichui, “Toyapoño poromochisa mbahe tẽi güemimbotarai pipe yuvireco” ehi chupe. Evocoyase cuña avei cuimbahe rese güeco rãgũer sui yuvirecoi oyese ae.

²⁷ Cuimbahe avei cuña rese güeco rãgũer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tũpa supi eté vahe” ndehise seroyaẽhisa pipe yuvireco, Tũpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe.

²⁹ Ahe evocoyase yuvirecoi opacatu mbahe-mbahe tẽi pipe; oyemboaguasa-guasa tẽi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tẽi ava upe. Ahe oñemoiro ambuae ava mbahe pota raisave tẽi, oporapichi, ivava serai, iporombopa serai, ipihañemoñeta ava reco momara ãgua tẽi iyavei imahechiroi ai ipipe yuvireco.

³⁰ Iyavei ambuae ava cupe cotive mara ehi-ehi tẽi vahe, ahe Tũpa amotarẽhisar yuvirecoi, viroiro avei ava, oyemboivate ai, oyeecomboivate ai tẽi avei oñehe pipe yepi, oseca-seca tẽi mbahe naporai vahe güembiaporã, nomboyeroia avei oyesupa yuvireco,

³¹ ndoyapisaca potai eté Tũpa suindar ñehesa rese, nombõaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco.

³² Oicua tẽi Tũpa “oimera evocoi nungar aposar upe cañisa” ehi vahe, oyapo viteño rumo mbahe tẽi yuvireco iyavei ambuae ava oyapose mbahe tẽi, ovihareteño sepiase yuvireco.

2

Tũpa omondo ava upe sembiapogüer rupi tupri ité

¹ Oimese que pe pãhu pendar ‘co oyapo mbahe tẽi; tocañi’ ohesave ambuae upe, ahese ahe ae oyemocañi tẽi uca. Esepia, ahe inungar tupri avei.

² Yaicua rumo Tũpa omocañise evocoi nungar mbahe tẽi aposar recocuer, ahe evocoiyase oyapo mbahe supi tupri vahe.

³ Pe opase ava recocuer pesenoi, pe avei rumo ãgüe peye tupri peico. Pe avei eté evocoiyase ndapeñemi chietera Tũpa ñemoirosa sui.

⁴ ¿Peroiro tie Tũpa oyapo vitesse mbahe aviye vahe oñemosase, seco mbegüe tupri ai vitesse avei pẽu? ‘Tosecuñaro güecocuer yuvireco’ oyapave rumo ãgüe ehi pẽu.

⁵ Pe rumo pepiharãta viteño ité Tũpa upe pe yevi potaẽhi ãgua. Sese pereco catu viteño ité Tũpa ñemoirosa peyese, acoi ari oyepotase Tũpa güeco tupri sa pipe yande renoipara yande mocañi ãgua, anise yande pĩsiro ãgua curi.

⁶ Ahese opara omboepi ñepepei yande rembiapogüer rupi yandeu.

⁷ Omboura tecovesa apirẽhi vahe yandeu yasecase teco ori, Tũpa suindar poromboeteisa iyavei mbahe apirẽhi vahe yande mbahe tupri aposa pipe.

⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tẽi.

⁹ Judío opacatu mbahe-mbahe tẽi aposar ranengatu oiporarara mbahe rasicuer yuvireco, iparera ndahei vahe avei judío.

¹⁰ Tũpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tũpa ndayande mboyoaviratii yande rereco.

¹² ãgüe ehi eté, opacatu oyemboangaipa vahe Moisés porocuaita porẽhi oyemocañi tẽira yuvireco. Acoi oyemboangaipa vahe Moisés porocuaita rereco pipe yuvireco, ahe porocuaita pipe avei opara ocañi tẽi porandusave yuvireco coiye.

¹³ Esepia, osenduño tẽi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi.

¹⁴ Supi eté acoi ndahei vahe judío yuvirecoi vahe yepe ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoiyase inungar porocuaita vireco vahe yuvireco.

¹⁵ Esepia, güembiapo catupri pipe omboyecua porocuaita virecose opiha pipe. Opihañemoñeta pipe avei oyandu porocuaita mboaviyesa. Ahe ipipe avei oyandu mbahe güembiavi, ichui avei oyemonguerẽhi mbahe aviye vahe apose.

¹⁶ Ahe ari cañi pipe Tũpa oyocuai ucara opacatu ava rembiapo cuaẽhisa reprĩ pisi ãgua Jesucristo upe, co ñehesa pĩsirosa resendar amombehu vahecuer rupi tupri ãgüe ehira curi.

Ñehesa judío resendar, Moisés porocuaita resendar avei

¹⁷ Pe rumo, “Judío aico” peye vahe, peyeroya opacatu Moisés porocuaita mboaviyesa pipe pe reco catupri ãgua Tũpa rovaque viña. Iyavei ipipe peyecomboivate ai Tũpa rese peicose.

¹⁸ Peicua semimbotar. Ahe porocuaita pe mbohe avei mbahe aviye catu vahe poravo ãgua.

¹⁹ Pe, “Aicatu ité ndasesapiso vahe nungar ava ndayaracuai vahe mboaracua iyavei ava angaipa viyar pĩtumimbi vahe nungarsave tẽi resape ãgua” peye tẽi.

20 “Aicatu avei ava mbahe ndosenducuai vahe mboaracua iyavei ava chihivahemi nungar mbohe água. Esepia, areco co mborocuita vireco vahe opacatu mbahecuasa iyavei mbahe supi tupri vahe ité” peye tēi avei.

21 Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi água, ¿mahera ru pe ae avei pemonda no?

22 Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui.

23 Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe.

24 Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

25 Supi eté co tecocuer cuacua circuncisión resendar ahe aviyere angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico.

26 Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi.

27 Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi água yuvireco. Esepia, yepe pereco Tūpa porocuita viña, pe rumo ndapemboaviyei eté.

28 Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retecuer rese güeraño tēi avei no.

29 Judío ete ité rumo oipihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3

1 Evocoyase, ¿mbahe vo co aviye judío yande reco água? ¿Yande yembocircuncidasa piha aviyera?

2 Supi eté. Esepia, yipindar Tūpa omondo oñehe judío eta upe imboaviye água.

3 Amove yepe ipāhu pendar nomboaviyeise ocuita viña, ¿Tūpa avei tie ēgüe ehira?

4 ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi:

“Supi tupri vahe Tūpa’ ehira nde ñehe rese yuvireco.

Sese ereiquesse ava porandusave, eresē tupriñora eso ichui” ehi.

5 Yande reco rai pipe tēi yamboyecuase Tūpa reco tupriisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.)

6 ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri água chupe viña.

7 Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoyase angaipa viyar nungar yande rerecora viña?” ehi.

8 “Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Ñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñehe rai opihavĩracuá iteangasa pipe yuvireco.

¹⁵ Ndayipitii oporapichi ãgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri ãgua yuvireco.

¹⁸ Ndipihañemoñetai eté Tūpa sui osiquiye ãgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi ãgua yuvireco’ ohesave aipo ehi.

²⁰ Esepia, ndipoi chietera que ñepei seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande pĩsirora

²¹⁻²² Cũritei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita aracahendar pipe, iñehe mombehusareta rembicuachiagüer pipe avei.

²³ Supi eté yande opacatu yayapo angaipa, ndayasupitii eté Tūpa reco porañetesa.

²⁴ Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe.

²⁵⁻²⁶ Tūpa rumo ombou Guahir Cristo oipiyere vaherã vuvu yande angaipa rese ñero ãgua. Sese yande yeroya pipe oime ñeroisa yandeu. Ipipe omboyecua güeco ivi tupriisa. Yipisuive rumo güeco asiẽhisa pipe oñemosañõ aracahendar ava angaipa upe; cũritei rumo omboyecua ité güeco ivisa yandeu, seco iviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai ãgua sovaque! Esepia, ndahei porocuita mboaviye rese egüe ehi, ahe rumo Cristo rese yande yeroya pipe egüe ehi yandeu.

²⁸ Sese yaicua Tūpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuita mboaviyesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño!

³⁰ ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no!

³¹ Ndahei rumo, “Ëgüe ehi tēi vahe” yahe evocoi mborocuaíta upe Jesucristo reroyasa pipe. Ipipe rumo yamboyecua evocoi mborocuaíta ãgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pñha yande ramoi Abraham recocuer aracahe?

² Acoi mbahe güembiapo pipe sui tēi oipisise güeco tupri ãgua Tūpa sui, oyemboivate aira oico ipipe viña. Ndiyai eté rumo ãgüe ehi Tūpa rovaque.

³ Esepia, icuachiapri aracahendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi.

⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi.

⁵ Yande rumo, yayeroyase Tūpa rese, Tūpa evocoyase yande pisira, ‘co seco catupri vahe’ ohesave. Esepia, ahe ãgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña.

⁶ David mborerecuar aracahendar avei oñehe ava rorivetesese rese Tūpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi.

⁷ Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese.

¹⁰ ¿Marase pñha oipisi oyeupe nara sereco? ¿Oyembocircuncida renondeve pñha, anise ipare tie? Yipive ité.

¹¹ “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. Ëgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ëgüe ehi Tūpa, “Co seco catupri vahe yuvirecoi” ehi avei ahe ava upe.

¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

Tūpa remimobehu imboaviesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuaíta mboyeroya pipe ãgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave.

¹⁴ Supi etese co mborocuaíta mboyeroyasar güeraño oipisise co mbahe oime vahe rā chupe viña, evocoyase yande yeroyasa Tūpa rese ãgüe ehi tēi etera, Tūpa remimobehugüer evocoyase ãgüe ehi tēi vahe aveira viña no.

¹⁵ Esepia, co mborocuaíta mboavieñhisa pipe ñemoirosa oime ava upe. Ndipoise rumo mborocuaíta, ndipoi chietera ahe porocuaíta mboyeroyañhisa.

¹⁶ Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuaita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secoi.

¹⁷ Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya água viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité.

¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi água yuvireco viña.

²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté.

²¹ “Supi eté Tūpa vireco opĩratasa opacatu oñehengagüer mboaviye água” ehiño ité opiha pipe.

²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño.

²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús.

²⁵ Esepia, ahe imondopri secoi yande angaipa repirã. Ipare Tūpa ombogüerayevi yande pisi água seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe.

² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco água imborerecuasave.

³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemoso água,

⁴ iyavei yañemosañose, yasẽ tuprira yande recoãhasa sui, ahese yaicua yaipisi vaheerã mbahe aviye vahe Tūpa suindar yepi.

⁵ Iyavei ahe yande remiaro nayamoha tẽi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro água yande recocuerai sui, Cristo rumo osupitise ari chupe, omano opacatu yande angaipa rese.

⁷ Aviyeteramo oimera que ñepeí ava omano vaheerã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vaheerã chupe.

⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano água yande angaipa repirã.

⁹ Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu.

¹⁰ Esepia, yamotarẽhimbar yaico vitese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pĩsiro.

11 Ndahei co reseño ãgüe yahera, yavïha catu aveira Tũpa rese, yande Yar Jesucristo rese avei. Ichui niha ndipo iri mbahe Tũpa rovaque yande rese.

Adán iyavei Cristo resendar ñehesa

12 Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco.

13 Ndipo viteise Moisés porocuita, oime voi eté angaipa co ivi pipe. Yepe tie ndicuasa vitei angaipa porocuita ndipoise viña,

14 Adán reco sui tupri ité rumo ava omanoño ité oangaipa pipe yuvireco. ãgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeẽhisa resendar rese viña. Ahe Adán rese omboyecua mbia ou vaheã.

15 Tũpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tũpa ombou oporerecosa poropĩsĩrosa yandeu. Ahe rumo aviye catu vahe ava eta upe nara.

16 Ahe ñepeï ava angaipa rumo ndoyoyai eté Tũpa poropĩsĩrosa ombou vahe rese yandeu. Esepia, ñepeï ava angaipa sui ou Tũpa ñemoĩrosa; oporerecosa rumo Tũpa ombouño ité ava eta mbahe oyavi ati vahe upe nara yangaipa mocañi ãgua.

17 Supi eté ñepeï ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tũpa porovasasa tuvichá vahe ité iyavei iporerecosa, “Peyavi mbahe” iheẽhisa resendar. Sese yareco ité tecovesa apĩrẽhi vahe yandeyeupe nara ñepeï ava sui, ahe Jesucristo.

18 Evocoyase inungar Adán rembiapo ai güeru Tũpa ñemoĩrosa opacatu ava upe, Jesucristo rembiapo aviye vahe avei güeru opacatu ava upe Tũpa ñemoĩrosa pisiẽhi ãgua ‘tovireco tecovesa apĩrẽhi yuvireco’ oya.

19 Esepia, ñepeï ava Tũpa reroyaẽhisa sui setá oime ava angaipa viyar; ãgüe ehi aveira ñepeï ava mboyeroyasa sui setá aveira ava vireco güeco catupriisa Tũpa rese yuvireco.

20 Supi eté porocuita ouse aracahe, ahese angaipa yaposa catu ité. Yepe ãgüe ehi viña, Tũpa porovasasa rumo ivate catu ité ichui.

21 Evocoyase inungar angaipa ipĩrata yandeu yande mano ãgua viña, ãgüe ehi avei rumo Tũpa oporovasasa ipĩrata vahe pipe yande pisi seco catupri vahe nungar yande rereco ‘toipisi tecovesa apĩrẽhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

1 Evocoyase, ¿iya iri pĩha yayapo vite angaipa yaico Tũpa yandeu oporovasasa mboyecua catu ãgua?

2 ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico.

3 ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese?

4 Yande ñeapiramose, aviye acoi ñotimbri yaico Cristo rupive yande mbogüerayevi iri ãgua iyavei yande recocuer mopiasu ãgua avei, inungar acoi Cristo ocuerayevi Vu reco pĩratasa pipe.

5 Yande omano vahe nungar yaicose supive, ãgüe yahe aveira yande yacuerayevi supi.

⁶ Yaicua avei niha yipindar yande recocueraí yaticapri nungar curusu rese Cristo rupive, “Che recocueraí tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua.

⁷ Esepia, acoi omano vahe ndoyapo iri angaipa yuvireco.

⁸ Yande avei niha omano vahe nungar Cristo rese yaico. Evocoyase yayeroya avei yaicove vaheṛā sese.

⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe.

¹⁰ Supi eté omanose Cristo, omano ñepei reseve opacatu angaipa mocañi āgua; cūrítei rumo oicove Tūpa upe nara.

¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavrive pe cuai āgua pe remimbotarai mboyeroyasa pipe.

¹³ Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua.

¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera!

¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira.

¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe.

¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico.

¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipindar pe retecuer pereco mbahe tēi pipe mbahe naporai vahe apo āgua. Ēgüe peye rumo pe cūrítei pe reco mohivi āgua peico mbahe tupri pipe ñepei reseve Tūpa upe pe reco āgua.

²⁰ Pe peico vitesese mbiguai tēi nungar pe angaipa pipe, ahese ndapeyapo vitei mbahe supi tupri vahe;

²¹ cūrítei rumo pechĩ tēi ichui, ahe niha ndape pītivii eté pe recocuer rese, iyavei pe reraso pota manosa apirēhi vahesave yepi.

²² Cūrítei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipipe sui peicora apirēhi vaheṛā.

²³ Angaipa niha ombou manosa tēi yandeu, Tūpa rumo oporereresa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitesese co ivi pipe.

² Esepia, inungar cuña omenda vahe, imer oicove v̄itese, iporocuitav̄rive v̄iteño ité secoi yepi. Omanose rumo imer ichui, ahe cuña ndahe iri omer porocuitav̄rive secoi.

³ Acoi cuña omer recove v̄iteseve, v̄irecose ambuae cuimbahe, oyemboaguasa t̄ei evocoyase; acoi omanose rumo imer ichui, ndaseco iri ipov̄rive. Ahe iyacatu ité omenda yupagüe iri; ahese ndahei yaguasa t̄ei cute.

⁴ Che riv̄ireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuitav̄rive peico Cristo rese peico āgua. Ahe niha acoi ocuerayevi vahe. Sese yande recocuer ěgüe ndehi t̄ei vahe Tūpa upe.

⁵ Esepia, yande yaicove v̄itese yande reco ai pipe, ahe porocuita renduse, yaipota catu mbahe t̄ei pipe yande reco āgua. Ipare rumo ahe manosave t̄ei yande reraso ucara viña.

⁶ Cūritei rumo yande omano vahe nungar yaico acoi porocuita pipe yaico vahecuer sui. ěgüe yahe, yasē ichui Tūpa upe mbahe apo āgua Esp̄iritu sui yande reco pīasu pipe. Ndahe iri mborocuita icuachiap̄ri yip̄indar vahe pipe yaico.

Angaipa oime vahe yande rese

⁷ ¿“Tūpa porocuita angaipa” yahera p̄iha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chiaveira che mbahe pota raisa viña.

⁸ Aicuase mborocuita, ahese angaipa ip̄irata catu cheu. Ahe mborocuita apo potaēhisa pipe che querēhi catu opacatu che remimbotarai t̄ei apo āgua. Esepia, mborocuita porēhi angaipa av̄iye ndipoi vahe viña.

⁹ Yip̄indar Tūpa porocuita ndaicua v̄itese, ndoyav̄i av̄iye vahe ité che reco areco viña. Porocuita aicuase rumo, aipota rai angaipa apo āgua.

¹⁰ Che evocoyase acañi t̄ei vaherā aico ipipe viña. Ahe porocuita che recove ap̄irēhi āgua mbou rāgüer sui, che mondo ucaño itera manosa ap̄irēhi vahe pipe t̄ei viña.

¹¹ Esepia, angaipa ahe porocuita pipe che mbopa ité. Ahe ipipe avei che mocañi t̄eira viña.

¹² Evocoyase co porocuita ndaseco marai vahe ité, supi tup̄ri vahe ité, av̄iye vahe avei.

¹³ ¿Co porocuita av̄iye vahe p̄iha che rereco che mano āgua t̄ei? ¡Aní eté! Angaipa t̄ei rumo ěgüe ehi che rereco. Evocoyase co porocuita cuasa sui oipota catu uca mbahe t̄ei apo āgua cheu. Ipipe aicua angaipa oime vahe che rese. ěgüe ehi avei ahe porocuita omboyecua tup̄ri ité angaipa mbahe t̄ei vahe yandeu.

¹⁴ Yaicua niha porocuita Tūpa suindar, che t̄ei rumo imondop̄ri aico angaipa mboyeroya āgua.

¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo.

¹⁶ Che rumo ayapose mbahe ndayapo potai vahe, ahese aicua co porocuita av̄iye vahe.

¹⁷ Evocoyase ndahei cheyesui eté ěgüe ahe, angaipa t̄ei rumo ěgüe ehi che mbohe uca.

¹⁸⁻¹⁹ Esepia, che aicua ndipoi eté mbahe av̄iye vahe che reco ai rese; sese yepe che ayapo pota ité mbahe av̄iye vahe viña, ndaicutui eté rumo yapo. Iyavei yepe ndayapo potai mbahe t̄ei viña, che rumo ayapoño ité.

²⁰ Sese ayapo v̄iteño itese mbahe ndayapo potai vahe, ndahei rumo che ité ayapo, che p̄iha pipe angaipa oime vahe, ahe t̄ei rumo oyapo uca cheu.

21 Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi.

22 Che piha pipe rumo Tūpa porocuita aipotá iteanga tēi,

23 che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

24 “¡Che paraísu ité!, ndaicatu iri eté, ¿uma piha co mbahe tēi sui che renosera viña?” ahe cheyeupe vichico.

25 Tūpaño ité oicatu Guahir Jesucristo rese. “Aviye” yande Ru Tūpa upe. Ëgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povri.

8

Yaico vaherã Tūpa Espiritu rese

1 Cūritei rumo ndipo iri Tūpa ñemoirosa yandeu Jesucristo rese yaicose.

2 Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei.

3 Esepia, yande remimbotarai rese ndayaicatu Moisés porocuita mboyeroa āgua, ahe avei evocoyase ndoicatu eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirã’ oya. Ëgüe ehi imocañi opacatu yande angaipa yande sui, yande remimbotarai avei.

4 Ahe Ëgüe ehi yande yamboaviye vaherã mborocuita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

5 Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco.

6 Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco.

7 Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatu Tūpa porocuita mboyeroa āgua yuvireco.

8 Ëgüe ehi eté, acoi yuvirecoi vahe güemimbotarai pipe, ndoicatu eté Tūpa remimbotar apo āgua yuvireco.

9 Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar.

10 Cristo secoise rumo pe rese, yepe pe rete ocañi tēi vaherã angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

11 Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

12 Ëgüe ehi che rivireta, yareco yande cuaita, ndahei rumo yande remimbotarai pipe yande reco āgua.

13 Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaherã.

14 Esepia, opacatu Tūpa Espiritu ombohe vahe, Tūpa rahir ité yuvirecoi.

¹⁵ Supi eté pe Espíritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe.

¹⁶ Co Espíritu avei oicua uca yande espíritu upe Tūpa rahir yande recose.

¹⁷ Evocoyase yaipisi aveira mbahe yande Ru Tūpa ombou vaheerā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaheerā teco porañetesa ipiri curi.

Teco porañetesa ou vaheerā curi

¹⁸ Cūritei rumo yande paraिसusa ndoyoyai eté teco porañetesa yande rese ou vaheerā rese.

¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese.

²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa reprī ava upe. Mbahe sembiapocuer rumo osāroño ité

²¹ güeco opa tēi vaheerā sui ñepisiro āgua teco porañete vahe Tūpa rahir vireco vahe rupiti āgua curi.

²² Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembi rasi vahe nungar.

²³ Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espíritu, ahe yipindar vahe yaipisi vaheerā ichui curi. Yayemombaraisu, yasāro vite yande querēhisa pipe Tūpa guahir ité yande rereco āgua, yande retecuer recuñaro āgua avei.

²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia.

²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espíritu yande pītivii ndayaicatu irise. Esepia, ndayaicuai eté mara yahera yayeroqui, co Espíritu Santo rumo oporandu ité Tūpa upe yande rese oyemopoasesa pipe.

²⁷ Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyeupe. Esepia, Espíritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave.

²⁹ Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya.

³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

³² Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pītivii āgua Tahir rese yande recose.

³³⁻³⁴ Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande

angaipa yande sui Cristo omanose sepĩrã, iyavei ocuerayevise. Cũritei Cristo Vu acato coti, “Co cheundar ité yuvĩrecoi” ehi yande rese oyerure yepi.

³⁵ ¿Mbahe pĩha yande mboyepepĩra Cristo yande raisusa sui viña? ¿Que yande paraĩsusa, mbahe yavai vahe yandeu, yande momara-mara tẽisa, que tieporẽhi, anise que yande turucuarã ndipoise, que mbahe tẽise yandeu, yande yuca potase tie yuvĩreco?

³⁶ Inungar icuachiapri aracahendar pipe aipo ehi: “Oyemoingatu voi ari rupi yande yuca ãgua yuvĩreco ndeundar yaicose, ovesa yucapĩrã nungar tẽi yande rereco yuvĩreco” ehi aracahe.

³⁷ Opacatu rumo co mbahe oimese yandeu, yasecopĩpa ité ahe yande raisusar recocuer pipe sui.

³⁸ Sese che aroya ité Tũpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepepĩ chiaveira ichui que Tũpa rembiguai, que seco ivate vahe, seco pĩrata vahe ndayasepiai vahe, que cũritei mbahe oime vahe yandeu, anise que mbahe oime vahe rã curi.

³⁹ ¡Ndayande mboyepepĩ chiaveira que iva pendar mbahe, anise que mbahe ivi pipendar, que ambuae mbahe Tũpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tũpa oiporavo Israel oyeupe nara aracahe

¹ Che Cristo reroyasar che reco pipe supi eté añehe, ndopombopai. Tũpa Espĩritu oicua ité che pihañemoñetasa supi vahe.

² Ndavĩhai eté che piha pipe; oime mbahe tasi vahe cheu yepi.

³ Che aipota tẽi opacatu che mu judío ñepĩsiro ãgua yuvĩreco viña. “Tacañi tẽi Cristo porẽhi icañi tẽiẽhi ãgua yuvĩreco” ahera viña.

⁴ Ahe niha Israel suindar yuvĩrecoi, aracahe Tũpa oiporavo vahe guahĩrguã. Ahe ipãhuve avei secoi güendĩgüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rõtave yuvĩreco’ oya, iyavei, “Amboavĩye itera che ñehe pe rese” ehi yuvĩreco chupe.

⁵ Ahe avei niha yande ramoi yipĩndar vahe suindar yuvĩrecoi, Tũpa Rembioporavo Poropĩsirosar avei ahe ichuindar oyesu vahe. Ahe Poropĩsirosar niha Tũpa ité, ivate catu vahe secoi opacatu sui. Sese, ¡timboeteisa catu yepi! ¡Egũe tehi apirẽhi!

⁶ “Tũpa nomboavĩyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe.

⁷ Iyavei ndahei opacatu Abraham suindar tahĩr supi tupri vahe yuvĩreco. Esepia, Tũpa aipo ehi: “Nde rahĩr Isaac sui rumo oimera nde suindar sovasapri” ehi chupe.

⁸ Co rumo osenducua uca yandeu ndahei Abraham suindar yuvĩnose vaheño ité Tũpa rahĩr yuvĩrecoi, Tũpa remimombehu rupi yuvĩroha vahe güeraño rumo ichuindar ité yuvĩrecoi.

⁹ Esepia, Tũpa Abraham upe aipo ehi aracahe: “Co ari rupi avei ayevĩra curi, ahese oimera Sara membrĩ ndeu” ehi.

¹⁰ Ndahei rumo co reseño, tahĩr Isaac rese avei. Esepia, ocuacuase sem-bireco Rebeca imembĩ cõi, ahe icõi vahe yesupa rumo ñepeño ité.

¹¹⁻¹³ Ahe ndoyuvĩroha vitesse, ndoyapo vitesse mbahe que avĩye vahe, que naporai vahe yuvĩreco, Tũpa aipo ehi ichĩ Rebeca upe: “Yipĩndar oha vahe

nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tupri vahe” yahera? ¡Aní eté!

¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi.

¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu.

¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi.

¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vahe Tūpa remimbotar upe” ehira.

²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua oaposar upe.

²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

²² Tūpa rumo oñemosa pare iya ité oñemoirora, opīratasa mboyecua āgua ocañi tēi vahe Tūpa upe.

²³ Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique āgua.

²⁴ Yande avei yande renoi oyeupe, que judío, anise que ndahei vahe judío yande recose.

²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,
‘Cheundar ité’ ahera, iyavei acoi ava ndahei vahe saisupri yuvirecoi, chupe,
‘Che rembiaisu ité’ ahera” ehi.

²⁶ “ ‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiora yuvireco.

²⁸ Esepia, yande Yar omboaviye voira oñehe ava viroyasarēhi mocañi āgua co ivi pipe” ehi.

²⁹ Oyoya avei ambuae Isaías remimombegüer yipindar vahe rese:

“Yande Yar seco pīrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pīsiora resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque.

³¹ Judío yuvirecoi vahe rumo oipota tēi güeco tupri āgua ité Tūpa porocuita mboyeroya pipe viña, ndoicatu eté rumo supiti yuvireco.

³² Esepia niha, ndahei oyeroyasa pipe ité oseca oñepisiro ãgua, ahe rumo co mborocuita mboyeroyasa sui tẽi Tũpa rese yuvirecoi pota viña. Ahe evocoyase ndoyavĩ oyepiapi vahe “ita yepiapisã” rese yuvireco.

³³ Aipo ehi tupri icuachiapri aracahendar pipe:

“Che amondo Siõn ve ñepei ita yepiapisã, ahe oporoeti vahe.

Acoi sese oyeroyã vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tũpa upe che mu judío recocuer rese ‘toñepisiro yuvireco’ che yapave.

² Supi eté iquerẽhi ité Tũpa upe mboraviqui apo ãgua yuvireco viña. Oquerẽhisa sui rumo oyavi senducuaẽhisa pipe yuvireco.

³ Esepia, ndoicua potai mara ehi Tũpa ava pisi oyeupe. Sese oyesui tẽi oseca güecocuer tuprisa pipe ‘tomoingatu Tũpa opiha yande pisi ãgua’ ohesave yuvireco viña. Ipipe sui nomboyeroyai eté Tũpa remimbotar güeco mbocatupri ãgua ité yuvireco.

⁴ Esepia, Cristo recocuer pipe imboaviyesa tupri Moisés porocuita, “Peyavi mbahe che ñemoirosa pisi ãgua” ehiẽhi ãgua Tũpa oyese oyeroya vahe upe.

⁵ Co yande reco catupri ãgua porocuita pipe sui, Moisés aipo ehi icuachia: “Acoi ava omboaviye tupri vahe opacatu co mborocuita, ipipe sui yuvirecovera” ehi.

⁶ Tũpa, “Peyavi mbahe che ñemoirosa pisi ãgua” heẽhi ãgua rumo yande yeroyasa pipe, “Ava vo oyeupira ivave Tũpa Rembiporavo reroyi ãgua” ndapeyei chira.

⁷ Iyavei, “Ava vo ogüeyira omano vahe pãhuve Tũpa Rembiporavo mboyeupi uca ãgua” ndapeyei chiaveira.

⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera.

⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipisiropri peicora.

¹⁰ Esepia, yande piha pipe yayeroya Jesús rese. Ahese Tũpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiropri yaicora.

¹¹ Esepia, icuachiapri aracahendar pipe Tũpa aipo ehi: “Acoi sese oyeroyã vahe rumo, nomochi ucai chietera oyesui” ehi.

¹² Sese oyoya tupri judío ndahei vahe judío recocuer rese. Esepia, ñepeiño ité niha Yar opacatu ava upe nomopanei vahe oporovasasa tuvichã vahe oyeupe oporandusar upe.

¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipisiropri yuvirecoira” ehi.

¹⁴ Ava rumo ndoporandui chira pisirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe.

¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe pisirosa resendar!” ehi.

16 Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo ehi avei aracahe: “Che Yar, ¿uma pĩha viroya ore ñehe yuvireco?” ehi.

17 Sese yayeroya Jesucristo rese co ñehesa pĩsirosa rendusa pipe.

18 ¿Osendu pĩha judío co ñehesa yuvireco? ¡Osendu ité! Esepia, aipo ehi avei acoi icuachiapri aracahendar pipe:

“Sendusa niha opacatú ivi rupi iñehe” ehi.

19 Iyavei, ¿osenducua pĩha yuvireco? ¡Osenducuaño ité! Esepia, yipindar Moisés omombehu icuachiapri pipe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

20 Ipare omombehu tupri ité Isaías osiquiyeēhisave Tūpa ñehe aipo ehi vahe: “Acoi ava ndache recaí vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

21 Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

11

Moviro tēi ava Israel pendar Tūpa oiporavo oyeupe nara

1 Evocoyase, ¿omombo pĩha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico.

2 Yipisuive ité niha Tūpa, “Co ava cheundar ité” ehi ore ramoí israelita upe. Sese cūritei ndore momboí eté oyesui. Peicua niha acoi Elías resendar icuachiapri aracahendar oyerogui tēise omu israelita rese aipo ehise Tūpa upe:

3 “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi.

4 Tūpa rumo omboyeví chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi.

5 Ēgüe ehi avei cūritei opita viteño moviro judío, ahe niha Tūpa oiporavo oporoaisusa pipe.

6 Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

7 Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua.

8 Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūritei ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi.

9 Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraísu uca avei ipipe yuvireco.

10 Toicua eme mbahe inungar ndasesapisoi vahe yuvireco.

Icuhapapri nungar ayase toyuvirecoi apirēhi vaherā” ehi.

Ndahei vahe judío ñepisiro agüer

¹¹ Evocoyase areco iri che porandusa pëu: ¿Apirëhi vaherã ité pïha judío eta ndoyeroyai Jesucristo rese oñepisiro ãgua yuvireco? ¡Aní eté! Ahe rumo ëgüe ehi ava ndahei vahe judío pïsirosa pïsi ãgua yuvireco. Ipipe sui oyemonguerëhi catura judío ipïsi ãgua yuvireco curi.

¹² Evocoyase judío eta rembiavï sui tuvichá Tũpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tũpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pëu pe ndahei vahe judío. Tũpa niha che cui oñehe mombehu ãgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi.

¹⁴ Sendusa sui aviyeteramo oimera ipãhuve oyemonguerëhi vahe pïsirosa Tũpa suindar pïsi ãgua oyeupe nara yuvireco.

¹⁵ Esepia, judío mombosa pïpe sui Tũpa omoime ñerosa opacatu ava co ivi pïpendar upe. ¿Mara ehira pïha evocoyase Tũpa ipïsi? Ahese oipisira tecovesa apirëhi vahe yuvireco, evocoyase ndoyuvireco iri chira omano vahe nungar Tũpa upe.

¹⁶ Esepia, yipïndar panguã sui yapopri seropovëhese Tũpa upe, opacatu panvi evocoyase sovasapri avei ichui. Iyavei inungar ivira rapo seropovëhese Tũpa upe viña, sãca avei evocoyase opacatu ëgüe ehi aveira viña.

¹⁷ Amove che mu judío inungar Olivo rãca yasiapri. Pe evocoyase ndahei vahe judío ivira caha pïpendar rãca nungar peico vahe, peso yasiapri rendagüerve, ipipe sui peipïsi víracuasa pe recove ãgua.

¹⁸ Aní chira rumo, “Yande aviye catu vahe yaico ivira rãca nungar yipïndar yuvirecoi vahe sui” peye pe yeecomboivate aisa pïpe. Esepia, ndahei pe sui judío oipïsi oyemoviracua ãgua yuvireco, pe rumo yipïndar ichui eté peipïsi pe yemoviracua ãgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vaherã” peye revo.

²⁰ Supi eté, co rumo Tũpa reroyaëhi pïpe ahe imombosa ichui yuvireco, pe rumo seroya pïpe suiño ité pepita sendagüerve. Sese peicua catu, aní chira peyemboivate ai ipipe.

²¹ Esepia, Tũpa oiporavo co judío oyeupe nara ité viña, ndovïroyaise rumo, ndoipisii eté. Pëu avei ëgüe ehira ndapemboyeroyaise.

²² Peyapisaca tupri, Tũpa niha aviye vahe ité. Seco pïrata vahe avei rumo ava viroyaëhisar upe. Pëu rumo aviye ité. Peicoño catu iporoaisusa pïpe; aviyeteramo ndapeicoise supi, pe avei yasiapri nungar tēi peicora.

²³ Opoipase rumo judío eta Cristo reroyaëhisa sui, Tũpa evocoyase viroyevi irira oyeupe nara. Esepia, chupe iya ité ipïsi iri ãgua.

²⁴ Pe ndahei vahe judío ivira caha pïpendar rãca yasiapri nungar peico, Tũpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rãca yasiapri, ahe ivate catu oipïsi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tũpa remimbotar icuapirëhi oyemboivate aiëhi ãgua yuvireco” ahe pëu. Esepia, amove Tũpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pëu,

²⁶ ahese ramo opacatu ava judío yuvirecoi vahe Tũpa oipïsirora. Esepia, icuachiapri arachendar pïpe aipo ehi:

“Oura ava P̄s̄irosar judío recua Sión p̄ahu sui, ahe oipehara mbahe naporai vahe opacatu judío sui.

27 Evocoi niha che remimbotar chupe nara, amocañise yangaipagüer yuvireco ichui” ehi.

28 Ēgüe ehi cūritei judío eta ndosendu potai ñehesa p̄s̄irosa resendar yuvireco. Sese Tūpa amotarēhisar yuvirecoi. P̄eu mbahe tupri āgua rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe.

29 Supi eté, Tūpa ndoviroyevi iri eté mbahe güemimondo iyavei ndovirovavova tēi vahe opihañemoñetasa güembiporavo sui.

30 Yipindar niha pe ndapemboyeroyai eté Tūpa. Cūritei rumo judío eta ndoviroyaise yuvireco, pe paraisuereco Tūpa.

31 Ēgüe ehi avei judío eta cūritei ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco.

32 Esepia, Tūpa ité, “Opacatú oyavi mbahe che reroyaēhisa pipe” ehi ‘oicuae mbahe güembiavi, tiquerēhi opacatú che poroparaisuerecosa pisi āgua yuvireco’ oya.

33 ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicutui avei secocuer cuapa tupri āgua.

34 Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no.

35 Ndipoi que ava mbahe omondo vahe yande Yar upe ‘tomboyevi cheu’ ohesave.

36 Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

1 Sese che rivireta, che Tūpa poroparaisuerecosa pipe aipota pe yemondo ité pe recoveseve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe p̄iha pipe sui eté peyapo vahe rā chupe.

2 Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

3 Tūpa niha oporovasasa pipe che cuai, sese aipo ahe p̄eu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa p̄eu mbahe imbougüer rupi sese pe yeroyasa pipe.

4 Inungar yande rete ñepeño ité, sesendar rumo setá, iyavei ndahoyoyai mbahe sembiapo.

5 Ēgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepepei opacatu upendar yaico.

6 Tūpa niha omboyeavirati mbahecuasa imbou oporoaisusa pipe ñepepei-pei upe. Evocoyase Tūpa ombouse oñehe mombehu āgua yandeu, yamombehura ñepepei iñehe sese yande yeroyagüer rupi.

⁷ Que ombouse mbahecuasa ambuae ava p̄itivii āgua yandeu, yaip̄itivii tupri aveira. Ombouse yande porombohe āgua, yaporombohe tupriño itera.

⁸ Iyavei ombouse yandeu ambuae ava monguerēhi āgua, yapomonguerēhiño itera. Ombouse yande porop̄itivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe p̄itivisar, toip̄itiviiño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe.

¹⁰ Peyeaisu catu ñepepei-pepei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhii chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva péndar rārosa pipe; peñemosañ mbahe rasícuer peiporarase iyavei aní chira peseya pe yeruresa yepi.

¹³ Peip̄itivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyembov̄iha acoi ava oyembov̄iha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepepei-pepei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní p̄eu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave.

¹⁸ Peicatu vahe rupi peseca pe reco tupri āgua opacatu ava upe.

¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyañ Tūpa upe. Ahe oicudara chupe. Esepia, icuachiapri pipe aipo ehi: “Che ité aicudara ava mbahe tēi aposar upe. Che amboepira” ehi yande Yar.

²⁰ Iyavei aipo ehi: “Acoi nde amotarēhimbar ndasiēpoise, emondo mbahe itohu, iyavei acoi ihuseise, eremondora itohu. Esepia, ēgüe peyese pe amotarēhimbar upe, ochira pe sui” ehi.

²¹ Aní mbahe tēi upe peyecopi uca. Iyacatu rumo pesecopira mbahe mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité.

² Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambr̄i yuvirecoira.

³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu.

⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande

nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco.

⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande pīhañemoñetasa momaraēhi āgua rese avei.

⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepeí-peí ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acói ava osaisu vahe ambuae ava, omboaviye ité Tūpa porocuaita.

⁹ Aipo ehi acói Tūpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi.

¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyasa tupri ité porocuaita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yeví āgua cōimi catu yandeu iñehengagüer yipindar seroyasa sui.

¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoyase tayaico sundao oyoepisa omonde vahe nungar.

¹³ Yande catu yaguata yande reco ívi tupri sa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pīhañemoñeta ndahoyoyai vahe pipe, ambuae ava mbahe pota raisa pipe avei no.

¹⁴ Iya rumo yarecora yande Yar Jesucristo recocuer yande yese, aní yande pīhañemoñeta mbahe-mbahe tēi apo āgua yande remimbotarai pipe.

14

Aní peroïro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tupri; aní peiñehepoepira ipīhañemoñetasa ndahoyoyaise pe pīhañemoñeta rese.

² Esepia, amove evocoi nungar ava ihupri pāve tēi yuvirohu, oime rumo amove ava ipīhañemoñeta opacatu mbahe hu āgua rese.

³ Acoi ava opacatu mbahe ohu vahe, toviroïro eme amove ndohui vahe mbahe iyavei acói amove ndohui vahe mbahe, toviroïro eme acói ohu vahe opacatu mbahe. Esepia, evocoi nungar ava Tūpa oipisi ité.

⁴ Supi eté pe ndiyai eté peroïro vaherā ambuae ava rembiguai. Esepia, ahe yande Yar povri pendar secoi. Yepe ndoyavise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opīratasa pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasño ité niha ari” ehi vahe. Ñepeí-peí opīhañemoñeta rupi, “Co supi tupri vahe” ehira opiha pipe yuvireco.

⁶ Acoi que ñepeí ari ava omboetei vahe, yande Yar mboeteisa pipe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi.

Esepia, ahe güembiapo rese, “Aviye ndeu” ehi Tüpa upe; iyavei acoi amove ndohui vahe mbahe, Yar mboeteisave ěgüe ehi, iyavei, “Aviye ndeu” ehi avei Tüpa upe.

⁷ Esepia, yande ñepei-pei ndayaicoi yandeyeupe nara tēi, ndayamanoi avei yandeyeupe nara.

⁸ Esepia, yaicove vĭtese, yaico yande Yar upe nara; yamanose, yamano yande Yar upe nara avei. ěgüe yahe yande yaicove vĭtese, anise yamanose, opacatu chupe nara ité yaico.

⁹ Sese niha Cristo omano, ipare ocuerayevĭ opacatu ava Yar güeco āgua que omano vahe, anise que oicove vĭte vahe upe avei.

¹⁰ ¿Mahera evocoyase peroĩro pe mboetasa Cristo reroyasar iyavei mahera ndapese pia potai? Esepia, supĭ eté niha yande opacatú yasora Tüpa rovai. Ahe evocoyase opara oporandu yande recocuer rese yandeu.

¹¹ Esepia, icuachiapri aracadendar pĭpe omombehu:

“Supĭ eté che reco pĭpe aipo ahe, ehi yande Yar, opacatu ava oñenopĭhara che rovai yuvĭreco, iyavei che mboeteira yuvĭreco, ehi” ehi.

¹² Evocoyase yande ñepei-pei yamombehura yande recocuer Tüpa upe.

Anĭ pe rĭvĭreta mbahe tēi pĭpe pereco uca

¹³ Sese yande ndiyai yañeroĩro. Iyacatu rumo ñepei reseve pereco tupri ambuae pe rĭvri, angaipa pĭpe sereco ucaēhi āgua, iyeroyasa momaraēhi āgua avei.

¹⁴ Che yande Yar reroyasar che reco pĭpe aicua ndipoi eté que tembĭhu yande reco momara vahe. Amove rumo ava, “Mbahe tēi co tembĭhu, ndiyai yahu” ehise, ahe chupe evocoyase mbahe tēi, ndiyai eté ihu āgua.

¹⁵ Iyavei yande que mbahe yahuse, ipipe yamomara tēise yande rĭvri pĭhañemoñetasa Tüpa rese, ndahei evocoyase yande poroaisusa pĭpe ité ěgüe yahe. ¡Anĭ ahe yamocañi tēi uca Cristo sui evocoi nungar mbahe yahu vahesa pĭpe! Esepia, secocuer rese Cristo omano.

¹⁶ Yepe que mbahe avĭyera yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua.

¹⁷ Esepia, ndahei ĭvate catu vahe Tüpa upe yande carusa, yande ĭgua avei ipovrĭve yande recose. ěgüe ehi rumo co ĭvate catu vahe chupe yande recocuer mohĭvisa, yande reco tuprisa ambuae Tüpa reroyasar pāhuve iyavei yande rorivetsa yareco vahe Espĭritu Santo sui.

¹⁸ ěgüe yahese Cristo mboeteisave, avĭye aira Tüpa upe iyavei opacatu ava rembiepiave avei no.

¹⁹ Sese opacatu yande recoeté pĭpe yasecara yaico tupri vaherã yandeyeupe. Ipĭpe sui yande yaicatura yañepĭtivĭi yande yemovĭracua tupri āgua yande Yar rese.

²⁰ Anĭ pemocañi uca tēi ava recocuer Tüpa remipĭsiro tembĭhu sui tēi. Opacatu niha co tembĭhu avĭye aiño ité; ndiyai eté rumo yahu que tembĭhu ambuae ava Cristo reroyasar pĭhañemoñetasa momara āgua.

²¹ Avĭye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pĭpe seitĭ uca iriēhi āgua.

²² Yande pĭhañemoñetasa yareco vahe rumo yarecoño ĭtera yandeyeupe ité Tüpa rovaque. ¡Avĭye ai catuño ité ava acoi, “Avĭye yayapose evocoi nungar mbahe” he pare, “¿Mara ehi pĭha?” ndehi irise opĭhañemoñetasa pĭpe!

²³ Acoi que ava, “¿Mara ehi pĭha?” ehise tembĭhu upe. Ipare rumo ohuse, ahe evocoyase oyemboangaipa ipĭpe. Esepia, ndohui Tüpa rese oyeroyasa

pipe. Iyavei ava, “¿Mara ehi pīha?” ehi vitesse que mbahe upe, ipare oyapose ité, ahe angaipa.

15

Yambovihara ava yande cotindar; ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vītei vahe rese. Ndahei chira rumo yande ae tēi yayemboviha.

² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave.

³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi.

⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vahe rā Tūpa reco porañetesa yande ñemosasa pipe iyavei yande pīhamonguerēhisa pipe avei ahe yareco vahe ichuindar.

⁵ Tūpa, acoi ombou vahe yande ñemosasa, yande pīhamonguerēhisa avei yandeu, tape pītivii oyoya guasu pe reco tupri āgua ñepei-peipeyese Jesucristo recocuer rupi.

⁶ Ipīpe sui pe opacatu oyoya guasu ñepei pe pīhanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepei-peipe, inungar Cristo pe pisi tupri oyeupe nara Vu mboetei āgua.

⁸ Che rumo aipo ahe pēu: Jesucristo ou judío pītivii Tūpa remimombeguer mboaviye āgua judío ramo aracahendar upe. Ēgüe ehi Tūpa oñehe mboaviyesa mboyecua

⁹ ‘tomboetei ava ndahei vahe judío yuvirecoi vahe che Ru Tūpa iporoparisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ipemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipīpe sui tombou yasāro vahe rā ahe mbahe aviye vahe Espiritu Santo pīratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepei-peipeyeppe yemboaracua āgua.

¹⁵ Co tecocuer rese rumo aicuachía opacatu che siquiyeēhisa pipe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pipe cheu

¹⁶ Jesucristo rese che poraviqui água ava ndahei vahe judío recocuer aviye água. Evocoyase judío pahi nungar che cuaisa pipe amombehu co ñehesa Tūpa ombou vahe p̄sirosa resendar yuvireco chupe imoporēhi água Tūpa rovai inungar mbahe seropovēhepri aviye vahe Tūpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tūpa che cuaita rese.

¹⁸ Esepia, cheu ndiyai añehe vaherã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherã. Esepia, amonguerēhi Tūpa reroya água yuvireco che ñehe rese, che rembiapo sui avei.

¹⁹ Ēgüe ahe poromondiisa mbahe yavai vahe apo Tūpa p̄ratasa pipe. Ahe ayapo Espiritu Tūpa suindar p̄ratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

²⁰ Chequerēhi avei co ñehesa p̄sirosa resendar mombehu água ava Cristo recocuer ndosendui vahe upe yepi. Ndahei rumo ambuae ava imboaracua pare tēi,

²¹ che rumo ayapo inungar icuachiapri pipe omombehu vahe:
“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso água

²² Co rese tēi che ndaicutui aso pe p̄ri, yepe setá rupi aso pota tēi viña.

²³ Cūritei rumo opa amboaviye che poraviqui co ivi rupi, iyavei opa tēi setá araviter pe p̄ri che sosa rāgüer.

²⁴ España ve che soseve, apita pucumira vicho pe p̄ri yande yemboviha água. Iyavei pe sui che sē potase, che p̄tivimira peye aheve che so água.

²⁵ Cūritei rumo che asora Jerusalén ve. Arasora porerecosa ahe pendar yande mboetasa Jesús reroyasar p̄tivii água.

²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe p̄tivii água yuvireco.

²⁷ Ahe ēgüe ehi güemimbotar rupi yuvireco iyavei iya ité imboyevi água yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi água co ivi pipendar porerecosa chupe.

²⁸ Opase che co porerecosa amondo yuvireco chupe, España ve che sose, ahese apitara vicho pe p̄ri.

²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu p̄eu opacatu che rese peyeroqui p̄rata vaherã Tūpa upe che p̄tivii água co mboraviqui rese.

³¹ Peporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa p̄si tupri água avei.

³² Ahese Tūpa oipotase, che aviharetera ayepotase pe repia, iyavei toime p̄tuhusa yandeu che pe p̄ri che sose.

³³ Ēgüe tehi Tūpa güeco tupriisa pipe tasecoi opacatu pe rese.

16

Pablo mahenduhasa ñepe-peí ava upe

¹ Co yande reindri Febe serer vahe, ahe oip̃itivii tecua Cencrea pendar Cristo reroyasar oico.

² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peip̃itiviiño que mbahe chupe ipane vahe rese. Esepia, ahe setá ité oporop̃itivii iyavei che avei eté che p̃itivii no.

³ Pemombehu che mahenduha Prisca upe, Aquila upe avei, ahe niha che p̃itivii mboraviqui Jesucristo recocuer resendar rese yuvireco.

⁴ Ahe avei niha mbahe t̃ei pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe.

⁵ Pemombehu avei che mahenduha s̃etave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar.

⁶ Pemombehu avei che mahenduha María upe. Ahe niha oporaviqui iteanga vahe pe recocuer rese.

⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe.

⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei.

¹⁰ Pemombehu avei che mahenduha Apeles upe. Ahe niha güecoãhasa sui os̃e tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo r̃eta pipendar yuvirecoi vahe upe avei.

¹¹ Pemombehu avei che mahenduha che mu Herodión upe, ava Narciso r̃eta pipendar yande Yar reroyasar upe avei.

¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara.

¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei.

¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco p̃eu.

¹⁷ Che rivireta, peicua catu pe p̃ahu pendar omboyaho pota serai vahe sui. Oime ava ñgüe ehi vahe, oiti uca vahe ava mbahe t̃ei pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepepiño itera.

¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Ñgüe ehi rumo ahe oyeupe nara t̃ei oipota rai mbahe yuvireco.

Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco.

¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaheṛã pe mbahecuasa mbahe aviye vahe apo ãgua, ndahei mbahe tēi apo ãgua.

²⁰ Evocoiyase Tũpa güeco tupriisa pipe pihavi Carugar osecopipa tupri itera. Pe avei evocoiyase pesecoroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pñivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoēhi suive mbahe ndicuasai vahe rese.

²⁶ Cũritei rumo oyecua uca oñehe mombehusar rembicuachía pipe Tũpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, ãgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água.

² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei.

³ Yande Ru Tüpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose.

⁵ Ëgüe ehi secocuer pipe sui Tüpa ombou opacatu pe reco tupri catu água, pemombehu tupri vaheñã imbahecuasa, opacatu mbahe supi eté vahe cua tupri água avei.

⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité.

⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesãrose.

⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave.

⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiroiro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyohoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimb-otar.

¹² Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico.

¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico?

¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese.

¹⁵ Sese ndipoi chira “serer pipe ñapiramosa” ehi vahe yuvireco cheu.

¹⁶ Estéfanos rēta pndar avei añapiramo yuvireco, ipare ndipo iri revo ambuae ava añapiramo vahecuer.

¹⁷ Cristo niha nomombehui che poroãpiramo água. Ëgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai

catu vahe aiporu. Esepia, nañomi potai eté que chĩhi co ñehesa pĩratagüer Jesucristo curusu rese imano agüer resendar ava sui.

Cristo Tũpa pĩratasa, imbahecuasa avei

¹⁸ Esepia, acoi ava ocañi tẽi vaheã upe co ñehesa curusu rese Cristo manosa resendar aviye ãgũe ehi tẽi vahe viña. Yande ipĩsiropri yaico vaheã upe rumo co ñehesa vireco ité Tũpa pĩratasa,

¹⁹ inungar Isaías rembicuachiagüer pipe aipo ehi:

“Amocañira co ivi pipendar ava tẽi mbahecuasa iyavei arocuara ava yaracua vai tẽi vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecuasa vai vahe, ava-ava tẽi aracuasa cuapar avei, iyavei ñehẽe cua tupri ai vahe co ivi pipendar mbahe rese yuvireco? ¿Tũpa niha osecuñaro evocoi nungar mbahecuasa ãgũe ehi tẽi vahe pipe!

²¹ ãgũe ehi eté oaracuasa pipe ‘toicua eme che recocuer ava oaracuasa pipe tẽi’ oya. Yepe, “Co ñehesa Cristo resendar ãgũe ehi tẽi vahe” ehi tẽi ava yuvireco chupe viña, Tũpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tẽi mbahe poromondiisa ipĩratá vahe iva pendar yuvireco. Griego evocoyase osendu pota tẽi ñehesa aracuasa resendar yuvireco no.

²³ Yande rumo, “Cristo omano curusu rese” vahe ava upe yaico. Amove judío upe mbahe tẽi co ñehesa. Iyavei amove ndahei vahe judío, co ñehesa osenduse, aviye acoi ãgũe ehi tẽi vahe yuvireco chupe.

²⁴ Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuasa avei.

²⁵ Esepia niha, ava upe, Tũpa suindar mbahe aviye acoi ãgũe ehi tẽi vahe viña. Co Tũpa suindar rumo mbahecuasa aviye catu vahe ité ava tẽi mbahecuasa sui iyavei acoi mbahe Tũpa suindar aviye nipiratai vahe ava upe viña, ahe rumo ipĩrata catu ité opacatu ava tẽi pĩratasa sui.

²⁶ Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi imbahecuasa vai vahe ava rovaque yuvireco viña. Ndasetaimi avei pereco pe mu seco ivate vahe viña no.

²⁷ Evocoi ava, “Ndoicuai vahe mbahe yuvireco” ehi yuvireco pẽu viña. Tũpa rumo pe poravo evocoi ava imbahecuasa vai vahe mochi ãgua. Iyavei oiporavo ava pe pãhu pendar ndoicatu tuprii vahe yuvireco ava ipĩrata vahe Tũpa cuaparẽhi mochi ãgua.

²⁸ Oiporavo avei co ivi pipe ava remieroĩro seco mbegüemi vahe, ava seco ivi coti catu vahe pe pãhu pendar co ava seco ivaté vahe reroyi ãgua

²⁹ ‘toyemboivate ai eme que ava che rovaque yuvireco’ oya.

³⁰ Tũpa ité rumo yande mboyemboya Guahir Jesucristo rese, ahe avei ombou Guahir yande mboaracua ãgua, yande reco mohivi ãgua avei ‘toyuvirecoi cheu nara’ ohesave iyavei ‘ipĩsiropri toyuvirecoi’ oya yandeu.

³¹ Sese inungar aipo ehi ñehesa icuachiapri aracahendar pipe: “Acoi ava oyeecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rĩvireta, che asose cuese, añehese pẽu Tũpa suindar ñehesa supi eté vahe yĩpĩndar ndicuasai vahe pipe, nañehi co ivi pipendar tẽi ava mbahecuasa pipe, ñehesa ivate ai vahe pipe avei.

² Esepia, acoi aicose pe pãhuve cuese, ndachepĩhañemoñetai eté que ambuae mbahe rese; Jesucristo recocuer rese, yatica agũer rese catu ité che pĩhañemoñeta vichico.

³ Iyavei ndachepĩratat, arĩrii avei che siquiyepave pẽu che sose.

⁴ Iyavei acoi añehese ñehesa pĩsirosa resendar rese pẽu, ndaiporui eté rumo ñehesa ivate ai vahe pe pĩhañemoñetasa rerova ãgua. Che rumo Tũpa Espĩritu pĩratasa pipe añehi pẽu

⁵ ‘toyeroya catu Tũpa pĩratasa rese yuvireco’ che yapave pe yeroyaẽhi ãgua ava tẽi mbahecuasa rese.

Tũpa oEspĩritu pipe oicua uca mbahe yandeu

⁶ Ore rumo oromombehuño ité aracuasa pẽu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tẽi, ndahei avei ava mborerecuar co ivi pipendar tẽi aracuasa nungar. Esepia, ahe imborerecuasa ocañi tẽi vaheerã.

⁷ Oroñehi catu aracuasa Tũpa suindar ndicuasai vahe rese, ahe yĩpĩve vireco vahe ivi apoẽhi viteseve, ahe co omboyecua ramo vahe yandeu yaico vaheerã teco ori apĩrẽhi vahesave.

⁸ Co ivi pipendar ava mborerecuareta rumo ndosenducuai eté co ñehesa. Osenducua rumo mborerecuar Jerusalén pendar yuvireco viña, ndoyatica ucui chira yande Yar seco ivate, porañete vahe curusu rese yuvireco viña.

⁹ Icuachiapri aracahendar pipe aipo ehi:

“Tũpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopĩhañemoñetaimi eté sese yuvireco no” ehi aracahe.

¹⁰ Tũpa rumo oicua uca Espĩritu pipe yandeu cute. Esepia, Espĩritu oicua tupri catu ité opacatú secocuer oico.

¹¹ Ëgũe ehi eté, inungar opacatu ava pãhuve ndipoi eté que ñepepe ava pĩhañemoñetasa oicua vahe, iespĩritu gũeraño ité oicua mbahe oime vahe ipiha pipe. Ëgũe ehi avei Tũpa Espĩritu gũeraño ité oicua Tũpa pĩhañemoñetasa.

¹² Yande evocoyase ndahei co ivi pipendar tẽi espĩritu yaipisi, Ëgũe ehi rumo Espĩritu Tũpa suindar yaipisi yaicua vaheerã iporerecosa oporoaisusa pipe ombou vahe yandeu.

¹³ Ahe niha oromombehu Tũpa Espĩritu ore mbohe vahe, ndahei ñehesa ava tẽi aracuasa sui. Ëgũe orohe co supi eté vahe ñehesa Espĩritu suindar oromombehu Espĩritu rese yuvirecoi vahe upe yepi.

¹⁴ Acoi ava ndovirecoi vahe rumo Tũpa Espĩritu opiha pipe, ndoipisi eté mbahe Tũpa Espĩritu suindar yuvireco. Esepia, chupe evocoi mbahe aviye Ëgũe ehi tẽi vahe, iyavei ndosenducua catui eté yuvireco. Esepia, evocoi nungar mbahe senducua Espĩritu pipeño ité.

¹⁵ Acoi ava vireco vahe rumo Tũpa Espĩritu opiha pipe oicatu opacatu mbahe cua ãgua. Ndipoi chira rumo ambuae ava ndovirecoi vahe Espĩritu opiha pipe ahe ava recocuer cua tupri ãgua.

¹⁶ Esepia, icuachiapri aracahendar pipe aipo ehi: “¿Ava vo oicua tẽira yande Yar pĩhañemoñetasa viña? ¿Ava vo ombohe tẽira viña?” ehi. Yande rumo yareco yande Yar Cristo pĩhañemoñetasa.

3

Pablo iyavei Apolos Tũpa upe oporaviqui vahe yuvirecoi

¹ Che rívířeta, ndapeguata tupří Espírítu reroyasa pipe; pe rumo peguataño víte ava tēi pihañemoñetasa rupi peico. Sese namombehu catui ñehesa yavai vahe Espírítu suindar pēu. Esepia, pe pītanimi nungar víte tēi pe pihañemoñetasa Cristo rese.

² Sese che opombohe mbahe ndayavaimi vahe rese. Esepia, pītanimi ndoicatu vítei ocaru. Sese ocambu víteño tēi. Cūritei rumo ěgüe peye víte ité. Esepia, pe ndapesenducua catu vítei eté Tūpa Ñehengagüer yavai vahe.

³ Peguata víteño co ivi pīpendar pihañemoñetasa tēi rupi. Esepia, peyemoe-catēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar.

⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehē: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepeipei mboraviqui yande chupe yayapo vaherã. Tūpa upe ore poraviquisa pipe sui niha peroya yande Yar peico:

⁶ che rane inungar añoti vahe mbahe rāhi pe piha pipe; Apolos evocoyase inungar imboihusar; Tūpa rumo inungar omboori vahe pēu.

⁷ Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco.

⁸ Ore rumo oyoya tupri oroyapo mbahe pēu nara. Sese ñepeipei Tūpa omboura porerecosa pe rese ore poraviquigüer rupi oreu.

⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico.

¹⁰⁻¹² Che inungar oi apo cuapar oyapo rane vahe oi vīracua āgua, ěgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivīracuasa harive, ěgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihí, anise tacuar tēi oiguā yuvireco. ěgüe ehi aveira pe mbohesar yuvireco. Ahe ñepeipei rumo iya oicua tuprira pe mbohe āgua yuvireco.

¹³ Ahe iporaviqui agüer rumo ari cañise icuasa tuprira ñepeipei yuvireco. Esepia, ahe ari pipe yande Yar oura tata reseve ñepeipei pe mbohesar poraviqui agüer cua āgua.

¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri;

¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sãira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspírítu niha secoi eté yande piha pipe.

¹⁷ Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pīpendar pihañemoñetasa rupi

tēi, toyecomombegüemi rane oaracua āgua.

¹⁹ Esepia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pīpe aipo ehi: “Ava oaracua raisa pīpe oyeiti uca mbahe tēi pīpe Tūpa upe yuvireco” ehi.

²⁰ Iyavei aipo ehi no: “Yar rumo oicua ava tēi yaracua rai vahe pīhañemoñetasa, ahe ēgüe ehi tēi vahe” ehi.

²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité:

²² Ēgüe ehi eté che Pablo, iyavei Apolos, Pedro avei, opacatu ivi pīpendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vahe, ahe niha opacatu pēu nara,

²³ pe niha Cristo upendar, Cristo evocoyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña.

² Acoi vireco vahe ocuaitarã, iya ité omboyecua ocuaita mboaviye tupri.

³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri.

⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe pēu. Yande Yar rumo oicua.

⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi āgua. Ahe niha omboyecua opacatu mbahe ndoyecuai vahe, iyavei omboyecuapara ñepepei yande pīhañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepepei yandeu.

⁶ Che rivireta, che añe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pīpe oreu.

⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

⁸ Ndojavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¿Ēgüe peye itera tarahu viña! Ahese, ore avei mborerecuar oroicora pe pāhuve viña.

⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua. Sese seroñrombri oroico inungar ava imboguai pī yucapirã. Ēgüe orohe oroico opacatu ava rovaque, Tūpa rembiguai eta ivapendar rovaque avei.

¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pīpe. Iyavei ore ndoyavii ndaseco pīratai vahe oroico ava rembiepiave; aheseve avei rumo peyecomomirata tēi peico. Ore seroñrombri tēi oroico, pe evocoyase ava pe mboetei guasu pe rereco yuvireco.

¹¹ Cũritei ore oroicove vite ité ore rieporẽhi pipe, ore husei tẽi iyavei ndore turucuai eté. Ava rumo evocoyase mara-mara tẽi ore rereco yuvireco. Iyavei ndorovirecoi ore rẽta ité.

¹² Ore oroporaviquiño ité, oroyembogüerai tẽi ipipe. Ava rumo iñehe mara-mara tẽi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara ãgua yuvireco; ore rumo oroñemosañi ité yuvireco chupe.

¹³ Iñehe-ñehe tẽi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tẽi iyavei ore rereco inungar ava ãgüe ehi tẽi vahe yuvireco. Cũritei ãgüe ehi viteño ité yuvireco oreu.

¹⁴ Ndahei pe mochi ãgua aipo ahe icuachía pẽu, ãgüe ehi rumo pe mboaracua ãgua tẽi. Inungar che rahir ité, che rembiaisu opovireco.

¹⁵ Esepia, yepe pereco ati pe pĩtivirusar Cristo rese pe reco ãgua viña, ndaperecoi rumo setá pe yesupa. Esepia, che amombehuse niha ñehesa pĩsirosa resendar pẽu, ahese ramo peroya Jesucristo. Seroyasa pipe evocoyase che inungar pe yesupa ité aico pẽu.

¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pẽu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

¹⁸ Amove oime pe pãhuve oyeecomboivate ai vahe. “Ndou iri chietera revo cohava yande repia” ehi yuvireco cheu viña;

¹⁹ aso pĩhaiviño itera rumo pe repia yande Yar oipotase cheu. Ahese aicua tupri ra oyemboivate ai vahe reco pĩratasa yuvireco. Ndahei chira iñehe güeraño tẽi aicuara.

²⁰ Esepia, Tũpa omborerrecuasave, ndahei oñehe pipe tẽi oporocuai, opĩratasa pipe rumo ãgüe ehi.

²¹ ¿Mbahe pĩha peipota peico? ¿Peipota pĩha che aso vaherã pẽu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepeí Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepeí mbahe tẽi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarẽhi ité ndoyapoi evocoi nungar mbahe tẽi yuvireco.

² ¡Pe rumo peyeecomboivate ai peico! ¡Iyacatu rumo ndapeyemboivahi chira evocoi nungar mbahe tẽi repiase viña! Evocoi nungar ava iyacatu ité pemboyepipira pe pãhu sui.

³ Yepe niha che teieté ndaicoi pe pãhuve viña, pe rese che mahenduhasa pipe rumo aicove ité pe pãhuve iyavei aicua voi eté aipo oyapo vahe mbahe tẽi recocuer inungar-ra aico vahe ité pe pãhuve viña.

⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese.

⁵ Evocoyase ahe ava timondosa Carugar povrive secocuerai mocañi ãgua. Ipipe sui iespĩritu oñepisirora yande Yar Jesucristo yevise curi.

⁶ Ndapeyeecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi.

⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pipe peico vaheã inungar panguã ipiasu vahe ndovirecoi vahe omboapeposa oyese. Ëgüe peye ité niha. Esepia, yande Yar Jesucristo iparaisu omano yande repirã. Ëgüe ehi ahe inungar ovesa yucapri angaipa mocañi ãgua judío pieta Pascua pipe yepi.

⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, Ëgüe vahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pẽu: “Ndapemborõi chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vıteı vahe upendar. Esepia niha, pe yepepi ãgua ñepeı reseve evocoi nungar ava sui, pesẽ itera co ivı pipe sui viña.

¹¹ Che niha aipo ahe icuachía pẽu: ndapemborõi chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyerocuı tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava piri ñepeı yepe ndapecarui chietera.

¹²⁻¹³ Cheu ndiyai eté ava ndoyuvirecoi vahe Tũpa rese recocuer rese porandu ãgua. Tũpa ahe ava yuvirecoi vahe recocuer opara oicua coıye. Pe rumo pe cuaita ité Tũpa rese yuvirecoi vahe upe pe porandu ãgua secocuer rese. ¡Sese pemboyepiño ité osı recoyar rese secoı vahe pe pãhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oıme pe pãhu pendar “co mbıa oyapo mbahe tẽi cheu” ehi vahe ambuae Jesús reroyasar upe. ¡Mahera peraso mborerecuar Tũpa reroyasarẽhi upe tẽi evocoi mbıa rembiapo ai rese porandu ãgua! Iyacatu rumo Tũpa reroyasareta upe perasora secocuer moıngatu ãgua yuvireco viña.

² Peıcuı niha pe Tũpa reroyasar peporandura ava ndoıcuı vahe Tũpa upe secocuer rese yuvireco curı. Evocıyase, ¿ndapeıcatui pıha co tecocuer mbahemi tẽi moıngatu peıco?

³ ¿Ndapeıcuı vo yande aveı yaporandura Tũpa rembıguı recocuer rese curı? Evocıyase, ¡peporandu catu itera co ivı pıpendar tecocuer rese peyeupe yepı!

⁴ Pereıose evocoi nungar mbahe tẽi peyeupe, ¡mahera peıporu ava Ëgüe ehi tẽi vahe tũparo pendar upe mbahe moıngatu ãgua!

⁵ Che aipo ahe ité pẽu pe chı ãgua: ¿Ndıpoımi eté vo pe pãhuve que ñepeı yaracua vahe oıcatu vahe que mbahe tẽi peyeupendar moıngatu ãgua?

⁶ ¡Amove pevava peyeupe! ¡Ndahei co güeraño, oıme aveı pe pãhu pendar Tũpa reroyasar vıraso ambuae omboetası mborerecuar Tũpa reroyasarẽhi upe tẽi mbahe moıngatu ãgua!

⁷ Supı eté evocııya pe reco pipe peyavı guasu ité. Iya peñemosañora co mbahe tẽi pe mboetası suındar upe viña. Ëgüe ehi eté, iya mbahe pe reco vahe, “Toñomiño yuvireco” peyera chupe pe raso rãgüer sui Tũpa reroyasarẽhi mborerecuar upe viña.

⁸ Amove rumo pe aveı peyapo mbahe-mbahe tẽi eté; peñomi aveı pe mboetası Tũpa reroyasar mbahe.

9-10 ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerogui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava vīrocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi.

11 Oime avei niha acoi pe pāhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

12 Iyavei ambuae mbahe: Supi eté niha “aviye que mbahe che remimbotar ayapo vaheṛā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua.

13 Supi eté niha aipo ehi vahe: “Yande rembiyu yande aviter upe nara, yande aviter evocoyase yande rembiyu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaheṛā, ahe rumo yande Yar upe nara. Yande Yar evocoyase yande retecuer upe nara secoi.

14 Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

15 Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo āgua cuña güetecuer omondo-mondo tēi vahe upe.

16 Peicua niha pe aipo nungar cuña ndipihai vahe rese peicose, pe retecuer evocoyase ñepe vahe nungar ité pereco. Esepia, icuachiapri arachendar pipe aipo ehi yandeu: “Yepe ñuvirío ava yuvirecoi vahe viña, ñepe vahe nungar ité rumo secocuer yuvireco” ehi.

17 Acoi ava secoi vahe rumo yande Yar rese, ahe secocuer evocoyase ñepeño ité.

18 Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoyase omomara catu güembiapo pipe sui tēi.

19 ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité.

20 Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

7

Poromboaracuasa mendasa resendar

1 Cūrítei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña.

2 Pe aguasa-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco.

3 Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase.

⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco.

⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, avieteramo ndapeñemosai chira, ipipe sui aviyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu.

⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

⁹ Ndapeicatuise rumo pe ñemosā āgua, pemendaño. Esepia, aviye catu itera pemenda poropota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité.

¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui.

¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui.

¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira.

¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; avieteramo pe recocuer sui pe mer oñepisirora. Iyavei pe cuimbahe, avieteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi.

¹⁸ Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua.

¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu.

²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve.

²¹ Pe mbiguai tēi peico vahe pe renoise Tūpa, pepihañemoñeta etepri eme evocoyase pe recosa sui pesē vaherā rese. Peicatuse rumo, peyepipiño itera ichui.

²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ěgüe peye viña, peroyase rumo Cristo, ahese sembiguai peico.

²³ Tūpa upe rumo perepí iteanga, sese ndiyai eté ambuae ava povrive tēi peico.

²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe āgua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico.

²⁶ Cheu aviye catuño ité ndomendai vahe ěgüe ehiño tēise yuvireco viña. Esepia niha, tecocuer yavaí eteanga cūrítei.

²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe.

²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe.

³⁰ Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe.

³¹ Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovīha āgua;

³³ omenda vahe rumo ipihañemoñeta avei co ivi pipendar recocuer rese tēi, güembireco mbovīha āgua rese avei.

³⁴ Evocoyase ndahei ñepepi opihañemoñetasa vireco. ěgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mbovīha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaherā pe recoeté pipe peico.

³⁶ Acoi ava ipihañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa.

³⁷ Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipihañemoñetase ñepepi reseve güembirecovi rese omendaēhi āgua, ahe aviyeño ité.

³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi ãgua omer sui imanoẽhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara.

⁴⁰ Ndomenda irise rumo, aviye catuño itera. Ahe che pïhañemoñetasa, iyavei revo ahe che pïhañemoñetasa Tũpa Espiritu suindar.

8

Pablo oñehe tembihu mbahe rahanga upe tẽi seropovẽhepri rese

¹ Cũritei ambuae mbahe amombehura pẽu mbahe rahanga upe mbahe mĩmba yucapri seropovẽhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tẽi! Yayeaisuse rumo, ahese yañepitivi catu Cristo reroya tupri ãgua.

² Supi eté yande, “Che aicua ité co mbahe” yahe tẽise que mbahe upe, ipane vite ité rumo icua tupri ãgua yandeu.

³ Yande rumo yasaisuse Tũpa, ahese Tũpa, “Co ava cheundar ité secoi” ehira yandeu.

⁴ Evocoyase co mbahe rahanga upe tẽi seropovẽhepri mbahe mĩmba yucapri hu ãgua rese añehe. Yande niha yaicua co mbahe rahanga egũe ehi tẽi vahe co ivi pipe, iyavei oime ñepeĩ güeraño ité Tũpa.

⁵ Esepia, yepe ava upe setá tũpa ivave, ivive avei viña (setá iteanga niha oime tũpa angahu tẽi, yar angahu tẽi avei).

⁶ Yande rumo yaicua ñepeĩño ité Tũpa oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepeĩ vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipĩndar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovẽhepri, ipïhañemoñeta, “Co mbahe roho tũpa rahanga upe seropovẽhepri” ehi viteño yuvireco oyeupe. Ipipe sui omomara uca Tũpa rese opïhañemoñetasa yuvireco.

⁸ Supi eté tembihu ndayande pĩtivi Tũpa rese yaico vagherã. Ndahei mbahe roho husa pipe sui tẽi aviye catura yaico iyavei ndayahuse, ndahei chira mbahe tẽi catu yaico.

⁹ Pẽu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara.

¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerẽhi aveira ihu uca ãgua chupe.

¹¹ Evocoyase co pe mbahecuasa pipe pemocañi uca yande rivri Tũpa rese noviracua tupri vitei vahe peico. ¡Cristo rumo omano ipĩsiro ãgua!

¹² Esepia, pemomarse Tũpa rese ipïhañemoñetasa, ahese pe ae peyemboangaipa uca Cristo amotarẽhisa pipe peico.

¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaẽhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico.

² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pëu.

³ Ahe ñehesa amboyevi tupri ava che recoãha potasar upe yuvireco yepi.

⁴ Iya ité che remihura pisi, che iguarã avei pe sui viña.

⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ãgüe ehi yuvireco, ãgüe ehi avei Pedro, ãgüe ahe aveira niha che viña.

⁶ ¿Ore güeraño tie Bernabé rese oroporaviquira ambuae mbahe rese ore recove ãgua?

⁷ Esepia, sundao nomboepi sundao güeco ãgua, ahe rumo oporaviquisa repri oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua.

⁸ Che ndahei cheyesui tēi aipo ahe pëu. Esepia niha, Moisés porocuita pipe avei aipo ehi yandeu:

⁹ “Pemondo eme tivi yuru rese mbahe icaruẽhisa mbahe rãhi oicambese yuvireco pëu” ehi. Supi eté co Tũpa aipo ehi vahe ndahei tivi upeño.

¹⁰ Yande reco tupri ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vahe rã oporaviquisa sui oyeupe nara yuvireco yepi.

¹¹ Evocoyase ore avei oroñoti Tũpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña.

¹² Esepia, ambuae oicatu mbahe pisi ãgua oyeupe nara yuvireco pe sui. Evocoyase ore avei niha oroicatu mbahe pisi ãgua pe sui ore poraviquisa pipe viña.

Ore rumo ãgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave.

¹³ Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tũpa upe seropovẽhepri tũparo rocarve yuvireco yepi.

¹⁴ ãgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu.

¹⁵ Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayembovihaño ité. ¡Yepe che yucapri tēira tieporēhi viña, ndaporandui chietera rumo mbahe rese pëu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa pĩsirosa resendar ava upe, ndiyai ayecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña!

¹⁷ Tũpa ndache cuaise oñehe mombehu ãgua viña, che rumo che querẽhisa pipe amombehuse, ahese aipisira Tũpa suindar porerecosa. ãgüe ndahei rumo. Esepia, Tũpa che cuaisa pipe niha amombehu.

¹⁸ Ndaporandise mbahe rese p̄u amombehuse co ñehesa p̄sirosa re-sendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ãgüe ndahei eté.

¹⁹ Yepe che ndahei ava povrive t̄i aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquer̄hi vahe Cristo reroya ãgua’ che yapave.

²⁰ Esepia, aicose judío p̄ahuve, secocuer rupi aicoveño Yar upe imonguer̄hi catu ãgua yuvireco. ãgüe ahe ité, aicose ava Moisés porocuita povrive yuvirecoi vahe p̄ahuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua.

²¹ Iyavei ava ndoyuvirecoi vahe Moisés porocuita povrive, ip̄ahuve aicose, inungar ahe yuvirecoi, ãgüe ahe tupri avei imonguer̄hi ãgua yande Yar upe vichico. Ndahei rumo T̄upa porocuita mboyeroāhisa pipe aico. Esepia, Cristo porocuitavrive che recocuer.

²² Iyavei no, aicose ava yande Yar ndoviroya tupri vitei vahe p̄ahuve, secocuer nungar tupri avei aico Yar upe imonguer̄hi catu ãgua. ãgüe ahe opacatu ava upe ‘toñep̄siro catu ahe avei yuvireco’ viya.

²³ Che ayapo co opacatu mbahe ‘tasetá catu co ñehesa p̄sirosa reroyasar yuvireco’ che hesa pipe, ‘taip̄si avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe ḡeraño rumo oip̄si porerecosa yepi. Evocoyase inungar co ivava catu vahe, ãgüe peye avei pe recocuer pipe T̄upa porerecosa p̄si ãgua peico.

²⁵ Iyavei opacatu oyemoingatu vahe uguaȳi ãgua oñearo tupri opacatu mbahe t̄i sui oyemomarāhi ãgua yuvireco. Ahe ãgüe ehi porerecosa ndipocopīi vahe p̄si ãgua t̄i yuvireco. Yande rumo yayemomborarara porerecosa apir̄hi vahe p̄si ãgua yaico.

²⁶ Evocoyase che avei, ndahei ava oyahuva-huva t̄i vahe nungar aico T̄upa remimbotar apo ãgua iyavei che ndaicoi ava uguaȳi t̄i vahe nungar.

²⁷ Che rumo mbiguai nungar che retocuer areco, amboyeroya uca p̄ihañemoñeta tupri upe. Esepia, ndaipotai ambuae ava mbohe pare imombopri t̄i nungar guayisa sui che yereco ãgua.

10

Ndiyai aracadendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe p̄itu T̄upa imboguata aḡer rese. Iyavei para guasu P̄ira vahe avei osasa opacatu yuvireco aracahe.

² ãgüe ehi eté opacatu uguatase mbahe p̄ituvri rupi iyavei para guasu osasase yuvireco, ndoyav̄i ñapiramombri yuvirecoi Moisés recocuer rupi uguata ãgua aracahe.

³ Iyavei oyoya guasu yuvirohu tembihu T̄upa ombou vahe chupe nara yuvireco,

⁴ opacatu guasu avei oihu ita sui T̄upa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco.

⁵ Yepe ãgüe ehi T̄upa opacatu yande ramoi judío upe viña, setá iteanga rumo ava ip̄ahu pendar ndahei aviye vahe ip̄iha rupi yuvireco. Ipipe sui opa omano ivi iporupir̄hisa rupi aracahe.

⁶ Co opacatu mbahe sembiapoḡer yuvireco ahe yande mbohe ãgua ‘toipota rai eme mbahe-mbahe t̄i inungar ahe ava yuvirecoi’ oyapave yandeu.

⁷ Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracadendar pipe: “Co ava ocaru vahe, yuviroihu avei yuvinoi. Ichui yuviropūha, oyembovihaño pieta apo yuvireco” ehi.

⁸ Ndayayemboaguasa-guasa tēi chaveira inungar ahe amove ēgüe ehi yuvireco. Ipipe sui tēi ñepeí ari pipe ahe opa omano veintitrés mil tupri yuvireco aracahe.

⁹ Ndayasecoãha-ãha tēi chaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco.

¹⁰ Iyavei ndayande ñehe mara-mara tēi chira yande Aposar rese, inungar ahe ēgüe ehi yuvireco. Ipipe sui Tūpa ombou güembigui ava yucasar iva sui ahe ava yucapa āgua aracahe.

¹¹ Co opacatu yande ramoí upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu.

¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe.

¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voiñora pīratasa evocoi mbahe tēi sui pe sē āgua, chupe pe ñemosā āgua.

¹⁴ Sese che rivireta, che rembiaisu, peyepipi mbahe rahanga mboeteisa sui.

¹⁵ Ava niha peico pesenducua vaheṛā mbahe, evocoiyase peporandu co che remimombehugüer rese peyeupe icua tupri āgua.

¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyahoyahopri, ahese oyoya guasu yaipisi Cristo retecuer yandeyeupe nara.

¹⁷ Yepe yande reta yaico viña, opacatu rumo yahu ñepeí pan sui. Sese yande ñepeí vahe ité yaico.

¹⁸ Peyapisaca acoi ava aracadendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoiyase chupendar ité yuvirecoi.

¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei.

²⁰ Co rumo, acoi ava ndoicuai vahe Tūpa oicuavēhe mbahe carugar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoiyase ndaipotai eté carugar upe nara tēi ēgüe peye vaheṛā peico.

²¹ Peihuse rumo yande Yar upendar igua, ndiyai peihu avei carugar upendar igua; iyavei pehuse yande Yar upendar mbahe, ndiyai avei pehu carugar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua.

²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua.

²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbocaru āgua, peso potase ipiri, pehuñora mbahe imbouprī pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua.

²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaēhi āgua, ava pīhañemoñetasa momaraēhi āgua avei.

²⁹ Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe.

³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reroñora yuvireco ahuse viña?” ehira.

³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pīpe.

³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei.

³³ Che opacatu che rembiapo pīpe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pēu yepi che rese pemahenduha vitesse iyavei peguataño vitesse che opombohe vahe agüer rupi.

³ Che rumo aicua uca tupri pota pēu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ēgüe ehi avei Tūpa Guahir Cristo upe.

⁴ Acoi cuimbahe Cristo upe ñemonuhasave oāca ndiru ndosequise oyerure āgua, anise Tūpa Ñhengagüer mombehu āgua, ahe Ēgüe ehi güereciar Cristo mboeteiēhisa pīpe.

⁵ Iyavei acoi cuña ndoyopiise oāca oyeroqui āgua, anise Tūpa Ñhengagüer mombehu āgua, ahe Ēgüe ehi omer mboyeroyaēhisa pīpe. Ahe cuña evocoyase ndoyavii oñeapipa tupri vahe.

⁶ Acoi cuña ndoyopi potaise oāca, tayapecāraisa tupri. Ochise rumo oapecārai āgua, evocoyase toyopiño oāca sereco.

⁷ Cuimbahe rumo ndoyopi chira oāca sereco. Esepia, ahe Tūpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco.

⁸ Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo.

⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara.

¹⁰ Co rese cuña virecora oācapisa omer mboyeroyasa mboyecua āgua omahese Tūpa rembiguai eta yuvireco sese.

11 Yande, yande Yar reroyasar yaico vahe co tecocuer rese, yañepitivi oyoya yaico. Evocoyase cuimbahe ndoicatui cuña porêhi; cuña avei ndoicatui cuimbahe porêhi yuvireco.

12 Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

13 Evocoyase peyapisaca tupri co rese: ¿Iya pīha cuña noñeacapi vahe oyerure Tūpa upe?

14 Yande ité yaicua yemochisa cuimbahe oyemboha vucuse.

15 Cuña rumo oviharete oha vucu porañetesa rese. Esepia, chupe imondopri ité ñacapi āgua.

16 Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ēgüe ehi avei yuvireco.

Yande Yar rese yemomahenduha raisa

17 Co ambuae mbahe rese rumo ndaicatui eté, “Aviye tupri yuvirecoi” che he āgua pēu. Esepia, aipo pe ñemonuhasave, mbahe tēi eté aipo peyapo.

18 Esepia, yipindar che ayandu peñemonuhapase aipo oyese yande Yar mboetei āgua pe pihañemoñetasa ndahoyoyai pipe peico. Amove ayanduse pe rerācua, aroya ité.

19 ¡Iya ité revo pihañemoñetasa ndahoyoyai vahe reime āgua pe pāhuve Jesús reroyasar supi tupri vahe cua tupri āgua!

20 Peñemonuhase pe pihañemoñetasa ndahoyoyai vahe pipe pe caru āgua, ndahei yande Yar rese pe yemomahenduhase ēgüe peye.

21 Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco.

22 Pereco niha pe rēta aheve pe caru āgua iyavei pe ihu āgua. Pe rumo pe reco pipe opa peroīro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhasa supi ité vahe resendar

23 Co ñehesa aipisi vahe yande Yar suindar amombehu vahe pēu: ahe pītu pipe acoi Jesús mboguaisar opisī āgua renonde, ahe oipisi pan.

24 “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco āgua. Ēgüe peyera che rese pe mahenduhasa pipe peico” ehi.

25 Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tūpa oyapora mbahe ipiasu vahe pe recorā. Che ruvi pipe rumo yaposara. Evocoyase co arī pipe suive peihuse co, peyemomahenduhara che rese yepi” ehi.

26 Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rāro peico.

Mara yahera yande Yar rese yayemomahenduhase

27 Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nombotei yuvireco yande Yar rembiapocuer omondose güetecuer, iyavei oipiyerese vuvi.

28 Sese tipihañemoñeta rane oyacatu güecocuer rese ava co pan hu āgua renonde, oihu āgua renonde avei co uva ricuer yuvireco.

²⁹ Esepia, acoi pe yemomahenduhaẽhisave co setecuer rese pehuse iyavei peihuse, ahese mbahe naporai vahe peseca peyeupe nara peico.

³⁰ Ichui niha setá pemaheasi, oime setá nipirata iri vahe avei pe pãhuve, oime avei omano vahe pe pãhu pendar.

³¹ Yande pihañemoñeta tuprise rumo yande reco ãgua rese, yande Yar evocoyase nomoime chira mbahe tẽi yandeu evocoyaya yande recosa pipe.

³² Yande Yar rumo oicua yande rembiapo ai. Sese omoime mbahe tẽi yandeu. Yande reco mohivi tupri ãgua rumo ãgüe ehi yandeu, ndahei yande cañi ãgua opacatu ava viroyasarẽhi reseve.

³³ Sese, che rivireta, acoi peñemonuhase pe yemomahenduha ãgua yande Yar rese, peñearo ranera oyoya guasu pe caru ãgua.

³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhase, ndipoĩ chira mbahe chupe. Iyavei che asose eipeve pe repia, opara ambuae mbahe amoingatu vicho pẽu.

12

Mbahecuasa Tũpa Espiritu suindar

¹ Che rivireta, che aicua uca pota pẽu co mbahecuasa resendar ñepeĩ-peĩ pẽu Espiritu omondo vahe.

² Pe niha cõriteĩ peicua tupri ité yipindar Tũpa rese peicoẽhi vitesẽ, peyembopa uca mbahe rahanga ãgüe ehi tẽi, noñehẽ vahe upe peico.

³ Sese, che aipotã peicua acoi ava iñehẽ mara Jesús upe ndahei Tũpa Espiritu pĩratasa pipe ãgüe ehi. Iyavei ava ndoicatui chira, “¡Jesús che Yar secoi!” ohe ãgua opĩha pipe Espiritu Santo ndovirecoise.

⁴ Oime setá ambuae-ae tẽi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeĩño ité imondosar secoi.

⁵ Setá mbahe avei oime mbahe yayapo vaheerã yande Yar upe. Ahe yande Yar rumo ñepeĩño ité secoi.

⁶ Iyavei setá oime ambuae mbahe Tũpa oyapo vahe yande rese opĩratasa pipe, Tũpa rumo ñepeĩño ité secoi. Ahe oyapo opacatu co mbahe ñepeĩ-peĩ yande rese.

⁷ Ahe omboyecua yande Espiritu rerecosa ñepeĩ-peĩ yandeu opacatu yande reco tupri ãgua.

⁸ Espiritu pĩratasa pipe Tũpa omondo ñepeĩ viroyasar upe iñehẽ ãgua aracuasa rese iyavei ambuae upe omondo iporombohe tupri catu ãgua ombahecuasa pipe.

⁹ Ambuae upe evocoyase omondo oyese yeroya tupri catu ãgua oEspiritu pipe sui avei. Iyavei ambuae upe omondo opĩratasa imbaheasi vahe mbogüera ãgua.

¹⁰ Ambuae oipisi pĩratasa mbahe poromondiisa oyapo vaheerã yuvireco. Ahe ichui avei vireco ambuae ava omombehu vaheerã ñehesa Tũpa suindar yuvireco. Ambuae upe Tũpa omondo mbahecuasa espiritu naporai vahe iyavei Espiritu supi tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tũpa suindar pipe oñehẽ ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe.

¹¹ ãgüe ehi Espiritu ñepeĩño ité güemimbotar rupi omondo ñepeĩ-peĩ yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeĩño ité yande recocuer

¹² Inungar yande retecuer resendar setá mbahe oime viña, ahe rumo ñepeĩño ité; ãgüe ehi avei Cristo.

¹³ Ëgüe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepei vahe nungar yande reco ãgua Espíritu ñepei vahe pipe. Ahe ñepei Espíritu avei opa yaipisi.

¹⁴ Supi eté yande rete resendar ndahei ñepei mbahe, setá rumo mbahe.

¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese.

¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese!

¹⁷ Esepia, opacatu tupri yande rete sesa pãve tēise, ndayasendui chietera evocoyase mbahe viña. Anise, yande rete yapisacuar pãve tēise, ndayasētui chietera evocoyase mbahe viña.

¹⁸ Tūpa rumo ñepei-pei yande rese mbahe omondo senara rupi tupri güemimbotar rupi.

¹⁹ Yande opacatu ñepei ava rete resendar nungar pãve tēise, ndahei evocoyase opacatu tupri ava rete nungar yaico.

²⁰ Supi eté yepe setá mbahe yande rete rese, ñepeiño ité rumo yande rete.

²¹ Iyavei que yande resa ndiyai aipo ehira yande po upe: “¡Nde Ëgüe ere tēi vahe eico!”; anise que yande ãca avei, “¡Nde Ëgüe ere tēi vahe eico!” ndehi chira yande pi upe.

²² Esepia, yande rete resendar mbahe aviye nipiratai vahe yandeu, ahe sese rumo yayeroya catu.

²³ Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco.

²⁴ Oime rumo ambuae yande rete resendar ndayayopii vaheerã. Ëgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu secoi.

²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepei-pei peyese peico.

²⁶ Evocoyase que ñepei yande pãhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyembovaha yuvireco sese.

²⁷ Supi eté pe inungar Cristo rete peico. Ëgüe peye ité ñepei-pei chupendar ité peico.

²⁸ Ëgüe ehi Tūpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava p̄itiv̄iisar tasecoi, ambuae ava recocuer reroguata tupri ãgua tasecoi, ambuae ava evocoyase toñehe ñehesa ndicuasai vahe pipe” ehi.

²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco,

³⁰ ndahei opacatu vireco p̄iratasa oporombogüera ãgua yuvireco, iyavei ndahei opacatu ndicuasai vahe ñehesa Espíritu suindar pipe oñehe yuvireco, ndaopacatui avei oicua evocoi ñehesa renducua uca ãgua ambuae ava upe yuvireco.

³¹ Peseca ru Espíritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pẽu.

13

¹ Yepe yande yañeheño tẽise ambuae ava ñehe ndayaicuai vahe pipe, iyavei Tũpa rembiguai ñehe pipe avei viña, ndayasaisuisse rumo ava ipipe, yande evocoyase ãgũe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, ãgũe yahe tẽi yaico.

² Iyavei yepe yamombehuño tẽise Tũpa suindar ñehesa ou vahe yandeu viña, iyavei yepe yaicuase mbahe opacatu icuapirẽhi Tũpa suindar yaico, yarecose avei yande aracuasa opacatu yandeyese, iyavei yepe yande Tũpa rese yeroya pipe yarosirira ivitri guasu senda sui viña, ndayasaisuisse rumo ava ipipe, yande evocoyase ãgũe yahe tupri tẽira yaico.

³ Iyavei yande mbahe opacatu yareco vahe yamboyaho-yaho tupri tẽise ava iparaisu vahe upe viña, iyavei yayoapi ucapa tupri tẽise viña, ndayasaisuisse rumo ava ipipe yaico, ndayande pĩtivii eté evocoyia yande reco agüer.

⁴ Acoi ava iporoaisu vahe, ahe seco mbegũe tupri, secocuer aviye ai eté iyavei ndoporoamotarẽhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté,

⁵ ahe ndovirecoi eté oporomboeteiẽhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe.

⁶ Ndahei mbahe tẽi rese oyembovĩa; ahe rumo oyembovĩa mbahe supi tupri vahe rese.

⁷ Oporoaisusa virecose oñemosañõ opacatu uve, oyeroya vite sese, osãro vite mbahe tupri ichui, iyavei seco mbegũe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tũpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa.

⁹ Esepia niha, yaicua raimi tẽi mbahe iyavei chĩhi raimi tẽi yamombehu Tũpa Ñehengagüer.

¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tẽi vahe yaiporura.

¹¹ Esepia niha, chĩhivahe vite yande recose, yañehe, yandepihañemoñeta, yasenducua mbahe chĩhivahe nungar; yacuacuase ité rumo cute, yaseyapa chĩhivahe yande reco agüer.

¹² Cũritei yande ndayasenducua tuprii Tũpa resendar mbahe, inungar acoi yepiasa pipe yasepia hãvomi tẽi que mbahe; oyeovai eté yaicose rumo, yasenducua tupri catu itera mbahe evocoyase. Cũritei rumo yaicua raimi tẽi mbahe Tũpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaheerã, ahe: Tũpa rese yande yeroyasa, mbahe yande remiario ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

14

Yaseca catura Tũpa suindar ñehesa mombehu ãgua

¹ Peseca catu pe yeaisu tupri água peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu água rese catu ité rumo peicora.

² Esepia, acoi ava oñehe vahe ñehesa ndayaicuai vahe pipe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespíritu pipe.

³ Acoi ava omombehu vahe rumo Tūpa suindar ñehesa yasenducua vahe pipe, ahe oipĩtivii ambuae ava Tūpa rese iyeroya água, oporomonguerēhi catu, oporombovīha catu avei.

⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opīhañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopīhañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe água ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri água, ahese aviyeño oñehe Jesús reroyasar rovaque. Ipipe sui ipīhañemoñeta catura Tūpa rese yuvireco.

⁶ Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbī, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osāha yuvireco.

⁸ Anise co inungar mimbī nomoñehe tupriise vavasave nara yuvireco viña, ndipoi chietera que ava oyemoingatu voi vaherã ovava água viña.

⁹ Ēgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñeheseño tēi eté!

¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa.

¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe.

¹² Pe niha peipota ité pereco vaherã mbahecuasa Tūpa Espíritu suindar yepi. Sese peporandu catu mbahecuasa Espíritu suindar rese opacatu Jesús reroyasar pĩtivii água Tūpa rese yuvirecoi tupri catu vaherã.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri água rese.

¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui.

¹⁵ ¿Mara yahera vo evocoyase? Yayeroquirá yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no.

¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisá, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco.

¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitivii chietera Tūpa rese imbopihañemoñeta catu āgua senducuaēhi pipe.

¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui.

¹⁹ Jesús reroyasar ñemonuhasave rumo aipota catu amombehu vaheã moviromi tēi ñehesa yasenducua vahe ava mbohe āgua setá ñehesa ndicuasai vahe pipe che ñehe rāgüer sui.

²⁰ Che rivireta, pepihañemoñeta eme chñihvahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua.

²¹ Porocuita resendar icuachiapri arachendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe.

²² Evocoyase co ñehesa ndayaicuai vahe pipe oñehese ava Tūpa pñratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar.

²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pñhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu.

²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pñhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco.

²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramosse yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pñhu pendar osapucui pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco.

²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoyase osenducua ucara iñehe ava upe oico.

²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe.

²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pñhu pendar oyapisaca tupri rase yuvireco ‘¿supi eté pñha?’ ohesave.

³⁰ Que ñepeipei oñehe vitese Tūpa oicua ucasse mbahe ambuae ava upe, topituhuño yipindar oñehe vahe, ambuae evocoyase toñehe pēu.

³¹ Evocoyase ěgüe peyera peñehe ñepei-pei opacatu ambuae osendu vahe mbohe āgua iyavei imonguerēhi catu āgua.

³² Acoi omombehu vahe ñehesa Tūpa suindar, ahe oicatu oñehe mombituhu āgua.

³³⁻³⁴ Esepia, Tūpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhasave. Esepia, ěgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe āgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuaíta rupi.

³⁵ Oicua potase que mbahe, iya omer upe oporandura güētave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa.

³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tupri co aicuachía vahe imondo pēu, ahe yande Yar porocuaíta resendar.

³⁸ Ahe ndoyapisaca potaise rumo che ñehe rese, iñehe rese evocoyase ndapeyapisacai chira.

³⁹ Sese, che rivireta, peyemonguerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe āgua.

⁴⁰ Peyapora rumo opacatu mbahe ñepei-pei pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsĩrosa resendar pēu mombehu vahecuer rese. Co ñehesa niha peipisi. Ipipe sui avei niha peyemoviracua peyese.

² Seroya pipe niha peñepisiro peico peyemoviracuase sese. ěgüe ndapeyeise rumo, peroya tupri tēi.

³ Acoi ñehesa aipisi vahe, opa uca aicua pēu. Esepia, ahe aviye catu vahe: Cristo omano yande angaipa repirã Tūpa Ñehengagüer icuachiapri rupi eté

⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei.

⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe.

⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūritei; amove rumo ambuae opa omano yuvireco.

⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya āgua.

⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco āgua viña. Esepia, che yipindar seroyasar aseca-seca catu vahe mara-mara tēi sereco āgua.

¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che

aporaviqui catu ité opacatu ambuae apóstol sui. Ndahei rumo cheyesui tēi ēgüe ahe vichico, Tūpa rumo oporovasasa pīpe secoi che rupi.

¹¹ Ndapepīhañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepīhañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco.

¹³ Ndocuerayevise ité rumo ava omano vahe viña, Cristo avei evocoyase ndocuerayevii chietera viña;

¹⁴ iyavei Cristo ndocuerayevise viña, ore secocuer oromombehu vahe evocoyase ēgüe ehi tēi etera viña. Iyavei pe yeroyasa Cristo rese ēgüe ehi tēi aveira viña.

¹⁵ Acoi ēgüe ehise ité rumo viña, ore avei evocoyase oroñehēño tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tūpa nombogüerayevii chiaveira Cristo viña.

¹⁶ Ēgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevii chietera viña;

¹⁷ Tūpa rese pe yeroyasa evocoyase ēgüe ehi tēi vahe itera viña; angaipa pīpe viteño tēi evocoyase pe recocuer viña.

¹⁸ Iyavei acoi ēgüe ehise ité viña, evocoyase omano vahe Cristo reroyasar, ahe avei ocañi tēira viña.

¹⁹ Ndipoise yasāro vaherā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe.

²¹ Esepia, ñepi ava rembiapo sui oime manosa yandeu. Evocoyase ñepi ava rembiapo sui avei yacuerayevira.

²² Esepia, inungar acoi Adán rembiapo ai sui ava opacatu omano yuvireco, ēgüe ehi aveira Cristo rembiapo sui opacatu ava sese yuvirecoi vahe virecora tēcovesa yuvireco.

²³ Ñepi-pe yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi.

²⁴ Ahese oura ari ipa vahe cute. Yipindar rumo Cristo omocañipara opacatu seco pīrata ēgüe ehi tēi vahe. Ipare omondora opovri pendar Vu Tūpa upe.

²⁵ Ahe rane ité rumo opacatu oporocuirā oico acoi Tu opase voi eté omondo opacatu yamotarēhimbar ipovrive.

²⁶ Ahese ipa manosa opa itera.

²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive.

²⁸ Evocoyase, opase mbahe imondosa ipovrive, ahe ae evocoyase oye-mondora Vu Tūpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pīha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco?

³⁰ Iyavei ore no, ¿mahera ru evocoyase oroyemondora mbahe tēi upe ari rupi viña?

³¹ Supi eté, che rivireta, ari yacatu aviye che amano vaherã opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose.

³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase vïrovara pe reco tuprisa” ehi vahe.

³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pëu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pãhu pendar oimera oporandu vahe: “¿Mara ehira pãha omano vahe ocuerayevi irise yuvireco coiye? ¿Mara ehi angahura pãha setecuer ahese yuvireco?” ehira yuvireco oyeupe.

³⁶ ¡Pe aipo peye-peye tēi peico! Esepia, mbahe rãhi yañotise, ituyu rane ité sori água.

³⁷ Yañotise mbahe, sãhi rane ité yañoti; ndahei ihi opacatu reseve yañoti.

³⁸ Ipare rumo Tũpa omondo ahe mbahe rãhi upe ihiguã güemimbotar rupi, iyavei ambuae mbahe rãhi yacatu omondo ihiguã.

³⁹ Ndahoyoyai rumo que ñepe mbahe miti hi ambuae mbahe miti hi rese. Ëgüe yahe avei yande yaico vahe ambuae ité yande rete mbahe mimba sui; vïrai rete ambuae ité iyavei pira rete ambuae tēi no.

⁴⁰ Ëgüe ehi avei niha, oime ìva pendar rete, ìvive ava yuvirecoi vahe rete avei no. Ìva pendar rete catuprigüer rumo ndahoyoyai eté ìvi pipendar rete rese.

⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepe yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehögüer, ahe ituyu vaherã. Ocuerayevise rumo ndituyu iri chietera; apirëhi vaherã ité secoira.

⁴³ Tehögüer ñotimbri nimomburusai vahe; coiye ocuerayevise rumo, imboeteipri ité seci. Acoi ava rehögüer oñoti vahe yuvireco, nipirata iri eté oico, coiye ocuerayevise rumo, ipirata itera.

⁴⁴ Supi eté, acoi ava rehögüer ñotisa vahe, ahe co ìvi pipendar tēi setecuer. Ocuerayevise rumo, setecuer ìva pendar secoira. Esepia, oime ité ìvi pendar setecuer, oime avei ìva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tũpa secove água co ìvi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa ìva pendar ava upe imbou água.

⁴⁶ Yipindar oime co ìvi pipendar tecovesa. Ipare rumo oime co tecovesa ìva pendar yandeu.

⁴⁷ Ëgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar.

⁴⁸ Inungar yipindar ava ivi suindar, Ëgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, Ëgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; Ëgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaherā, ndoipisii chira tecocuer apirēhi vahe.

⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.

⁵² Mimbī moñehese voi yande resapihara inungar yande resapiqui vahe, Ëgüe ehira secuñarosapa yande rete. Aheseve avei omano vahe ocuer-ayevipara apirēhi vaherā ité yuvireco; yande evocoyase nayamano vitei vahe, opaño tēira yande rete secuñarosa.

⁵³ Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco.

⁵⁴ Ëgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe.

⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi.

⁵⁶ Angaipa niha inungar mbahe popiar omoime vahe manosa yandeu. Moisés porocuita aracadendar evocoyase ombou pīratasa angaipa upe angaipa aposar mocañi uca āgua.

⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei Ëgüe ehi tēi vahe.

16

Porerecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingū yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico.

³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe.

⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve.

⁶ Aviyeteramo apita pucumira pe piri, anise aviyeteramo pe piri ité mbahe porañehi che mombitañora. Ipare pe che pītiviiñomira peye eipeve sui ambuae tecuave che so āgua rese.

⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

⁸ Che rumo cūrītei apītaño vitera cohava Efeso ve, asepia ranera Pentecostés pieta.

⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar.

¹¹ Tipo eme ñepei yepe sepia potaēhisar yuvireco, iya rumo peipitivi catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrītei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosāño catu pe cuaita upe. Peicoveño itera Tūpa pīratasa pipe.

¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri āgua yuvireco no.

¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pāhu pendar Estéfanos, Fortunato iyavei Acaico cohava oyepotase che mbovīha yuvireco. Esepia, ahe oyapo ité pe ndapeicatu tupri vahe apo yuvireco.

¹⁸ Ahe che monguerēhi catu yuvireco, ěgüe ehi avei revo pēu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave yuvireco, ahe avei ombou omahenduhasa yande Yar rer pipe yuvireco pēu.

²⁰ Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pēu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi.

²⁴ Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMONŪVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu.

² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru seci, ahe yande paraisuereco vahe iyavei ombou vahe yande mbovaha āgua yepi.

⁴ Ahe niha yande mbovahaño opacatu yande paraisusa pipe, yande avei evocoyase yaicatura ava iparaisu vahe mbovaha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe.

⁵ Esepia, inungar Cristo imombaraisupri seci, ēgüe yahe aveira imombaraisupri yaico yaicose sese. Cristo sui avei rumo oime itera vihasa yandeu.

⁶ Ore paraisu pe mbovaha āgua ‘toñepisiro yuvireco’ ore yapave. Iyavei Tūpa ore mbovaha pe mbovaha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose.

⁷ Ore oroyeroya ité Tūpa pe pītivii āgua rese. Esepia, oroicua ore paraisu agüer nungar tupri peico, ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndorocatu iri eté oroñemosa ore pīrataēhise chupe, seni orepihahñemoñeta: “Yamanoño itera co mbahe-mbahe tēi pipe” orohe viña.

⁹ Supi eté oromoha ore cañi tēi āgua viña, ēgüe ehi rumo oreu oroyeroya catu āgua Tūpa rese, ndahei oreyese tēi. Esepia, ahe oporombogüerayevi vahe seci.

¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui,

¹¹ pe ore pītivise peye pe yeroqui pipe. Ahese setá, “Aviye ndeu” ehira yuvireco Tūpa oporopītivisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihahñemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ēgüe orohe, ndahei ava co ivi pipendar mbahecuaasa pipe tēi.

¹³⁻¹⁴ Esepia, che ñehe aicuachía vahe imondo pëu, aicuachía ñepi reseve pe yeroqui tupri āgua, pe senducua tupri āgua avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihahñemoñeta aso vaheerā ñuvirío yupagüer pe repia, pe mbovaha catu āgua viña. Ēgüe ahe ité, che pihahñemoñeta pe piri

rane che so ãgua che guatasa rupi Macedonia ve. Ichui ayevi pota iri pe piri viña, ipare pe che p̃tivimira peye ivi Judea rupi che so ãgua rese viña.

¹⁷ Ndachepihañemoñeta voiño t̃i che so ãgua, ndahei iporombopa serai vahe aico “che co mbahe ayapora” ehi t̃i vahe, ipare rumo nomboaviyei eté.

¹⁸ T̃upa rumo oicua ore ndahei, “Aviye” ore he voisa p̃u, ahe pipeve avei, “Aní” ore hesa.

¹⁹ Esepia, T̃upa Rahir Jesucristo avei ñepeí reseve vahe ité yayeroyá vahe sese. Ahe secocuer niha oromombehu oroico p̃u, che, Silvano, Timoteo avei.

²⁰ Esepia, opacatu T̃upa remimombehug̃er imboaviyesa sese. Sese niha serer pipe, “Èg̃ue tehi” yahe T̃upa upe imboeteisave.

²¹ T̃upa niha opacatu yande momirata seseño ité yande reco ãgua, yande poravo avei.

²² Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehug̃er rupi tupri ité mbahe amondora chupe yuvireco curi’ oyapave.

²³ T̃upa niha oicua acoi ndayevise Corinto ve pe piri, èg̃ue ahe p̃u mbahe aviye ãgua rese.

²⁴ Ndahei opocuai pota mbahe pe rembieroyarã rese. Esepia, pe T̃upa rese pe yeroyasa pipe peyemoviracuaño ité Cristo rese. Ore rumo oroipota pe p̃tivisa pe yemboṽiha ãgua.

2

¹⁻² Co rese ndaso catu iri pe piri. Esepia, che aso irise pe piri ndopomboṽiha catui chira viña, ¿ava vo evocoyase che mboṽihara viña? Pe ité niha che mboṽihasar peico.

³ Sese che aicuachía ñehesa ip̃rata vahe p̃u cuese. Esepia, ndaipotai eipeve che sose, che mboṽihañhi ãgua peye. Pe rumo iya ité che mboṽiha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese.

⁴ Supi eté che aicuachiasa che ñeha p̃u, che ae ayep̃hamboasi ité, ayaseho avei. Esepia, aicuachía vahe p̃u ndahei pe mboṽihañhi ãgua, che rumo aicuachía ‘toicua che guaisu eteprisa yuvireco’ che yapave p̃u.

Oime ñerosa ava upe mbahe sembiavi rese

⁵ Acoi yande rivri omoime uca vahe vihar̃hisa co mbahe t̃i apo pipe, ndahei che güeraño ndache mboṽihai, pe avei rumo seni opacatu èg̃ue peye. Che, “Seni” aipo ahe ité p̃u. Esepia, ndaipotai che ñeha rasi ãgua.

⁶ Co mbia upe setá mbahe peiporara uca ité, evocoi rupive iya èg̃ue peye chupe.

⁷ Co suive ité rumo peñerora chupe, peip̃tiṽi aveira. Esepia, aviyeteramo oṽihar̃hisa pipe oyemocañi t̃ira.

⁸ Sese c̃uritei opomonguer̃hi ité pe mboyecua iri ãgua pe poroaisusa chupe.

⁹ Cuese ambuae che ñeha aicuachía co che pe mbohesa resendar p̃u pe recoãha ãgua, “¿Oyapo itera piha che remimombehu yuvireco?” ahe p̃u.

¹⁰ C̃uritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque èg̃ue ahe pe raisusave

¹¹ Carugar yande mbopañhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui op̃ihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña.

¹³ Nambohe catui rumo che p̄ihañemoñetasa. Esepia, ndasepiai eté yande r̄ivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe t̄ei recopi

¹⁴ Aviye yande Ru T̄upa upe. Esepia, yande Cristo rese yaico vahe yande renose oamotar̄h̄imbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe s̄iacua vahe yas̄etu vahe opacatu rupi.

¹⁵ Esepia, inungar itaisi s̄iacua vahe opacatu rupi, ãgüe yahe avei yande T̄upa upe Cristo yande reropov̄ehese yaico ava ip̄is̄iropir̄ã upe, ava ocañi t̄ei vahe r̄ã upe avei.

¹⁶ Ahe ava ocañi t̄ei vahe r̄ã upe evocoi ñehesa yaru vahe inungar cañi t̄eisa resendar; ava ip̄is̄iropir̄ã yuvirecoi vahe upe rumo evocoi ñehesa ombou tecovesa. Yande ae t̄ei rumo ndayaicatu evocoi nungar mbahe apo.

¹⁷ Ore rumo ndahei setá ambuae ava nungar t̄ei oroico. Esepia, oromombehuse T̄upa Ñehengagüer, ndahei mbahe p̄isi ãgua t̄ei rese ãgüe orohe, ore rumo ore p̄ihañemoñeta tuprisa p̄ipe oromombehu co ñehesa T̄upa rovaque Cristo rese ore recosa p̄ipe. Esepia niha, ore semimondo oroico.

3

Ñehesa T̄upa remimbotar ip̄iasu vahe resendar

¹ Ore aipo orohese, aviyeteramo p̄eu ndoyavi oroyecomboivate ai pota iri viña, ãgüe ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vahe r̄ã p̄eu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi.

² Esepia, pe ité inungar ore rembicuachía ore recocuer resendar ore oroipota vahe, ãgüe peye peico ore p̄iha p̄ipe. Esepia, opacatu ava pe reco tupri repiase, oicua ore poraviqui tuprisa pe p̄ahuve yuvireco.

³ Pe niha pemboyecua pe reco tupri p̄ipe ore rembiapo Cristo porocuita p̄ipe pe p̄ahuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta p̄ipe ité icuachiapri itape rese, Esp̄iritu T̄upa oicove vahe suindar p̄ipe rumo yapopri ava p̄iha p̄ipe.

⁴ Oroyeroya ité co rese T̄upa rese ore yeroyasa p̄ipe. Cristo niha ãgüe ehi oreu.

⁵ Ndahei oreyesui t̄ei oroicatu co mbahe apo. T̄upa rumo ombou oreu opacatu co mbahe apo ãgua.

⁶ Ahe niha ombou op̄iratasa oreu güemimbotar ip̄iasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyeñehisa p̄ipe yamano t̄eira viña. Ahe rumo Esp̄iritu T̄upa suindar p̄ipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei T̄upa reco porañetesa p̄ipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeno oso viña. Ahe Moisés recosendar porocuita ava upe manosa t̄ei güeru vahe iporañete ai eté yip̄indar oico viña.

⁸ ¡C̄uritei rumo iporañeté catu ité ñehesa T̄upa remimbotar ip̄iasu vahe resendar Esp̄iritu Santo ombou vahe yandeu!

⁹ Supi eté yepe iporañete ai eté Moisés porocuita acoi güeru vahe manosa yandeu viña, ¡co ñehesa ip̄iasu vahe rumo yande reco moingatu vahe iporañete catu ité ichui!

¹⁰ Esepia, co yipindar porañete vahe ndahoyoyai ñehesa cūrteindar porañete catu vahe rese.

¹¹ Acoi mborocuaita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité.

¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe.

¹⁴ Ēgüe ehi ahe ndosenducua ucai eté ndoyavii sovapisa vite vahe cūrteit, ēgüe ehi vite oyerouise Moisés porocuaita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe.

¹⁵ Ēgüe ehi vite cūrteit, senducuaēhi pipe Moisés porocuaita pipe oyerouit viteño tēi eté yuvireco inungar sovapisa vite vahe.

¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua.

¹⁷ Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi.

¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espiritu secoi vahe ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese.

² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñhengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave.

³ Yavaise co ñehesa pĩsirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe.

⁴ Esepia, supi eté caruguar rereciar inungar nomboesapisoit vahe ahe ava yuvireco, sese ndosenducua ucai chupe ‘toviroya eme ñehesa Poropĩsirosar Cristo resendar porañete vahe’ oyapave. Ahe niha Tūpa recocuer mboyecuar secoi.

⁵ Esepia, oromombehuse ñehesa pēu, ndahei oreyses tēi. Ore rumo, “Jesuscristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave.

⁶ Esepia, Tūpa aipo ehi aracahe: “Toime tesapesa pĩtumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retocuer pipe, inungar-ra que mbahe sepĩrusu vahe yapocatupri ivi mbahe-moinda ndipocopiit vahe pipe tēi viña. Ipipe toicua opacatu ava yuvireco co pĩratasa Tūpa suindar, ndahei oreysesuindar tēi.

⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté oreyesui.

⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo.

¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave.

¹¹ Esepia, ore recove vitesese imboguaipri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese.

¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe.

¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora.

¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi.

¹⁷ Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaheerã.

¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepai vahe, apirēhi vaheerã ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi.

² Supi eté yaicove vitesese co yande rete ndipocopi vahe rese, yande poāsese pipe yaipota ité yande rete iva pendar.

³ Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira.

⁴ Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaipotai yande hã nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vaheerã yande resendar tecovesa piasu, ndopai vahe rereco āgua” yahe.

⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesese yande rete rese, ndayaico vitei eté ivave yande Yar piri.

⁷ Esepia, cūritei yande Yar rese yeroyasa pipe ité yaguata, ndahei mbahe yande rembiepia pipe.

⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave.

⁹ Sese yaseca yande Yar mboviha āgua yepi, que yaicove vitesse yande rete rese, anise que yasēse ichui.

¹⁰ Esepia, yande opacatu yañecuavēhera Cristo rovai iporandusave yaipisi vaherā ñepe-pe mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesse.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pihañemoñeta rerova Tūpa rese ipihañemoñeta āgua yuvireco. Tūpa niha ore cua tupri, tapeicua avei ru ore recocuer.

¹² Ndoronehei pēu ore yemboivate ai āgua tēi. Ore rumo oronehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mboyevi āgua. Esepia, ahe ndahei ava piha pipendar rese oyemboviha yuvireco.

¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgüe orohe.

¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vaherā yuvireco viña.

¹⁵ Cristo niha omano opacatu yande repirā. Yande yaicove vite vahe evocoyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese.

¹⁶ Sese, iya ité oreu ore pihañemoñetaēhi iri āgua que ava rese, ava tēi pihañemoñetasa rupi. Yepe yipindar inungar ava ivi pipendar tēi ēgüe orohe ore Cristo rese ore pihañemoñeta oroico viña, cūrtei rumo ēgüe ndorohe iri orepihñemoñeta sese.

¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu āgua ambuae ava upe secocuer moingatu āgua avei.

¹⁹ Aipo oyapave aipo ehi: Tūpa ombou Guahir Cristo co ivi pipe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu āgua ava upe.

²⁰ Ore evocoyase Cristo porocuita rupi oronehe vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pēu.

²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco ivi āgua Cristo rupi yande guatase.

6

¹ Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pēu.

² Esepia, Tūpa aipo ehi icuachiapri aracahendar pipe: “Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivi” ehi.
¡Ahe ari oyepota cute! iyavei oime ité cūrtei ñepisirosa.

³ Ore niha ndoromboyecuai ore reco ai ava pãhuve. Esepia, ndoroipotai que ava Tũpa upe ore poraviquisa rese ñehe rai ãgua yuvireco.

⁴ Ore rumo oromboyecua ité Tũpa rembiguai ore recosa. Esepia, ore reco mbegüesa pipe oroñemosañõ mbahe-mbahe tẽi upe yepe ipane mbahe oreu viña, iyavei mbahe yavaise;

⁵ ãgüe orohe avei ore nupa-nupase, ore roquendase avei iyavei omonguerẽhise ava rehi ore amotarẽhi ãgua yuvireco. Oroyapo avei mboraviqui ipĩrata vahe; amove ndoroquei eté, setá rupi ndoreriepoi tẽi avei.

⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. ãgüe orohe ité niha Espiritu Santo pĩratasa pipe, ore poroaisusa supi eté vahe pipe avei.

⁷ Ore remimombehu supi eté vahe pipe iyavei Tũpa pĩratasa pipe avei oroico. Ore niha ore reco tupri pipe orosecopi mbahe-mbahe tẽi. Ipipe avei oroyoepe.

⁸ Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo ñehe-ñehe tẽi ore rese yuvireco yepi no. Iyavei amove oporombopa tẽi vahe nungar ore rereco yuvireco, yepe oromombehu tẽi mbahe supi eté vahe viña.

⁹ Amove ndicuasai vahe nungar tẽi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tẽi, ndore yuca eté rumo ipipe yuvireco.

¹⁰ Amove ndoyavii ndorovihai vahe yuvireco chupe, ore rumo orovihaiño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tũpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pẽu iyavei pe raisu ãgua orovireco ore piha pipe tuvichá pe rese.

¹² Ndorehãpisi pe rese pe raisu ãgua; pe rumo ãgüe ndapeyei ore rese.

¹³ Che niha opovireco che rahir nungar; pemboyevi avei catu ore pe raisusa oreu.

Tũpa oicove vahe rẽta nungar ité yaico

¹⁴ Ndapeyovaichoi chira ava Tũpa ndoviroyai vahe rese. Esepia, ndoyoyai eté pe pihañemoñetasa. ãgüe ehi eté teco ñvisa ndoyoyai teco rai rese inungar tesapesa ndoyoyai pĩtumimbi vahe rese.

¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tũpa reroyasar Tũpa reroyasarẽhi rese yuvireco? ¡Aní eté!

¹⁶ ¿Oyoya tie mbahe rahanga tẽi Tũpa rẽta rese? Yande niha Tũpa oicove vahe rẽta nungar ité yaico. Ahe ité niha aipo ehi icuachiapri pipe aracahe: “Che aicovera seseve iyavei aguatarã ipãhu rupi yuvireco; che avei aicora iTũpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“ Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei aipo ehi yande Yar güeco pĩratasa pipe” ehi.

7

¹ Che rivireta, che rembiaisu, co Tũpa remimombehu imboaviyepirã yan-deu. Sese yande yamoingatu tuprira yande recocuer chupe yarecoẽhi ãgua

yande retecuer iyavei yande espíritu mbahe tēi pīpe. Iyavei Tūpa mboeteisa pīpe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pīsi peye pe pīha pīpe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei.

³ Ndahei pe recocuer rese che ñehe raisave aipo ahe pēu. Supi eté yipīndar, “Che pīhave ité opoaisu, pēu nara avei aicove, amano aveira pēu” ahe acoi pēu cuese.

⁴ Ayeroya ité pe rese, pe rese avei avīharete. Che paraísu pāhuve ayemonguerēhi iyavei ayembovīhareteño.

⁵ Ore yepotasa suive rumo Macedonia ve, ndopītuhui eté mbahe tēi ore sui; oime vīteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepīhamondiisa.

⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase.

⁷ Ndahei rumo Tito yepotaseño orovīharete, ahe avei oyembovīha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe vīharēhi agüer cheu, pemahenduhāño ité aipo che rese pe che raisusave yepi. Aipo nungar renduse ayembovīhá catu.

⁸ Yepe che ñehe aicuachía vahecuer imondo pēu ndape mbovīhai viña, cheu rumo aviyeño cūrītei. Yipīndar rumo ayepīhamboasi aicuase che ñehe tasí iteanga vahe pēu; chíhi rupi tēi rumo ndapevīhai peyeroqui pare sese.

⁹ Cūrītei che avīhareté. Ndahei rumo pe vīharēhisa rese ēgüe ahe. Esepia, co pe vīharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehe ndoyapoi mbahe naporai vahe pēu.

¹⁰ Esepia, co nungar vīharēhisa Tūpa oipota vahe yande angaipa mboasi uca, chupe yande yevi āgua. Ipīpe sui niha yañepīsiro yande pīhañemoñeta rerovaēhisa pīpe. Co ivi pīpendar tēi vīharēhisa rumo manosa tēi vīreco yandeu.

¹¹ Pe rumo peñemosañño pe vīharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pīpe oime vahe evocoi Tūpa remimbou pe vīharēhisa sui cute! Supi eté rumo, peyapīsaca iyavei pe querēhisa pīpe peyoepi, pemboasi pe pīha pīpe ité co mbahe tēi oimese pe pāhuve, iyavei peyembosiquīye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepipi ité evocoi mbahe tēi aposar peyesui. Che aicua cute pēu ndahei pe pīha rupi co nungar mbahe tēi oimese.

¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque.

¹³ Co rese ore oroyembovīharete.

Iyavei orovīha catu Tito yembovīhasa repiase. Esepia, pe avei niha opacatu pembovīha catu ité pe recocuer pīpe.

¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipīpe nachí eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe.

¹⁵ Iyavei cūrītei ahe pe raisu catu ité pe rese omahenduhase opacatu pe poreroyasa rese. Iyavei peipīsī tupri ité imboeteisave sereco.

¹⁶ ¡Ayeroya ité pe rese, sese avīha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrītei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi.

² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco.

³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco.

⁴ Ahe, “Ore avei catu toroipitivii ambuae Tūpa reroyasar” ehi yuvireco.

⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco.

⁶ Evocoyase ore aipo orohe Tito upe pēu: “Tomboyeapī iri co porerecosa monuha āgua ava upe” orohe. Esepia, yipindar ahe orose pe pāhuve, ahe pe pīitivii imboipi āgua.

⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa.

⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo.

¹¹ Cūrītei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi.

¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pītiviiisa pipe yuvireco” ndahei rumo pēu.

¹⁴ Cūrītei mbahe pe rembiereco eta pipe peipīitivii catu ambuae ava ipane vahe mbahe yuvireco chupe. Virecomise mbahe, ahe avei pe pītiviiira yuvireco pēu mbahe ipanese. Evocoyase pe recocuer oyoya tupri itera.

¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi.

¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pīsirosa rese yuvireco.

¹⁹ Sese opacatu oiporavo yuvireco ore rupi iguata āgua ore pītivii vaherā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oroporopīitivii yuvireco’ ore yapave.

²⁰ Ore ndoroipotai que ava oñehe tẽira ore rese yuvireco co porrecosa monuhasa pĩpe sui.

²¹ Esepia, ore oroyapo pota mbahe aviye vahe, ndahei Tũpa rovaque güeraño, opacatu ava rembiepiave avei.

²² Supi avei oromondo ambuae yande rĩvri. Ahe omboyecua ité oreu oquerẽhisa opacatu mbahe güembiapo pĩpe. Ahe cũritei iquerẽhi catu ité. Esepia, oyeroya ité pe rese.

²³ Acoi oporanduse que ava Tito rese yuvireco pẽu, “Ahe oyoya Pablo rese oporaviqui vahe pe pĩtivii ãgua” peyeñora. Acoi oporanduse avei ambuae yande rĩvri rese yuvireco pẽu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe.

²⁴ Sese, pe recocuer cua ãgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovichase pe recocuer rese yuvireco.

9

Porrecosa imonuhapri Jesús reroyasar upe

¹ Porrecosa imonuhapri Jesús reroyasar upe nara rese rumo nañehe iri pẽu.

² Esepia, che aicua pequerẽhi ité ipĩtivii ãgua. Evocoyase che viharetesa pĩpe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pĩtivii ãgua cuese ambuae araviter suive yuvireco” ahe yuvireco chupe. Evocoyase pequerẽhise ité ipĩtivii ãgua, ahese setaño ité oyemonguerẽhi yuvireco.

³ Che rumo amondo co yande rĩvri yuvireco pẽu cũritei ‘ẽgũe tehi tẽi eme che ñehesa aviye vahe sesendar yuvireco’ viya pẽu. Pe yemoingatu tupri ãgua ité aipo ahe pẽu;

⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Ẽgũe peyese ore mochi guasu uca tiẽtera peye. Esepia, che ayeroya ité pe rese. Pe avei evocoyase pechĩra.

⁵ Sese che pihañemoñeta yipindar añehe co mbosapĩ yande rĩvri upe yuvireco, ahe ranei ore renonde yuviraso ãgua pe pĩri pe pĩtivii ãgua co porrecosa aviye vahe monuha ãgua rese, acoi cuese pe remimombehugũer rupi. Evocoyase ahe pe porrecosa pe remimonuha opara pemoingatu tupri ité pe avagũer mboyecua ãgua, ndahei chira rumo pe recatẽhisa pĩpe.

⁶ Peyemomahenduha co rese: acoi noñoti atĩmi vahe mbahe, chupe movĩromi tẽi avei iha; acoi oñoti ati vahe rumo mbahe, ahe setá catu avei iha chupe.

⁷ Ñepeipei iya opihañemoñetasa rupi omondora oporrecosa Tũpa upe yuvireco, ndahei chira opĩha vĩracuasa pĩpe tẽi iyavei ndahei chiaveira ambuae ava ocuai pĩratasa pĩpe tẽi. Esepia, Tũpa osaisu ava oviharetesa pĩpe omondo vahe oporrecosa chupe.

⁸ Tũpa niha oicatu opacatu mbahe aviye vahe mondo ãgua pẽu ari yacatu rupi pereco vaherã opacatu mbahe ipane vahe pẽu iyavei sumbirer pĩpe opacatu ambuae mbahe aviye vahe rese pe poropĩtivii ãgua.

⁹ Inungar icuachiapri pĩpe aipo ehi: “Ahe iporereco ai iparaisu vahe rese yepi. Ahe mbahe aviye vahe sembiapo nocañi chietera” ehi.

¹⁰ Tũpa niha ombou mbahe rãhi ava remitĩra, mbahe semihura avei. Sese ombou catura mbahe pẽu iyavei ombouvicha catura pe rembiapo aviye vahe ava pĩtivii ãgua.

¹¹ Tūpa ombou catura opacatu mbahe pe rembierecorã ava upe imondo catu ãgua pe avasa pipe. Ore orovirasose porerecosa pe remimbou yande rivireta upe, ahe evocoiyase, “Aviye ndeu” ehira Tūpa upe yuvireco.

¹² Esepia, co pemondo vahe yande rivireta pĩtivii ãgua, ndahei peipĩtivii mbahe ipane vahe rese güeraño, ichui avei niha, “Aviye Tūpa upe” ehira yuvireco.

¹³ Ahe evocoiyase omboeteira Tūpa yuvireco. Esepia, co pe poropĩtiviiisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe.

¹⁴ Evocoiyase ahe oyoerquirira pe rese iyavei pe raisu eteprira yuvireco. Esepia, Tūpa pe pĩtivii eté oporovasasa pipe.

¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri ãgua!

10

Pablo cuaita apóstol seco ãgua

¹ Che Pablo añehe Cristo poroaisusa, seco asiẽhisa pipe avei pẽu. Amove ava pe pãhu pendar, “Seco mbegüemi tẽi yande pãhuve oicose, amombri güecose rumo oñehe pĩratá iteanga” aipo ehi tẽi yuvireco cheu viña.

² Che rumo asose pe repia, ndaipotai che pĩratasa mboyecua ãgua pe pãhu pendar upe. Amove rumo ava pe pãhu pendar ipihañemoñeta: “Oyapo mbahe co ivi pipendar pihañemoñetasa rupi tẽi” ehi yuvireco cheu. Sese che ayemoingatũño ité evocoi nungar ava upe añehe pĩrata vaheerã.

³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar.

⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pĩratasa mbahe tẽi seco pĩrata vahe recopi ãgua ava aracuada tẽi recopi ãgua avei.

⁵ Ahe ipipe ore opa orosecopi yepoepi-episa iyavei opacatu semira-mira tẽi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri ãgua yuvireco.

⁶ Iyavei ore oroyemoingatu ité opacatu ndiporeroyai vahe recocuer reroyi ãgua. Pe rane rumo peroya tuprira.

⁷ Pe rumo pemaheño tẽi ahe ava recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco.

⁸ Yepe ayecomboivate che mborerecuasa rese pẽu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua.

⁹ Aní chira, “Pablo yande mbosiquiye pota güembicuachía pipe” peye cheu.

¹⁰ Esepia, amove ava pe pãhu pendar, “Oñehe oicua chía vahe ombou yandeu, ahe ipĩratá, yavai avei yandeu; ahe ité rumo aní angai vahe secoi yande pãhuve iyavei iñehe ãgüe ehi tẽi vahe” ehi yuvireco cheu.

¹¹ Toicua catu ru yuvireco: eipeve oroso irise, inungar amombehu che rebicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tẽi oñehe vahe recocuer rese. Esepia, omboyoyase oyese, ndoyapisacai eté yuvireco.

¹³ Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei.

¹⁴ Ore rumo ndoroyapirasai ore cuaita mombehusa icuachía pēu. Esepia, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pēu.

¹⁵ Ndoroyapirasai avei ore ñehes pipe ambuae ava poraviquisa sui tēi. Ore rumo, orosāro ore oroporaviqui catu vaherā pe pāhuve Tūpa rese pe yeroyasa rupi. Ndoroyapirasai avei rumo ore cuaita.

¹⁶ Iyavei orosāro ñehesa pīsīrosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese.

¹⁸ Esepia, acoi ava “che aico tupri” ehi vahe ndahei ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

11

Pablo iyavei apóstol angahu tēi yuvirecoi vahe

¹ ¡Peñemosa iriñomi tēira cheu co che ñehes ndayaracuai vahe nungar pipe che ñehese!

² Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vaherā pe reco maranehisa pipe, inungar cuñatai ndaseco marai vahe imondopri cuimbahe upe imenda āgua.

³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova āgua Cristo mboeteisa supi eté vahe sui.

⁴ Esepia, peñemosaño ava oñehes vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pīsīrosa resendar peipisi avei ndoyoyai vahe ore pēu oromombehu vahe rese.

⁵ Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui.

⁶ Yepe ndayembohei che ñehes tupri āgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pīsīrosa resendar pe cheu imboepi āgua; pe recocuer mboivate catu āgua rumo Tūpa rovaque ēgüe ahe che reco yemominisa pipe. ¿Mbahe tēi pīha ayapo ēgüe ahese pēu?

⁸ Aipisi ambuae ava Jesús reroyasar sui guarepochi, pe recocuer rese che poraviqui āgua.

⁹ Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. Ēgüe ahe che pepoisupave pe mañecoēhi vichico. Ndopomañecoi chietera niha mbahe ipanese cheu.

¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi vīrocua vaherā co che vīharetasa che sui yuvireco.

¹¹ ¿Mbahe rese pīha aipo ahe pēu? ¿Pe raisuēhisave pīha? ¡Tūpa rumo oicua che pe raisusa!

¹² Ayapoño itera rumo co mboraviqui cheu imboepiēhisa pipe vichico co ambuae pe pāhu pendar ava pe mbopaēhi āgua yuvireco. Esepia, che nungar yuvirecoi pota tēi viña.

¹³ Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco.

¹⁴ Yaicua niha Carugar rerecuar oporombopa. Esepia, oyeapo inungar Tūpa rembiguai amove.

¹⁵ Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañeheño ayase ndayaracuai vahe nungar, che avei evocoyase tayeecomboivateño vichico.

¹⁷ Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe.

¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera.

¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe.

²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe reroirosar, que pe rova pete-petesar avei.

²¹ Che chīsa pipe aipo ahe co imombehu, jore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ěgüe ahera. Aipo ahese rumo aviye ndayaracuai vahe nungar aico.

²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico.

²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco.

²⁴ Cinco yupagüer judío che nupá iteanga treinta y nueve tupri tucumbo pipe yuvireco.

²⁵ Mbosapi yupagüer che nupasa ivira pipe, ñepei rupi evocoyase che api-apisita ita pipe. Mbosapi yupagüer avei oñeapiviñi iar ipive che guatasa rupi cheu, ñepei pñtu, ñepei ari avei avevui tēi para guasu aviter rupi vichico.

²⁶ Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico.

²⁷ Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; sōhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese.

²⁹ Oimese que oiporara vahe mbaherasicuer, che avei ayandu co mba-herasisa. Acoi que oimese oyavi uca vahe mbahe, che moñemoiro uca.

³⁰ Iyase che yeecomboivate ai ãgua cheu, co mbahe omboyecua vahe che pĩrataẽhisa rese ayecomboivate aiño itera.

³¹ Yande Yar Jesucristo Ru Tũpa, ahe imboeteipri apirẽhi secoi vahe, ahe oicua aipo che hesa supi tupri vahe.

³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco va-herã che roquenda ãgua yuvireco viña;

³³ oime rumo ava iruova guasu pipe che mogüeyi vahe tecua ãchisa metana rupi yuvireco. Ëgüe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tẽi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui.

² Che aicua mbia Cristo reroyasar, omomba cũritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tũpa rumo oicua.

³⁻⁴ Che rumo, “Ëgüe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu ãgua yuvireco.

⁵ Evocoi nungar mbia rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño ëgüe ahera vichico.

⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombegüer rese avei yuvireco che querve nungar mbahe mombehu rãgüer sui’ viya.

⁷ Sese che yemboivate aiẽhi ãgua che quer nungar mbahe che pĩhamondii vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavi avei Carugar mara-mara tẽi che rereco vahe.

⁸ Mbosapi yupagüer yande Yar upe aporandu ité teco asisa che sui serocua ãgua rese viña.

⁹ Ahe rumo aipo ehi cheu: “Che porovasasa ndeu ambou vahe iyara nde ñemosa ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboiha catuño itera che reco nipiratai vahe rese. Ëgüe ehira Jesucristo pĩratasa oyecua che rese.

¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩrataẽhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ëgüe ahe. Iya rumo peñehe tupri che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco.

12 Che ñemoso tupri pipe mboraviqui ayapo pe pãhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa.

13 Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherã rese. ¿Ayavi tie che cuaita, ãgüe ahese pëu? ¡Peñero sese cheu!

14 Cũritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepia omonuha guarepochi guahir upe, ndahei tahir tã ãgüe ehi oyesupa upe yepi.

15 Evocoiyase che querẽhisa pipe amondora opacatu che mbahe areco vahe pe pĩtivii ãgua iyavei opacatu che recocuer rese ayemondo pëu pe reco tupri ãgua. Che rumo opoaisu ité, pe tie revo ndache raisu tuprii eté peye.

16 Cheu mbahe ipanese, ndaporandui eté mbahe pereco vahe rese pëu. Amove rumo ava, “Yande mbopa ãgua tã ãgüe ehi Pablo yandeu” ehi tã yuvireco.

17 ¿Opombopa uca tie ava pëu che remimondo pipe?

18 Che Tito upe, “Eresora ipiri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tupri mbahe oroyapo Tũpa upe ñepe ore pihañemoñetasa pipe.

19 Che rivireta, che rembiaisu, pe revo pepihañemoñeta ore oroicuachía co pëu, ore yoepi ãgua tã. ãgüe ndorohei eté rumo. Ore rumo Cristo rese ore reco pipe oroñehe Tũpa rovaque. Opacatu ité niha mbahe oroyapo pe recocuer moviracua catu ãgua.

20 Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo ãgüe peye aveira che repiase. Che asiquiye ité, oime revo pe pãhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pãhuve ava oyeupeño tã mbahe oipota vahe, imahechiroi ai vahe iyavei oñehe-ñehe tã vahe ambuae ava rese, seco ivate ai vahe iyavei ndiporoviroyai vahe.

21 Asiquiye avei aso irise pe repia, omboura Tũpa pe sui che chĩ ãgua, che mboyaseho uca tiẽtera peye setá pe cueseve peyemboangaipa vahe rese iyavei ndapemboasi etese mbahe tã, yemboaguasa-guasa tãisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

1 Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai.

2 Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cũritei amombri aico pe sui, amombehu irira rumo co pëu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pãhuve, ndopoparaisuereco iri chira.

3 Esepia, pe peipota ité che recoãha ãgua ‘¿Cristo ité piha omoñehe uca?’ pe yapave cheu. Cristo ndaseco mbegüemi pëu mbahe apo oico. Ahe rumo omboyecua opĩratasa pëu.

⁴ Supi eté niha ahe yaticasa, inungar ava nipiratai vahe. Cũritei rumo ahe oicove Tũpa pĩratasa pipe. Ēgũe orohe avei ore seco pĩrataẽhisa sereco. Oroicose rumo sese oroico Tũpa pĩratasa pipe pe rese hañeco ãgua.

⁵ Pemahecua tupri catu pe recocuer rese: ¿peico ité pĩha pe Cristo rese yeroyasa pipe? ¿Ndapeicuai vo Jesucristo secoise pe rese, pesẽse pe recoãhasa sui?

⁶ Pe revo peicuara ore ndorocañi tẽi vahe oroico ore recoãhasa pipe.

⁷ Iyavei oroyerure pe rese Tũpa upe ‘toyapo eme mbahe tẽi yuvireco’ ore hesave. Ndahei rumo ore ivate catu vahe mbahe tẽi rasa pare mboyecuasave ěgũe orohe; co catu ‘toyapo mbahe aviye vahe yuvireco’ ore yapave, yepe pẽu ndoyavi orocañi tẽi vahe oroico viña.

⁸ Esepia, ndiyai mbahe supi tupri vahe amotarẽhi ãgua oreu; ěgũe ehi rumo sese catu ité oroñehe.

⁹ Sese orovihaño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese.

¹⁰ Aicuachía co che ñehe imondo pẽu pe piri che so ãgua renonde. Acoi asose, namboyecua pĩratatai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerẽhi catu, oyoya guasu peico tupri avei peyese mbahe tupri pipe. Evocoyase Tũpa oporoaisusa pipe, gũeco tupri sa pipe avei secoira pe rese.

¹² Pemombehu che mahenduhasa ñepeipei peyeupe pe yeovaupitesa pipe.

¹³ Opacatu ambuae yande rivri, Tũpa reroyasar avei omondo omahenduhasa yuvireco pẽu.

¹⁴ Peipisi yande Yar Jesucristo porovasasa, Tũpa poroaisusa iyavei Espiritu Santo tasecoi opacatu pe rese. Aipo rupive che ñehe pẽu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco ãgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir.

² Che, Pablo, iyavei opacatu Jesús reroyasar yuvirecoi vahe cohove oroicuachía co ore ñehe pēu, pe opacatu Jesús reroyasar Galacia pipe peico vahe.

³ Tapeipisi yande Ru Tūpa, yande Yar Jesucristo porovasasa pe reco tupri ãgua.

⁴ Ahe acoi oyemondo vahe omano ãgua yande angaipá repirã. Ëgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi.

⁵ ¡Imboeteipri apirēhi Tu tasecoi!

Ndipoi ambuae ñehesa poropĩsirosa resendar

⁶ Che pihamondi etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro ãgua peico viña.

⁷ Supi eté ndipoi ambuae ñehesa pĩsirosa resendar. Ëgüe ehi rumo, oime ava pe mañeco tēi vahe pe mbopa ãgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco.

⁸ Oimese rumo que ambuae ava oñehe vahe poropĩsirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai íva pendar avei no.

⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he ãgua cheu, Tūpa rumo aseca cheu aipo he ãgua. Esepia, java remimbotar rupi tēi mbahe ayapo vitesse, evocoyase ndahei chietera Cristo rembiguai aico viña!

Mara ehi Pablo apóstol güeco ãgua

¹¹ Che rivireta, tapeicua co ñehesa poropĩsirosa resendar amombehu vahe ava upe ndahei ava tēi pihañemoñetasa.

¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesse aracaco. Che pĩratasa pipe tēi aseca opacatu Tūpa rembiporavo Jesús reroyasar momara ãgua.

¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico.

¹⁵ Tūpa rumo yipive che ha vitéhiseve che poravo oyeupe nara. Iyavei oporoaisusa pipe che renoi güemimbotar rupi.

¹⁶ Ëgüe ehi ahe oicua uca Guahir cheu, che imombehu ãgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua ãgua;

¹⁷ ndasoi avei Jerusalén ve yipive apóstol yuvirecoi vahe repia ãgua. Che rumo aso voi eté ivi Arabia ve. Coiyé ayeve tecua Damasco ve vitu.

¹⁸ Ichui mbosapí araviter che seroya pare, aso tecua guasu Jerusalén ve cute. Ahese ramo Pedro amborí quince arí rupi güerañomi tēi.

¹⁹ Ndasepiai eté rumo ambuae apóstol. Yande Yar rivri Santiago güeraño asepia.

²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no.

²² Yande Yar reroyasar rumo oñemonuha vahe ivi Judea ve ndache cuai eté yuvireco.

²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūrítei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu.

²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vaherā. Evocoyase amombehu co ñehesa poropĩsirosa resendar chupe yuvireco acoi amombehu vahe ava eta ndahei vahe judío pāhuve.

³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavri ve tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi.

⁵ Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pĩsirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo ñañecuñaroi chietera che recocuer sui. Esepia niha, Tūpa ndahei ava rete tēi osepia.)

⁷ Ahe rumo oicua yuvireco Tūpa che cuai oñehengagüer poropĩsirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropĩsirosa resendar mombehu āgua judío upe.

⁸ Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vaherā ava ndahei vahe judío pāhuve oroico, inungar ahe oporaviqui judío pāhuve yuvireco.

¹⁰ Co reseño oporandu yuvireco oreu: “Peyemomahenduhami ava iparaisu vahe pĩtivii āgua rese” ehi. Yipive ité rumo che ēgüe ahe pota vichico yepi.

Pablo oñehe pĩrata Pedro upe sembiavi rese Antioquia ve

¹¹ Iyavei osose Pedro tecua Antioquía ve. Aheve oyavi güecocuer. Evo-coiyase añehe pĩrata sovai eté chupe mbahe sembiavi rese.

¹² Esepia, yipĩndar ahe ocaru ndahei vahe judío pĩri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osirĩño ichui osiquiyepave. Iyavei ndocarú iri ipĩri. Esepia, ahe Jesús reroyasar judío yugüeru vahe “judío recocuer rupi yaguatara yande ñepĩsĩro ãgua” ehi vahe ité yuvireco viña.

¹³ Evocoyase ambuae Jesús reroyasar judío avei osirĩpaño tẽi supive yuvireco. Bernabé avei eté supive ãgüe ehiño tẽi.

¹⁴ Che asepiase rumo, ndahoyoyai secocuer yuvireco co ñehesa poropĩsĩrosa resendar supĩ tuprĩ vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cũritei rumo erembohe tẽi nde rembiapo pĩpe evocoi ava ndahei vahe judío Jesús reroyasar judío rereco uca ãgua” ahe chupe.

Judío, ndahei vahe judío oyoya oñepĩsĩro yuvireco Cristo rese oyeroyasa pĩpe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico.

¹⁶ Cũritei rumo yaicua, ndipoi eté que ava seco catuprĩ vahe Tũpa rovaque Moisés porocuita mboaviyesa pĩpe. Jesucristo rese yeroyasa pĩpeño ité rumo yande reco catuprĩ. Sese yande yayeroya ité Jesucristo rese, “Co seco catuprĩ vahe” Tũpa he ãgua yandeu. ãgüe ehi eté seroya pĩpe, ndahei acoi porocuita tẽi reroyasa pĩpe. Esepia, ndipoi chietera que ñepĩri ava seco catuprĩ vahe Tũpa rovaque evocoi porocuita tẽi aposa pĩpe.

¹⁷ Yasecase yande reco catuprĩ ãgua Cristo rese yande yeroyasa pĩpe, ipĩpe yaicuase angaipa viyar yande reco, ¿Cristo pĩha evocoyase yande mboangaipa? ¡Aní eté!

¹⁸ Che amocañise mbahe, ipare rumo amopuha irise, che evocoyase ayemboangaipa ipĩpe.

¹⁹ Esepia, ndaicutise Moisés porocuita reroya tuprĩ che ñepĩsĩro ãgua, ahese ocañi tẽi vahe aico ipĩpe. Ichui rumo Jesucristo reroyasa pĩpe asupitĩ Tũpa upe nara che recove ãgua. Esepia, che avĩye yaticaprĩ aico Cristo rese.

²⁰ Sese ndahe iri che ité aicove; Tũpa Rahĩr Cristo rumo che rese secoi. Sese ité ayeroya che retecuer pĩpe che recove ãgua. Ahe niha oyemondo omano ãgua che raisupave.

²¹ Naroĩroi eté co Tũpa porovasasa. Esepia, ava seco catuprĩra Tũpa rovaque porocuita tẽi reroya pĩpe viña, evocoyase Cristo mano agüer ãgüe ehi tẽi etera viña.

3

Porocuita iyavei yeroyasa

¹ ¡Ndapembahecuai eté pe Galacia pendar! Pe ndoyavĩ ipaye vahe remimbopa peico. Oromombehu tuprĩ niha pe rovai eté acoi Jesucristo curusu rese yatica agüer pẽu.

² ¡Pemboyecua co che porandusa cheu! ¿Moisés porocuita mboyeroya pĩpe pĩha peipĩsĩ Espĩritu Tũpa suindar, co ñehesa pesendu vahecuer reroya pĩpe tie?

³ ¡Ndapembahecuai eté! Yipĩndar Espĩritu pĩpe pemboipĩ Cristo rupi pe guata ãgua. ¿ãgüe peye aveira pĩha pe pĩratasa pĩpe tẽi pe guata tuprĩ ãgua Cristo rupi cũritei?

⁴ ¿Ndape pĩtivĩimi eté vo acoi opacatu pe paradisusa Cristo recocuer rese? ¡Pe pĩtivĩimira tarahu viña!

⁵ Tūpa niha omondo oEspíritu pe rese iyavei oyapo poromondiisa pe pãhuve. ¿Mahera pñha oyapo? Esepia, co ñehesa pesendu vahe peroya ité, sese ãgüe ehi pëu ndahei Moisés porocuaita tõi reroya pipe.

⁶ Esepia, aracahe Abraham oyeroya ité Tūpa rese, ipipe sui Tūpa oipisi seco catupri vahe nungar oyeupe nara.

⁷ Sese iya ité peicuara opacatu acoi oyeroya vahe Tūpa rese yuvireco, ahe Abraham suindar supi tupri vahe.

⁸ Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri ra yuvireco nde sui” ehi.

⁹ Evocoyase Tūpa osovasara cūrteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tõi yuvirecoi vahe, ahe Tūpa ñemoirosavri ve tõi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe ñemoirosavri ve tõi yuvirecoira” ehi.

¹¹ Sese, co omboyecua tupri yandeu ndahei Moisés porocuaita reroyasa pipe tõi Tūpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi.

¹² Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove água” ehi.

¹³ Moisés porocuaita mboaviyeñhisa pipe yacañi tẽira viña. Cristo rumo yande renose yande cañi tõi rãgüer sui. Ahe ae opa oipisi ñemoirosa yande repirã. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi.

¹⁴ Ëgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espíritu imombehupri yayeroyase Cristo rese cūrtei.

Porocuaita iyavei Tūpa güemimombehugüer omboaviye vaherã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiase güemimbotar omombehu vahe, ahese ndipoi que ambuae ava omboyeho vaherã iyavei ndipoi que ambuae ava omboyepi iri vaherã.

¹⁶ Ëgüe ehi avei Tūpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ëgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tūpa Rembiporavo Jesucristo.

¹⁷ Co mbahe amombehu pota pëu: evocoi porocuaita Tūpa ombou vahecuer cuatrocientos treinta araviter pare, ndoicatui chietera Tūpa ñepeí reseve Abraham upe omombehu vahecuer iyavei oñehe omboaviye vaherã mboyeho água.

¹⁸ Supi eté acoi Tūpa suindar ou vaherã porerecosa Moisés porocuaita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepeí reseve Tūpa remimombehugüer rupi Abraham upendar porerecosa.

¹⁹ ¿Mahera pīha evocoyase aviye Moisés porocuita? Esepia, ava poreroyaēhisa cua āgua Tūpa ombou oporocuita Moisés upe aracahe. Co porocuitavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembiguai iva pendar oporocuita mombehu āgua Moisés upe aracahe ‘tomombehu evocoyase Moisés che porocuita opacatu ava upe’ oyapave.

²⁰ Ñepei ava rese oñemoñetase, ndipotasai ambuae imoingatu āgua. Tūpa niha ñepei vahe secoi.

Mbahe sui Tūpa ombou oporocuita

²¹ “Moisés porocuita co coti tēi Tūpa remimombehugüer imboaviyepirã sui” aipo ndahei eté pēu. Esepia, acoi Tūpa omondose que porocuita ombou vahe rã tecovesa apirēhi ava upe imboaviyesa pipe, evocoyase porocuita reroya pipe yande reco catuprira Tūpa rovaque viña.

²² Icuachiapri arachendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vahe rã ichui mbahe imombepri pisi āgua.

²³ Yipindar rumo mbiguai nungar yaico Tūpa nomboyecua viteise Guahir rese yande yeroya āgua.

²⁴ Inungar chihivahemi tēi, ēgüe vahe porocuitavrive yaico yipindar. Ahe porocuita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu.

²⁵ Cūritei rumo oime Jesucristo rese yeroya āgua cute. Evocoyase ndahe iri ahe porocuitavrive yaico.

²⁶ Pe niha opacatu Tūpa rahir peico Jesucristo rese yeroya pipe.

²⁷ Opacatu pe ñapiramombri peico vahe Jesucristo rupi pe guata āgua, secocuer avei pereco.

²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese.

²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerocosa yandeundar.

4

¹ Amboyopri vitera co che ñehesa pēu: inungar que ava omanose, oseyá ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi.

² Esepia, ahe guãrosar povrive secoi imboyeroya āgua. Ocuacuase voi eté, opoira tu remimombehugüer rupi ichui.

³ Ēgüe ehi avei yandeu. Yande chihivahemise, evocoyase mbiguai nungar yipindar vahe co ivi pipendar porocuitavrive yaico.

⁴ Oyepotase rumo ari imombepri, Tūpa ombou Guahir, ahe oha cuña sui; evocoyase ahe Moisés porocuitavrive secoi.

⁵ Ēgüe ehi ou opacatu yande renose āgua evocoi mborocuitavri sui Tūpa rahir ité yande reco āgua.

⁶ Evocoyase Tūpa omboyecua Guahir yande recose ombouse Guahir Espiritu yande pīha pipe, “¡Che Ru!” yande he āgua chupe.

⁷ Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerocosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe.

⁹ Cūritei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pīha oyevi iri mborocuita tēi pipe mbiguai tēi güeco iri āgua yuvireco?” ahe pēu.

¹⁰ Esepia, pemboetei vite ari, yasi, araviter pieta eta tēi peico.

¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu.

¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu.

¹⁴ Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no.

¹⁵ ¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña.

¹⁶ ¡Evocoyase cūritei che amotarēhi tie peye acoi pēu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua tēi ore sui yuvireco pe querēhi āgua supi.

¹⁸ Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi.

¹⁹ Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pēu.

²⁰ Cūritei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuita pe reco catupri āgua, pemombehumi cheu: ¿Ndapesenducuai tie co mborocuita aipo ehi vahe?

²² Esepia, aipo ehi: Abraham aipo vireco ñuvirío guahir, ñepeitahir aipo sembiguai Agar membri, ambuae tahir evocoyase sembireco Sara membri.

²³ Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté.

²⁴⁻²⁵ Co tecocuer mboyyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco.

²⁶ Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi.

²⁷ Esepia, icuachiapri aracahendar pipe aipo ehi:

“Eyembovihareté, cuña nimembii vahe; esapucui nde rorivetesu pipe, nde ndereiporarai vahe nde membri rasicuer. Esepia, acoi cuña seyapri imembi ati catura cuña omer vireco vahe sui” ehi.

²⁸ Che riviřeta, inungar Sara membri Isaac, ěgüe yahe avei tahir ité yaico Tũpa remimombehugüer rupi.

²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espĩritu pĩratasa pĩpe sui oha vahe; cũritei ěgüe ehi tupri avei.

³⁰ ¿Mara ehi icuachiapri aracahendar pĩpe? “Pemboyepēpi pe rēta sui cuña mbiguai tēi imembri reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pĩsi ěgua yuvireco” ehi.

³¹ Sese, che riviřeta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pĩpe pe recoēhi ěgua

¹ Jesucristo niha ombou yandeu mbiguai tēi nungar sui yande sē ěgua. Sese peyemoviracua mbiguai tēi pe reco iriēhi ěgua.

² Pesendu che ñehe. Che, Pablo, aipo ahe pēu: acoi peyembocircuncida ucasa, ahese ěgüe ehi tēi vahe Cristo pereco.

³ Che amombehu pota irimi pēu, que ava oyembocircuncida uca vahe, vireco niha ocuaita opacatu Moisés porocuita mboyeroya ěgua.

⁴ Pe pereco catupri pota tēi vahe Tũpa rovaque evocoi porocuita tēi reroya pĩpe, peyepēpi ité Cristo sui. Evocoyase Tũpa porovasasa avei pemocañi tēi peyesui.

⁵ Yande rumo yande querēhisa pĩpe yayeroya yande reco catupri ěgua rese. ěgüe yahe Espĩritu yande pĩtivĩsa pĩpe iyavei Jesús rese yeroyasa pĩpe avei.

⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pĩtivii eté yande reco catupri ěgua Tũpa rovaque. Co güeraño rumo yande pĩtivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipĩndar viña. ¡Ava ru ndoviroya uca iri mbahe supi tupri vahe pēu!

⁸ Ndahei eté rumo pe poravosar Tũpa ěgüe ehi pēu.

⁹ ¿Ndapeicuai vo acoi aipo ehi vahe: “Chĩhimi pan mboapeposa oso panguã rese opacatu rupi oicahopa tupri yepi” ehi?

¹⁰ Che rumo ayeroya yande Yar rese pe pĩhañemoñeta ěgua che pĩhañemoñetasa rupi. Tũpa rumo omboura oñemoĩrosa que ava pe mbopĩhañemoñeta yoavirati uca vahe upe.

¹¹ Che rumo, che riviřeta, “Iya yayembocircuncida yande reco catupri ěgua” ahe vĩtese Jesús reroyasar upe viña, ahese revo ndipoi chira che amotarēhisar judío pãhuve, ahese avei ndipoi chira ñehesa curusu rese Jesús manosa resendar amotarēhimbar ipãhuve viña.

¹² Evocoi ava pe mbopĩhañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeĩ reseve yuvireco!

¹³ Esepia, pe ore riviřeta, Tũpa niha pe renoi mbiguai tēi nungar pe recosa sui pe renose ěgua. Ndahei chira rumo pe remimbotarai tēi apo ěgua, iyacatu rumo peñepĩtivĩira pe yeaisusa pĩpe.

¹⁴ Esepia, opacatu evocoi mborocuita imboavĩyesa yamboavĩyese co ñehesa aipo ehi vahe: “Esaisu ambuae ava nde yeaisu nungar” ehi vahe.

¹⁵ Peyeseño teteĩ rene catu; peicua catu, aviyeteramo ěgüe peyese, pe recouer pemomarapa tiētera.

Yaguatara Espĩritu remimbotar rupi, ndahei yande remimbotar tēi rupi

¹⁶ Pesendu che ñehe: Espíritu pĩratasa pĩpe catu peico yepi. Iyavei peyapoi rene mbahe pe remimbotarai.

¹⁷ Esepia, co pe remimbotarai ndahoyoyai eté Tũpa Espíritu remimbotar rese. Ndoyembohe catui eté. Sese ndapeyapo ucai mbahe pe remimbotar aviye vahe peyeupe.

¹⁸ Acoi Espíritu ité pe reroguatase, ahese ndahe iri chiaveira Moisés porocuaítavri ve peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tẽisa, teco quihasa, mbahe tẽi aposa;

²⁰ mbahe rahanga upe yerure tẽisa, yembopayesa, ñeroĩrosa, ñehepoepĩ-epĩsa iyavei ambuae ava mbahe pota raisa; ñemoĩro seraisa, yemboyahoyahosa, pĩhañemoñeta yoyaẽhisa,

²¹ iyavei ambuae ava mbahe pota raisa rese ñemoĩrosa, savaĩposa, yembopieta tẽisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tũpa mborerecuasave yuvireco curi.

²² Yayapose rumo Espíritu remimbotar, yande evocoyase yayeaisura, yande rorivetera, yaicora mbahe tupri pĩpe, yande reco mbegũera, yaporoaisura yande reco aviyesa pĩpe, yamboyecuará yande cuaita mboaviyesa,

²³ yayemominiñora iyavei yande recorã rese yañearo tuprĩra. Evocoi nungar yayapose, ndipoi eté que mborocuaíta pĩpe yande yeamotarẽhi ãgua.

²⁴ Jesucristo rese ité yuvirecoi vahe rumo, opa ité omombo güecocueraĩ co ivi pĩpendar tẽi oyesui yuvireco, güemimbotarai, opĩhañemoñeta raisa avei no.

²⁵ Yande yaicose Espíritu pĩratasa rese, ahese Espíritu rupi eté yaguatará.

²⁶ Ndayayemboivate ai chira. Esepia, ipĩpe sui yayeamotarẽhi, yaipota rai avei yande mboetasá recocuer nungar yande reco ãgua.

6

Peñepitivi ñepi-peĩ

¹ Che rivireta, acoi que Jesús reroysar pe pãhu pendar oyavise güecocuer, pe peico vahe Espíritu rese, peipitivi secocuer moingatu ãgua pe recocuer mbegüemisa pĩpe. Peicua catura rumo, avieteramo oyoya voi peyemboangaipa uca tiẽtera.

² Peñepitivi-tivi catu que mbahe yavai rai vahe rese. Ëgüe peyese, Jesucristo porocuaíta pemboaviyera.

³ Amove ava, “Che ivate catu vahe aico” ehi tẽi. Ëgüe ehi rumo ahe ae oyembopa aipo ohesa pĩpe oico.

⁴ Sese niha ñepi-peĩ eté yaicua tuprĩra yande recocuer. Aviyesa, evocoyase sese yaviharetera. Ndahei acoi ambuae ava recocuer rese tẽi yamboyoyara yande recocuer.

⁵ Esepia, ñepi-peĩ eté yande yacatu yareco yande cuaita imboaviye ãgua.

⁶ Acoi oyembohe vahe Tũpa ñehe pĩsirosa resendar rese, tomondo ombohesar upe mbahe güembiereco ipitivi ãgua.

⁷ Peyembopa eme catu pe ae. Ndipoi chietera que ava viroĩro vahe Tũpa ñemoĩrosa pĩsiẽhisa pĩpe. Ëgüe ehi eté: yañotise mbahe, ichui avei mbahe yaipisira.

⁸ Acoi ava rumo oyapo vahe mbahe güemimbotarai pĩpe, ahe oipisira cañisa apirẽhi vahe. Acoi oyapo vahe mbahe Espíritu remimbotar rupi, ahe oipisira tecovesa apirẽhi vahe yuvireco.

⁹ Evocoyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo reperi.

¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pẽu!

¹² Acoi judío Jesús reroyasar pe mbocircuncida uca potaño tẽi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tẽi ěgũe ehi yuvireco viña. Esepia, ndoipotai evocoi judío oamotarẽhi co ñehesa Cristo atica agüer mombehu pipe yuvireco.

¹³ Acoi oyembocircuncida uca tẽi vahe avei rumo nomboaviyei eté opacatu mborocuaita yuvireco. Oipota rumo pe mbocircuncida ucara oyemboivate ai ěgua pe cuaise evocoi nungar apo yuvireco.

¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe.

¹⁵ Yepe que yayembocircuncidase revo, anise que ndayayembocircuncidaise viña, ndayande pitivi eté Cristo rese yaico tupri ěgua. Co rumo aviye vahe ité yandeu: Tũpa yande recocuer mbopiasuse.

¹⁶ Opacatu yuvirecoi vahe co ñehesa che remimombehugüer rupi iyavei opacatu Tũpa upendar supi eté vahe toipisi Tũpa suindar teco tuprisa iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tẽi vaherã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe.

² Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe.

⁴ Sese niha Tūpa yande poravo yipivé ité ivi apoēhi vitesese ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe.

⁵ Ipipe avei yipisuive yande pisi guahirguā Jesucristo yande pīsirosa pipe güemimbotar rupi.

⁶ Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui.

⁷ Tūpa yande raisu eteprisa pipe yande pīsiro Guahir ruvi piyeresá pipe yande angaipa rese ñero āgua.

⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu,

⁹ iyavei oicua uca güemimbotar yipisuive ndicuasai vahe yandeu co güembiaporā mboaviye āgua.

¹⁰ Oyepotase ahe arí imboaviye āgua, Tūpa opacatu mbahe iva pendar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua

¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu.

¹³ Pe avei niha, pesenduse co ñehesa supi eté vahe pīsirosa resendar, Cristo peroya pe piha pipe sese peico vaherā. Tūpa ombou güemimombhugüer Espiritu Santo pe piha pipe ‘cheundar ité yuvirecoi’ oya.

¹⁴ Ipišisa pipe niha yaicua yande yaipisi vaherā yandeundar mbahe imoin-gatupri, acoi Tūpa opase oipīsiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar.

¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe.

¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar.

¹⁸ Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha.

Iyavei peicuara co mbahe imondopirã iva pendar iporañete vahe Tũpa upendar yuvirecoi vahe upe.

¹⁹⁻²⁰ Ipipe sui peicua tupri aveira Tũpa pĩratasa ndopai vahe yande seroyasar yaico vahe rese. Co pĩratasa ivatẽ vahe itẽ. Ahe pĩratasa Tũpa omboyecua, ombogũerayevise Guahir Cristo omano vahe pãhu sui, iyavei omboguapise oacato coti ivave.

²¹ Osecomboivate catu opacatu iva pendar, ivi pendar seco ivate vahe mborerecua-recuar tẽi pĩratasa sui iyavei opacatu cũriteindar sui, que oime vaherã sui avei.

²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco ãgua opacatu viroyasar upe.

²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tũpa oporovasasa pipe yande pĩsĩro

¹ Pe rumo, yipĩndar angaipa pipe peicose, inungar omano vahe peico Tũpa upe.

² Co ivi pipendar pihañemoñetasa rupi tẽi peico iyavei ivate rupindar carugar rerecuar porocuaita tẽi avei peroya, ahe Jesús reroyasarẽhi ombohe vahe.

³ Yipĩndar opacatu yande avei yaguata yande remimbotar rupi tẽi yande recocuerai pipe. Yande pihañemoñeta raisa rupi tẽi avei yayapo mbahe. Sese Tũpa ñemoĩrosa yaipĩsĩra opacatu ambuae ava rupive viña.

⁴ Tũpa rumo yande paraisuereco itẽ, yande raisu etepri avei.

⁵ Yepe angaipa pipe yaico omano vahe nungar viña, ahe rumo ombou Guahir yande recove ãgua. Ahe oporovasasa pipe yande pĩsĩro.

⁶ Yande mbogũerayevi iri avei niha sese. Ipare seseve yande moingue oyepiri ivave

⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya.

⁸ Esepia, oporovasasa pipe pe pĩsĩro Jesús rese peyeroyase. Ndahei rumo pe recocuer sui tẽi peñepĩsĩro, ahe rumo ombou porerecosa pẽu.

⁹ Ndahei avei ava rembiapo sui tẽi ou vahe. Evocoyase ndiyai chira yayemboivate ai ipipe.

¹⁰ Tũpa niha yande recocuer mohivi Jesucristo rese yande reco ãgua mbahe icatupri vahe apo ãgua. Ahe mbahe icatupri vahe yipĩsui Tũpa omoime yande rembiaporã.

Cristo ombou yande reco tupri ãgua

¹¹ Evocoyase peyemomahenduha yipĩndar pe recocuer rese. Ndahei rumo judío suindar peico: “Co ndoicuai vahe Tũpa, ndoyembocircuncidai vahe tẽi yuvirecoi” ehi judío yuvireco pẽu, (ahe judío oyembocircuncida vahe gũete rese oyeupe, “Yande Tũpa rembiporavo imbocircuncidapri yaico” ehi yuvireco).

¹² Peyemomahenduha yipĩndar Cristo ndaperecoi vahe rese. Ahese ndapeicoi Tũpa rembiporavo Israel recua pendar iyavei ndapecuai Tũpa remimbotar semimombehu avei ombou vahe judío upe ipĩtivii ãgua; ndaperecoi Tũpa iyavei ndaperecoi sãrosa pe ñepĩsĩro ãgua co ivi pipe viña.

¹³ Esepia, ahese amombrĩ Tũpa sui peico. Cũritei rumo Jesucristo rese peico. Esepia, ahe vuvi pipe pe reru Vu Tũpa upe.

¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepei vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondosa pipe.

¹⁵ Cristo omomba opacatu Moisés porocuita. Ahe oipota ñepei ava nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua.

¹⁶ Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepei ava nungar Tūpa rupi yande reco āgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombri vahe judío oroico vahe upe ‘tñero yuvireco oyeupe’ oya.

¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaherã Tūpa rese Espíritu ñepei vahe pipe.

¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepei reseve oñemu guasu vahe nungar yaico.

²⁰ Pe inungar tūparo maranehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu.

²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ēgüe vahe ipehapri yaico yande Yar upe nara sese ité yande reco āgua.

²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspíritu pipe, secoira.

3

Pablo cuaita ñehesa pñisirosa resendar mombehu āgua ava ndahei vahe judío upe

¹ Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ēgüe ahe.

² Peicua tupri revo co che poraviquisa Tūpa ombou vahe cheu oporovasasa mombehu āgua pēu nara.

³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pēu.

⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe.

⁵ Co ñehesa icatupri vahe ndoicuai eté ava yuvireco aracahe. Cūritei rumo Tūpa oEspíritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi.

⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropñisirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer arachendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opĩratasa pipe ñehesa pñisirosa resendar mombehu āgua.

⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu āgua ava ndahei vahe judío upe nara cheu.

⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pihanemoñetasa yipindar ndicuasai vahe.

¹⁰ Ēgüe ehi cūritei oyesuindar aracuasa cua uca āgua viroyasareta recocuer rese opacatu mborerecuar guasu, seco pīrata vahe iva pendar upe.

¹¹ Ēgüe ehi, Tūpa opihanemoñeta ndopai vahe mboaviye Guahir, yande Yar Jesucristo rese.

¹² Sese yande yeroyasa suiño ité yaicatu yande yemboya āgua Tūpa rese yande siquiyeēhisa pipe.

¹³ Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa pereco pe yembovaha āgua.

Cristo poroaisusa

¹⁴ Sese añenopiha yande Ru Tūpa rovaque.

¹⁵ Ichui serer pāve vireco yuvireco, opacatu seroyasareta iva pendar, ivi pendar avei ñepe oñemu yuvirecoi vahe nungar.

¹⁶ Che aporandu chupe ‘tombou güeco porañetesa sui opīratasa yuvireco chupe oEspíritu pipe imoviracua āgua’ viya pēu.

¹⁷ Ēgüe ahe ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese

¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu.

¹⁹ Che ayeroqui ahe poroaisusa peicua tupri catu āgua rese (yepé ndayaica-tui icuapa tupri āgua yaico viña). Ipipi sui Tūpa tasecoi pe rese.

²⁰ Cūritei yamboetei yande Ru Tūpa. Esepia niha, ahe opīratasa pipe ombouvicha catu itera mbahe yande porandusa sui, yande pihanemoñetasa sui avei yandeu. Esepia, opīratasa pipe oporaviqui yande rese.

²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tupriira pe cuaita rupi Tūpa pe renoisa pipe” ahe pēu.

² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe.

³ Peyapo opacatu pe recocuer pipe peico tupri vite āgua peyepāhuve Espiritu Santo pe pītiviisa pipe, pe reco tupriisa pipe avei.

⁴ Yaico ñepe nungar Cristo rese iyavei yareco ñepe Espiritu. Ēgüe ehi avei Tūpa yande poravo ñepe guārosa rereco āgua.

⁵ Oime ñepe yande Yar, ñepe yande yeroyasa, oime avei ñepe poroāpiramosa.

⁶ Oime ñepe Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepe-pe mbahecuasa ombou.

⁸ Sese aipo ehi icuachiapri arachendar pipe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe.

¹⁰ Acoi ogüeyi vahe co ivi pipe oso ivate catusave 'taico opacatu rupi' oya.

¹¹ Ahe niha ombou amove apóstol seco ãgua, ambuae upe ombou Vu ñehes mombehu ãgua, ambuae upe ombou ñehesa písiroso mombehu ãgua, ombou avei ambuae upe viroyasar rãro ãgua iyavei iporombohe ãgua.

¹² Ëgüe ehi ava viroyasar mbohe oyeupe mboraviqui apo ambuae viroyasar moviracua tupri catu ãgua.

¹³ Opacatu yaico tupri rane itera oyese Jesús rese yeroyasa pipe iyavei yaicua tupri Tüpa Rahir recocuer. Ahe yaico tupri yande Cristo rese inungar ava ipihañemoñeta tupri catu vahe, ahe yasupitira Cristo recocuer yaico.

¹⁴ Evocoyase ndahe iri chira chihivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe.

¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi.

¹⁶ Esepia, ahe yande mboya tupri oyese, yande moenda tupri avei yande rereco, Ëgüe ehi ahe yande mboyemboya oyese ñepe vahe nungar. Ñepepei yaporaviqui tuprise, ahe opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tüpa rer pipe pēu che pe cuaisa pipe: peico iri eme ava Tüpa cuaparēhi nungar. Ahe yuvirecoi vahe ité opihañemoñeta raisa pipe,

¹⁸ ndoicatu mbahe renducua tupri ãgua iyavei ndovirecoi tecovesa Tüpa suindar oyese yuvireco. Esepia, ndoicuai Tüpa ñehes opihañemoñetaēhisa pipe yuvireco.

¹⁹ Ndoyuvinochi iri mbahe tēi apo ãgua iyavei oyemondo ité mbahe tēi pipe. Ndosiquiyei eté opacatu güemimbotarai apo ãgua yuvireco.

²⁰ Pe rumo ndapeyembohei eté evocoi nungar mbahe rese Cristo rese peicose,

²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese.

²² Ahe yande mbohe yande recocuerai yipindar vahe reya ãgua. Esepia, ahe naporai vahe yande mbopa tēi yande pihañemoñeta rai apo ãgua.

²³ Pesecuñaro catu pe yapisacasa.

²⁴ Peicoño ité avei pe recocuer piasu pipe. Sese niha Tüpa yande apo yande reco ivi tupri ãgua yande reco maranehi vaherã supi tupri vahe pipe, inungar ahe.

²⁵ Sese ndaperemira iri chira, iya rumo peñehes ñepepei mbahe supi tupri vahe rese peyeupe. Esepia niha, yande opacatu ñepepei ava rete resendar nungar yaico.

²⁶ Peyemboangapai rene peñemoirose, iyavei ndiyai peñemoiro ari momba peico.

²⁷ Peipota ucai rene Carugar upe peyeupe mbahe apo ãgua.

²⁸ Acoi imonda rai vahe, timonda iri eme; toporaviquiño ava iparaisu vahe pítivi ãgua.

²⁹ Ndapeñehes rai chira, iyacatu rumo peñehes tupri ñehes aviye vahe pipe ambuae pe ñehes rendusar monguerēhi catu ãgua yuvireco yande Yar rese.

³⁰ Peyapoi rene mbahe Espíritu Santo mbovîhaēhi āgua. Ahe niha Tūpa ombou yandeu 'toicua ava co cheundar oipisîra ari ipa vahe pipe poropisîrosa ñepeî reseve vahe yuvîreco' oya.

³¹ Peyepēpi co nungar mbahe sui: piha vîracuasa, mbahe mboasi pîratasa, ñemoîrosa, pe rāse aisa, opacatu pe ñehe rai, opacatu ambuae mbahe-mbahe tēi sui avei.

³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahîr yuvîreco

¹ Pe niha Tūpa rahîr sembiaîsu peico. Sese peyemonguerēhi catu secocuer moña āgua.

² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe sîacua vahe chupe.

³ Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese.

⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tūpa upe peico.

⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvîrecoi chira Tūpa povrive iyavei Tahir Cristo povrive.

⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoîrosa ava seroyasarēhi upe.

⁷ Sese ndapeyemboyai chira evocoi nungar ava rese.

⁸ Peicua niha yipîndar peico pîtumimbisa nungar mbahe-mbahe tēi pipe. Cûritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe.

⁹ Esepia, poroesapesa pipe yande recose, yayapo opacatu mbahe tupri ava upe yande reco îvi tuprisave, mbahe supi tupri vahe pipe.

¹⁰ Sese peyembohe catu mbahe Tūpa piha rupindar apo āgua rese.

¹¹ Peyepēpi ité opacatu pîtumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe.

¹² Esepia, ahe sembiapo yemochîsa ñomipri tēi vîreco yuvîreco.

¹³ Acoi yamboyecua ucase rumo evocoi nungar mbahe tesapesa nungar pipe, ahese oyecua tupri secocuer naporai vahe.

¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi:

"Peyemopoāse pe oque vahe nungar, peyepēpi omano vahe nungar pāhu sui. Ahese niha Cristo pe recocuer resapera" ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapîsaca tupriisa pipe.

¹⁶ Peiporu catu ñepeî-peî ari yande Yar upe nara pe recoveseve. Esepia, cûritei tecocuer co îvi pipe mbahe tēi.

¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua.

¹⁸ Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe.

¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar.

²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarã mbiguai reseve

²¹ Peyemboyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco.

²³ Esepia, imer güembireco cuai āgua secoi, ěgüe ehi avei niha Cristo viroyasar cuai āgua oico. Viroyasar Pĩsirosar avei secoi, inungar güetecuer ité sereco.

²⁴ Evocoiyase inungar seroyasar omboyeroya Cristo yuvireco, cuña avei niha ěgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara.

²⁶ ěgüe ehi yande recocuer moatiro yande angaipa sui i pipe Tūpa Ñhengagüer reroysave.

²⁷ Iyavei oyeupe yande rerecora yande reco catuprisa pipe iyavei yande reco quihaẽhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe.

²⁸ ěgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae.

²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. ěgüe ehi avei Cristo opacatu viroyasar upe.

³⁰ Esepia, chupendar ité yaico setecuer nungar.

³¹ “Sese ava oseyara vu, osi güembireco rese güeco āgua; ñuvirío yuvirecoira ñepeí ava nungar.”

³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa.

³³ ěgüe ehi eté ñepeí-peí pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chĩhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita.

² Co porocuaíta yipindar omombehu vahe porovasasa pisi āgua imboaviyesa pipe aipo ehi: “Pemboeteira pe ru, pe si avei.

³ ěgüe peyese, pe rorivetera iyavei pe reco pãhumbucu catura co ivi pipe” ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saísusa pipe.

⁵ Pe avei no mbiguai, pemboyeroya catura pe rereciar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña.

⁶⁻⁷ Pepraviqui tupri catu chupe nara, ndahei chira rumo pe repiaseño imbovaha āgua tēi; pepraviquira rumo pe querẽhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri āgua.

⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe sereciar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rereciar ivave chini vahe povrive peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipīratasa rese avei.

¹¹ Peñearo tupri catu Tūpa pīratasa pipe pe yemoviracua āgua Carugar pe mbopa tēiēhi āgua.

¹² Esepia, yande ndahei ava ité amotarēhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Carugar ipīrata vahe pītumimbisa pendar reroyaēhi āgua.

¹³ Sese peipisi catu opacatu mbahe Tūpa ombou vahe pēu pe yoepi āgua. Evocoyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe.

¹⁵ Peyemoingatu voi Tūpa Ñehengagüer ñeroisa resendar mombehu āgua yepi.

¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ātoisa sui.

¹⁷ Poropīsirosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe.

¹⁸ Peyeroqui catu Espíritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi.

¹⁹ Peyeroqui avei che rese. Evocoyase Tūpa tombou che ñehes āgua cheu che siquiyeēhisa pipe ñehesa ñepisirosa icuapi ramo vahe cua uca āgua ava eta upe.

²⁰ Tūpa niha che cuai co ñehesa mombehu āgua. Ichui tēi cūritei soquendapri aico. Peyeroqui catu che rese che siquiyeēhisa pipe co ñehesa mombehu āgua.

Ñehesa ipa vahe

²¹ Yande rivri Tíquico, yande rembiaisu, che pītivisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu.

²² Sese amondo eipeve pēu ore recocuer mombehu āgua 'ipipe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri āgua, iporoaisu āgua, oyese yeroya āgua avei.

²⁴ Tūpa tosovasa opacatu yande Yar Jesucristo raisupar saisusa ñepeí reseve vahe pipe. Aipo rupive.

PABLO REMBICUACHIA FILIPO PENDAR UPE FILIPENSES

Pablo mahenduhasa Jesús reroyasar Filipino pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei.

² Yande Ru Tūpa, yande Yar Jesucristo tape rovasa pe reco tupri ãgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi.

⁴ Iyavei che ayeruresa, ari rupi ayeroqui opacatu pe rese Tūpa upe che viharetasa pipe yepi.

⁵ Esepia, oyoya yañepitivi Jesucristo resendar ñehesa icatupri vahe rese, acoi pe seroya ramo suive.

⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave añ, anise que co coti rupi aico mborerecuar rovai co ñehesa pisirosa resendar repi ãgua iyavei amboyecua vaherã ahe ñehesa supi tupri vahe yuvireco chupe.

⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu.

⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pëu.

¹⁰ Ipipe sui peicuara mbahe aviye catu vahe poravo ãgua yepi; ëgüe peye aveira pe recocuer moatiro ãgua peico. Evocoyase ndipoi chira angaipa pe rese acoi Jesucristo ouse curi.

¹¹ Perecora pe recocuer aviye vahe ité Jesucristo ombou vahe pëu Tūpa mboetei ãgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco.

¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasasa Jesucristo rupi che guata sui tēi yuvireco.

¹⁴ Iyavei setá etepri yande rivri che repiase soquendapri che recose yuvireco, oyemonguerēhi catu Tūpa Ñehengagüer mombehu ãgua osiquiyeēhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroirosa pipe tēi. Oime rumo amove ava oñehe tupri Jesucristo rese opihañemoñeta tupri pipe.

¹⁶ Evocoi ava oñehe tupri oporoaisusa pipe, ahe oicua cohava che roquendasave yuvireco, “Co ñehesa Tūpa ñehe pisirosa resendar, ahe supi eté vahe, ndahei temira tēi” ahese.

¹⁷ Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi viteve.

¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira.

¹⁹ Esepia, che aicua co opacatu mbahe-mbahe tēi sui añepisirora pe yeruresa pipe iyavei che p̄t̄ivira Jesucristo Espiritu.

²⁰ Che aipota ité, asãro avei opacatu che recocuer sui che chĩehi ãgua añehe vaheerã opacatu che siquiyeẽhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco.

²¹ Esepia, Cristo che recovesa ité secoi; amanose rumo, aviyeño itera cheu.

²² Aicove vitesse co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyeera cheu.

²³ Ndaicatui co ñuvirio che p̄ihañemoñetasa rereco: amove amano pota che so ãgua ivave Cristo piri. Ahe aviye catura cheu viña.

²⁴ P̄eu nara rumo aviye catu aicove vitesse co ivi pipe.

²⁵ Sese che aicua aicove vite vaheerã pe p̄t̄ivii vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe.

²⁶ Evocoyase che rereco vitera peye pe piri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe p̄ihañemoñetasa yoyasa resendar iyavei pe poraviqui p̄iratasa resendar pe poreroyasave co ñehesa porop̄isirosa resendar rese.

²⁸ Iyavei ndapeyembosiquiyei chira pe amotarẽhimbar sui. Evocoyase ahe oicuaara yuvireco chupe ité Tũpa omondora imocañi ãgua; pe rumo Tũpa pe p̄isirora curi.

²⁹ Supi eté ndahei Jesucristo recocuer reroya ãgua güeraño Tũpa oipota p̄eu, sese pe yemombaraisu ãgua avei oipota.

³⁰ Esepia, pe, che avei oyoya tupri yaporaviqui p̄irata yande amotarẽhimbar p̄ãhuve yaico. Iyavei acoi pesepia yip̄indar che aporaviqui p̄irata che amotarẽhimbar p̄ãhuve vichico, iyavei cūritei peyandu mara ahe aporaviqui p̄irata vite ip̄ãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerẽhi, pe mboviha oporoaisusa pipe oico, Espiritu avei secoi pe rese. Peyeaisu tupri iyavei pe yeaisusa pipe peñep̄it̄ivii.

² Sese che mboviha catu peye: perecora p̄ihañemoñetasa ñepei reseve, oyoya guasu avei peyeaisura, oyoya aveira pe p̄ihañemoñetasa, ñepei reseve mbahe pe remimbotar rese avei.

³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui.

⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

⁵ Inungar Cristo p̄ihañemoñeta, ãgüe peye tupri aveira.

⁶ Yepe ahe Tũpa recocuer vireco, “Taseya eme Tũpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tēi ou.

⁸ ãgüe ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse 'toñenopiha opacatu iva pendar, ivi pipendar, opacatu omano vahecuer avei yuvireco' oya.

¹¹ Ichui toicua opacatu, "Jesucristo ité yande Yar" tehi yande Ru Tūpa mboetei āgua yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora písirosa pipeño ité Tūpa mboeteisave ichui pe siquiyesa pipe.

¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei.

¹⁵ Sese tipo eme mbahe pe rembiavi que pe reco raisa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pãhuve. Ahe ipãhuve pe recocuer osesapera, inungar tataendi osesape pítumimbisave.

¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherã.

¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihaivi vaherã Timoteo pe repia. Ahe omboyevise ñehesa pe recocuer resendar, ahese che aviharetera.

²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri āgua.

²¹ Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco.

²² Pe niha peicua Timoteo reco tupriisa opacatu upe. Iyavei che pítivii Tūpa Ñhengagüer mombehu āgua, inungar chñivahe oipítivii oyesupa, ēgüe ehi che pítivii oico.

²³ Sese che aipota imondo āgua pe repia acoi aicuase mara ehira che rereco yuvireco.

²⁴ Che rumo ayeroya yande Yar rese aso pihaivi vaherã che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che pítivii āgua mbahe cheu ipane vahe rese. Ahe che ndugüer oporaviqui pīrata vahe Tūpa upe.

²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi.

²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipítivii, che avei che paraisuereco co viharēhisa yeapi-apiñoēhi āgua cheu.

²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei.

²⁹ Peipisi tupri pëu iyepotase pe viharetasa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi.

³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pítivii pipe. Esepia, pe ité ndapeicatu che pítivii peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri āgua pëu. Iyavei aviye catu ité pëu nara.

² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe.

³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espíritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya,

⁴ yepe che supi eté ayeroya catura ambuae ava sui evocoi nungar mbahe rese viña.

⁵ Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuasa judío porocuita resendar rese vichico.

⁶ Ipipe sui tēi eté aseca-seca catu ayapo vaherã mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava “mara” ehi vahe yuvireco cheu.

⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ěgüe ehi tēi vahe nungar areco.

⁸ Iyavei opacatu que ambuae mbahe aviyera cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe iti nungar tēi

⁹ ‘taico sese’ che yapave. Ndahei porocuita mboaviyesa rese tēi aseca che reco catupri āgua, che rumo aseca Jesucristo rese che yeroyasa pipe sui ěgüe ahe vaherã. ěgüe ehi eté Tūpa che pisi seco catupri vahe nungar Cristo rese che yeroyasa pipe.

¹⁰ Che aipota ité Cristo cua tupri catu āgua. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ěgüe ahe pota avei.

¹¹ ěgüe tahe avei che cuerayevi āgua omano vahe pāhu sui, ahe co che asāro vichico.

Pablo osupiti pota ité güeco maranehi āgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorã. Esepia, Jesucristo che pisi ité oyeupe nara.

¹³ Che rivireta, “Che ae tēi co tecocuer ihivi vahe opa ité ayapo vichico” ndahei chira pëu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité.

¹⁴ Esepia, Tūpa che renoi ivave che so āgua aipisi vaherã iporerrecosa ivapendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu.

¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese.

¹⁸ Iyavei amombehu setá yupagüer pēu, cūritei amboyeví iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotarēhimbar.

¹⁹ Ahe rumo imocañipirã yuvirecoira curi. Oyemonguerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco.

²⁰ Yande rumo ivave nara ité yaico. Iyavei yasãro ité yaico íva sui ou vaherã yande Pīsirosar, ahe yande Yar Jesucristo.

²¹ Ahe opīratasa pipe virecora opacatu mbahe opovrive. Ahe opīratasa pipe avei osecuñaropara yande retecuer ēgüe ehi tēi vahe, ahese inungar ahe setecuer sendi yai, nimarai vahe, ēgüe yahe aveira yande yaico.

4

Yayembovihá yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco.

³ Nde niha che pítivii tupri vahecuer che poraviquisa rese eve. Eipítivii evocoi cuña. Esepia, ahe niha oyembopihaviracua ité che pítivise Tūpa Ñehengagüer písirosa resendar mombehu āgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apirēhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihãño ité!” ahe aipo pēu.

⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri āgua yandeu.

⁶ “¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe.

⁷ Evocoyase Tūpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipipe sui Tūpa osãrora pe piha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, poromboetei āgua rese, mbahe ihivi vahe rese, mbahe maranehi rese, mbahe yande mbovaha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tūpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou ãgua cheu. “Sesarai yuvireco che sui” ndahei chira pẽu. Pe rumo yipindar ndapeicatui eté che pĩtivii ãgua peye.

¹¹ “Ipane mbahe cheu” ndahei chira pẽu. Esepia, ayembohe che viharete ãgua mbahe che rembiereco rese.

¹² Aicua mara yahe yande paraisusa pipe yaico, aicua avei mara yahe mbahe rereco ati ãgua. Ayembohe avei che viha ãgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu.

¹³ Aicatu opacatu mbahe uve che yemoviracua ãgua. Esepia, Cristo ombou che pĩrata ãgua.

¹⁴ Pe rumo peyapo mbahe aviye vahe cheu che pĩtivii eteprisave peye mbahe-mbahe tẽi oimese cheu.

¹⁵ Iyavei pe Filipo pendar peicua avei acoi yipindar peipisise pĩsirosa resendar Tũpa Ñehengagũer acoi che sose Macedonia sui, ndipoi eté Jesús reroyasar ambuae tecua pendar iporerenco vahe yuvireco che rese. Pe gũeraño pembou pe porerecosa, “Aviye” pe hesa pipe che pĩtivii ãgua.

¹⁶ Iyavei aicose Tesalónica ve, pembou pe porerecosa cheu ñuvirio yupagũer che pĩtivii ãgua.

¹⁷ Ndachepihañemoñetai mbahe arocuaño tẽi vaheã pe sui. Che rumo aipota Tũpa omboyevira pẽu co pe porerecosa pembou vahe cheu.

¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi siãcua vahe, iyavei inungar mbahe seropovẽhepri aviye vahe Tũpa upe.

¹⁹ Evocoyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe.

²⁰ ¡Ëgũe tehi timboeteisa yande Ru Tũpa! ¡Ahe apirẽhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pẽu.

²² Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rõtave yuvirecoi vahe, ahe ité avei omondo omahenduhasa yuvireco pẽu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivi Timoteo reseve.

² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese.

⁴⁻⁵ Esepia, oroyandu acoi oyepota ramosa Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosa pisi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi.

⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe.

⁷ Co ñehesa yande rembiaisu yande mboetasa Epafra pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve.

⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramosave ndoroyeroquipai pe rese. Orojeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tupri pipe avei yuvireco’ ore yapave pēu.

¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico.

¹¹ Iyavei tombou catu pe momirata āgua güecocuer pīratasa pipe sui. Evo-coiyase oimese que mbahe tēi pēu, peñemosañora pe reco mbegüesa pipe.

¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe.

¹³ Ahe niha yande pīsiro Carugar povri sui. Ēgüe ehi yande reraso Guahir güembiaisu povri ve.

¹⁴ Ahe Tahir yande pīsiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui.

¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei.

¹⁷ Ahe oicove yipisuive aracahe opacatu mbahe reimeēhi vitesave. Ahe avei omoime vite opacatu mbahe yandeu.

¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoyase ahe ivate catu vahe opacatu sui.

¹⁹ Esepia, Tu oipota opacatu güecocuer reseve secoi ãgua sese yepi.

²⁰ Iyavei 'che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei' oya. Ëgüe ehi Jesús oipiyere vuvi curusu rese Tüpa upe opacatu mbahe moingatu ãgua.

²¹ Yipindar pe pihañemoñeta raisa pipe sui tõi amombri Tüpa sui peico yamotarẽhisa pipe mbahe pe rembiapo ai rese.

²² Cũritei rumo Tüpa iñero pẽu pe reroeyevi oyeupe Cristo mano pipe. Ahe niha ãgüe ehi Vu rovai ipehapri pe rereco oyeupe nara, pe reco maranehi ãgua mbahe aviẽhisa pipe ava rovaque.

²³ Ëgüe peye ãgua rumo peyemoviracuaño itera Cristo rese pe yeroyasa pipe yepi. Ndapeyepipi chiaveira mbahe oime vaherã rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuairi, aico co ñehesa mombehu ãgua.

Pablo icuaita Jesús reroiyasar rese hañeco ãgua

²⁴ Cũritei aviha pe rese che yemomboraras pipe. Ëgüe ahe iporara che rete rese cohave vichico. Ëgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico.

²⁵ Jesús reroiyasar pĩtivii ãgua niha Tüpa che cuai. Sese amombehu opacatu iñehengagüer pẽu pe reco tupri ãgua rese.

²⁶ Ahe ñehesa aracahe suive ndicuasai vahe ité. Cũritei rumo Tüpa omboyecua viroyasar upe.

²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherã teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri ãgua ore aracuasa pipe 'toyuvirecoi tupri ité Cristo rese Tüpa rovai' ore hesa pipe.

²⁹ Co rese niha che aporaviqui etepri opacatu Cristo pĩratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparẽhi recocuer rese avei

² 'toyemonguerẽhi catu, toyemboyoya guasu oyeaisusa pipe yuvireco' viya. Iyavei 'senducua tuprisa pipe toyuvirecoi mbahe tupri pipe' viya opacatu pẽu. Esepia, ichui avei peicua tupri co mbahe imboyecuapi ramo, ahe niha Cristo.

³ Ahe vireco opacatu mbahe yande mboaracua ãgua, mbahe renducua tupri ãgua avei.

⁴ Aipo mbahe amombehu pẽu ava oñehe tupri aisa pipe tõi pe mbopaẽhi ãgua.

⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ivisa pipe, ndapeyepipi co coti rupi Jesucristo reroiyasa sui. Sese che mbovihareteño ité peye.

Jesús suindar tecocuer piyasu

⁶ Evocoyase inungar acoi peipisi Jesucristo pe Yarã, ãgüe peye aveira peico sese ari yacatu rupi

⁷ pe yemoviracuasa pîpe. Pe yembohesa rese peyemomirata catura Cristo rese pe yeroyasa pîpe. Iyavei, “Aviye ndeu” peye itera Tûpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pîpe. Esepia, ahe ěgüe ehi tēi vahe, ava suindar tēi yembohesa, ivi pîpendar ava seco ivate catu vahe pîhañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tûpa reco oyese.

¹⁰ Evocoyase pe pereco Tûpa reco Cristo rese peicose. Ahe opacatu mborerecuar ivi pîpendar iyavei iva pendar rerecuar secoi.

¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe vîrocu pe recocuerai pe sui.

¹² Pe āpiramosa pîpe ndoyavi pe recocuerai ñotimbrî Cristo reseve. ěgüe ehi avei ndoyavi pe recocuer ocuerayevi vahe seseve avei, peyeroyase Tûpa pîratasa rese. Ahe niha ombogüerayevi vahe Guahîr omano vahe pâhu sui.

¹³ Pe niha acoi cuese omano vahe nungar peico Tûpa upe pe angaipa pîpe, pe ndahei vahe judío peico vahe. Ahe rumo pe recocuer mbogüerayevi Guahîr reseve iyavei iñero pe angaipa rese pēu.

¹⁴ Ahe yande cañi rāgüer rumo opa omboepi. Esepia, yande iporocuita pîpe yaico imboaviye āgua viña, evocoyase imocañipri tēi yaico ipovrive viña; ombou rumo Guahîr curusu rese yatica āgua yande cañi rāgüer sui yande renose āgua.

¹⁵ ěgüe ehi ahe omano pîpe curusu rese caruguar, ipovri pendar mborerecuareta reseve secopi. ěgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbîtuhusa avei no.

¹⁷ Esepia, opacatu co mbahe, ahe yipîndar vahe, “ěgüe ehira Cristo ou” hesa tēi yandeu. Co rumo Cristo ité cute.

¹⁸ Peyapisacai rene acoi ava “ndapeipisi chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tûpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pîpe iva pendar mbahe” ehi tēi. Esepia, ahe oyemboivate ai oaracua rai tēisa pîpe yuvireco.

¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepei vahe nungar vireco oyeupe Vu Tûpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pîpendar pîhañemoñetasavrive peico. ¿Mahera evocoyase peroya vite co ivi pîpendar porocuita ěgüe ehi tēi vahe,

²¹ inungar “pepocoi rene co mbahe rese, pehui rene evocoi nungar mbahe” ehi tēi vahe?

²² Opacatu co nungar porocuita ocañi tēi vaherã. Esepia, ahe ava remimbotar tēi yembohesa, iporocuita tēi avei.

²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ěgüe ehi tēi vahe. Esepia, ndayande pîtivîi eté yande yepepi āgua yande remimbotarai sui.

3

¹ Cūritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti.

² Pepihañemoñeta mbahe iva pendar rese, ndahei chira ivi pipendar mbahe rese tēi.

³ Esepia, cūritei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña.

⁴ Cristo niha yande recovesa ité secoi. Sese ahe oyevi irise curi, ěgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese).

⁶ Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco.

⁷ ěgüe peye avei yipindar pe recocuerai pipe peico.

⁸ Cūritei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe.

⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui.

¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu āgua.

¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora.

¹³ ěgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ěgüe peyera ambuae ava upe.

¹⁴ Iyavei peyeaisu catura. Esepia, ahe yande mboyemboya tupri oyese yepi.

¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuaasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi.

¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe.

¹⁹ Pe avei no imer: pesaisu pe rembireco. Perecoi rene pihavĩracuasa pipe.

²⁰ Pe avei no chĩhivahe: peroya aveira pe yesupa. Esepia, ahe yande Yar oipota.

²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerẽhi iri chira ocuaise pẽu.

²² Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tupri pipe, Tũpa sui pe siquiyesa pipe avei.

²³ Opacatu mbahe peyapo vahe, peyapo pe querẽhisave yande Yar mboviha ãgua. Ndahei chira ava mboviha ãgua tẽi.

²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe.

²⁵ Acoi ava oyapo vahe mbahe naporai vahe, oipisi aveira güembiapo ai repri. Tũpa niha nomboyoviratii yande raisu.

4

¹ Pe avei serecuar: peyapo mbahe ihĩvi vahe pe pihañemoñeta tupri pipe pe rembiguai upe. Peyemomahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tũpa upe.

³ Peyeroqui avei ore rese. Tore pĩtivii Tũpa oñehengagüer mombehu vite ãgua. Toroñehe vite avei co ñehesa Cristo resendar Tũpa omboyecua ramo vahe rese yandeu. Sese tẽi niha co che roquendasa.

⁴ Evocoyase peyeroqui che rese, tamombehu tupri catu co ñehesa opacatu upe senducua tupri catu ãgua. Ēgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve.

⁶ Pe reco aviye tupri pipe peñehera yepi. Iyavei peicua tupri ñehesa mboyevi ãgua ñepeipei ava uve.

Ñehesa ipa vahe

⁷ Co yande rivri, yande rembiaisu, Tíquico, che pĩtivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pẽu.

⁸ Sese co amondo pẽu ore recocuer cua tupri ãgua, pe monguerẽhi catu ãgua avei.

⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pẽu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pẽu iyavei Marcos, Bernabé rihir. Pe revo peicuaño Marcos so ãgua eipeve; osose pe piri, peipisi tupriñora.

¹¹ Iyavei omahenduhasa omondo Jesús, ahe serer acoi Justo, pẽu. Co güerañomi Jesús reroyasar pãhuve judío oporaviqui vahe che rupi yuvireco Tũpa mborerecuasave nara. Ahe niha che mboviha yuvireco yepi.

¹² Epafras avei omondo omahenduhasa pẽu. Ahe pe recua pendar ité, Jesucristo rembiguai. Ahe oyeroqui vahe pe rese yepi ‘toyemoviracua tupri iyavei toyuvirecoi Tũpa remimbotar rupi yuvireco’ oyapave.

¹³ Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei.

¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pẽu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tũpa reroyasar yuvireco.

¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei.

¹⁷ Iyavei emombehu Arquipo upe aipo ere: “Emboaviye tupri Tũpa nde cuaisa” ere.

¹⁸ Che Pablo aico. Che ité aicuachía co che mahenduhasa pẽu. Tapemahenduha vite che roquendasave che rese. Aviye pẽu. Yande Aposar tape pĩtivii. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri āgua yande Ru Tūpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tūpa upe opacatu pe rese yepi. Iyavei oremahenduha pe rese ore yeruresa pipe.

³ Pe niha yande Yar rese pe yeroya tupriisa pipe peporaviquiño yepi, iyavei pe poroaisusa pipe peyapo mbahe Tūpa upe, iyavei peñemosañño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tūpa rovai.

⁴ Ore rivireta, Tūpa niha pe raisu, oroicua avei ahe ité pe poravo.

⁵ Esepia, acoi oromombehuse ñehesa pīsirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriñño ité, orosecañño avei pe reco tupri āgua.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiñño ité rumo co ñehesa pe vihasa pipe Espiritu Santo ombou vahe pëu.

⁷ Evocoya pe reco pipe pemboyecua catu pe reco catupriisa Tūpa reroyasar Macedonia pendar upe, Acaya pendar upe avei.

⁸ Esepia, pe Tūpa ñehe peicua uca Macedonia rupi, Acaya rupi avei. Ndahei rumo co rupiñño, opacatu rupi avei oicua yuvireco Tūpa reroyasa pereco vahe peyese. Sese ore ndoromombehu iri chira pe recocuer.

⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuvireco, pe chupe nara mbahe apo āgua avei no.

¹⁰ Omombehu avei pesāro vahe Tūpa Rahir Jesús iyevi āgua iva sui yuvireco oreu, acoi Tūpa ombogüerayevi vahe omano vahe pāhu sui. Ahe niha yande pīsirora Tūpa ñemoirosa ipīrata vahe ou vaherã sui.

2

Tesalónica pendar yeroyasa mboyecuasa

¹ Ore rivireta, pe niha peicua ore so agüer pe piri ndahei ēgüe ehi tēi vahe.

² Peicua tupri avei niha acoi cuese yipindar mara-mara tēi ava ore rereco yuvireco tecua Filipino ve. Tūpa rumo ore pītivii oñhengagüer pīsirosa resendar mombehu āgua opacatu ore siquiyeēhisa pipe ore amotarēhimbar pāhuve.

³ Esepia, ndoroyavii eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa āgua oroñehe.

⁴ Tūpa rumo ore recoñha, ichui ore cuai oñhengagüer pīsirosa resendar mombehu āgua; ēgüe ehi ore ñehe, ndahei ava tēi mboviha āgua. Tūpa yande pihañemoñetasa oicua vahe rumo oromboviha.

⁵ Peicua niha ore ndoroñehi ñehesa icatupri catu vahe tēi rese pe mbopa āgua, iyavei ndahei guarepochi potasave tēi oroñehi tupri. Tūpa niha oicua.

⁶ Ore ndorosecai eté ava ore mboetei catu āgua pe, que ambuae ava eta avei no.

⁷ Ehi oroyandu ucara ore mborerecuasa Jesucristo ore cuaisa pēu viña; oroyemominiño rumo oroico pe pāhuve inungar acoi cuña osāro tupri vahe omembrī imboacua.

⁸ Ēgüe orohe avei ore pe raisu. Sese ndahei Tūpa Ñehengagüer año oromondo pota pēu, ore recocuer avei no. Esepia, opoaisú ité.

⁹ Ore rīvireta, peyemomahenduha acoi ore paraisu agüer rese, ore poraviqui agüer rese avei ari, pītu reseve. Ndahei que ñepe mañeco tēi āgua mbahe rese oromombehu Tūpa Ñehengagüer oroico pēu.

¹⁰ Pe niha ore repia peye Tūpa avei oicua, ore reco tupri, ore rembiapo supi eté vahe, ihīvi vahe pe Jesús reroyasar pāhuve.

¹¹⁻¹² Peicua niha, inungar mbīa guahir upe, ēgüe orohe pe monguerēhi, pe mbovīhasa avei ñepe-pe opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehi pēu peico vaheñe sese imborerecuasa porañetesave.

¹³ Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipisi ité, “Co Tūpa ñehi, ndahei ava tēi ñehi” aipo peye ité pe chupe. Supi eté Tūpa ñehi. Ahe niha osecuñaro ité pe recocuer peroyare.

¹⁴ Ore rīvireta, acoi cuese peiporara mbahe-mbahe tēi pe mu eta pāhuve peicose; ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco.

¹⁵ Ahe niha oyuca yande Yar Jesús yuvireco. Ahe avei oyucapa Tūpa ñehi mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarēhimbar tēi yuvirecoi.

¹⁶ Esepia, acoi oroñehi potase ava ndahei vahe judío upe iñepisiro āgua rese, ahe rumo ndoipotai yuvireco oreu. Ipīpe sui oyemboangaipa catu yuvireco. Cūrīte rumo Tūpa ñemoirosa ipīrata vahe ou iharīve yuvireco cute.

Pablo oso pota iri Tesalónica pendar repia

¹⁷ Ore rīvireta, yepe ndayayoepia iri yayepipi raimise yandeyesui, ore piha pipi rumo, “Ahé” oroheño ité pēu. Iyavei orequerēhiño ité yepi oroso iri vaheñe pe repia.

¹⁸ Orosāha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai.

¹⁹ ¿Ava sui pīha orosāro mbahe aviye vahe? ¿Uma ore vīhasa? ¿Uma ore mbovīharete catura? ¡Peño itera acoi yande Yar Jesucristo yevise curi!

²⁰ Pe ité niha ore mbovīhara peye, iyavei orovīha catura pe rese no.

3

¹⁻² Evocoyase che nañemosa irise pe repiāñi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pīsīrosa resendar Cristo suindar ou vahe. Ahe amondo pēu pe moviracua catu āgua, pe monguerēhi catu āgua avei peyeroya catu vaheñe Cristo rese.

³ Evocoyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe.

⁴ Iyavei niha acoi oroico vïtese pe piri, “Yande paraisu rane itera mbahe yavai vahe” orohe voi eté acoi pëu. Ahe niha cûritei peicua.

⁵ Evocoiyase che nañemosa irise, amondo Timoteo ‘¿yuvirecoiño ité pïha Tûpa rese?’ che yapave. Che asiquiye, “Aviyeteramo Carugar omondora mbahe tēi pipe yuvireco” ahe ‘ore poraviqui agüer evocoiyase ocañi tēira’ che hesave.

⁶ Cûritei rumo Timoteo oyevi Tesalónica sui, güeru ñehesa aviye vahe pe resendar oreu pe Tûpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei.

⁷ Sese, ore rivireta, ore paraisusa pãhuve ore mbovïharete peye, co oroicuase pe reco tupri Tûpa reroyasa pipe.

⁸ Cûritei ore mopoase catu iri oroyanduse pe yemoviracua tuprisa yande Yar rese.

⁹ “¿Mara yahera pïha, ‘Aviye ndeu’ yande he tupri catu ãgua Tûpa upe?” orohe pe reco tuprisa rese, iyavei ore yembovïha catusa rese avei no

¹⁰ pïtu, ari rupi oroporandu Tûpa upe ore so ãgua pe repia eipeve iyavei Tûpa reroyasa ipane vite vahe mboaviye tupri ãgua pëu.

¹¹ Iyavei ore oroipota ore pïtivïira yande Ru Tûpa, yande Yar Jesucristo avei ore so ãgua pe piri.

¹² Evocoiyase yande Yar tape moviracua catu, tombou catu avei pe yeaisu ãgua, iyavei opacatu raisu catu ãgua, inungar ore orovireco pe raisusa.

¹³ Ipipe sui tape moviracua pe reco maranehi pipe pe mbahe aviëhisave yande Ru Tûpa rovai acoi oyevise yande Yar Jesús opacatu ovoya reseve. Êgüe tehi pëu.

4

Teco tupri Tûpa oipota

¹ Ore rivireta, cûritei oroñehe pota pëu pe cuaitarã rese yande Yar Jesús rer pipe: inungar cûritei pe recocuer pereco, êgüe peyeño ité catu peico ore pe mbohe agüer rupi Tûpa mboetei ãgua.

² Pe niha, peicua acoi ore pe mbohe agüer yande Yar Jesús rer pipe.

³ Esepia, Tûpa oipota pe reco maranehi ãgua oyeupe. “Tipo eme que ñepeï oyemboaguasa tēi vahe” ehi.

⁴ Iyavei peico tupri pe rembireco rese pe reco ïvisa pipe Tûpa remimbotar rupi, iyavei pemboetei tuprïra sereco yepi.

⁵ Peicoi rene ava Tûpa ndoicuai vahe reco pipe pe remimbotar tēi apo ãgua.

⁶ Tipo eme avei oyapo vahe co nungar angaipa yande rivri reco momara ãgua tēi. Esepia, Tûpa omondora oñemoïrosa ipïrata vahe evocoi nungar ava upe. Evocoi niha yipïsuive oromombehu vahe pëu.

⁷ Esepia, Tûpa niha yande poravo yande reco maranehi ãgua, ndahei angaipa pipe yande reco ãgua tēi.

⁸ Sese acoi ndosendu potai vahe co yembohesa, ndahei eté ava tēi viroïro, ahe rumo Tûpa ité viroïro yuvireco acoi ombou vahe oEspïritu Santo pëu.

⁹ Iyavei co peyepãhuve pe yeaisusa rese, ndaicuachïa iri chira pëu. Esepia, Tûpa ité niha pe mbohe pe yeaisu ãgua opacatu.

¹⁰ Êgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa.

¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pëu cuese.

¹² Evocoyase pe mboyeroyara ava ndahei vahe Jesús reroyasar yuvireco; iyavei ěgüe peyera mbahe pẽu ipaneẽhi ģgua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharẽhisa pipe inungar co ava ndoyeroyai vahe Tũpa rese.

¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tũpa Guahir Jesucristo reseve ombogũerayevira opacatu acoi seroyasa pipe omano vahe yuvireco.

¹⁵ Sese co oromombehu pẽu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese.

¹⁶ Esepia, yande Yar ité ogũeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tũpa remimbi moñehe pĩratasa. Ahese seroyasar omano vahecuer rane opũhara yuvireco.

¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovaĩchi ģgua ivitu rupi. Ęgüe yahera yande Yar piri yaico vaherã apirẽhi.

¹⁸ Sese peyemonguerẽhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pẽu.

² Esepia, pe peicua tupri co yande Yar ari oyepotara imohaẽhisa pipe, inungar acoi imonda rai vahe oyepota pĩtu pipe.

³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tẽi yandeu” ehise, ahese inungar acoi cuña imembirasĩ aviyeteramo tẽi, ěgüe ehi aveira, aviyeteramo tẽi icañi oura iharive, ahese ndoicatui chira ichui oñemi yuvireco.

⁴ Pe rumo, ore rivireta, ndahei pĩtumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tẽi ou.

⁵ Esepia, pe opacatu peico vahe Tũpa poroesapesa pipe, ndahe iri yande pĩtumimbi pipendar yaico.

⁶ Evocoyase ndayaicoi chira co ambuae yuviroque tẽi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe.

⁷ Acoi yuviroque vahe, yuviroque pĩtu pipe; iyavei acoi osavaipo vahe, osavaipo avei pĩtu pipe yuvireco.

⁸ Yande rumo yaico vahe Tũpa poroesapesa pipe. Evocoyase yareco tupri yande pihañemoñetasa yande reco tupri ģgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oãca ndiru guarepochi apopri yuvireco oãca repi ģgua, yande avei tayareco yande remiaro yande ñepisiro ģgua.

⁹ Esepia niha, Tũpa yande poravo ndahei yaico vaherã iñemoirosa pipe nara; ahe rumo yande poravo yasupiti vaherã ñepisirosa yande Yar Jesucristo rembiapo sui.

¹⁰ Esepia, ahe omano yande recocuer rese oyese yande rereco ģgua opacatu yande recove vitesse, yamanose avei.

¹¹ Sese peyemonguerẽhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rívíreta, pemboyeroya acoi oporaviqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

¹³ Pemboyeroya iyavei pesaisu tuprira iporaviquisa rese. Peico tupri avei peyepãhuve.

¹⁴ Iyavei ore rívíreta, pe cuaisa: pemboaracua acoi ndoporaviqui potai vahe imbohe catu ãgua. Iyavei pemonguerẽhi acoi niquerẽhi iri vahe. Peipitivii avei acoi ndoyemoviracuai vahe Tũpa rese güeco ãgua. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tẽi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihanõra ari yacatu peico.

¹⁷ Iyavei peyeroquirã ari yacatu rupi no.

¹⁸ “Aviye ndeu” peyera Tũpa upe opacatu mbahe rese. Esepia, ahe niha Tũpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espiritu Santo oyapo pota vahe pe rese.

²⁰ Ndapeyamotarẽhi chira Tũpa ñehe imombehupri.

²¹ Pesãhapa rane opacatu mbahe. Ichui peipisira mbahe aviye vahe peyeupe.

²² Peyepipi opacatu mbahe naporai vahe sui.

²³ Tũpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espíritu, pe hã, pe rete avei pe reco maranehi ãgua co yande Yar Jesucristo yevi irise.

²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroysar rese

²⁵ Ore rívíreta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroqui co cuachiar opacatu yande rívíreta upe.

²⁸ Yande Yar Jesucristo tape rovasa tupriño pe rereco. Aipo rupive.

PABLO REMBICUACHIA IMOÑUVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pëu, ore rívíreta, peñemonuha vahe Tũpa uve tecua Tesalónica ve, yande Ru Tũpa, yande Yar Jesucristo rese peico vahe.

² Tombou pëu oporovasasa pe reco tuprî ãgua yande Ru Tũpa, yande Yar Jesucristo avei.

Tũpa omombaraisura viroyasarêhi Jesucristo yevise curi

³ Ore rívíreta, “Aviye ndeu” orohe itera Tũpa upe pe recocuer rese yepi. Esepia, Tũpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe.

⁴ Evocoiyase, ore oroñehe pe rese ore vihasa pıpe Tũpa reroyasar ñemonuhasa rupi. Esepia, acoi ava mbahe-mbahe tẽise pëu, peñemosañõ chupe pe Cristo rese pe yeroyasa pıpe.

⁵ Co niha omboyecua Tũpa reco ívisa ava upe. Esepia, ipıpe pe rereco omborerecuasave pe reique ãgua. Sese niha, peparaisu vite tẽi peico.

⁶ Tũpa omombaraisura acoi pe mombaraisusarer. Iya ité ãgũe ehi vaherã chupe.

⁷ Pe rumo imombaraisuprî peico vahe, Tũpa omondora pe pıtuhu ãgua, ore pıtuhu ãgua avei, acoi yande Yar Jesús oyevise tata rendigũer pãhuve iva sui opacatu güembiguai seco pĩrata catu vahe reseve.

⁸ Ahe oura opacatu Vu Tũpa reroyasarêhi mombaraisu ãgua iyavei oyesuindar ñehesa poropĩsirosa resendar rendu tẽisar mombaraisu avei.

⁹ Evocoi iparaisura yuvireco, imocañıprî yuvirecoira apırêhi. Iyavei imboyepısarara amombri yande Yar reco pĩratasa porañetesa sui.

¹⁰ Acoi ouse ahe arı pıpe, yande Yar imboeteiprıra opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

¹¹ Co rese oroyeroquı pe rese yepi: oroporandu yande Ru Tũpa upe tape rereco tuprî güemienoi pe recosa pıpe. Iyavei oroyeroquı chupe, tomboaviye güeco pĩratasa pıpe opacatu ñepeı-peı mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pıpe.

¹² Evocoiyase yande Yar Jesucristo rer imboeteiprıra pe recocuer pıpe sui; iyavei pe imboeteiprıra peico yande Yar rese peico vahe yande Ru Tũpa, yande Yar Jesucristo pe raisusave.

2

Yande Yar Jesús yevisa resendar mombehu tuprısã

¹ Iyavei, ore rívíreta, ore oromombehu potami pëu opacatu acoi yande Yar Jesucristo yevisa resendar yande monuha vaherã oyese.

² Peicua catu, tapepıhañemoñeta rerova eme iyavei peyembosıquıyeı rene que ava “che añehe Espıritu pıpe” ehi vahe sui, que icuachiaprı sui, que ñehesa pesendu vahe sui inungar-ra ore ñehesa ité viña “oyepota arı Jesús yevısã” ehi tẽi vahe yuvireco pëu.

³ Peicua catu peyembopa ucai rene ñepeı yepe ava upe. Esepia, yıpındar arı Jesucristo yu ãgua renonde, yugũerura mbahe-mbahe tẽi aposar. Ahe Tũpa

amotarēhisar yuvirecoi vahe. Ahese oyemboyecuara ava yangaipa guasu vahe. Ahe ocañi tēi vaherā.

⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oĩ.

⁵ ¿Ndapemahenduhai vo acoi che ñehengagüer rese pe pãhuve aico vitesese cuese?

⁶ Co imombitasar peicua cūritei. Ihari oyepotase voi, oyemboyecuara.

⁷ Co porocuita amotarēhisar ndoyemboyecua vitei vahe rembiapo oime cūritei. Co güeraño ipane imombitasar renose āgua ipãhu sui,

⁸ ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pĩratasa pipe oyeveise curi.

⁹ Yucasa renonde rumo, acoi ava yangaipa guasu vahe oura Carugar pĩratasa pipe; güerura güeco pĩratasa tuvicha vahe; omboyecua angahura poromondiisa.

¹⁰ Oyapo angahura opacatu mbahe tēi oporombopa āgua oico ava ocañi tēi vaherā upe. Esepia, evocoi ava ndosendu potai porombohesa supi eté vahe oñepisiro āgua yuvireco.

¹¹ Sese Tūpa oseyara co porombopasa reroya āgua yuvireco

¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ipĩsiropirã

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe pĩsiro āgua pe reco maranehi āgua rese Espiritu pipe iyavei porombohesa supi eté vahe reroya āgua.

¹⁴ Sese niha, Tūpa oñehe yandeu yande piha pipe co ñehesa pĩsirosa re-sendar pipe, ore oromombehu vahe pēu ‘tovireco che Rahir Jesucristo reco porañetesa’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu.

¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rãro āgua,

¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pãhuve.

² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco.

³ Yande Yar rumo seco ïvi vahe. Ahe pe recocuer moviracuara iyavei pe rãrora mbahe tēi sui.

⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer.

⁵ Yande Yar tape pĩtivi pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rívr̄eta, opocuai yande Yar Jesucristo rer p̄ipe: acoi ndoporav̄iqui potai vahe yande rívr̄i pe p̄ãhuve, peyepipiño ichui, acoi ndov̄iroya potai vahe avei ore porombohesa oromombehu vahe p̄ẽu.

⁷ Pe peicua mara peyera ore recocuer moña ãgua peico. Ore oroicose pe p̄ãhuve, ndoroico t̄ei,

⁸ ndorohu t̄ei avei ambuae tembihu imboepipir̄ehi. Ore rumo que ñepeí mañeco t̄eiñhi ãgua rese oroporav̄iqui ore cuerai rane ité ari, p̄ĩtu reseve.

⁹ Iya ité niha mbahe rese ore porandu ãgua p̄ẽu ore p̄ĩtiv̄i ãgua rese viña; ore rumo oroporav̄iqui pe ore recocuer rupi pe guata ãgua rese.

¹⁰ Acoi oroico v̄itese pe p̄ãhuve, oromondo pe cuaitar̄ã: acoi ndoporav̄iqui potai vahe, ahe tocaru eme.

¹¹ Oroyandu amove aipo pe p̄ãhu pendar yuv̄irecoiño t̄ei ndoporav̄iqui vahe. Evocoi omañeco t̄ei ambuae ava recocuer.

¹² Ore oromondo acoi ava upe mborocuita yande Yar Jesucristo rer p̄ipe: toporav̄iqui güeco quiririsa p̄ipe; ip̄ipe sui yuv̄irecovera.

¹³ Ore rívr̄eta, pecuerai eme mbahe av̄iye vahe apo.

¹⁴ Oimese ndov̄iroyai vahe ore remimombehu co cuachiar p̄ipe, peicua tupri evocoi nungar. Peyemboya eme sese. Evocoyase toch̄i ahe.

¹⁵ Pereco eme catu yamotar̄ehisa chupe; iyacatu rumo pemboaracua catuñora inungar yande rívr̄i.

Ñehesa ipa vahe

¹⁶ Av̄iye, yande Yar ae tombou güeco tuprisa pe reco tupri ãgua p̄ẽu ari yacatu rupi opacatu pe reco p̄ipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po p̄ipe ité p̄ẽu. Che rembicuachía icuapri opacatu che cuachiar p̄ipe.

¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande Písirosar Tūpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco.

⁴ Toyapisaca eme avei tecocuer ipapapri tēi vahe rese, tecocuer aracahendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pītivii rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe.

⁶ Esepia, amove ava oime ichui oyearacua mocañi oñehe-ñehe tēisa pipe yuvireco.

⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté.

⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nomboetei vahe Tūpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar.

¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara.

¹¹ Co porombohesa nimarai vahe oyoya tupri ñehesa porañete vahe poropísirosa resendar rese. Tūpa sovasapri secoi, ahe che cuai vahe sese.

Pablo oparaisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua.

¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe.

¹⁴ Ëgüe ehi yande Yar ombou catu oporovasasa che rese iyavei ombou che oyese yeroya ãgua iyavei che poroaisu ãgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe písiro ãgua. Che rumo acoi ivate catu vahe yipindar aico ipãhuve.

¹⁶ Sese Tũpa che paraisuereco che rese rane Jesucristo reco mbegüe tuprisa mboyecua ãgua. Ëgüe ehi che recocuer upe ambuae ava seroya ãgua. Ipipe sui osupitira tecovesa apirēhi vahe yuvireco.

¹⁷ ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepe vahe Tũpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua ãgua mbahe tēi recopi ãgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tũpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tũpa rese oyeroyasa

²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tũpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure ãgua, peporandu, pemondo avei “aviye” pe hesa Tũpa upe opacatu ava recocuer rese.

² Iyavei peyerure opacatú mborerecuar rese. Evocoyase tayareco yande reco tupri Tũpa mboetei tuprisa pipe, yande poromboeteisa pipe avei.

³ Co aviye ité; ahe niha yande Písirosar Tũpa remimbotar.

⁴ Supi eté ahe oipota opacatu ava ñepísiro iyavei co porombohesa supi eté vahe cua tupri ãgua.

⁵ Esepia, ñepeño ité Tũpa, iyavei ñepeño ité ava oicatu vahe yande reraso Tũpa upe: ahe Jesucristo.

⁶ Esepia, Jesucristo omano opacatu ava yangaipa vahe repirã ipísiro ãgua. Ahe imombehusa chupendar arí iporavopri rupi.

⁷ Sese che supi eté apóstol, icuaipri aico Tũpa Ñhengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei.

⁹ Iyavei cuña toyemonde tupriño turucuarño tēi pipe yuvireco. Aní chira rumo oãca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco.

¹⁰ Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tũpa upe yuvireco yepi.

¹¹ Iyavei cuña tosendu porombohesa oquiririsa pipe imboyeroyasave.

¹² Ndaipotai cuña oporombohe ava rehí pãhuve iyavei toyocuai eme cuimbahe. Iyacatu rumo iquiririñora yuvireco.

¹³ Esepia, Tũpa oyapo yipindar Adán; ipare Eva oyapo.

¹⁴ Adán ndahei imbopapri; cuña rumo oyembopa uca. Ichui oviapi angaipa pipe.

¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tũpa reroyasar rãrosar cuaita

¹ Iyavei co supi eté: acoi amove oico pota vahe Tũpa reroyasar rãro ãgua, ahe oipota mboraviqui aviye catu vahe.

² Sese acoi vireco vahe ocuaita Tũpa reroyasar rãro ãgua, ahe secoi tuprira mbahe aviye vahe pipe yepi. Ipipe ava noñehei chira yamotarẽhisave. Iyavei omendara ñepei cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri ãgua.

³ Iyavei ndahei chira caguar tẽi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi.

⁴ Iyavei oicua tuprira güeta pipendar rãro ãgua. Ombohe aveira guahir iporeroya ãgua, iporomboetei ãgua avei.

⁵ Esepia, acoi ndoicuai vahe güeta pipendar rãro, ¿mara ehira evocoiyase Tũpa reroyasar rãro?

⁶ Tũpa reroyasar rãrosar rumo ndahei chira oipisi ramo vahe Tũpa opiha pipe. Esepia, aviyeteramo oyemboivate ai tiẽtera. Ipipe sui imocañipri avei secoira Carugar nungar.

⁷ Iyavei oyecua uca tupri ranera Tũpa reroyasarẽhi pãhuve. Ahese ndipoi chira imboeteiẽhisa iyavei ndoviapi chira Carugar povrive.

Tũpa reroyasar rese ihañeco vahe cuaita

⁸ Iyavei Tũpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tẽi; ndahei chiaveira guarepochi pota raisar tẽi.

⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco.

¹⁰ Iyavei secoãhasa ranera. Acoi osẽ tuprise, ahese toyuvirecoi Tũpa reroyasar rese ihañeco vaheerã.

¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco.

¹² Iyavei Tũpa reroyasar rese hañecosar ñepeiño itera sembireco, oicua aveira guahir rãro tupri ãgua, güeta pipendar rãro ãgua avei.

¹³ Esepia, Tũpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeẽhisave avei secoira Jesucristo reroyasa pipe.

Tũpa reco oyecua ramo vahe reroya tuprisa

¹⁴ Che aso pihaivi pota nde repia. Aicuachía rumo co che ñehe ndeu

¹⁵ acoi che aracahese, ereicuañora rumo pe reco tupri ãgua ava Tũpa rese yuvirecoi vahe pãhuve; ahe acoi Tũpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua.

¹⁶ Supi eté tuvichá etepri Tũpa reco oyecua ramo vahe reroya tuprisa:

Cristo oyemoporẽhi yande reco nungar pipe yandeu.

Ipare Espiritu pipe imboyecuasa secocuer supi tupri vahe.

Iyavei Tũpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

4

Oimera ava oyepēpi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepēpīra Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei.

² Oyapīsacara ava aipo ehi tēi vahe rese, semirañete ai vahe ñehe rese avei yuvireco. Ēgüe ehira opīhañemoñetasa mocañi tēi yuvireco.

³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco.

⁴ Esepia, opacatu mbahe Tūpa rembiapo, aviye ité. Ahe ndiyai chira yaroïro yaipīsisē, “Aviye ndeu” yande hesa pipe chupe.

⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapīsacai chira rumo acoi mbahe aracahendar co ivi pendar yapīsaca tēisa rese. Eyembohe catu yande Yar uveño ité nde reco āgua.

⁸ Esepia, yepe aviyeño chīhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pītivīra yande recove āgua cūrītei iyavei curi yande recove āgua.

⁹ Co supi eté vahe, evocoyase yande yaroyara opacatu yepi.

¹⁰ Sese niha yaporavīquí etepri. Esepia, yande yayeroya ité Tūpa ndopai vahe rese, ahe opacatu ava Pīsirosar, iyavei viroyasar Pīsirosar catu ité secoi.

¹¹ Co porombohesa eremombehura ava pāhuve, erembohe aveira sese.

¹² Tipo eme ava nde reroïro vahe chīhivahe catu nde reco rese. Nde rumo ereico tuprīra Tūpa reroyasar rovaque. Eñehe Tūpa reroyasave nde reco tuprīsa pipe. Esaisu tupri nde yeroyasave nde recocuer maranehi pipe.

¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprīra.

¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatū catusa yuvireco.

¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsiropri ereicora; nde ñehe rese oyapīsaca vahe avei ipīsiropri yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbīa cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbīa chīhivahe upe ereñehe tuprīra secocuerā rese inungar nde rivri upe.

² Cuña otīaro vahe upe avei ereñehe tuprīra inungar nde si ité sereco; iyavei cuñatai eremboaracua tuprīra inungar nde reindrī ité ererecora opacatu nde reco catuprīsa pipe.

³ Acoi imer mano vahecuer ité ereipítivira que mbahe ipane vahe rese.

⁴ Que oimese imembri, anise que semiariro, toyembohe rane ocuaita mboaviye água yuvireco chupe. Ēgüe tehi guaisu mboyevi chupe, ahe niha Tūpa remimbotar.

⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyeroguiño ité ari, p̄itu yacatu yepi.

⁶ Osecase rumo mbahe güemimbotar yuvireco, ahese omano vahe tēi secouer yuvirecoi.

⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi.

⁸ Acoi ava rumo nosaroi vahe omu; acoi güēta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeño ité omer vireco vahecuer.

¹⁰ Icuapri secocuer icatupri rese, omboacua tuprise chihivahe oyesuindar, omoinguese ava güēta pipe, ihañecose ava Tūpa reroyasar rese ipi sei água, oipitiviise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe.

¹² Ipipe oimera Tūpa poronupasa chupe. Esepia, yipindar oyemondo Tūpa upeño ité oyecuachiasa. Ipare rumo nomboaviyei eté oñehe.

¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe.

¹⁴ Sese co aipota acoi imer mano vahecuer cuñatai vite vahe: tomenda iri, timembri iri avei yuvireco, iyavei tosāro tupri güēta pipendar. Sese yamotarēhimbar secocuer ndahei chira oñehepora tēi vireco yuvireco.

¹⁵ Esepia, oime ité amove oyepepi vahe güemimbotar pipe Carugar rupi güeco água.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoyase tūparo pendar nihañecoi chira. Ahese oicatura supi eté imu ndipoi vahe rese hañeco água yuvireco.

¹⁷ Iyavei acoi Tūpa reroyasar rārosar osāro tupri vahe, ahe toipisi catu ava poropitivisa imboyeroyasave. Acoi oyemondo vahe Tūpa Ñhengagüer mombehu água, ava mbohe água avei, ahe co poropitivisa oipisi catura.

¹⁸ Esepia, arachendar icuachiapri pipe aipo ehi: “Ereyuru apichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoyase ambuae osiquiyera angaipa apoēhi água yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tupri co mborocuaita, nderemomahuatii chira ava imboaracua nde remimbotar rupi tēi.

²² Ndahei chira pihaiivi ereseno i mba mborocuaita rese ihañeco vaheã. Aviyeteramo nde rese pãve mbahe oimera. Eñearo tupri nde reco maranehisa pipe.

²³ Nde rie mbaherasisa upe nderehui chira i güeraño tẽi, chñhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu ãgua renonde. Oime rumo acoi oñomi vahe oangaipa yuvireco. Ipare tẽi icuasa.

²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ite nañomisai chira.

6

¹ Iyavei co ava mbiguai Jesús reroyasar, ahe oyeroya tupri güereciar yuvireco ava oñehe-ñehe tẽiẽhi ãgua Tũpa rer rese, yande porombohesa rese avei no.

² Acoi co mbiguai virecose güereciar Tũpa viroya vahe yuvireco, ahese ndovirecoi chira imboyeroaẽhisa Jesús reroyasar recosa rese. Iyacatu rumo omboyeroa tupri catura güereciar yuvireco. Esepia, sereciar oipisi vahe iporaviquisa, ahe Jesús reroyasar saisupri yuvirecoi yepi.

Tũpa rese yande pihañemoñetasa sepirusu vahe nungar

Eporombohe, emombehu co mbahe:

³ oimese oporombohe vahe oyesuindar pihañemoñetasa co coti tẽi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tũpa rese yande yeroya tupri rese,

⁴ ãgüe ehi vahe oyemboivate ai tẽi mbahe renducuaẽhisave. Iyavei oporandu-randu tẽi ñehesa rese secoãha ãgua inungar imbaheasi vahe. Ichui osẽ mbahe pota raisa, ñemoirosa, ñehe-ñehe tẽisa, yemboyeroaẽhisa

⁵ iyavei iporoacasa ndopai vahe ava yaracua rai vahe pãhuve. Ndoicuai rumo mbahe supi tupri vahe yuvireco. Ipihãñemoñeta Tũpa rese omahenduhasa pipe mbahe rereco ati ãgua yuvireco viña.

⁶ Yayembovihanose mbahe yande rembiereco rese, ahese Tũpa rese yande pihañemoñetasa inungar mbahe sepirusu vahe yandeu.

⁷ Esepia, ndayarui ete niha mbahe yahase co ivi pipe iyavei ndayarasoi chiaveira mbahe yamanose yande yeupi.

⁸ Iyacatu rumo yarecose yande remihura, yande yemonde ãgua avei, sese yayembovihanora yaico.

⁹ Amove rumo ava, “Mbahe rerecosar ite taico” ehi tiẽte viña, ndoyemoviracuai rumo tecoãhasa upe. Ipare oviapi mbahe tẽi pipe, seta mbahe pota raisave, ipipe oyecomomara. Ipare oyemocañi tẽi.

¹⁰ Esepia, guarepochi pota raisa sui osẽ opacatu mbahe naporai vahe. Amove ava ipota raisa pipe oyepipi Tũpa reroyasa sui iyavei omobaraisu güecocuer ipipe ahe ae yuvireco.

Tũpa rese yande reco ṽracuasa

¹¹ Nde rumo, Tũpa rese ereico vahe, eyepipi opacatu co nungar mbahe naporai vahe sui. Eico nde reco ñvisa pipe, ndemahenduhaño ite Tũpa rese. Eroya, esaisu, eñemosa avei eico nde reco mbegüesave.

¹² Eyemoviracua ite mbahe tẽi uve Tũpa reroyasa rese. Erepoi rene tecovesa apirẽhi vahe sui, sese niha Tũpa oñehe ndeu. Iyavei eremombehu ite niha Tũpa reroyasa nde reco ãgua ava eta rovai.

¹³ Cũritei Tũpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ite supi ete vahe Poncio Pilato rovai, che orocuai

¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tupriisa sui acoi ouse yande Yar Jesucristo.

¹⁵ Acoi oyepotase ari imombehupri curi, ahese Tūpa omboyevira Guahir. Ahe niha ñepe vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar.

¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe Ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā.

¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho āgua ambuae ava upe yuvireco.

¹⁹ Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa Ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.

²¹ Ipipe sui niha amove ava oyavi Tūpa reroyasa yuvireco. Aviye, yande Aposar tande rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tũpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cũritei oime yandeu Jesucristo rese yande recose. Yande Ru Tũpa iyavei yande Yar Jesucristo tombou oporovasasa, oporoparisuerecosa nde reco tupri ãgua ndeu.

Pablo oyocuai Timoteo Cristo recocuer mombehu ãgua

³ Che yeroqui pãhuve, chemahenduha nde rese pĩtu, ari yacatu rupi. “Aviye ndeu” ahe Tũpa upe nde recocuer rese. Che aporaviqui tupri ité Tũpa rese che pihañemoñeta tupri sa pipe yepi inungar che ramoi eta oyapo yuvireco aracahe.

⁴ Ndacheresarai eté acoi nde yaseho agüer sui. Iyavei oroepia pota tēi che yemboviharere ãgua.

⁵ Supi eté chemahenduhãño ité nde Tũpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ãgüe ehi yuvireco. Evocoyase ayeroyãño ité nde rese, nde avei ãgüe erese.

⁶ Sese che oromonguerēhi embouvicha catu co Tũpa ombou vahe ndeu acoi amondose che po nde harive; ahe ereco catu ndeyeupe.

⁷ Esepia, Tũpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri ãgua.

⁸ Evocoyase eresiquiye eme catu yande Yar recocuer mombehu. Nderechĩ chiveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosãño co mbahe-mbahe tēi Tũpa pĩratasa pipe. Ahe oura ndeu ñehesa pĩsirosa resendar mombehusa sui.

⁹ Tũpa niha yande pĩsiro iyavei yande renoi yande reco tupri ãgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tũpa ité yande raisu yipisuive ivi apo vitehiseve.

¹⁰ Cũritei rumo ahe omboyecua oporoaisusa yande Pĩsirosar Jesucristo ouse, acoi ou vahe co ivi pipe manosa pĩratasa recopi ãgua. Iyavei ñehesa pĩsirosa pipe avei oicua uca tecovesa ndopai vahe.

¹¹ Tũpa niha che cuai co ñehesa mombehu ãgua. Che cuai avei apóstol che reco ãgua iyavei che porombohe ãgua.

¹² Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pĩratasa acoi ñehesa ombou vahe cheu imocañiēhi ãgua acoi Jesús yevi ãgua rupi eté.

¹³ Erecoveño ité porombohesa aviye vahe che suindar, iyavei eicoño ité Tũpa rese nde yeroyasa pipe iyavei poroaisusa yareco vahe pipe Cristo rese yaicose.

¹⁴ Esãro avei co ñehesa aviye vahe Tũpa ombou vahe ndeu Espiritu Santo reco pĩratasa pipe yareco vahe yandeyese.

¹⁵ Ereicua niha co ava opacatu Asia pipendar oyepipiño che sui yuvireco. Ipãhuve yuvirecoi mbia ñuvirío, ahe serer: Figelo, Hermógenes.

¹⁶ Yande Yar tomondo paraисуerecosa Onesíforo mu upe. Esepia, Onesíforo setá yupagüer che mbovîha. Iyavei nochi eté ava rovaque che roquendasa sui.

¹⁷ Ouse rumo Roma ve, ndopituhui eté che reca.

¹⁸ Yande Yar tomondo oporoparaисуerecosa chupe ahe arî pipe curi. Iyavei nde ereicua tupri ité ahe mbîa yande pîtivîi vahe Efeso ve.

2

Jesucristo sundao oyemovîracua vahe

¹ Iyavei nde no, che rahîr, eyemovîracua mbahecuasa Jesucristo ombou vahe pipe ndeu.

² Acoî che porombohesa eresendu vahe ava rehîi rovaque amondo vahe ndeu, embohe tupri mbîa oyeroya vahe, oicatu vahe avei ambuae mbohe âgua.

³ Nde eyemovîracuaño teco asi upe Jesucristo uve nara inungar sundao oyemovîracua vahe ité.

⁴ Ñepeî yepe sundao ndosîrii eté ocuaita sui. Esepia, ahe oyemoingatu voi eté ocuai âgua güerecuar upe.

⁵ Iyavei iguayî rai vahe, ndoipîsîi chira porerecosa oguayî tupriêhî pipe.

⁶ Iyavei yande inungar que ava oñoti vahe mbahe, ahe rane omonuha güemiti yavîyese oyeupe yepî.

⁷ Eyapîsaca tupri co che ñehe rese. Yande Yar niha osenducua uca tupri ra opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevî vahe. Iyavei aracadendar mborerecuar David suindar secoi. Co niha ñehesa ñepîsîrosa resendar amombehu vahe vichico.

⁹ Co ñehesa mombehusa sui têi che mombaraisu yuvîreco. Che roquendasave aviye oporapichi vahe che rereco yuvîreco. Tûpa Ñhengagüer mombîta rumo ndoicatuî eté yuvîreco.

¹⁰ Sese che añemosaño opacatu mbahe-mbahe têi upe opacatu Tûpa rembi-poravo recocuer aviye âgua rese ‘tovîreco catu pîsîrosa porañete, apîrêhî vahe Jesucristo rese yuvîreco’ che yapave.

¹¹ Co niha supî tupri vahe:

Yamanose Cristo rese, ahese yaicove aveira sese.

¹² Yañemosase mbahe têi upe, ahese yande yaicora mborerecuar imborerecuasave ipîri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co cotî têi yarovara yande recocuer seroyaêhîsave, ahe rumo ndovîrovai chietera güeco îvîsa.

Esepia, ndoicatuî, “Ndahei che ahe aico” ehi vahe rã.

Ava osê tupri vahe güecoãhasa Tûpa upe nara

¹⁴ Emomahenduha yuvîreco co ñehesa rese, iyavei eyocuai Tûpa rovaque: topoi ñehepoepî-epîsa sui yuvîreco, co ñehepoepî-epîsa êgüe ehi têi vahe. Esepia, omomara ambuae ava osenduse îñehe rai yuvîreco.

¹⁵ Eyapo tupri mbahe opacatu nde catugüer rupî nde recocuer mboyecua âgua Tûpa rovai inungar oporavîquî tupri vahe, nochi vahe. Êgüe ere, eporombohe tupri ñehesa supî eté vahe rese.

¹⁶ Eyepepî ñehe têisa, êgüe ehi têi vahe sui. Esepia, co nungar ñehesa têi ombouvîcha catu mbahe naporai vahe.

¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ëgüe ehi Himeneo, Fileto

¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco.

¹⁹ Tūpa rumo omondo mbahe moviracua tupri āgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepe iporupirã ari imboeteisa pipe nara, ambuae rumo ari rupi iporupirã.

²¹ Acoi ava oñemoatiro vahe co tecocuera sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo āgua Tūpa upe.

²² Eyepepi mbia chihivahe pihañemoñeta rai tēisa sui. Emohivi tupriño ité nde recocer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo oipihañemoñeta tuprisa pipe yuvireco.

²³ Eremboyeroyai rene ñehesa porandu-randu tēisa, Ëgüe ehi tēi vahe. Ereicua niha ichui tēi oime yeamotarēhisa yepi.

²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviyera secocuer opacatu upe, oporombohe tupri, oñemosañora ombahe mboasiēhisa pipe oico.

²⁵ Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tūpa osecuñarora ipihañemoñeta raisa oyeupe yevi iri āgua: ipipe sui porombohesa supi eté vahe oicuara yuvireco.

²⁶ Ipipe sui avei toyemopoase, toyuvinose Carugar povri sui semimbotar apo iriēhi āgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe.

² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese pihañemoñetas yuvireco.

³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo āgua yuvireco. Güeco asi pipe avei yuvirecoira. Iyavei opacatu mbahe aviyeva vahe oyamotarēhira yuvireco.

⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboiha āgua yuvireco. Ipipe rumo Tūpa ndosaisui chira yuvireco.

⁵ Ahe inungar-ra Tūpa rese ité yuvirecoi vahe viña. Tūpa pĩratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui.

⁶ Esepia, evocoi nungar ava pãhuve oime yuviroiqueño tēi vahe oi rupi cuña ndoicatui vahe angaipa rerecosar mbopa āgua. Esepia, ahe cuña oipihañemoñeta raisa pipe yuvirecoi vahe.

⁷ Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua ãgua yuvireco.

⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ěgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opihañemoñeta rai pipe yuvireco. Ndoviroyai eté Jesús porombohesa yuvireco.

⁹ Ndoporombopa iri chira rumo yuvireco. Esepia, opacatu ava oicuaara yuvireco imbahecuaēhi rese, inungar co ñuvirío mbia Moisés amotarēhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa

¹¹ opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pĩsiro opacatu evocoi mbahe-mbahe tēi sui.

¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco.

¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua.

¹⁵ Iyavei eyemomahenduha co rese: nde chĩhivahe suive ité niha ereicua Tũpa ñehes icuachiapri eico. Ahe niha nde mombahecua vahe nde pĩsiro ãgua Jesucristo reroyasa pipe.

¹⁶ Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehes tupri ãgua secocuer mohivi ãgua yepi.

¹⁷ Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

4

¹ Iyavei no, co rese che orocuai pota Tũpa rovaque, Jesucristo rovaque avei acoi ou vakerã omborerecuasa reseve oicove vahe, omano vahe recocuer rese porandu ãgua.

² Emombehu Tũpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe.

³ Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe ãgua, güemimbotar tēi avei omombehu ucara oyeupe yuvireco.

⁴ Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco.

⁵ Nde rumo, ererecoveñora nde aracua tupriisa. Eñemosañño mbahe naporai vahe upe. Ndehañeco catu ñehesa pĩsirosa resendar mombehu ãgua. Emboaviye tupri avei opacatu nde poraviquisa.

⁶ Virovi ari che retecuer mondo ãgua manosave inungar mbahe seropovēhepri yande Yar upe.

⁷ Ayapopa che recoetē pipe che poraviquisa aviye vahe che amotarēhimbar pãhuve. Amboaviye che cuaita. Ndayepepii eté che yeroyasa sui.

⁸ Cũritei che rãro ivave co porerecosa che poraviqui aviye vahe resendar. Yande Yar mborerecuar seco ïvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

Pablo, “Eyu rane che repia” ehi Timoteo upe

⁹ Ndepoyava catu eyu che repia.

¹⁰ Esepia, Demas che reya co mbahe ïvi pipendar tẽi potasave, ichui tẽi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve.

¹¹ Lucas güeraño oicove che piri. Eseca Marcos, tou nde rupi che pĩtĩviĩ ãgua mboraviqui rese.

¹² Tĩquico amondo tecua Efeso ve.

¹³ Acoi ereyuse, eru avirave che yemboyhasa aseya vahe Troas ve Carpo rõtave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tẽi cheu. Yande Yar rumo oicuar sembiapogũer rese chupe.

¹⁵ Iyavei nde eicua catu ichui. Esepia, ahe yande amotarẽhi mbahe yande remimombehu rese oico.

¹⁶ Yipĩndar añehese che yoepi ãgua mborerecuareta rovai, ndipoi eté que che pĩtĩvisar; opacatuño ité che reya yuvireco. Tũpa tiñero sese yuvireco chupe.

¹⁷ Yande Yar Jesucristo rumo che pĩtĩviĩ. Che momirata co ñehesa pĩsĩrosa resendar mombehu tupri ãgua opacatu ava ndahei vahe judío upe. Ëgũe ehi avei che renose mbahe tẽi sui.

¹⁸ Ahe che pehara opacatu mbahe-mbahe tẽi sui iyavei che pĩsĩrora oyepiri ivave che so ãgua. ¡Ëgũe tehi timboeteisa catu yande Yar apirẽhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rẽta pendar upe avei.

²⁰ Erasto opita Corinto ve, Trófimo rumo imbaheasi, evocoyase aseya Mileto ve.

²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supī tupri vahe cua uca tupri āgua.

² Esepia, tecovesa apirēhi vahe rārosa pīpe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico.

³ Ichui cūrītei ari oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu.

⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pīpe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opīta vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeī-peī tecua rupindar” ahe acoi ndeu cuese.

⁶ Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeīño güembireco virecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pīpe ambuae ava ñeheēhi āgua sese yuvireco.

⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tupri yuvireco. Iyavei toico eme oporeroyaēhisa pīpe, toñemoiro eme avei, ndahei chiaveira caguar tēi; ndivava serai chīaveira, tiguarepochi pota rai eme yuvireco.

⁸ Iyacatu rumo omoinguera ava oyepota vahe güētave oyepīri. Iyavei aviye aira yepi. Osāro tuprīra güecocuer. Iyavei taseco ivi güeco catupri pīpe Tūpa upe. Tosāro tupri avei opīhañemoñetasa yuvireco.

⁹ Iya oyemboya catu oyembohesa supī tupri vahe rese yuvireco. Ipīpe sui tomonguerēhi catu ambuae yuvireco co ñehesa maranehi pīpe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepīsiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco.

¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepēi uca porombohesa supī tupri vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepeī mbīa, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mīmba nungar tēi, icaru ai, yangaipa vai yuvireco yepi” ehi oñehe.

¹³ Supi eté aipo ehi; sese emboaracua pīrata ité. Evocoiyase toviroya tupri Tūpa yuvireco.

¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supī vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté.

¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi.

² Evocoyase mbia oñaro catu vahe Tūpa reroyasar toñearo tupri, imboyeroyapri toyuvirecoi, tosāro tupri güecocuer, tovíreco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe.

³ Ëgüe tehi avei cuña oñaro vahe Tūpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuara güecocuer aviye vahe,

⁴ ombohera cuñatai imer raisu āgua, imembrī raisu āgua avei.

⁵ Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroa āgua avei. Evocoyase noñehe-ñehe tēi chira ava Tūpa Ñehengagüer rese yuvireco.

⁶ Ëgüe ere avei emonguerēhi mbia chñivahe secocuer rese iñearo tupri āgua.

⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tupriisa pipe emboyecua nde reco maranehisa, nde poromboeteisa avei.

⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoica-tuise, “Mbahe” ohe āgua yuvireco yandeu.

⁹ Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroa imboeteisave, toiñehepoepi eme avei yuvireco.

¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tupriisa, omboeteira yande Písirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru písirosa opacatu ava upē.

¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ivi āgua iyavei Tūpa mboetei āgua.

¹³ Iyavei yasāro yande viharetisa pipe Tūpa omboaviye vaheñā güemimombehu, ahe Jesucristo yande Tūpa seco ivaté vahe, yande Písirosar yevi irisa oporañetisa pipe.

¹⁴ Ahe oyemondo oyeyuca uca yande rese yande písiro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhise save opacatu mbahe aviye vahe apo āgua.

¹⁵ Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde reroirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarmi porocuita avei. Iyavei toyemoingatu tupri opacatu mbahe aviye vahe apo ãgua yuvireco.

² Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecuaí yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yembovíha ãgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrí yaico iyavei yandeyeupe ae-ae yayeamotarēhi.

⁴ Ipare rumo Tūpa, yande Písirosar, omboyecua güeco tuprisa, oporoaisusa opacatu ava upe.

⁵ Yande písiro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espíritu Santo pipe yande recocuer recuñaro tecove piasu rereco ãgua.

⁶ Iyavei yande Písirosar Jesucristo rembiapo sui Tūpa ombou catu oEspíritu Santo yandeu,

⁷ ipipe yande reco ai sui yande renose yande reco ívi tupri ãgua oporoaisusa pipe 'toipisi co tecovesa apirēhi güemiario yuvireco' oya.

⁸ Aipo ñehesa supi eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherã yuvireco.

⁹ Ereyepipira rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepipi aveira iporomoñemoiro serai vahe sui, Moisés porocuita resendar sui tēi ñehepoepi-episa sui avei. Esepia, evocoi nungar mbahe ēgüe ehi tēi vahe.

¹⁰ Acoi ava omoimese yemboyahosa Tūpa reroyasar pãhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui.

¹¹ Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihavi che repia tecua Nicópolis ve. Esepia, aheve apita pota sōhisa vahe pituhu rãro.

¹³ Eipitivií opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco.

¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo ãgua iyavei ava mbahe chupe ipane vahe pítivií ãgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo ãgua ereico.

² Iyavei amondo co cuachiar yande reindrí Apía upe, Arquipo upe avei. Ahe avei yande ndugüer mboraviqui apo ãgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara.

³ Yande Ru Tūpa, yande Yar Jesucristo tombou oporovasasa, güeco tuprís avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi.

⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar.

⁶ Aporandu Tūpa upe nde rese nde ereyeroyase yande Yar rese inungar ore ‘toicua tuprís opacatu mbahe aviye vahe orovireco vahe nde Rahír Jesucristo reroyasa sui’ viya.

⁷ Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai ãgua viña.

⁹⁻¹⁰ Che rumo aporandu ndeu nde poroaisusa rese mbahe aviye vahe apo ãgua co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahír nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ěgüe ehi tēi vahe secocuer ndeu viña. Cūrítei rumo ěgüe ndehi iri chira oico ndeu, iyavei cheu no.

¹² Amboyeví co imondo ndeu eipeve. Eipísí inungar-ra che itera viña.

¹³ Che aipota opita vaherã nde nungar tuprís che pítivíi ãgua viña, co soquendapri vite che recose Jesucristo ñehengagüer sui.

¹⁴ Che rumo ndaipotai mbahe apo nde pihañemoñetasa cuaēhi viteseva. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe.

¹⁵ Aviyeteramo Onésimo oyepipi pucu raimi nde sui oyeví iri vaherã nde piri nara.

¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprís saísusa pipe yande rívrí nungar tuprís ité yande Yar upe nara.

¹⁷ Inungar nde rívrí che rereco eve. ěgüe ere tuprís aveira co mbia písi.

¹⁸ Acoi oyapose mbahe ndeu, anise vírocuase que mbahe nde sui, cheu emombehu. Che evocoyase amboepira ndeu.

¹⁹ Che Pablo, aicuachía che po pipe ité seroya tuprís ãgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ěgüe ere cheu. Che rumo, “Ndereve cheu” ndahei eté ndeu.

²⁰ Supi eté, che rívrí, eyapomi mbahe icatuprí vahe cheu che remimbotar yande Yar Cristo reroyasa pípe. Ipípe che mbovíha catumi eve.

²¹ Che aicuachía ndeu. Esepia, aicua nde ereyapo tupríra aipo che porandusa, iyavei ereyapo catu itera co sui.

²² Iyavei amoha Tũpa che renose vaherã che roquendasa sui pe yeruresa pípe che so ãgua eipeve pe repia. Sese emoingatumi avei che pítuhu ãgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendaprí cohava yande Yar Jesucristo recocuer rese.

²⁴ Iyavei Marcos, Aristarco, Demas, Lucas che ndugüer oporaviqui vahe Tũpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe.

² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité.

³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pĩratasa pipe. Yande angaipagüer sui yande moatiro pare oso, uguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui.

⁵ Esepia, Tūpa aipo ndehi eté güembiguai upe:
“Nde che Rahir ereico; co pipe amondo nde recove ãgua” ndehi eté.
Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”
ehi.

⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui va-herã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vahe ité.

Ereporocuai nde reco ivi tupri sa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vahe ité,

inungar turucuar cuacua oyearo vahe opa.

Nde rumo apirēhi vahe ité ereico.

¹² Ipare ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vahe ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahesa che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui ãgua, icuapri avei ava ipĩsiropirã pĩtivivi ãgua.

2

Yandemahemoha tupri yande p̄sirosa rese

¹ Sese iyacatu co ñehesa yasendu vahe rese yayapisaca tupri catu co tecocuer p̄iasu sui yande yepipiēhi āgua.

² Esepia, co Tūpa rembiguai remimombehugüer seroyapri ité secoi, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe.

³ ¿Mara yahera p̄iha evocoyase yande yañemi Tūpa ñemoirosa sui viña acoi ndayandemahemoha tupriise co yande p̄sirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu.

⁴ Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrive omondo Tūpa ivi oime vaherã, acoi oromombehu vahe p̄eu.

⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava t̄ei rese, iyavei eresãro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

⁸ Iyavei opacatu erereco uca mbahe nde rembiapo ipovrive” ehi imombehu. Ēgüe ehise Tūpa, ndoseyai eté que ñepe yepe mbahe ipo pendarēhi. Cūritei rumo ndaopacatu tupri vitei mbahe ipovrive.

⁹ Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano āgua opacatu ava repirã. Cūritei rumo iyemombaraisu pare, omondo oporañetesa imboeteisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Porop̄sirosar güeco āgua’ oya.

¹¹ Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe āgua viroyasar upe.

¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe p̄ahuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; Ēgüe ehi avei Jesús vireco voho, vuvi yande nungar; omano pipe sui omocañi vaherã iporoyuca ai vahe p̄ratasa; ahe Carugar.

¹⁵ Opacatu ava manosa sui osiquiyesa pipe mbiguai t̄ei nungar yuvirecoi vahe güecove viteseve, evocoi nungar sui senose āgua, Ēgüe ehi Jesús.

¹⁶ Esepia, ahe ndoui Tūpa rembiguai p̄tivii āgua, ahe rumo ou Abraham suindareta p̄tivii āgua.

¹⁷ Sese niha tivireta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime āgua” ehi.

¹⁸ Esepia, ahe avei oiporara Caruguar poroãtoisa. Sese cūrítei ahe oicatu ité ava Caruguar remiatoi p̄tivii āgua.

3

Jesús ivate catu vahe Moisés sui

¹ Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa.

² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rãro aracahe.

³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi.

⁴ Esepia, ñepeipei oi vireco oaposar viña. Tūpa rumo opacatu mbahe aposar secoi.

⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi.

⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasãroño itese yande yembovïhasa pipe co mbahe aviye vahe oime vaherã yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espiritu Santo icuachiapri aracahendar pipe: “Co pipeve voi, pesenduse Tūpa ñehe,

⁸ peyepïhamoatai rene catu chupe, ndapeicoi chira ava ndiava reroyai vahe nungar acoi ivi iporupirêhisa rupi Tūpa recoãhasar yuvirecoi vahe aracahe.

⁹ Aheve avei acoi che recoãha tēi pe ramoi mbahe güembaliapo pipe, yepi cuarenta araviter rupi osepiã tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe: ‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoiro ahe ava upe, ‘Ñepeï reseve ndapepituhui chietera che pituhusa pipe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepeï ipihañemoñeta naporai vahe Tūpa reroyaêhisa pipe oyepepi vahe vaherã ichui.

¹³ Iya rumo peyemonguerêhi catu ñepeï-peï ari yacatu rupi cūrítei pe recove pipe angaipa upe pe yembopa uca iriêhi āgua, pe mbahe reroya iriêhi āgua rese avei.

¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

¹⁵ Supi niha acoi aipo ehi ñehesa: “Co pipe voi pesenduse Tūpa ñehe, peyepïhamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pïha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui êgüe ehi yuvireco.

¹⁷ ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi.

¹⁸ ¿Uma upe pīha acoi ñepei reseve, “Ndapeiquei chietera che pītuhusa pipe pe pītuhu āgua” ehi Tūpa? Acoi viroyaēhisar upe aipo ehi.

¹⁹ Sese yaicua seroyaēhi pipe ndoicatui yuviroique ipipe.

4

¹ Oime vite Tūpa remimombehu yande yaique vaherā ipiri yande pītuhu āgua. Sese iya ité yañearo tupri. Aní chira que ñepei pe pāhu pendar ndoiquei chira.

² Esepia, yandeu avei imombehusa ñehesa poropĩsirosa resendar inungar yande ramoi upe ivi iporupirēhi rupi yuvireco aracahe. Co ñehesa rumo ndoipĩtĩvi eté ahe ava yuvireco. Esepia, ahe osendu yuvireco seroyaēhisave tēi.

³ Yande rumo yaroya vahe, yaiquera yande pītuhu āgua, ahe chupe Tūpa aipo ehi:

“Sese añemoiro ahe ava upe; ñepei reseve,

‘Ndoyuviroiquei chietera che pītuhusa pipe opītuhu āgua yuvireco’ ahe” ehi. Tūpa rumo yipive ité opa omboaviye oporaviquisa iva, ivi.

⁴ Esepia, co imbosietesa ari resendar ñehesa oime icuachiapri aracahendar pipe:

“Tūpa opītuhu opacatu oporaviquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pītuhusa pipe opītuhu āgua yuvireco” ehi.

⁶ Ipane vite rumo amove ava yuviroique vaherā ahe pītuhusave. Acoi yipindar osendu tēi vahe rumo ñehesa poropĩsirosa resendar, ndoyuviroiquei eté seroyaēhisa pipe yuvireco.

⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe,

peyepihamoatai rene catu chupe” ehi vahe.

⁸ Ehi revo Josué omondose co pītuhusa israelita upe aracahe viña, Tūpa evocoyase noñehe iri chira co ambuae ari rese viña.

⁹ Evocoyase oimeño itera mbituhusa iporavopri ava Tūpa upendar upe nara:

¹⁰ Acoi oique vahe evocoyase pītuhusa pipe, opītuhu oporaviquisa sui inungar Tūpa opītuhu ombahe mboaviye pare aracahe.

¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ěgüe ehi avei iñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta.

¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe.

15 Esepia, yande pahi ivate catu vahe oicuaño ité yande recocuer pĩrataẽhisa. Ahe avei niha yande nungar aracaco viroparaisu opacatu mbahe-mbahe tẽi güecoãhasa. Ahe rumo ndoyemboangaipai eté ipipe.

16 Sese yayemboya catura yande yeroyasa pipe yande Ru Tũpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pĩtivii água mbahe tẽi oimese yandeu.

5

1 Opacatu pahi ivate catu vahe iporavopri secoi ava pãhu sui ava recocuer reropovẽhe água Tũpa upe iyavei porerecosa mondo água chupe, mbahe mimba yucapri reropovẽhe água avei ava angaipa repirã.

2 Ahe pahi niha oiporara avei teco asisa ambuae ava nungar. Sese güeco asiẽhisa pipe oipĩtivii ava ndayaracuai vahe, oyavi vahe avei.

3 Ahe rumo güeco pĩrataẽhisa pipe viropovẽhe mbahe mimba yucapri Tũpa upe oangaipa repirã, opacatu ambuae ava angaipa repirã avei.

4 Ndiyai chira que ava oyesui tẽi pahi oyeapo. Tũpa ité rumo osenoira imboetei uca água inungar acoi Aarón upe aracahe.

5 Ëgüe ehi avei Cristo, ahe noñeenoi pahi ivate catu vahe güeco água oyesui tẽi. Tũpa ité osenoi imboetei uca água acoi aipo ehise:

“Nde che rahir ereico, co pipe amondo nde recove água” ehi.

6 Aipo ehi avei ambuae icuachiapri pipe:

“Nde ereico pahi ivate catu vahe apirẽhi vaherã, inungar tupri mbia Melquisedec serer vahe” ehi.

7 Co ivi pipe Cristo oicove vitesse, oyerogui pĩrata oyasehosa pipe Vu Tũpa upe yepi. Esepia, ahe oicatu ipĩsiro água manosa sui. Ëgüe ehi iporeroya tupriisa pipe, Tu osendu iyerogui yepi.

8 Yepe Tahir ité viña, güeco paraisu pipe rumo oyembohe imboyeroya água;

9 evocoiya güeco pipe omboaviye güeco catupriisa. Ipipe sui güeru poropĩsirosa ndopai vahe opacatu viroyasar upe nara.

10 Esepia, Tũpa niha osenoi pahi ivate catu vahe seco água inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

11 Orovireco vite mo setá mbahe ore ñehe água pẽu co mbahe tecocuer resendar rese. Yavai etepri rumo imombehu tupri água. Esepia, pe ndapeyembohe tupri vitei eté.

12 Aracacove peporombohera viña; peipota vite rumo pẽu mbahe ndayavaimi vahe imombehu iri água yembohesa Tũpa suindar. Ndapeyemoviracuai rumo; peihu iri pota cambi mbahe sãta vahe hu rãgüer sui.

13 Esepia, acoi Ëgüe ehi vahe pĩtani osi rese ocambu vite vahe nungar tẽi pe recocuer. Ipipe sui ndapeyembohei eté Tũpa Ñehengagüer rese mbahe tupri pe reco água.

14 Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu ñehengagüer rese güeco tupri água yepi. Ipipe sui oicua ité mbahe aviye vahe poravo mbahe naporai vahe sui.

6

1 Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tũpa suindar co mbahe rese yembohe iri rãgüer sui. Ahe yipindar vahe co: yande

ñecuñarosa, yande reco ai sui yande poisa, manosa apirēhi vahesave yande rerasoēhi āgua, iyavei Tūpa rese yande yeroyasa,

² yembohesa poroāpiramosa resendar, po mondosa Tūpa reroyasar harive, omano vahe cuerayevisa iyavei ava recocuer rese porandusa resendar avei.

³ Tūpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espíritu Santo güecocuer pipe,

⁵ osāha vahe avei Tūpa Ñehengagüer aviye vahe iyavei osāha chīhi ipīratasa curi oime vahe rā viña,

⁶ oyepepise rumo ichui, ndayaicatu iri seco reroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñeheñehe tēi iri sese.

⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tūpa suindar.

⁸ Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapirā tēi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare.

¹⁰ Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico.

¹¹ Ore rumo oroipotaño ité ñepeipei pe pemboyecuaño itera ari cañi rupi eté co pereco vahe pe querēhisa pe remiaro aviye vahe rupiti āgua.

¹² Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vahe rā. Sese ahe güerer ité osenoi

¹⁴ aipo ehi chupe: “Supi eté oroovasa itera, iyavei setara ava nde suindar” ehi.

¹⁵ Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu.

¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ēgüe ehise yuvireco, ndiya iri eté ipare oñehe vitera sese.

¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe.

¹⁸ Ēgüe ehi oime ñuvirio mbahe imboyepoepirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese.

¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ēgüe ehi yande remiaro oique turucuar guasu tūparo asiasa cupeve oi imaranehi catu vahesave ivave.

²⁰ Aheve Jesús oique yande raperā mboi āgua. Ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyeveise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mondo āgua chupe.

² Iyavei aipo Abraham omondo oporerecosa vavasa sui mbahe güeru vahe diez vahe sui ñepei-pei chupe. ‘Mborerecuar guasu seco ñvi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi.

³ Ahe iyepa rumo ndicuasai eté iyavei ichi, tamo, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepei-pei mbahe porerecosa mborerecuar guasu eta sui güembierocua chupe.

⁵ Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepei-pei iporaviquimi rocua āgua yuvireco. Abraham suindar ité niha ēgüe ehi yuvireco.

⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaheerā mbahe Tūpa remimombehu. Ēgüe ehi Melquisedec Abraham rovasa.

⁷ Supi eté sovasapri sui oporovasa vahe ivate catu secoi yepi.

⁸ Evocoi levita suindar oipisi ava poraviqui repri diez sui ñepei-pei. Ahe ava rumo omano vaheerā tēi yuvirecoi. Icuachiapri arachendar pipe rumo Melquisedec serer vahe oicoveño vahe ité.

⁹ Ndoyavii evocoyase opacatu pahi eta Levi suindar omondo vahe porerecosa Abraham rupive chupe yuvireco viña.

¹⁰ Esepia, Abraham oyeseve vite Levi oyesuindar vireco, evocoyase ihaēhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catupri evocoi mborocuita reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera.

¹² Esepia, Tūpa osecuñarose evocoi pahi cuaita, osecuñaro aveira supive mborocuita;

¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramo suindar. Ahe ichui acoi ndipoi eté osē vahe ambuae pahi.

¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuae pahi ipiasu vahe Melquisedec nungar.

¹⁶ Ahe rumo ndahei porocuita “uma sui osēra pahiguā” ehi vahe sui oique pahi güeco āgua; güecocuer pīrata ndopai vahe reseve oique.

¹⁷ Esepia, Tūpa ité aipo ehi oñehese:

“Nde pahi apirēhi vaheerā ité ereico inungar Melquisedec” ehi.

¹⁸ Sese mborocuita arachendar opa ité. Esepia, ahe nipiratai, ndayande pītivii eté.

¹⁹ Esepia, Moisés porocuaíta ndosecocuer mbocatuprii eté ava. Yande rumo yasãro mbahe aviye catu vahe yande recocuer uve nara. Supi niha yayemboya Tũpa rese.

²⁰ Tũpa rumo oñehe omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tũpa rer pipe.

²¹ Yande Yar rumo Tũpa osenoi ñepei reseve güerer pipe pahi seco ãgua icuachiapri pipe aipo ehise chupe:

“Yar Tũpa osenoi ñepei reseve, sese nosecuñaroi chietera:

‘Nde pahi apirẽhi vaherã ité ereico’ ehi”

ehi icuachiapri pipe.

²² Sese Jesús rese yaicua Tũpa omboaviyera güemimbotar ipiasu vahe yandeu aviye catu vahe yipindar vahe sui.

²³ Yipindar setã pahi yuvirecoi. Opa-opaño rumo omano.

²⁴ Jesús rumo nomanoi vahe ité, sese nomondoi chietera pahi güecosa ambuae upe.

²⁵ Sese ahe oicatu ité ñepei reseve viroyasar Tũpa rese oyemboya vahe pĩsiro ãgua apirẽhi. Esepia, ahe oicove vaherã ité apirẽhi oyeroqui vaherã Vu Tũpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tẽi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui.

²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mĩmba Tũpa upe seropovẽhe ãgua yipindar oangaipa rese, ipare opacatu ambuae angaipa rese. Ñepei reseve ité rumo güete viropovẽhe opacatu ava angaipa repirã.

²⁸ Moisés porocuaíta rupi iporavopri pahi ivate catu vaherã ava ndahei seco tupri vahe; Tũpa rumo Moisés porocuaíta pare osenoi ñepei reseve Guahir seco catupri vahe ‘tasecoi pahi ivate catu vahe apirẽhi vaherã ité’ oya.

8

Jesús Tũpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oĩ.

² Aheve pahi secoi oporaviqui Vu rẽta supi eté vahe pipe. Ahe ivave ité yande Aposar rembiapo, ndahei ava tẽi rembiapo.

³ Opacatu pahi ivate catu yuvirecoi vahe senoisã mbahe oporerecosa iyavei mbahe mĩmba yucapri viropovẽhe vaherã Tũpa upe yuvireco. Sese Jesucristo avei vireco mbahe viropovẽhe vaherã Vu Tũpa upe.

⁴ Ahe secoise co ivi pipe viña, ndahei chietera pahi secoi viña. Esepia, cohove oime vite ité pahi mbahe viropovẽhe vahe Moisés porocuaíta rupi yuvireco.

⁵ Co ivi pipendar pahi rumo ihañeco iva pendar rahanga rese tẽi yuvireco. Yaicua niha ahe sahanga tẽi. Esepia, Moisés oyapo potase tũparo, Tũpa aipo ehi chupe: “Emahecua tupri acoi ivitribe amboyecua vahe rese ndeu. Ahe inungar tupri eyapo” ehi chupe.

⁶ Yande pahi ivate catu vahe rumo, Jesús, vireco ocuaíta aviye catu vahe ambuae pahi sui. Esepia, Tũpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tũpa remimombehu aviye catu vahe avei.

⁷ Esepia, yipindar Tūpa remimbotar oicatus yande recocuer recuñaro āgua viña, ndipoi chira ambuae semimbotar ipiasu vahe yandeu viña.

⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri āgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuita yuvireco.

Sese apoi ichui’ ehi yande Yar Tūpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe, aicuachía aveira ipihañemoñetasa pipe.

Evocoyase che iTūpa aicora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca āgua yuvireco.

Esepia niha, opacatu chihivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar” ehi icuachiapri pipe aracahe.

¹³ Oñehese Tūpa güemimbotar piasu rese, omombehu yipindar vahe cañi āgua; chihimi tēi ipane icañipa āgua.

9

Tūparo ivi pipendar iyavei tūparo iva pendar

¹ Evocoyase yipindar Tūpa remimbotar vireco ava cuaitarã iñemonuha āgua Tūpa mboeteisa pipe iyavei vireco tūparo co ivi pipendar.

² Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve.

³ Imoñuviriosa turucuar tūparo asiasa cupeve oime ambuae oi, ahe serer Nimarai Catu Vahe.

⁴ Aheve oime itaisi rapisa renda oro apopri, aheve avei oime Tūpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe.

⁵ Ahe mborocuita riru harive oime Tūpa rembiguai rahanga oyovai yuvinochai, “Tūpa oime ité cohava” he āgua. Ahe ipepo oyopi tupri Tūpa porocuita riru rovapisa yuvireco. Co rupive revo amombehura cō mbahe pēu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo āgua.

⁷ Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovēhe vaherã Tūpa upe oangaipa rese, ava icuaēhi pipe angaipa oyapo vahe repirã avei.

⁸ Co rese Espiritu Santo oicua uca yandeu avaño tēi ndiya vitei eté oique ipa vahe oi imaranehi catu vahe pipe Tūpa rovai oime vitesa yipindar oi yasiapri.

⁹ Co opacatu mbahe yande mbohe mbahe cūriteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pīhañemoñetasa.

¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuita. Ahe rumo ēgüe ehiñomi tēi yuvireco Tūpa remimbotar ipiasu vahe yu āgua renonde.

¹¹ Poropīsīrosar rumo ou cute. Iyavei ahe ité cūritei yande pahi ivate catu vahe secōi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri.

¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe vuvi ité opacatu rese; ēgüe ehi ahe ñepei reseve oique apirēhi vahe ñepisirosa reime āgua yandeu.

¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua.

¹⁴ Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pīhañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

¹⁵ Sese Jesucristo secōi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipīndar mborocuitavriye yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombehugüer rupi’ oya.

¹⁶ Que ava oicua ucasa güemimbotar ombahe mondo āgua omano renonde, icuasa tupri ranera rumo imanosa semimbotar apo āgua renonde.

¹⁷ Esepia, ndiya vitei eté omano vahe rā recove vitesese mbahe imondosa iyarā upe. Imanore voi rumo aviye imondosa.

¹⁸ Sese yipīndar vahe Tūpa remimbotar yaposa mbahe mīmba ruvi piyere pipe.

¹⁹ Esepia, Moisés omombehupase mborocuita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipi cuachiar mborocuita resendar, opacatu ava avei.

²⁰ Evocoyase aipo ehi icuachiapri pipe: “Co mbahe ruvi oicua tupri uca co porocuita Tūpa ombou vahe omboyeroya āgua pēu” ehi.

²¹ Mbahe mīmba ruvi pipe avei opa Moisés osipi tūparo iyavei opacatu mbahe ipipendar iporupri.

²² Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mīmba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui.

²⁴ Esepia, Cristo ndoiquei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūritei secōi Tūpa rovai yande pītivii āgua oyeroqui pipe.

²⁵ Judío pahi ivate catu vahe niha ñepei reseve oique araviter yacatu oí imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe.

²⁶ Ēgüe ehise rumo, yipisuive omano pihira viña. Cūritei rumo oyemboye-cua co ipa ari rupi ñepei reseve, apirēhi vaherā viropovēhe āgua güete Tūpa upe ‘tocañipa angaipa’ oya.

²⁷ Supi eté opa rane itera ava omano yuvireco, ipare voi ñepei reseve oimera porandusa.

²⁸ Indó, Cristo oyeeropovēhe ñepei reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guãrosar pĩsiro āgua.

10

¹ Esepia, Moisés porocuita mbahe aviye vahe ou vaherā rahanga tēi, ndahei ahe eté vahe ité. Sese ahe porocuita ndoicatu eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi.

² Porocuita oicatus pe angaipa sui pe moatiro tupri āgua, ndapeyandu iri chira pe angaipa viña iyavei pahi ndoviropovēhe iri chiaveira mbahe ruvi Tūpa upe yuvireco viña no.

³ Co seropovēhepri rumo yande momahenduha uca āgua tēi yande angaipagüer rese araviter yacatu.

⁴ Esepia, mbahe mimba ruvi tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retecuer evocoi nungarā.

⁶ Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

⁷ Evocoyase che aipo ahe:

‘Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuita rupi seropovēhesa viña.

⁹ Ipare aipo ehi: “Che ayu nde remimbotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua.

¹⁰ Tūpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaherā güete mondo pipe.

¹¹ Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa.

¹² Jesucristo rumo oyeeropovēhe ñepei reseve angaipa repirā apirēhi vaherā. Ipare oso ivave, oguapi oĩ Vu acato coti.

¹³ Aheve osāro oĩ Vu Tūpa opase voi omondo yamotarēhimbar ipovrive.

¹⁴ Esepia, ñepei reseve oyeeropovēhe pipe osecomohivi tupri Vu Tūpa rembipeha apirēhi vaherā.

¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

- 16 “ ‘Co ari pare rumo na ahera che remimbotar apo chupe’ ehi yande Yar Tũpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.
- 17 Ndayemomahenduha iri chietera yangaipagüer rese iyavei mbahe tẽi sembiapogüer rese yuvireco” ehi aracahe.
- 18 Ëgüe ehi angaipa rese oimese ñeroisa, ahese ndiya iri seropovêhesa mbahe angaipa repirã.

Yayemboya catura Tũpa rese

19 Sese che rivireta, iya ité cũritei yande reique água Tũpa rovai yande siquiyeêhisa pipe Jesucristo ruvi pipe sui.

20 Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tũparo pipe asiata turucuar yande reique água Tũpa rovai. Ahe turucuar inungar Jesús rete.

21 Iyavei ahe yande pahi ivate catu vahe ité secoi Vu Tũpa rêta rãrosar;

22 sese yayemboya catura Tũpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbo-catupri yande pihañemoñeta raisa sui iyavei omoatiro yande rete i maranehi pipe.

23 Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaêhisa pipe. Esepia, Tũpa omboaviye itera mbahe güemimombhugüer yandeu.

24 Iyavei yasecañora ñepeipei yañepitivii vaherã yande yeaisu catu água iyavei mbahe tupri apo água yandeyeupe.

25 Ndayamopanei chira yande ñemonuhasa Tũpa upe. Ndayaicoi chira omopane vahe nungar, iya rumo yayemonguerêhi catura ñepeipei yandeyeupe. Esepia, virovi ari yande Yar yevi iri água.

26 Acoi, “Tayemboangaipañõ ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu;

27 Tũpa ñemoirosa ipĩrata vahe güeraño oimera yandeu iyavei tata guasu apirêhi vahe opara omocañi Tũpa amotarêhimbar yuvirecoi vahe.

28 Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi.

29 Peyapisaca tupri co rese: ipĩrata catu oimera Tũpa ñemoirosa tahir reroĩrosar upe curi iyavei acoi ava vireco vahe suvi inungar mbahe êgüe ehi tẽi vahe iyavei viroĩro tẽi vahe guaisusar Espiritu, chupe avei oimera Tũpa ñemoirosa ipĩrata catu vahe. Esepia, co tuvi rese niha seroyapri ité Tũpa remimbotar. Ipipe avei niha ahe ava Tũpa rembipeha yuvirecoi.

30 Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi.

31 ¡Mbahe tẽi eté yaiquese Tũpa oicove vahe ñemoirosa pipe!

32 Peyemomahenduha acoi aracaco co tesapesa nungar supi eté vahe pisi ramosa, peyemoviracuaño ité pe recoãhasa upe pe yemombaraisusa pipe.

33 Esepia, acoi amove pe pãhu pendar rese iñehe-ñehe tẽi yuvireco, mara-mara tẽi avei pe rereco opacatu ava rovaque. Ambuae pe pãhu pendar evocoiyase peipitivii pe yemombaraisusa rese.

34 Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañõ avei pe viharetasa pipe peico. Esepia, peicua ivave perecoa mbahe aviye catu vahe iyavei apirêhi vahe.

³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pīpe omoime ucara mbahe tupri pēu curi.

³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombehugüer oime vaherã pīsi āgua curi.

³⁷ Supi eté icuachiapri pīpe Tūpa aipo ehi:

“Pīhaivi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pīpe oicovera. Acoi oyepepise rumo che sui, che evocoyase ndavīhai chira sese” ehi arac-
ahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaherã yuvireco. Yande rumo yayeroya sese; ipīpe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepia vahe.

² Supi eté amove yande ramoi aracadendar upe, “Avīye ité” ehi Tūpa oyese yeroyasa pīpe sui.

³ Tūpa rese yande yeroyasa pīpe yaicua ahe oñehe pīpe ité oyapo opacatu mbahe. Sese yaicua cūrteindar mbahe yasepia vahe mbahe ndayasepia vahe apopri.

⁴ Sese oyeroya pīpe Abel vīropovēhe oporerrecosa aviye catu vahe Caín porerrecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerrecosa. Yepe Abel omano viña, oimeño vīte rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pīpe serasosa co ivi pīpe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité vīraso secove reseve. Yipīndar rumo Tūpa vīrasoēhi vīteseve, “Enoc recocuer aviye ai rane ité chupe” ehi icuachiapri aracadendar.

⁶ Ndahei eté rumo Tūpa pīha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pīpe ndapesepia vītei vahe” ehise chupe, vīroya voi eté. Evocoyase seroyasave oyapo arca oyesuindar pīsiro āgua. Iyavei sese oyeroya pīpe omombehu ava co ivi pīpendar cañi āgua. Ahe rumo Tūpa rese oyeroya pīpe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherã vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso.

⁹ Ipare Tūpa rese oyeroya pīpe avei secoiño ité ahe ivi pīpe. Ndoyavi ambuae ivi pendar secoi vahe; oi mbahe pīrer apopri pīpe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaherã Tūpa remimombehu ivi yuvireco.

¹⁰ Esepia, aipo Abraham osãroño ité tecua ivave ovīracua vahe. Tūpa niha ahe tecua rãhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, vīroyaño ité Tūpa oñehe omboaviye āgua chupe.

12 Evocoyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

13 Ahe ava rumo opacatu omanopa tēi; ndoipisi eté mbahe semimombe-hugüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ëgüe ehi oicuaño ité ndahei co ivi pendar güecosa; ahe rumo yuvirecoveño raimi tēi co ivi pipe.

14 Aipo ehi vahe oicua uca tupri yandeu oseca vite oyeupendar ivi yuvireco.

15 Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña.

16 Ahe rumo oipota ambuae ivi aviye catu vahe yuvireco, ahe iba pendar. Sese Tüpa nochí eté, “Che Ru Tüpa” oyeupe hese. Esepia, vireco ité tecua imoingatupri chupe.

17 Tüpa rese yeroyasa pipe avei Abraham oyemoingatu voi guahir ñepeí vahe Isaac reropovêhe água Tüpa upe güecoãhasa pipe. Yepe Tüpa aipo ehi chupe aracahe viña:

18 “Nde rahir Isaac sui setá oimera nde suindar” ehi.

19 Esepia, oicua ité Tüpa vireco pĩratasa ava omano vahe mbogüerayevi iri água. Evocoyase imano rãgüer sui eté oipisi iri guahir aracahe. Ahe evocoyase omboyecua mbahe yandeu.

20 Tüpa rese oyeroya pipe avei Isaac osovasa Jacob, Esaú avei mbahe oime vahe rã piñi água.

21 Iyavei Tüpa rese oyeroya pipe avei Jacob omano pota água, osovasa ñepeí-pei José rahir. Ahese opococa rese tēi eté oyemoviracua oyerogui água Tüpa upe imboeteisa pipe.

22 Tüpa rese oyeroya pipe avei José, omano água renonde, aipo ehi: “Yande mu israelita opara yuvinose ivi Egipto sui curi” ehi. Ipare oyocuai omu oitacuer rerova água aracahe.

23 Tüpa rese oyeroya pipe avei, ohase Moisés, iyésupa oñomi mbosapi yasi rupi yuvireco. Esepia, ahe pĩtani icatupri ai, iyavei ndoyembosiquiyei eté mborerecuar guasu porocuaíta yuca água sui.

24 Tüpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he água.

25 Ahe rumo oipota catu mara-mara tēi güereco água Tüpa reroyasar reseve chĩhi rupive mbahe tēi rese yemboviha rãgüer sui.

26 Aviye catu ité chupe Tüpa rembiporavo upe nara mbahe tēi porara água Egipto pendar mbahe eta sepĩrusu vahe rereco rãgüer sui. Esepia, ahe oicuaño ité oyeupe nara porerecosa Tüpa ombou vahe rã.

27 Tüpa rese oyeroya pipe avei osẽ ivi Egipto sui osiquiyeẽhisa pipe mborerecuar guasu roriẽhise. Oyemoviracuaño ité oyese mbahe apo água; aviye osepia vahe ité Tüpa acoi ndoyecuai vahe.

28 Tüpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mĩmba ruvi Tüpa rembiguai oporoyuca vahe ava israelita rahir ipi yucaẽhi água.

29 Tüpa rese oyeroya pipe avei ava israelita osasa para guasu Pĩra Vahe ivi ipiru vahe hari rupi yuviraso. Ipare yamotarẽhimbar Egipto pendar, “Ëgüe yahe avei” ehi yuvireco viña, i rumo opaño oyopi.

30 Tüpa rese oyeroya pipe avei israelita oyerese siete ari rupi tecua Jericó rese, opa ñachisa onduru.

³¹ Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

³² ¡Setá vite ambuae ava recocuer oime amombehu vaherã pēu! Ipane ité rumo ari imombehupa ãgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer.

³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ívisa pipe, oipisiño ité Tūpa suindar mbahe semi-mombehugüer yuvireco, oiyurumboyaño avei yaguar,

³⁴ ombogüe avei tata ipĩrata vahe, oyeepi avei quise pucu pipe oyuca rãgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco.

³⁵ Oime amove cuña ipãhuve vireco iri vahecuer omu manosa sui im-bogüerayevipri.

Ambuae rumo omanopaño ité teco rasisa pipe, “Yasẽ catu co nungar mbahe sui” ndehi eté yuvireco cuerayevisa aviye catu vahe pipe güeco ãgua.

³⁶ Ambuae iparaisu catu ava upe oñeeroirosa pipe, onupasa pipe, oapĩchichisa pipe, voquendasa pipe avei yuvireco.

³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tēi, ovesa, cavara pিরer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no.

³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaherã oyepãhuve, ahe oguata tēi ivi iporupirēhisa rupi, ivitri rupi, mbaheciar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco.

⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri ãgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecia tupri yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe.

² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroia tupri catu. Oiporara curusu rese omano ochēhisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato coti oĩ.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico ãgua iyavei, “Ndorequerēhi iri” ndapeyei chira.

⁴ Esepia, pe ndapemano vitei eté angaipa upe pe yembopihaviracuasa pipe.

⁵ Peresarai eté Tūpa pe mboaracuasa sui tahir ité pe recosa pipe; icuachiapri arachendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri água, iyavei, ‘Ndachequerêhi iri’ nderei chiaveira chupe ndeu oñehe pĩratase.

⁶ Esepia, Tũpa osecomohivi tupri ava güembiaisu iyavei omombaraisu rane guahir sereco água” ehi.

⁷ Peñemosañõ catu pe mombaraisusa upe pe reco mohivi água. Esepia, Tũpa êgüe ehise pẽu guahir ité pe rereco. ¿Oime pĩha que ñepeí ava guahir upe noñehe pĩratái vahe secocuer mohivi água?

⁸ Tũpa ndape recocuer mohivise inungar oyapo ambuae guahireta upe yepi, pe evocoyase inungar-ra chĩhivahe ndiyesupai vahe, êgüe peye tẽi peico chupe.

⁹ Iyavei, chĩhivahe tẽi vite yaicose, yande yesupa co ivi pipendar yande nupa yande recocuer mohivi água, ahese yamboetei. Sese yamboetei catura yande Ru Tũpa iva pendar tecovesa rereco água.

¹⁰ Yande yesupa co ivi pipendar opihañemoñetagüer rupi tẽi yande nupa yaicove raimi tẽise co ivi pipe; Tũpa rumo yande mombaraisu yandeu mbahe tupri água rese yande reco maranehi água inungar ahe ndaseco marai vahe.

¹¹ Supi eté yipindar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihĩvi vahe. Ahe evocoyase yande recocuer rerecora mbahe tupri pipe.

Peicua catu Tũpa ñehe rendu potaẽhi sui

¹² Sese pemopoase iri pe reco pĩratasa iyavei peyemonguerêhi iri pe guata água yande Yar rupi.

¹³ Ipare peseca peri ihĩvi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiaí chietera yande Yar.

¹⁵ Peñearo tupri catu, tipo eme ava ndoipisi vahe Tũpa porovasasa pe pãhuve, iyavei tipo eme mbahe tẽi que ava piha pipe; aviyeteramo opacatu rese ova tiẽtera.

¹⁶ Tipo eme catu pe pãhu pendar oyemboaguasa tẽi vahe. Tipo eme avei ava Tũpa upendar mbahe viroĩro vahe pe pãhuve inungar Esaú aracahe. Ahe omondo Tũpa porovasasa oyeupendar tahir ipi güecosa resendar mimoi repirã tẽi vivri upe.

¹⁷ Iyavei peicua, ipare acoi Esaú oipisi pota Tũpa porovasasa vu sui viña. Ahe rumo ndiya iri eté sovasapirã secoi. Yepe oyasehó iteanga viña, ndiya iri eté rumo mbahe sembierecovi rãgüer mboyevi água chupe.

¹⁸ Peyemboyase Tũpa rese, ndahei inungar pe ramoí israelita aracahendar. Esepia, ahe ivitri Sinaí sese yapoco vahe rese tẽi oyemboya vahe yuvireco; ahe ivitri rese sendí ité inungar tata rendigüer; oime pĩtu, pĩtumimbi vahe, ivitu ai avei sese.

¹⁹ Iyavei ndapesendui mimbi imoñehepri, Tũpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco.

²⁰ Esepia, ahe oyembosiquiye ité evocoi porocuita aipo ehi vahe sui: “Acoi opĩro vahe ivitri rese, yepe que mbahe mimba tẽi viña, ahe peyapi-yapi yuca ita pipe, anise lanza pipe avei” ehi.

²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave arirri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei ãgua yuvireco yepi.

²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohivi tupri sereco.

²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherã acoi pëu oñehe vahe upe. Esepia, Moisés reroyaëhisa pipe pe ramoï noñemi eté Tūpa ñemoïrosa sui yuvireco, oyeupe, “¡Peicua catu!” ehise co ivi pipe aracahe. Ëgüe ehise chupe yuvireco aracahe, ëgüe ehi catu iri tiëtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu.

²⁶ Tūpa oñehe pipe omboriri eté ivi aracahe; cūritei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi.

²⁷ ‘Amboriri irira’ aipo oyapave aipo ehi: “Opara mbahe omi vahe omocañi güembiapo Tūpa ‘topita apirëhi mbahe nomi vahe’ oyapave” ehi.

²⁸ Tūpa mborerecuasa ombou vahe yandeu ahe nomi chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi.

²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tūpa mbovaha

¹ Ndapepoi chietera pe yeaisusa sui ñepei-peï oyeivri nungar pe recosa pipe.

² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güëtave icuaëhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ëgüe ehi aveira pëu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicudara oyemboaguasa tēi vahe upe.

⁵ Ndahei guarepochi tēi peipota raira. Iya rumo peyembovahaño mbahe pereco vahe rese. Esepia, Tūpa aipo ehi: “Ndoroeyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe:

“Che Yar che pitiivi, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe rerogatasar rese, pëu Tūpa Ñehengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirëhi vahe.

⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovëhepri. Ahe niha ndiyai eté pahi tūparo yipindar yuvirecoi vahe pendar yuvirohu.

11 Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivi yuvireco yepi.

12 Ēgüe ehi avei niha Jesús iparaisu, omano tecua ivi ava reco mbocatupri āgua vuvī pipe.

13 Ēgüe yahe aveira yasora Jesús upe yande paraisu āgua supi ava yande roñrosa pipe yaico.

14 Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vahe rā yandeu curi.

15 Sese Jesús rembiapo rese iyacatu yamboeteira apirēhi vahe rā yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe!

16 Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

17 Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu 'tayavai eme iporaviquisa chupe; tavorivete oporaviquisa rese yuvireco' pe yapave. Pemboavaise rumo, nosei chietera mbahe aviye vahe ichui pe recocuer upe nara.

18 Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave.

19 Che yevi pihavi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

20 Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu,

21 tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

22 Che rivireta, peñemosañ co che opomboaracua vahe rese, moviro tēi niha co ñehesa aicuachía pēu.

23 Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

24 Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pēu.

25 Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi.

³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosã ãgua rese peico.

⁴ Peicoño ité pe reco ñemosasa pìpe pe reco mohivi tupri catu ãgua. Evo-coiyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pìpe iyavei ombahe mboasiêhisa pìpe avei.

⁶ Iyacatu rumo evocoi ava oporandura Tūpa upe sese oyeroyá pìpe, ndahei chira opihañemoñeta rerova-rova tēisa pìpe inungar acoi ivitu i ombohitu-hitu tēi vahe.

⁷ Acoi êgüe ehi-ehi tēi vahe ava ndoipisii chira mbahe yande Yar sui yuvireco.

⁸ Esepia, ñepei ari ipihañemoñeta ñepei mbahe rese, ambuae ari ambuae rese. Ndoyemoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese.

¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi tēi vahe yuvireco.

¹¹ Evocoyase acoi ari osēse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirēhi vahe Tūpa ombou vahe guaisupar upe.

¹³ Acoi ava oyanduse poroãtoisa oyeupe mbahe tēi apo ãgua, “Tūpa revo êgüe ehi cheu” ndehi chira. Esepia niha, Tūpa ãtoisar ndipoi eté mbahe tēi oyapo uca vahrã chupe. Iyavei ahe noñatoi avei mbahe tēi apo ãgua ava.

¹⁴ Co rumo ava opihañemoñeta rai upe oñeatoí uca mbahe tēi apo ãgua yepi.

¹⁵ Güemimbotarai pìpe evocoyase oyapo angaipa. Ipare angaipa apo pìpe sui ou manosa chupe.

¹⁶ Che rivireta, che rembiaisu, peyembopai rene.

¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe.

¹⁸ Ahe rumo ombou ité tecovesa yandeu co ñehesa supi eté vahe pìpe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

Tūpa rese yande p̄ihañemoñetasa supi tupri vahe

¹⁹ Iyavei che r̄ivireta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapembahemboasi voi t̄ei chiaveira.

²⁰ Esepia, yambahemboasi voi t̄eise, ndayayapoi Tūpa remimbotar.

²¹ Evocoyase peseya teco raisa, opacatu ambuae oime vahe mbahe naporai vahe pe p̄ahuve. Co catu pe yemominisave peroya catu vite Tūpa ñehe omoingue vahe pe p̄iha pipe. Ahe niha v̄ireco p̄iratasa pe p̄isiro ãgua.

²² Pe rumo pemboav̄iyera co pe mbohe vahe ñehesa; ndahei acoi pesenduño t̄eira. Esepia, pesenduño t̄eise, pe ae peyembopara.

²³ Supi eté acoi ava osenduño t̄eise Tūpa Ñehengagüer, ipare rumo ndov̄iroyai, ahe inungar acoi ava osepiãño t̄ei vahe vova yepiasa pipe.

²⁴ Ipare rumo oyepep̄ise ichui, c̄uriteimi sesaraiño ichui.

²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe t̄ei sui yande rerocua vahe rese iyavei oyemov̄iracuaño ité vahe oyapo vaherã iporocuita, ahe ov̄iharetera opacatu güembiapo tupri rese.

²⁶ Amove ava, “Che aguata tupri Tūpa rupi” ehi t̄ei. Ndoicuai rumo oñehe monguiriri ãgua. Evocoyase ahe ae oyembopa oico. Sembieroya evocoyase ãgüe ehi t̄ei vahe.

²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaip̄itiv̄ira co tir̄ehi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoavirati chira ava mboeteisa sereco

¹ Iyavei no, che r̄ivireta, pe peroya vahe yande Yar Jesucristo seco porañete vahe peico, ndapeyeaisu yoav̄i chira.

²⁻³ Inungar-ra que ava mbahe yar oiqueste pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguap̄i co tenda av̄iye catu vahesave” peyera chupe. Ahe pipeve avei co oiqueste pe p̄ahuve iparaisu vahe oturucuar cuacua vahe reseve, “Eipe peve nde epita, anise eguap̄i iv̄ive” aipo peyeñora co chupe viña.

⁴ Evocoyase ãgüe peyese, peyapo mbahe ndoyoyai vahe, naporai vahe pe p̄ahuve ae iyavei peyeapo ava poravosar nungar peico pe p̄ihañemoñeta raisa pipe.

⁵ Che r̄ivireta, che rembiaisu, pesendu aipo ñehesa: Tūpa oiporavo ava iparaisu vahe co iv̄i pipe ‘toyuv̄irecoi mbahe yar nungar che reroyasa rereco’ oya, iyavei ‘toip̄isi che remimombehugüer rupi che mborerecuasa oyeupe nara’ oyapave guaisupar upe.

⁶ Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara t̄ei pe rereco yuv̄ireco yepi? Ahe niha pe mbot̄iriri mborerecuar rovai pe reraso yuv̄ireco yepi.

⁷ Ahe avei niha oñehe-ñehe t̄ei seroïrosa pipe yande Yar yaroya vahe rerimboyeroyapri rese yuv̄ireco.

⁸ Supi eté yayapo mbahe av̄iye vahe yamboav̄iyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe.

⁹ Acoi yayeaisu yoav̄irati t̄eise rumo, ahese yayapo angaipa, yayavi mborocuita Tūpa rovai.

¹⁰ Esepia, acoi ava v̄iroya vahe opacatu mborocuita, ipare rumo oime que ñepe nomboav̄iye tupri vahe, ahe oyavi opacatu mborocuita.

¹¹ Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pīpe rumo, peyavi mborocuita.

¹² Evocoyase peñehe tupri iyavei peico tupri aveira. Esepia, oporandura yande recocuer rese yande Yar oporocuita pīpe güeru vahe yande reco tupri āgua.

¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pīpe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pīpe tēi yuvireco?

¹⁵ Inungar-ra oimese que yande rivri, anise yande reindri upe ipanera iturucuarā, semihura ari yacatu rupindar viña.

¹⁶ Evocoyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña?

¹⁷ Ēgüe ehi avei, “Ayeroya yande Yar rese” yande hesa; ndayapoise rumo mbahe aviye vahe aipo yande hesa pīpe, aipo vahe tēi yaico.

¹⁸ Aviyeteramo ava pe pāhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoēhi pīpe. Evocoyase che amboyecua che yeroyasa oime vahe che rembiapo pīpe ndeu” ahera.

¹⁹ Nde niha aipo, “Che aicua oime ñepeí Tūpa” ere. Supi eté aipo ere. Co rumo carugar avei oicua. Ichui osiquiyepave rumo ahe oriri eté yuvireco.

²⁰ ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ēgüe ehi tēi vahe?

²¹ Esepia, Tūpa oipisi yande ramoí Abraham seco tupri isa pīpe oicuavēhese porerecosa nungar guahir Isaac chupe aracahe.

²² Indó, Abraham yeroyasa omboyecua ité güemiapo catupri reseve. Evocoyase ēgüe ehi ahe güemiapo tupri pīpe omboaviye tupri oyeroyasa oico aracahe.

²³ Ēgüe ehi yaviye icuachiapri aipo ehi vahe: “Abraham viroya ité Tūpa, evocoyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuvireco chupe.

²⁴ Indó, Tūpa, “Co seco catupri vahe” ehi ava upe semiapo tupri repiase yepi, ndahei iyeroyasa rese güeraño.

²⁵ Ēgüe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pīpe, ipare oñomi imondo ambuae peri rupi yamotarēhisar sui. Ipīpe sui Tūpa oipisi inungar-ra seco ivi tupri vahe viña.

²⁶ Ēgüe ehi yande rembiapo catupri ndayamboyecuaise yande yeroyasa pīpe, ahe inungar avei Espiritu ndasecoise yande rese, yande yeroyasa evocoyase omano tēi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa

oporandu catu itera ambuae ava sui yande porombohe agüer rese yandeu curi.

² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco ñvi tupri vahe. Iyavei oicua tupri opacatu güeco rereco tupri ãgua.

³ Inungar acoi yamondose cavayu yuru penda sese seroguata ãgua. Ahese opacatu cavayu retecuer yaicatu imboyahuva ãgua.

⁴ Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi.

⁵ Ëgüe ehi avei yande ãpecu, yepe chñhimi tñi viña, ipipe rumo yayapo tñi mbahe tuvicha vahe ava upe. Inungar avei que tata chñhimi vahe sui tñi yuvi guasu opa ocai.

⁶ Ëgüe ehi yande ñehesa tata nungar. Iyavei yande ãpecu pipe opacatu mbahe-mbahe tñi yamombehu. ¡Evocoi mbahe-mbahe tñi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tñisa carugar suindar.

⁷ Ava oicatu opacatu mbahe mimba nimasoi vahe mboaracua ãgua, vñrai, mboi iyavei mbahe ipi para guasu pipendar avei no.

⁸ Ndipoi eté rumo que ava oipoepi vaherã oñehe. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tñi eté.

⁹ Co yande ãpecu pipe yamboetei yande Yar Tupa, ipipe avei rumo yamomara ava, ahe ava rumo Tupa oyapo onungar.

¹⁰ Ëgüe ehi eté, yande ñehe pipe yamboetei Tupa, ipipe avei yaroñro ava. Che rivireta, ndiyai evocoi nungar mbahe yayapo yepi.

¹¹ ¿Oicatura pñha osẽ ñepei i ohẽ vahe sui sñhe vahe, iro vahe avei viña?

¹² ¿Ihara pñha higuera ivira rese aceituna viña? ¿Iyavei oicatura pñha uva hi rese oha higo viña no? ¡Aní, ndoicatu eté! Iyavei ndoicatu ñepei i ohẽ vahe sui osẽ i, sñhe vahe sñhe asi vahe reseve.

Mbahecuasa supi eté vahe

¹³ Acoi oimese pe pñhuve yaracua vahe, oyapisaca vahe, tomboyecua catu güeco catupriisa, güeco mbegüesa avei ombahecuata tupriisa pipe.

¹⁴ Oimese rumo pe pñhave pe poroamotarñhisa mbahe pota raisa pipe, iyavei peyeupe nara tñi mbahe peseca, ahese ndiyai peyemboviha tupri tñi 'che yaracua vahe aico' pe yapave. Esepia, peremira tñira supi eté vahe mbahe rese.

¹⁵ Ëgüe ehi eté evocoi nungar aracuasa ndahei Tupa suindar. Ahe rumo co ivi pipendar tñi vahe, ava pñhañemoñeta sui tñi osẽ vahe iyavei carugar suindar tñi avei.

¹⁶ Esepia, poroamotarñhisa yande mbahe pota raisa pipe yarecose iyavei yaipotase mbahe yandeyeupe nara tñi, ichui osẽ ñehespoepisa iyavei opacatu mbahe tñi.

¹⁷ Acoi vireco vahe rumo Tupa suindar aracuasa, ahe vireco itera opacatu ava rovaque güeco marañhisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyoavirati vahe güecocuer. Ahe ipñhañemoñetasa ñepei reseve vahe iyavei oyapo tupri vahe mbahe.

¹⁸ Iyavei acoi oseca vahe mbahe tupri yepi, oipisi itera opñha pipe teco ñvisa.

4

Co ìvi pipendar mbahe raisusa

¹ ¿Que sui p̄ha ou vavasa iyavei ñehepoepi-ep̄isa pe p̄hube? Ahe ou pe mbahe pota raisa sui pereco vahe pe p̄hañemoñetasa p̄ipe.

² Pe peipota rai mbahe. Ipare rumo ndapeicatui sereco ãgua. Evocoyase peporoyuca pe mbahe pota raisa p̄ipe. Ndiyai eté rumo p̄eu sereco ãgua. Ip̄ipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui T̄upa upe.

³ Acoi peporanduse rumo sese, ndapeip̄isii. Esepia, peporandu rai t̄ei, peipota pe yembov̄iha ãgua rese nara t̄ei.

⁴ ¡Pe mb̄ia, peyav̄i vahe pe recocuer! ¿Ndapeicuai vo acoi ava T̄upa cuapar̄ehi mbor̄ipar t̄ei yuv̄irecoi vahe, ahe T̄upa amotar̄ehimbar yuv̄irecoi? Ëḡue ehi eté acoi oipota vahe co ìvi pipendar mbahe-mbahe t̄ei p̄ipe güeco ãgua, ahe oyeapo T̄upa amotar̄ehimbar.

⁵ Supi eté T̄upa Ñehengaḡuer aipo ehi: “T̄upa osaisu güecat̄ehisa p̄ipe o Esp̄iritu omondo vahe yande p̄ha p̄ipe” ehi.

⁶ Ahe rumo yande p̄it̄iv̄i catu oporoaisusa p̄ipe. Esepia, icuachiap̄ri arachendar p̄ipe aipo ehi: “T̄upa oyamotar̄ehi ava oyeecomboiv̄ate ai vahe. Oip̄it̄iv̄i rumo seco mbeḡue vahe saisusave” ehi.

⁷ Sese pemboyeroya catu T̄upa. Peyemov̄iracua carugar remimbotar apōehi ãgua. Ahese ahe oyepep̄ira pe sui.

⁸ Peyemboya T̄upa rese, ahe evocoyase oyemboyara pe rese. Pe, angaipa viyar, ¡peñemoat̄iro mbahe peyapo vahe sui! ¡Iyavei pemoat̄iro pe p̄hañemoñetasa ñuv̄irío pereco vahe sui!

⁹ ¡Tatasi p̄eu, tapeyaseho, peror̄ivete iri eme, pemboasi pe angaipa pe yembov̄ihar̄ehisave!

¹⁰ Peñenop̄iha Yar rovai imboyeroysa p̄ipe. Ahe evocoyase pe reco mboiv̄atera.

Perōiro eme pe mboetasa

¹¹ Che riv̄ireta, aní chira peñehe mara peyeupe. Acoi oñehe rai vahe iyavei virōiro vahe ambuae Jesús reroyasar, ahe oñehe rai t̄ei aveira mborocuita rese serōirosave. Ëḡue peyese, evocoyase seroyāehisa p̄ipe peyemboiv̄ate catura mborocuita sui viña.

¹² Oime rumo ñepeñño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporop̄is̄iro iyavei oporomocañi ãgua no. Evocoyase pe, ¡ndiyai pe cotindar rerōiro ãgua p̄eu!

Ndayaicuai mbahe oime vaheer̄a yandeu ayihive

¹³ Pesendu pe aipo peye vahe: “C̄uritei, anise ayihive yasora que tecuave, anise que tecua guasuve revo. Aheve yaicora ñepēi arav̄iter yande porav̄iqui ãgua. Ahese yamogana catura guarepochi” aipo peye vahe.

¹⁴ ¡Ndapeicuai rumo mbahe oime vaheer̄a p̄eu ayihive! ¿Mara ehi p̄ha yande recocuer? Ahe inungar ìv̄ichi oyecua raimi t̄ei vahe, ipare opaño ocañi.

¹⁵ Iyacatu aipo peyera viña: “Oipotase yande Yar yande reco ãgua, yayapora co nungar mbahe, que ambuae mbahe” peyera yepi.

¹⁶ Pe rumo peñeheño pe yemboiv̄ate aisa p̄ipe mbahe pe rembiaporã rese. Opacatu evocoi nungar mbahe rumo naporai.

¹⁷ Esepia, acoi oicua vahe mbahe tupri apo ãgua, ipare rumo ndoyapoi eté, ahe oyapo angaipa.

5

Imbahe eta vahe paraísusa resendar

¹ ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico.

² Opacatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi.

³ Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe.

⁴ Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sãsé tēi yuvireco. Ahe rumo yande Yar ipĩratá vahe, ivate catu vahe oicua.

⁵ Co ivi pipe tēi pe peyecomendiayi peico iyavei peyemboviha co ivi pipendar mbahe rese inungar guaca imonguirapri yuca ãgua. Ipipe peyemoingatu pe cañi ãgua.

⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañu yande Yar yevi iri ãgua rese. Inungar ava omaheti vahe osãro rane güemiti poho ãgua. Esepia, ahe osãro yipindar oqui vahe iyavei ipa oqui vahe mbahe miti aviye ãgua.

⁸ Pe avei peñemosañu, peyemonguerēhi catu. Esepia, cõimi eté yande Yar yevi ãgua cute.

⁹ Iyavei che rivireta, peñemoiroi rene peyeupe. Evocoyase Tũpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohã yandeu porandu ãgua.

¹⁰ Che rivireta, peico catu inungar Tũpa ñehe mombehusar aracahendar yuvirecoi vahe. Ahe oñemosañu mbahe rasicuer upe yande Yar rer pipe oñehe ãgua yuvireco.

¹¹ Yande rumo yaicua sovasapri ava oñemosu vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iva rer iyavei que ambuae mbahe pe ñehe reroya uca ãgua. Iyacatu rumo, “Supi eté” peyese, supiño itera; “Aní” peyese, aní chiño itera Tũpa poronupasa pisiēhi ãgua.

¹³ Aviyeteramo que pe pãhu pendar iparaisura oico; toyeriqui. Aviyeteramo oimera que sorivete vahe oico; ahe tosapucaí Tũpa upe.

¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco.

¹⁵ Acoi oyeroquise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosu chupe.

¹⁶ Sese pemombehu pe angaipa peyeupe, peyeroqui avei peyese pe yembogüera tupri uca ãgua. Ava aviye vahe oyeroquise oquerēhisave opacatu güecocuer pipe, ahe iyeroquisa ipĩratá ité.

¹⁷ Acoi Tũpa ñehe mombehusar Elías yande nungar avei. Ahe oporandu oyerokuisa pĩpe Tũpa upe, “Toqui eme” ehi. Aipo ehise, ndoqui eté ivi harive mbosapi araviter imombitesa rupi.

¹⁸ Ipare oyerokuiri iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe,

²⁰ tapeicua pe acoi viroyevi vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tūpa rembi-poravo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe.

² Supi eté pe yande Ru Tūpa rembiporavo yipisuipe peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco ãgua 'imoatiropri toyuvirecoi che Rahir ruvi pipe oangaipagüer sui' oya. Peipisi catu Tūpa porovasasa pe reco tupri ãgua.

Tūpa suindar mbahe aviye vahe rãrosa

³ ¡Imboetepri tasecoi Tūpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tūpa suindar yandeu.

⁴ Ipipe sui avei Tūpa oipisi ucara pëu pe mombahesa ivave yapocatupri nocañi vaherã, ndituyui vaherã iyavei ndopai vaherã ité.

⁵ Pe peyeroya ité Tūpa rese. Sese niha ahe opiratasa pipe pe repi mbahe tēi sui poropisirosa pe reco ãgua. Ahe vireco vahe imoingatupri ari ipa vahe mboyecua ãgua pëu.

⁶ Co rese peyembovihareteño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña.

⁷ Esepia, pe yeroyasa Tūpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, "¿Aviye vahe ité pñha?" hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, "Che rese pe yeroyasa aviye ité" ehira yande Yar yandeu. Ahese yarecora teco porañetesa iyavei imboetepri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu.

⁹ Esepia niha, pesupiti pe remiaro poropisirosa apirēhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropisirosa resendar yuvireco '¿mara ehi eté pñha co tecocuer?' oyapave yuvireco. Iyavei oñemoñeta yuvireco Tūpa oporoaisusa pipe pëu mbahe ombou vaherã rese.

¹¹ Cristo Espiritu senondeve oicua uca mbahe Tūpa ñehe mombehusar upe aipo ehi: "Poropisirosar oyemombaraisu ranera, ipare rumo teco orisa porañete vahe oimera" ehi chupe aracahe. Sese, "¿Umara pñha evocoi mbia?" ehi; "¿Mbahesera vo oimera co Espiritu remimombehu yandeu?" ehi yuvireco.

¹² Tūpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cūrítei, Espiritu Santo pĩratasa pipe imboupri ìva pendar yandeu. ¡Tūpa rembiguai avei oicua tupri pota tēi cūrítei yuvireco viña!

Tūpa yande poravo yande reco maranehi ãgua

¹³ Sese pe pihañemoñeta tupriisa pipe pemahemoha tupriisa peyese Tūpa porovasasa pēu ombou vaheṛā rese pe yeroya catu āgua acoi Jesucristo oyeveise curi.

¹⁴ Tahir iporeroya vahe pe recosa pipe ndapeicoi chira mbahe pe remimb-otarai pipe, acoi pereco vahecuer peyese Tūpa recocuer cuaēhi vitesese.

¹⁵ Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité.

¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoavirati chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitesese.

¹⁸ Esepia, Tūpa pe pīsiro aracahendar pe ramo suindar aracuasa ēgüe ehi tēi vahe sui. Peicua tupri ité niha co poropīsirosa repri nimboepisai eté que mbahe ocañi tēi vaheṛā pipe inungar oro, anise guarepochira viña.

¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe.

²⁰ Ahe Tūpa oiporavo aracahe ivi, iva apoēhi vitesese ēgüe ehi vaheṛā. Cūrtei rumo oyemboyecua pēu mbahe tupri āgua.

²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

²² Cūrtei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaheṛā ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tupriisa pipe, iyavei opacatu pe pīratasa pipe.

²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe.

²⁴ Esepia, icuachiapri aracahendar pipe aipo ehi: “Opacatu ava inungar caha, iyemboeteisa evocoyase inungar ipotri. Ipare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vaheṛā ité yepi” ehi.

Ahe co ñehesa imombehupri poropīsirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.

² Inungar pītanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropīsirosa pipe,

³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroñroño yuvireco. Tūpa rumo ahe ita oiporavo aviye catu vahe.

⁵ Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe.

⁶ Esepia, icuachiapri aracahendar pipe aipo ehi:
 “Che amondo ñepeí ita nungar ava avíye vahe tecua Sión ve imoviracua ãgua.
 Ahe che rembiporavo iporañete vahe, imboeteipri.
 Acoi oyeroyá vahe sese, ahe nochí chietera ichui” ehi.

⁷ Pe seroyasar peico vahe upe evocoi ita avíye vahe ité. Seroyasarēhi upe
 rumo imboavíyesa co ñehesa aipo ehi vahe:
 “Oí aposar rumo vīroĩroño co ita yuvireco.
 Ahe ita rumo coiye vīracuasa avíye catu vahe”
 ehi.

⁸ Iyavei omboavíye aipo ñehesa:

“Co ita oipihapí oití uca ava” ehi. Esepia, Tūpa suindar ñehesa reroyaēhi
 pipe sui oyemondo uca mbahe tēi pipe yuvireco. Ēgüe ehi vaherã ité rumo
 ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imbor-
 erecuasa upendar pahi, iyavei chupendar ava seco maranehi vahe peico.
 Ēgüe peye Tūpa reco pīratasa mombehu ãgua peico. Esepia, ahe pe renose
 pītumimbisa nungar pe recocuerai sui tesapesa avíye vahe pipe pe reique
 ãgua.

¹⁰ Yipindar ndahe vītei eté Tūpa upendar ava peico, cūrītei rumo ahe ité
 peico; yipindar ndaperecoi Tūpa poroparaisuerecosa, cūrītei rumo pereco ité
 cute.

Peico catu Tūpa mboetei ãgua

¹¹ Che rīvireta, che rembiaisu, peico raimi tēi vahe co ivi pipe, pepoi opacatu
 co ivi pipendar pe pīhañemoñeta raisa sui. Esepia, pemomara uca tēi pe
 recocuer ipipe.

¹² Pereco tupri pe recocuer avíye vahe ava Tūpa ndoicua vītei vahe
 rovaque. Yepe ava remieroĩro peico inungar-ra mbahe tēi aposar viña,
 osepiase rumo pe rembiapo catupri, omboeteira Tūpa yuvireco ahe arí pipe
 acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que
 mborerecuar guasu ivate catu vahe,

¹⁴ anise yivirindar. Ahe pe recua pipendar rārosar imondopri ava naporai
 vahe mombaraisu ãgua, iyavei ava seco catupri vahe upe, “Avíye nde re-
 cocuer” he ãgua.

¹⁵ Esepia, Tūpa oipota pe peyapora mbahe avíye vahe ava mbahe ndoicuai
 vahe upe, ndayaracuai vahe upe pe rese iñehe-ñehe tēiēhi ãgua.

¹⁶ Peico tupri ava rovaque mbiguai tēi nungar sui senosepri pe recosa pipe.
 Ndiyai rumo ipipe peyapo iri mbahe tēi. Peico tuprira rumo Tūpa rembiguai
 pe recosa pipe.

¹⁷ Pemboeteira opacatu ava. Pesaisu catu pe rīvireta Jesús reroyasar;
 pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que
 seco catupri vahe, que ndaseco pōrai vahe avei.

¹⁹ Esepia, avíye catu yañemosase mbahe-mbahe tēi ava rembiapo upe Tūpa
 mboyeroya tuprisa pipe.

²⁰ Mbahe tēi aposa pipe rumo pe mombaraisuse yuvireco, ndipoi eté
 evocoiyase ichui mbahe avíye vahe peñemosase evocoi nungar mbahe upe.
 Co rumo acoi mbahe tupri aposa pipe pe mombaraisuse yuvireco, ipare
 peñemosase chupe, ahe rumo avíye catu itera Tūpa upe.

²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua.

²² Ahe ndoyapoi vahe ité angaipa iyavei ndoporombopai vahe ité.

²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco iñi vahe oicuara chupe yuvireco” ehiño oyeupe mbahe-mbahe tēi aposar upe.

²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco iñisave’ oyapave yandeu. Ahe niha yapichapri secoi pe recocuer moingatu āgua.

²⁵ Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Ēgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tupriisa imboeteisa avei chupe, aviyeteramo ahe avei viroyara, yepe ndapeñehei chira chupe viña.

³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe.

⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque.

⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco.

⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tupriisa pipe tecovesa apirēhi vahe oyoya voi pēu. Ēgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepe oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tupriisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave.

¹⁰ Esepia,

“Peipotase pe recocuer aviye tupri āgua pe yemboviharetosa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tupriisa peyeupe nara, peguata supi.

¹² Esepia, supi eté, yande Yar osāro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisi eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo.

¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui.

¹⁵ Pemboeteñora rumo Cristo pe Yar secosa rese pe piha pipe. Peyemoin-gatu voira ava pe remiaro rese oporanduse pēu pe querēhisa pipe imombehu tupri āgua.

¹⁶ Ēgüe peyera rumo pe reco mbegüesa pipe imboeteisave. Peico tupri ra pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui.

¹⁸ Esepia niha, Cristo teieté omano yande angaipa repirā ñepei reseve. Güeco maranehi pipe ēgüe ehi ava recocuerai rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe.

¹⁹ Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe.

²⁰ Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui.

²¹ Ahe i osāhangapo i poroāpiramosa, ahe omboyecua yande ipisiroproi yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pihañemoñetasa moatiro āgua. Ipipe sui evocoiyase yañepisiora yande Yar Jesucristo cuerayevisa pipe.

²² Ahe oso ivave uguapi oĩ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoiyase peyemoin-gatu voi ēgüe peye vaherā peico chupe nara. Esepia, acoi ava oyemomborara vahe güete pipe oseya angaipa yuvireco.

² Ipipe sui ndoyuvireco iri chira ari rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitesese.

³ Ēgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico.

⁴ Cūritei rumo pe mboriparer, ndoyembovihai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese.

⁵ Ahe chupe rumo oimera porandusa. Esepia, yande Yar oyemoin-gatu opacatu ava recocuer rese oporandu āgua omano vahe upe, oicove vite vahe upe avei curi.

⁶ Sese niha co ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tupri sa pipe.

⁸ Co catu opacatu tupri ité peyeaisura pe piha pipe. Esepia, ēgüe yahera poroaisusa pipe yande ñero voira seta ava yangaipa vahe upe.

⁹ Peipisi tupri ava yuviraso vahe pe rêtave; “¿Mbahe rese pîha co ou?” peyei rene pe pîhañemoñeta pipe pe piri ou vahe upe.

¹⁰ Ñepeipei yande yaiporura Tûpa suindar mbahecuasa yareco vahe ambuae Jesús reroyasar rese hañeco tupri âgua. Yaiporu tupri co Tûpa porovasasa setá vahe yande cuaita mboaviye tupri âgua.

¹¹ Acoi pemombehuse Tûpa suindar mbahe, pemombehura inungar iñehe ité; acoi peporopîtivii potase, peyapoño opîratasa pëu Tûpa ombou vahe pipe. Opacatu mbahe peyapo vahe peyapo ‘tomboetei ava yuvireco Tûpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Êgüe tehi apîrêhi vaherã ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoãhasa pëu ‘ndoyavii, ndipoi chietera evocoi nungar mbahe cheu viña’ pe hesa pipe.

¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoiyase yayemboviharete itera acoi yande Yar oyevise güeco pîratasa pipe.

¹⁴ Iñehe marase yuvireco pëu Cristo reroyasar pe recosa rese, sovasapri peico. Esepia, Tûpa Espiritu güeco porañetesa pipe seci eté pe rese.

¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui êgüe ehira serecosa.

¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tûpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu âgua. Êgüe ehise yandeu, mbahe tēi catu itera Jesús reroyasarēhi upe.

¹⁸ Yavaise seco catupri vahe upe iñepisiro âgua, ¿mara ehira pîha ava ndaseco pôrai vahe ava angaipa viyar yuvirecoi vahe upe?

¹⁹ Sese peyemomborarase Tûpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro âgua. Esepia, ahe niha yeroyasa ité seci.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, êgüe ahe aveira acoi yande Yar oyevise curi.

² Pesãro tupri catu Tûpa upendar ava eta pe remiaro co omondo vahe pëu inungar ovesa rese yangarecuar osãro tupri vahe ovesa; peyapora pe querēhisa pipe ité. Ahe niha Tûpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité.

³ Ndapeicoi chira pe remiaro upe inungar que mborerecuar güeco ivatesa pipe oporocuai pîrata vahe. Pemboyecuaru rumo pe recocuer aviye vahe chupe imbohesa tupri pipe.

⁴ Evocoiyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apîrêhi vahe.

⁵ Iyavei no pe mbia chîhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pĩratasa povrive. Evocoyase pe reco mboivatera curi.

⁷ Opacatu mbahe rese pe pĩhañemoñeta atisa pemombehura Tūpa upe. Esepia, ahe pe rãrosar ité secoi.

⁸ Pearacua cañi rene peyesui, pemahemoha ari rupi peyese. Esepia, pe amotarēhimbar Caruguar pe reco momara pota yepi inungar yaguar oñaro vahe uguata tēi oporoeca ‘tamomara ava’ oyapave.

⁹ Sese peyemoviracuara Tūpa rese pe yeroyasa pĩpe Caruguar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pĩpe.

¹⁰ Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pĩpe yande poravo oyeupe nara, yande yaso vaherã supi tecori ndopai vahesave yande Yar rese yande recosa pĩpe.

¹¹ Ēgüe tehi tasecoi güeco pĩratasa apirēhi vahe pĩpe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtiviisa pĩpe co ayapo imondo che rembicuachía ndipucuimi vahe pe mboaracua catu āgua ‘ipĩpe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese.

¹⁴ Peyeovaupite “avirave” apo pe yeaisusa pĩpe.

Tapereco tecocuer tupri yande Yar Jesucristo rese peico vahe. Aipo rupive.

IMONUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi.

² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pĩrata pipe opacatu mbahe ipane vahe yande recove ãgua, sese yande pĩhañemoñeta catu ãgua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei.

⁴ Ipipe avei oseya oñehe imboaviyepirã yandeu; ahe ñehe ãgüe ndehi tẽi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepepi ãgua mbahe tẽi sui. Ahe acoi oime vahe co ñvi pipe ava remimbotar tẽi sui.

⁵ Sese pe peyeroya vahe Jesús rese, peyemomirata catu aveira peyapo vahe mbahe aviye vahe. Peseca aveira Tüpa remimbotar cua tupri catu ãgua.

⁶ Iyavei peñearo tuprira. Ipare peñemosañe aveira mbahe tẽi upe. Ipipe sui peyemondo tupri catura Tüpa upe.

⁷ Ipare peyeaisura peyeivri nungar pe recosa pipe. Ipipe sui peseca catu viterava raису tupri ãgua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ãgüe ndehi tẽi chira, peicua tupri catu aveira yande Yar Jesucristo.

⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapiso vahe, anise mbahe ndosepia tupri vahe, sesaraiño oangaipa rese ñero agüer sui.

¹⁰ Sese che rivireta, peyemoviracua catu Tüpa pe renoisa mboyecua ãgua iporavopri pe recosave. ãgüe peyese, ndapeviapi chietera mbahe tẽi pipe.

¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhã itera evocoi nungar mbahe rese, yepe peicua, peicoveño avei mbahe supi tupri vahe rese.

¹³ Aviyeño itera revo che recove viteseseve opomomahenduha vite co aracuasa rese.

¹⁴ Esepia, yande Yar Jesucristo oicua uca cõimi che mano ãgua cheu.

¹⁵ Opombohera rumo opacatu che catugüer rupi co tecocuer rese che manore pe mahenduha ãgua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pĩratasa resendar, iyevi iri ãgua resendar avei, ndahei oreyesui tẽi. Ore rumo orosepia vahe ité ore resa pipe yande Yar mborerecuasa.

¹⁷ Orosepia niha yande Ru Tüpa omboeteise Guahir iyavei omondose chupe seco porañete iri ãgua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharere vichico” ehise.

¹⁸ Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tūpa ñehe mombehusar remimombehugüer supi tupri vahe Cristo resendar. Iya ité pēu pe yapisaca tupri āgua sese; inungar que tataendi pītusave osesape vahe oico acoi osēse voi cōhe rerusar yasitata guasu ou, ēgüe ehi co ñehesa pe piha pipe sesape.

²⁰ Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu āgua.

²¹ Esepia, ndahei iñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opīsīrosar. Co rumo güecocuer momba pihaivi āgua tēi ēgüe ehira yuvireco.

² Setá ava oguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco.

³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

⁴ Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. Ēgüe ehi seyapa pītumimbisave, inungar ñapichimbri carena pipe yapocatupri yuvireco cañisave nara.

⁵ Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipīsīro.

⁶ Iyavei opa omocañi tata pipe tecua Sodoma, Gomorra avei; ēgüe ehi imbotanimbu tupri ‘na ahe aveira niha ambuae ava che reroyaēhisar upe curi’ ohesave.

⁷ Lot güeraño rumo ahese oipīsīro. Ahe mbia aviye vahe secocuer; ndoyembovihal tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo.

⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi.

¹⁰ Tūpa omombaraisu catu itera acoi ndopoi vahe güemimbotarai sui, viroñiro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyēhisa pipe oñehe rai vahe seco ivate, ipīrata vahe rese.

¹¹ Tūpa rembiguai eta iva pendar rumo yepe ipīrata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirã tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe.

¹³ Oyemombaraisu uca ambuae ava mombaraisusa pipe sui tēi, “Yayemboviha mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyemboviha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca ãgua oyeupe yuvireco. Ava ocañi tēi vaherã yuvirecoi.

¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo ãgua guarepochi pota raisa pipe yuvireco.

¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaẽhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirẽhi vahe ité imombopirã yuvireco pĩtumimbi catu vahesave nara.

¹⁸ Esepia, oñehe tupri ai angahu tēi ava monguerẽhi ãgua ava pihañemoñeta raisa rupi seroyevi ãgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri ãgua.

¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca.

²⁰ Esepia, acoi oicua vahe yande Yar, yande Pĩsirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe.

²¹ Oyeupe Tūpa porocuita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña.

²² Supi tupri ité yaviye ñehesa sesendar: “Cave rumo ohu iri ogüehẽ. Iyavei cuchi oyasu pare, oyevi iri tuyuve oyemboavaete ãgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pẽu. Ipipe opompihañemoñeta tupri uca pota che pe mboaracuasa pipe.

² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropĩsirosar porocuita rese avei acoi apóstol pe mbohe vahecuer yuvireco.

³ Peicua ranera co arĩ imombehupri ipa vahe vırovise, oimera ava ahe ovıroĩrora co tecocuer aviye vahe Tūpa suindar güemimbotarai pipe yuvireco

⁴ aipo ehira, “¿Marase tēi vo aipo oura Tūpa Rembiporavo imombehupri ou vaherã curi? Esepia, yande ramoi opa tēi omano yuvireco. Cũritei opacatu ahe tupriño tēi tecocuer aracahe ivi apo suive” ehi tẽira yuvireco.

⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osẽ vahe i sui, i pãhuve avei secoi.

⁶ Coiye i pipe avei opa omocañi ivi, ombouse amarusu aracahe.

⁷ Cũriteindar rumo iva, ivi imoingatupri tata uve nara Tūpa porocuita rupi. Evocoi tata pipe avei ocañi tẽira ava mbahe tēi aposar yuvirecoi vahe curi.

⁸ Che riviřeta, che rembiaisu, peresarai rene co mbahe sui: yande Yar upe ñepeı arı inungar mil aravıter; mil aravıter evocoyase inungar ñepeı arımi tēi chupe.

⁹ Esepia, yande Yar ndiaracahei eté oñehe mboaviye āgua; inungar amove ava, “Tharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepeı yepe yande cañi tēi āgua; ahe rumo oipota opacatu tupri ité yande recocuer ñecuñaro āgua.

¹⁰ Yande Yar arı yande resapiha tēira inungar imonda rai vahe ou pıtu pipe yepi. Ahese iva ocañi tupri tēira viapugüer ipıřata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherã. Sese, ipeyemovıracuaño itera pe reco maraneħisa rese Tũpa rese pe pihañemoñetasa pipe!

¹² Pesãroño Tũpa yepotasa resendar arı, iyaveı peyapo opacatu peıcatugüer rupi ‘toyepota poyava voi’ pe yapave. Ahe arı pipe iva opara ocañi tēi eté tata pipe. Ipipe sui opacatu mbahe yapopri ticupa tuprıra curi.

¹³ Yande rumo yasãro ité iva, ivi ipiasu vahe Tũpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesãro vıteseve co tecocuer, ěgüe peyera opacatu peıcatugüer rupi pe reco tupri āgua pe angaıpaēhi pipe, pēu Tũpa, “Peyavi mbahe” ehiēhi āgua.

¹⁵ Tapeıcuia co: yande Yar seco mbegüe yandeu yande pıřiro āgua. ěgüe ehi aveı yande rembiaisu Pablo icuachıa oyeupe Tũpa ombou vahe mbahecuaısa pipe pēu.

¹⁶ Opacatu ocuachiar pipe omombehu evocoi nungar mbahe pēu, yepe amove yavai senducua āgua yuvireco viña. Sese amove ndoyemovıracua tuprıı vahe yande Yar rese iyaveı ndoyemboaracua tuprıı vahe, ahe co coti tēi virova ñehesa, inungar oyapo ambuae ñehesa icuachiapri Tũpa suıdar rese. Ipipe güecocuer omocañi tēi ahe.

¹⁷ Che rıvri, che rembiaisu, peıcuia ité niha evocoi mbahe; sese peñearo tuprıra pe yembopa ucaēhi āgua ava ndıporeroyai vahe upe Tũpa rese pe recocuer yemovıracuaısa sui pe yepepiēhi āgua.

¹⁸ Peıcuia tupri catura rumo yande Yar Poropıřırosar Jesucristo iyaveı peıcoveño itera iporovasasa pipe. ¡ěgüe tehi imboeteıpri tasecoı cūrıteı apıřēhi vaherã! Aıpo rupıve che ñehe pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive seci vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehesa tecovesa resendar.

² Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pëu. Ahe Vu rese seci vahe oyemboyecua vahe oreu.

³ Oromombehu co orosepia vahe, orosendu vahe ñepe vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei.

⁴ Evocoyase cūritei oroicuachía evocoi mbahe pëu yande yemboviharere catu āgua.

Tūpa tesapesa seci

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tūpa niha tesapesa seci; ndipoi eté pītumimbisa sese.

⁶ “Che aico tupri Tūpa rese” yahese, yaicoño rumo angaipa pipe, ahe inungar pītumimbi vahe, ahese yande remira tēi iyavei ndayayapoi mbahe supi tupri vahe.

⁷ Yaicose rumo tesapesa pipe inungar yande Ru Tūpa seci tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese.

⁹ Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe mbahe tēi yande sui. Esepia, ahe seco ïvi vahe.

¹⁰ Iyavei, “Che ndacheangaipai eté” yahe tupri tēise yaico, evocoyase Tūpa semirañete ai vahe nungar yareco. Ipipe ndayaroyai ñehengagüer.

2

Jesucristo yande reco moingatusar

¹ Che rahireta, co aicuachía pëu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivisar yande Ru rovai. Ahe Jesucristo, seco ïvi vahe.

² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

³ Acoi yayapo tuprise Tūpa porocuita, ahese supi eté yaicua Tūpa.

⁴ Oime amove ava “che aicua Tūpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese.

⁵ Acoi yamboaviyese ñehengagüer, ahese supi eté yasaisu Tūpa. Ipipe sui yaicua yande reco tupri Jesucristo rese.

⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuita ipiasu vahe resendar

⁷ Iyavei, che riviřeta, ndaicuachiai mborocuaita ambuae ipiasu vahe p̄u. Aheño ité mborocuaita pereco vahe yipisuiwe. Ahe acoi yipindar pesendu vahe.

⁸ Co aicuachía vahe rumo ogüeru mborocuaita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, p̄tumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu t̄i vahe; oyamotar̄hiño rumo ambuae omboetasa T̄pa reroyasar. Evocoi nungar recocuer p̄tumimbisave t̄i vite.

¹⁰ Acoi osaisu vahe ambuae omboetasa T̄pa reroyasar, ahe secoi tesapesave. Sese nomboangaipa ucai omboetasa.

¹¹ Acoi ndoyambotai vahe omboetasa, p̄tumimbisa pipe t̄i secoi, ndoicuai avei que rupi güecocuer virecora. Esepia, p̄tumimbi vahe nomboesapisoi.

¹² Che rahireta, co aicuachía p̄u nara. Esepia, T̄pa iñero pe angaipa rese p̄u Jesucristo recocuer pipe.

¹³ Pe, yesupa peico vahe upe co aicuachía. Esepia, peicua yipisuiwe oicove vahe. Aicuachía avei p̄u, mbia ch̄hivahe. Esepia, pesecopi Carugar.

¹⁴ Iyavei pe tahireta aicuachía opacatu p̄u. Esepia, peicua vahe niha yande Ru T̄pa. Aicuachía avei p̄u, pe iyepupa. Esepia, peicua yipisuiwe oicove vahe. Aicuachía avei p̄u, mbia ch̄hivahe. Esepia, peyemoviracua etepri, peipisi avei T̄pa Ñehengagüer pe piha pipe. Ipipe pesecopi Carugar.

¹⁵ Evocoyase pesaisu eme co mbahe t̄i ivi pipendar. Acoi ava co mbahe t̄i osaisu vahe, ahe ndosaisui yande Ru T̄pa yuvireco.

¹⁶ Esepia, opacatu co mbahe t̄i ndahei yande Ru T̄pa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai t̄isa.

¹⁷ Co ivi pipendar mbahe t̄i iyavei ava mbahe pota raisa opa pota ité ocañi. Acoi ava oyapo vahe rumo T̄pa remimbotar, yuvirecoira apir̄hi vahir̄ ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotar̄himbar” ehi vahe, ahe c̄ritei setá oyemboyecua yamotar̄himbar yuvireco. Sese yaicua ari ipa vahe yepota ãgua.

¹⁹ Ahe oyepipi yande p̄hu sui; ndahei eté rumo yande rivri yuvireco T̄pa rese. Esepia, acoi yande rivri itese, ahese opitara yande piri yuvireco viña. Ëgüe ehi oyecua ndahei opacatu yande rivri yuvirecoi.

²⁰ Cristo omondo Espiritu Santo p̄u. Sese opacatu pe peicua mbahe supi tupri vahe.

²¹ Pe niha peicua co mbahe supi eté vahe. Sese aicuachía co p̄u. Esepia, mbahe supi eté vahe sui ndoui temira.

²² Acoi “Jesús ndahei Porop̄isrosar imboupri” ehi vahe, ahe semira t̄i vahe, yamotar̄himbar yuvirecoi. Ahe niha ndoviroyai Tu, Tahir avei yuvireco.

²³ Acoi ava “evocoi ndahei T̄pa Rahir” ehi vahe, ndovirecoi Tu oyese yuvireco. Acoi “evocoi niha T̄pa rahir” ehi vahe rumo, ahe vireco yande Ru T̄pa oyese yuvireco.

²⁴ Sese yipisuiwe pesendu vahe ñehesa peyapocatu pe piha pipe. Ëgüe peyese, ahese peico tupri Jesucristo rese, Tu rese avei.

²⁵ Esepia, Jesucristo aipo ehi: “Pe perecora co tecovesa apir̄hi vahe peyese” ehi yandeu.

²⁶ Sese co ava pembopa pota vahe resendar aicuachía p̄eu.

²⁷ Pe pereco Esp̄ritu Santo Jesucristo ombou vahe p̄eu. Sese ndiyai eté ambuae pe mbohera. Esp̄ritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Esp̄ritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherã sese yande yeroyasa. Acoi ogüeyise ìva sui curi, ahese nayachĩ chietera sovai ichui.

²⁹ Pe niha peicua Jesucristo seco ìvi vahe. Iya peicua avei opacatu oyapo vahe mbahe ih̄ivi vahe, ahe Tũpa rahir ité yuvirecoi.

3

Tũpa rahir yuvirecoi vahe

¹ Mara ehi rutei Tũpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndov̄royai vahe Tũpa, ndoicatu eté yande recocuer cua ãgua. Esepia, ndoicuai Tũpa recocuer yuvireco.

² Che rivireta, yaico ité Tũpa rahir. Yande rumo ndayaicua tupri vitei yande reco ãgua ipare. Cũritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve.

³ Iyavei opacatu osãro vahe Jesucristo yuvireco, oyepepiño ité opacatu angaipa sui güeco catupri ãgua, inungar ahe secoi.

⁴ Opacatu ava oyemboangaipa vahe, ahe oyavi Tũpa porocuita. Esepia, angaipa Tũpa porocuita mboaviyeẽhisa yepi.

⁵ Pe rumo peicua Jesucristo ou co ìvi pipe yande angaipagüer mocañi ãgua. Ahe niha ndovirecoi eté angaipa oyese.

⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco.

⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo.

⁸ Acoi oyapo vahe angaipa, ahe Carugar suindar. Esepia, Carugar yip̄isuive ité oyapo angaipa. Sese ou Tũpa Rahir Carugar rembiapo mocañipa ãgua.

⁹ Opacatu yuvirecoi vahe Tũpa rese ndoyapoi angaipa. Esepia, ahe vireco ité Tũpa recocuer oyese yuvireco. Sese ndoicatu iri angaipa apo ãgua yuvireco. Esepia, ahe Tũpa rahir ité yuvirecoi.

¹⁰ Icuapri ité Tũpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tũpa reroyasar, ahe ndahei eté Tũpa rahir yuvirecoi.

Yayea:sura ñepe-peiyande yacatu

¹¹ Co niha ñehesa, acoi pesendu vahe yip̄isuive, ahe co yayea:sura ñepe-peiy.

¹² Ndayaicoi chira inungar Caín, ahe Carugar remimbohe oyuca vivri. ¿Mahera p̄iha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tũpa ndoicuai vahe pe reroĩrose yuvireco.

¹⁴ Yande rumo yaicua aracacondar yande hã cañi t̄ei agüer. Cũritei rumo yasẽ evocoi nungar sui tecovesa apir̄ehi vahe pipe yande reco ãgua. Esepia, yande niha yasaisu yande rivireta Tũpa rese yuvirecoi vahe. Acoi ndosaisui vahe rumo ahe ihã ocañi t̄ei vite ité yuvireco.

¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese.

¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei ēgüe tayahe yande rivireta rese.

¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco.

¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihanemoñetasa sui. Ahe opacatu mbahe oicua.” Sese yayeroyara.

²¹ Supi eté che rivireta, yaicua itese yande pīha pipe yande reco tupri Tūpa rese, ahese yayeroyaño itera sovai.

²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaíta iyavei yayapo semimbotar yaico.

²³ Co ité iporocuaíta: yaroyara Tahir Jesucristo iyavei yayeaisura ñepeipei Tūpa yande cuaisa rupi tupri.

²⁴ Acoi yaroyase iporocuaíta, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

4

Espiritu Tūpa suindar iyavei espíritu Cristo amotarēhimbar

¹ Che rahireta, aní chira peroya opacatu “Espiritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco.

² Co rese peicua ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité.

³ Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherā resendar. Ahe cūritei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipirata catu Carugar sui.

⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco.

⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicua vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepeipei. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco.

⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa seci.

⁹ Ēgüe ehi omboyecua oporoaisusa yandeu. Ahe niha, ombou Guahir ñepi vahe co ivi pipe ichui yande recove āgua.

¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirā. Ahe niha poroaisusa supi eté vahe.

¹¹ Che rivireta, che rembiaisu, ēgüe ehi Tūpa yande raisu. Evocoyase ēgüe yahe aveira yande yayeaisu ñepi-pei yepi.

¹² Ndipoi eté ava osepia vahe Tūpa. Yayeaisuse rumo, Tūpa seci yande rese. Iporoaisusa evocoyase oime ité yande rese.

¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese.

¹⁴ Iyavei orosepia vahe, oromombehu: yande Ru ombou Guahir ava ivi pipendar pĩsiro āgua.

¹⁵ Acoi ava “Jesús niha Tūpa Rahir” ehi vahe, ahe seci eté Tūpa rese; Tūpa evocoyase seci sese.

¹⁶ Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei seci sese.

¹⁷ Ēgüe yahe Tūpa poroaisusa mboaviye tupri ichui yande siquiyēhi āgua acoi oyepotase ari cañi yandeu. Esepia, yande yaico co ivi pipe inungar Jesucristo.

¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tupri eté.

¹⁹ Yipendar Tūpa yande raisu. Sese cūritei yande avei yasaisu Tūpa.

²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatu Tūpa ndayasepia vahe raisu āgua.

²¹ Jesucristo ombou co porocuita yandeu: acoi osaisu vahe Tūpa, tosaisu avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Poropĩsirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco.

² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe.

³ Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua.

⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco.

⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei oseco mombehu. Esepia, ahe omombehu mbahe supi eté vahe yepi.

⁷ Evocoyase oime mbosapi imboyecusar:

⁸ Espíritu, i, iyavei suvî. Ahe mbosapî oyoya tupri.

⁹ Yaroya revo ava remimombehu; Tũpa remimombehu rumo aviye catu vahe ité ichui. Esepia niha, ahe Guahir omombehu.

¹⁰ Acoi viroya vahe Tũpa Rahir viresco ité ahe semimombehu opîha pîpe. Acoi ndoviroyai vahe rumo Tũpa, semirañete ai vahe nungar tēi viresco. Esepia, ndoviroyai Tũpa ñehe Tahir resendar.

¹¹ Co Tũpa remimombehu: ahe ombou yandeu tecovesa apirēhi vahe. Co tecovesa Tahir rese seci.

¹² Acoi oipisî vahe Tũpa Rahir opîha pîpe, ahe viresco avei co tecovesa. Acoi ndoipisî vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tũpa Rahir, peicua água pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tũpa remimobtar rupi chupe, ahese ahe yande ñehe osendu.

¹⁵ Evocoyase yaicua ahe osendu yande yeruresa, yaicua avei mbahe yande porandusa ombou vahrã yandeu.

¹⁶ Acoi osepia vahe yande mboetasa Tũpa reroyasar oyemboangaipa vahe, ahe rumo ndahei manosave nara, oyerquirã sese. Evocoyase Tũpa omondora secove água chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu.

¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tũpa rahir ndoyapoi angaipa yuviresco. Esepia, Tahir osãro evocoi nungar. Ichui Carugar ndopocoi sese.

¹⁹ Sese yaicua yande Tũpa rahir yaico. Iyavei opacatu ava ndoviroyai vahe Tũpa, ahe Carugar povri pendar tēi yuvirescoi.

²⁰ Iyavei yaicua Tũpa Rahir ogüeru oaracuasa yandeu Tũpa supi eté vahe cua água iyavei yaico co supi eté vahe rese. Ahe niha Tahir Jesucristo, ahe avei Tũpa supi eté vahe iyavei tecovesa apirēhi vahe.

²¹ Che rahireta, peñearo tupri tũpa angahu tēi sui. Aipo rupive co che ñehesa amombehu pēu.

IMONŨVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuaipri, aicuachía co che ñehe pẽu pe Tũpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvirecõ.

² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité.

³ Yande Ru Tũpa, yande Yar Jesucristo, Tũpa Rahir, tombou oporovasasa, oporoparisuerecosa pẽu nara. Tombou avei güeco tuprisa, güeco supi eté vahe pipe oporoaisusa pipe avei pẽu.

⁴ Che mboviharere aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tũpa porocuita yandeu.

⁵ Iyavei, che rivireta, che rembiaisu, tayayeaisu catu ñepepei. Co aicuachía vahe ndahei porocuita ipiasu vahe. Ahe niha acoi yipindar icuachiapri pẽu.

⁶ Co yande yeaisusa, yande guata tupri água Tũpa porocuita rupi. Co Tũpa porocuita yipisuive pesendu vahe, ahe omombehu yande yeaisu tupri água yandeu.

Iporombopa serai vahe resendar

⁷ Setá vai oguata ivi yacatu rupi oporombopa tẽi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tẽi vahe Jesucristo amotarẽhimbar yuvirecoi.

⁸ Peñearo catu pe poraviqui repri mocañi tẽiẽhi água. Tapeipisi catu opacatu Tũpa porerecosa peyeupe nara.

⁹ Oime ava oyepipiño vahe Cristo porombohesa sui. Ahe Tũpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tũpa, Tahir avei oyese.

¹⁰ Acoi oyepotase ava oporombopa tẽi vahe pẽu, ndovirecoi vahe co porombohesa, ndapeipisii chira pe rõtave. Iyavei ndapemboaviravei chiaveira.

¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pẽu. Namombehu potai rumo cuachiar pipe. Che teieté aso pota pẽu che ñehe água. Ahese yayemboviharere vahe oyese.

¹³ Iyavei Tũpa rembiporavo oñemonuha vahe cohove opacatu omondo omahenduhasa yuvireco pẽu. Aipo rupive co che ñehesa amondo pẽu.

IMOMBOSAPI SA JUAN REMBICUACHIA SAN JUAN

Gayo recocuer aviye vahe resendar

¹ Che, icuairi, aicuachia co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivi, cūritei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu.

³ Che aviharete asenduse yande rivi ñehe nde recocuer resendar yugūeruse cohava. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu.

⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivi, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei.

⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitivi catu chupe mbahe ipane vahe rese iguataño āgua Tūpa remimbotar rupi yuvireco.

⁷ Esepia, ahe oguata yuvireco Jesucristo rer pipe. Ndoipisi eté rumo mbahe ipane vahe opitivi āgua yuvireco ava Tūpa reroyasarēhi sui.

⁸ Sese yande ēgüe yahera yaico evocoi nungar upe ñehesa supi eté vahe rese ipitivi āgua.

Diótrefes recocuerai iyavei Demetrio recocuer aviyesa

⁹ Che aicuachia che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve.

¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui.

¹¹ Che rivi, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore orombehu. Pe niha peicuaño ore orombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu.

¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui.

² Tüpa tombou catu pëu pe paraisuerecosa pe reco tupri ãgua pe raisusa pipe.

Oporombohe vahe ava mbopa tēi ãgua resendar

³ Che rivireta, che rembiaisu, yipindar chepihañemoñeta ité yande písirosa resendar cuachía ãgua pëu viña. Ipape rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepe reseve imondopri opacatu yandeu Jesucristo rese yaico vahe.

⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepe vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoi eta Egipto sui. Ipape rumo opa omocañi viroyasarēhi.

⁶ Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipape sui Tüpa osoquenda pitumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipape sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

⁸ Ëgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe va pendar rese yuvireco.

⁹ Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ãgua Carugar upe. Evocoyase aipo ehi chupe: “¡Tüpa oicuara co rese ndeu!” ehiño.

¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo

ahe pe recocuer monguiha ãgua tẽi yuviroique vahe pe pãhuve. Evocoi inungar ovesa rãrosar oyese tẽi ihañeco vahe yuvireco. Iyavei ahe inungar iva quihã ndovirecoi vahe i, ivitu remimombo tẽi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri.

¹³ Inungar avei acoi ïai pipe itu omombo tiyui vahe oyesui yepi. Ëgüe ehi avei evocoi mbia rembiapo poromochisa. Iyavei inungar yasitata amove omocãni vahe guaper co coti tẽi oso pĩtumimbisave, Ëgüe ehi aveira ava Tũpa sui oyepepi vahe pĩtumimbisa apirẽhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve

¹⁵ opacatu ava recoãha ãgua iyavei icañi mombehu ãgua opacatu mbahe-mbahe tẽi aposar upe, opacatu oñehe-ñehe tẽi yamotarẽhisave yuvirecoi vahe upe avei” ehi.

¹⁶ Ahe mbia niha oporoviroĩro yuvireco. Iyavei oseca oyeupe nara mbahe güemimbotar tẽi apo ãgua. Ahe oyemboivate ai vahe oñehe pipe tẽi yuvireco. Iyavei oñehe tupri ai angahu tẽi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese

¹⁸ aipo ehi vahe: “Co ari cañi renonde oimera ava viroĩro ai vahe Tũpa rembiapo yuvireco. Iyavei oyapoño itera güemimbotarai yuvireco” ehi vahe.

¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tẽi vireco vahe. Ahe niha ndovirecoi Tũpa Espĩritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espĩritu Santo pe rãrosa pipe.

²¹ Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tupri vahe Jesús.

²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepey yangaipa pipe pe viapiẽhi ãgua.

Tũpa mboetei tupriisa

²⁴⁻²⁵ Tũpa yande Pĩsirosar ñepey vahe vireco pĩratasa pe rãro angaipa pipe pe viapiẽhi ãgua. Ahe avei pe rerecora güecocuer porañetesave pe reco angaipaẽhisa pipe. Ichui peicora pe viharetesa pipe. Ahe imboeteipri tasecoi. Ëgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cũritei apirẽhi vaherã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihavipirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pīpe imboyecua uca āgua güembiguai che recose cheu.

² Che supi eté amombehu opacatu mbahe asepia vahecuer iyavei amombehu evocoi Tūpa Ñhengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyeriqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pīpendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tupri sa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvinohai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe seci opacatu ambuae-ae tēi mborerecuar sui. Ahe yande raisu iyavei yande pīsiro yande angaipa sui vuvi pīpe,

⁶ iyavei yande rereco mborerecuarā, pahiguā avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pīpe apirēhi vaheerā!

⁷ ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pīpendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

Juan osepia oquer nungar pīpe Jesucristo porañetesa

⁹ Che, Juan, pe riqehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pīpe. Che roquendasa vichico caha pāhumi para guasu aviterve Patmos serer vahesave Tūpa Ñhengagüer mombehusa pīpe sui tēi, Jesucristo recocuer mombehusa pīpe sui tēi avei no.

¹⁰ Acoi yande Yar ari pīpe Espíritu povri ve aicose, asendu che raquicuei oñehe pīrata vahe aviye acoi mimbí ñehe

¹¹ aipo ehi: “Eicuachía mbahe erese pia vahe. Ipape emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri,

¹³ iyavei asepia ipāhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota.

¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer.

¹⁵ Ipi evocoyase sendi yai eté, aviye acoi bronce ocai vahe horno pipe, iyavei ñehe ipiratá iteanga inungar itu riapugüer.

¹⁶ Oacato coti vireco siete tupri yasitata, iyavei iyuru sui osë quise pucu saimbe yoya vahe. Sova evocoyase aviye ari rendigüer ipiratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei.

¹⁸ Aicove vahe ité; yepe amano viña, cūritei rumo aicove iri ndopai chiva-herã ité aico. Che areco che mborerecuasa ava recocuer mocañi ñgua.

¹⁹ Sese eicuachía co mbahe eresepia vahe: cūriteindar oime vahe mbahe iyavei mbahe oime vaheherã curi.

²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu:

² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaheherã. Pesecoãha avei ava, ore apóstol oroico, ehi tēi vahe; ipare peicua iporombopa tēisa yuvireco.

³ Che aicua peñemosañõ peyemombaraisu peico che raisupave; ndapecuerai eté ipipe.

⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar.

⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevira pēu, arocuapara pe vera hi senda sui acoi ndapeyevise Tūpa upe.

⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté.

⁷ ¡Acoi osendu pota vahe, toyapisacañõ Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi ñgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pēu aipo ehi:

⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi.

¹⁰ Ndapesiquiyeyi chira pe paraisu āgua sui. Esepia, Carugar osoquenda ucara amove pe pāhu pendar secoāha āgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu.

¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi āgua, ahe imanore ihā ndoiporarai chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe:

¹³ Che aicua pe recosa. Aheve acoi Carugar uguapí oí; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave.

¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei.

¹⁵ Iyavei amove ava pe pāhuve ndoyepipi potai eté nicolaíta porombohesa sui yuvireco.

¹⁶ Sese pemboasi pe recocuerai, peyevi Tūpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi.

¹⁷ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oí, evocoi ava oipisi vahe güeraño oicua, ehi' erera icuachía.

Ñehesa Tiatira pendar upe

¹⁸ “Eicuachía avei Tūpa rembiguai Tiatira pendar che reroyasareta rārosar upe: ‘Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu:

¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú avíye vahe.

²⁰ Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe.

²¹ Che amondo vite tēi ari chupe, tomboasi oangaipa Tūpa upe oyevi āgua, che yapave viña. Ahe rumo ndopoi potai eté oyemboaguasa tēisa sui.

²² Evocoyase cūritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco.

²³ Ipare ayucapara imembrí ichui. Ēgüe ehi opacatu che reroyasar oicua yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pēu.

²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Carugar suindar aracuasa, ndicuasai yavai vahe, ehi vahe rese, pëu ndarecoi que ambuae che porocuita.

²⁵ Peyemoviracuañora rumo evocoi mbahe pereco vahe rese, acoi che ayevisi voi vitu curi.

²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi

²⁷ inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapipa uca āgua, aviyera acoi mahemoinda ñaihu apopri viña.

²⁸ Iyavei amondora yasitata cōhe rerusar chupe.

²⁹ ¡Acoi ava osendu pota vahe, toyapisacaño Espiritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tūpa rembiguai Sardis pendar che reroyasareta rārosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pëu viña; omano vahe nungar tēi rumo peico.

² Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe.

³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pëu inungar imonda rai vahe, ēgüe ahera vicho pe resapiha.

⁴ Oime rumo amove ava pe pāhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, ēgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité.

⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi.

⁶ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tūpa rembiguai Filadelfia pendar che reroyasareta rārosar upe: ‘Co seco maranehi vahe, supi tupri vahe ité, vireco vahe mborerecuasa arachendar mborerecuar guasu David nungar, acoi omboise que oquenda, ñepe yepe que ava nomboyai chietera; iyavei acoi omboyase, ñepe yepe que ava nomboi chiete aveira, ahe aipo ehi:

⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vāherā che recocuer. Ahe que ñepe yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye.

⁹ Co Carugar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopiñapa ucara pe rovai, toicua yuvireco che pe raisusa, che yapave.

¹⁰ Esepia, peroya ité che porocuita, peyemoviracua ité evocoi mbahe tēi upe peico. Evocoyase che opoepira acoi ari tecoñhasa ouse opacatu ivi rupindar upe curi.

¹¹ Ayevi poyavara. Peyemoviracua catu Tūpa reroyasa pereco vahe rese. Evocoyase ñepepe yepe que ava ndovirocuai chietera Tūpa suindar porerecosa pe sui.

¹² Acoi oyemoviracua vahe mbahe-mbahe tēi apoēhi ñagua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piñasu, evocoi ou vañerã iva pendar che Ru Tūpa sui, iyavei che rer ipiñasu vahe ité arovava sese no.

¹³ ¡Acoi ava osendu pota vahe, toyapiñasacaño Espiritu remimombehugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi:

¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepepe reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyevñora cheyesui.

¹⁷ Esepia, pepiñañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe parañsusa che Ru rovaque inungar ndasesapiñsoi vahe peico. Iyavei ndapeyavi nditurucuai vahe peico.

¹⁸ Sese opomboaracua; peseca iva pendar oro tatave imoatiropri nungar che sui pe parañsuēhi iri ñagua che Ru rovaque; peseca avei turucuar morochi vahe teco tupriñsa peyeupe che suindar nani tupri vahe nungar pipe pe recoēhi ñagua, pe chíēhi ñagua avei iyavei inungar ava oseca mosa güesa upe nara osareco iri ñagua, ñgüe peye aveira.

¹⁹ Che añehe piñrata seco mohivi ñagua che rembiñisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi ñagua.

²⁰ Esepia, inungar que ava oquenda omotara oquendipive ohã viña, ñgüe ahe pe piñhave vichico; pesenduse che ñehe, pemboira cheu. Che evocoyase aiquera pe piri, yacarura oyepiri.

²¹ Acoi ava oyemoviracua vahe mbahe-mbahe tēi apoēhi ñagua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vite.

²² ¡Acoi ava osendu pota vahe, toyapiñasacaño Espiritu remimombehugüer rese che reroyasareta upe! ehi imombehu pēu' erera icuachía” ehi Jesús cheu.

4

Tūpa mboeteisa ivave

¹ Ipare asepiñ mbahe inungar oquenda oyemboi vahe ivave. Ahese evocoi ñehesa ipiñrata vahe mimbñ nungar yipiñdar oñehe vahe cheu, ahe asendu iri: “Eyeupi ave. Che evocoyase mbahe amboyecuaru ndeu mbahe imboaviyepirã curi” ehi.

² Ahe pīpeve voi, Espíritu pīratasa pīpe aico iyavei asepia tenda ivave, ahe iharive ñepei oguapi oĩ.

³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda.

⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuapri yuvirecoi vahe; iturucuar morochí vahe yuvireco iyavei oãca rese omboyere tupri oro apopri yuvireco.

⁵ Evocoyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu.

⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no.

⁷ Yipindar yuvirecove vahe pāhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe.

⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūrteindar, apirēhi vahe!” ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapi vahe oĩ tenda harive ndopai vahe upe.

¹⁰ Ēgüe ehise evocoyase veinticuatro tupri icuapri yuvirecoi vahe, ahe oñenopiha imboeteisa pīpe sovai yuvireco. Ipare osequi oãca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pīratasa rese. Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

5

Ovesami upe güeraño iyacatu cuachiar imboyapri mboi āgua

¹ Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pīpe.

² Ipare asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi.

³ Ndipoi eté rumo que iva pendar, ivi pīpendar, ivivri pendar oicatu vaherā cuachiar pīpira sepia āgua viña.

⁴ Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pīpira sepia āgua viña.

⁵ Ahese icuapri pāhu pendar ñepei aipo ehi cheu: “Ereyaseho iri eme. Esepia niha, evocoi ava yagua pĩta yahe vahe chupe, Judá suindar, acoi mborerecuar guasu David suindar avei, ahe niha Caruguar osecoreroyi. Sese iya ité chupe siete sello mondoro cuachiar pīpira āgua” ehi.

⁶ Evocoiyase, asepia Tūpa rovai iva pendar irungatu yuvirecove vahe pāhuve, icuaipri yuvirecoi vahe mbiterve, ñepei ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoiyase siete tupri Tūpa espíritu yuvirecoi opacatu ivi rupi imboguatapri.

⁷ Ipare evocoi Ovesami oso, oipisi cuachiar evocoi tenda harive oguapi vahe yacato coti sui;

⁸ ipisi pare, evocoi irungatu yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepei-pei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa.

⁹ Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi āgua,
imboyapri monodoro āgua avei no.

Esepia niha, nde yucapri seropovēhepri ereico.

Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

¹⁰ Iyavei eremborerecua uca Tūpa upe nara, erembopahi uca avei no, ipare ahe oporocuiraira opacatu ivi rupi yuvireco” ehi osapucaí yuvireco.

¹¹ Ipare asepia, asendu avei Tūpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi.

¹² Ahe aipo ehi pīrata yuvireco no:

“¡Co Ovesami yucapirer, ahe chupe iyacatu ité mborerecuasa pisi āgua, opacatu Tūpa suindar porerecosa pisi āgua, mbahecuasa, pīratasa, mboyeroyasa, poromboeteisa, iyavei sapucaisa pisi āgua avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pīpendar, ivivri rupindar iyavei para guasu pīpendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei pīratasa, ahe timondosa apirēhi vaherā Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omonodoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “¡Erio!” ehi cheu.

² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco reroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Erio!” ehi vahe cheu.

⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pīpendar ava sui ‘toyeyuca-yuca tēi yuvireco’ oya-pave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Erio!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa.

⁶ Ipare asendu yuvirecove vahe cotindar ñehe, ahe aipo ehi: ‘Nẽpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no” ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu.

⁸ Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pĩratasa ivi imoirungatusa yahocuer rupi iguata ãgua ava yuca ãgua vavasa pipe, tieporẽhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovẽhepri rendavrive ava hã, ahe yucasa vahe yuvireco Tũpa Ñehengagüer mombehusa sui tẽi iyavei Jesús reroyasa sui tẽi avei no.

¹⁰ Ahe aipo ehi pĩrata yuvireco: “Ore Yar Tũpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pĩpendar ore repisave?” ehi yuvireco.

¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi riri ipĩratá vahe. Ari evocoyase sũ, aviye acoi turucuar sũ vahe mano sendar yemondesa iyavei yasi pĩrá inungar tuvi,

¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi.

¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pãhu avei no osiri güenda sui yuvireco.

¹⁵ Mborerecuareta avei co ivi pĩpendar yuvirecoi vahe opa tẽi oñemi mbahecuar pipe yuvireco, ita guasu pãhu rupi avei yuvireco no, oyoya guasu seco ivate vahe, sundao rerecuareta, mbahe yar seco pĩratá vahe, iyavei opacatu tupri mbiguai eta, ava ndahei vahe mbiguai avei;

¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tẽi Tũpa sui iyavei Ovesami sui acoi ombou vahe co poronupasa ipĩrata vahe oreu!

¹⁷ Esepia, oyepota ité Tũpa ñemoirosa oreu. Ndipoi chietera ava oye-moviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tũpa rembiguai iva pendar yuvinochai vahe irohi coti, norte coti, ari sãsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuẽhi ãgua, que para guasu pipe angara viña, que ñepei yepe ivira ro angara viña no.

² Ipare asepia avei ambuae Tũpa rembiguai iva pendar ou vahe ari sãsa coti sui, ahe vireco oyese Tũpa oicove vahe rer mondosa. Ahe niha osapuca pĩratá

evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi:

³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco.

⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar,

⁶ doce mil tupri Aser suindar, doce mil tupri Neftalí suindar, doce mil tupri Manasés suindar,

⁷ doce mil tupri Simeón suindar, doce mil tupri Leví suindar, doce mil tupri Isacar suindar,

⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no.

¹⁰ Ipare opacatú guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe oguapi vahe oī güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuapri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco,

¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vahe rā ité yepi!” ehi.

¹³ Ahese icuapri ipāhu pendar aipo ehi cheu cute: “¿Ereicua vo co ava rehi iturucuar morochi vahe pāve yuvirecoi, ereicua que sui pīha yugüeru?” ehi.

¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinohe tupri vahe ité teco asisa sui yuvireco, inungar oyosei, omomorochi vahe oturucuar, Ēgüe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapi vahe oī, güecocuer pipe osepira.

¹⁶ Evocoi ndiyumbiasí iri chira yuvireco,

ndihusei iri chiaveira, iyavei ari ndoyope iri chira, ndasacuvási iri chiaveira chupe no.

¹⁷ Esepia, evocoi Ovesa secoi Vu renda rovai,

ahe osārora ava rehi sereco inungar ovesa rārosar.

Ipare opara viraso tecovesa resendar i ndopai vahesave imboihu āgua.

Tūpa evocoyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sñu tupri ivave ñepe hora yemombitesa rupive.

² Ichui asepia siete tupri Tūpa rembiguai iva pendar yuvinohai vahe Tūpa rovai, chupe opa imondosa siete tupri mimbi.

³ Ipare ou ambuae Tūpa rembiguai iva pendar oro itaisi rapisa reseve, iyavei ou ohã itaisi rapisa renda rovai; ipare imondosa tuvichá itaisi chupe oicuavêhe vaheerã oyoya tupri opacatu ava Tūpa upendar yeruresa rese oro mbahe reropovêhepri renda harive; ahe Tūpa renda rovai chini vahe.

⁴ Itaisi râtachi evocoyase oso Tūpa rembiguai iva pendar po sui. Ëgüe ehi oyepota oso Tūpa recosave, oyoya tupri chupendar yeruresa rese.

⁵ Ipare evocoyase Tūpa rembiguai iva pendar opoco itaisi rapisa rese, omboapipo mbahe reropovêhepri renda pendar tâtapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbi

⁶ Evocoyase siete tupri Tūpa rembiguai iva pendar oyemoingatu voi güemimbi moñehe ãgua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi.

⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imo-cañisa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohê vahe mombosapisa yahocuer pipe avei no.

¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pĩtumimbi vahe mboisa.

² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe.

³ Iyavei evocoi tātachi sui opa yuvínose tucru guasu rehii oñemosai opacatu ivi rupi; chupe avei imondosa seco pīrata āgua inungar acoi mba-herumbiquiāpe.

⁴ Icuaisa rumo opacatu capihi mbahe rocři iyavei ivira momaraēhi āgua, ěgüe ehi rumo acoi ava nomboyecuai vahe osiva rese Tūpa rer, chupe nara ité.

⁵ Nimondosai rumo mborocuita chupe ava yuca āgua. ěgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca.

⁸ Iha ndoyavii cuña ha, sāi evocoyase ndoyavii tupri yagua pīta rāi.

⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave.

¹⁰ Vireco vuguai rese opopiar aviye mbaherumbiquiāpe popiar. Ahe niha vireco opīratasa poyandepo yasi rupi ava momara āgua tēi.

¹¹ Evocoi tucru guasu rerecuar, ahe icuai pri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yipindar vahe mbahe-mbahe tēi; oime vite rumo co pare ñuvirío mbahe taši vahe.

¹³ Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaingar irungatu sāchi vahe pāhu sui.

¹⁴ Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbrī iai guasu Eufrates ivirindar” ehi.

¹⁵ Evocoyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco.

¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ ěgüe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer pīra vahe tata nungar, sovi vahe, iyu vahe avei no. Cavayu rehii āca evocoyase aviye tupri yagua pīta āca, iyuru sui evocoyase yuvínose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco.

¹⁹ Esepia niha, cavayu pīratasa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, nosecuñaroi eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei.

²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmi

¹ Ipare asepia ambuae Tūpa rembiguai iva pendar ipīratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe.

² Cuachiarmi oyemboi vahe vireco opove. Opi oacato cotindar pipe opīro para guasu rese, ambuae opive evocoyase opīro ivi rese.

³ Evocoyase sãse pīratá, inungar yagua pīta rãse; sãse, evocoyase siete tupri osunu vahe ñehe oyendu yuvireco.

⁴ Oñehese, ahese ñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndere-icuachiai chietera” ehi cheu.

⁵ Evocoyase Tūpa rembiguai asepia vahecuer, ahe acoi opīro vahe para guasu rese, ivi rese avei opo oacato cotindar omopuha iva coti.

⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera;

⁷ oyepotase rumo imoñuvirío ovasa Tūpa rembiguai upe güemimbí moñehe ãgua, ahese imboaviesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmi imboipri Tūpa rembiguai vireco vahe evocoi opīro vahe para guasu rese ohã, ivi rese avei no” ehi.

⁹ Evocoyase aso Tūpa rembiguai upe, aporandu cuachiarmi rese, ahese ahe aipo ehi cheu: “Ndo co, eipisi, eh. Nde yuru pipe evocoyase sēhera eiri nungar, nde aviterve rumo irora” ehi cheu.

¹⁰ Ahese aipisi cuachiarmi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu.

¹¹ Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae ñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi.

² “Nderesãhai chira rumo ñachimbrí pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi.

³ “Ipare ñuvirío ava amondora che recocuer mombehu ãgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai.

⁵ Acoi que oimese ovireco mara pota vahe, ahese che reco mombehusar yuru sui osēra tata sapipa ãgua; ěgüe ehira ava omano que che reco mombehusar reco momara potasar.

⁶ Co ñuvirío vireco opīratasa oqui vahe mombita ãgua, acoi ari rupi che reco mombehu viteseve yuvireco; iyavei vireco pīratasa i recuñaro ãgua tuví pipe

yuvireco, imombaraisu uca āgua avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara.

⁸ Sehögüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no.

⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiaño tēira sehögüer yuvireco iyavei ahe noñoti ucai chietera ava upe yuvireco.

¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporerecora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoyase ava opacatu osepia vahe osiquiyé iteanga yuvireco ichui.

¹² Ipare ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyeupipa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave.

¹³ Aheseve voi oime ivi riri tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucal Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsiosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi vaherā itera secoi” ehi.

¹⁶ Evocoyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco,

¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūritei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhí ité yuvireco.

Nde ñemoirosa rumo cūritei oyepota, iyavei nde porandusa oime voirea ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaite resendar riru. Ipare overa-vera, siapu guasu, osunu, ivi oriri, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco.

² Co cuña ipuruha oico, sãsé tẽi omembri iha pota água oyesui. Esepia niha, oiporará ité tasicuer.

³ Ipare coiye oyecua iva rese ambuae mbahe mboyecua tupri: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu.

⁴ Suguai evocoyase ombotiriri yasitata iva pendar imombosapisa sui ñepeiyahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembri oha ramoseve” ehi viña.

⁵ Ipare co cuña membri oha cuimbahemi, ahe mborerecuar virecora mbococa guarepochi apopri, ipïrata catu vahe secoira opacatu ava ivi rupindar upe. Ichui serocuasa voi serasosa Tũpa rovai.

⁶ Cuña evocoyase oñemi ivi iporupirẽhisave oso. Aheve omoingatu Tũpa iyemboerecua água, eipeve icaru água mil dosciento sesenta ari rupi.

⁷ Oime avei vavasa ivave; ahese Tũpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco.

⁸ Ndoicatu eté rumo Miguel recopi água yuvireco. Sese ndipoi eté ivave seco água yuvireco chupe.

⁹ Ëgüe ehi imoyepipisa mbahe ipi oporomocañi vahe reco pïratasa sembiguai eta reseve; opa imombosa ivi pipe yuvireco. Evocoi mboi vai, “Caruguar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tẽi vahe opacatu ivi pipe yuvireco.

¹⁰ Evocoyase asendu ñehesa ipïrata vahe ivave, aipo ehi vahe:

“Cũritei oime poropïsirosa, pïratasa iyavei yande Tũpa mborerecuasa, Poropïsirosar mborerecuasa avei no.

Esepia niha, imoyepipisa iva sui acoi osecaseca vahe yande rivri Tũpa rero yasareta recocuer momara água pïtu, ari yacatu rupi yande Ru Tũpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tupri pipe sui avei no.

Esepia niha, ndosiquiyeyi eté güetecuer mocañi água yuvireco.

Ahe rumo oyemoingatu voi eté omano água.

¹² ¡Peyemboviha catu pe iva iguar peico vahe!

Pe rumo, ¡preparaisu catura ivi pipe, para guasu pipe avei peico vahe!

Esepia niha, Caruguar ogüeyi pẽu oñemoirosa pipe, oicuase güeco pucuehi água” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembri cuimbahemi reseve yamotarẽhisave pipe.

¹⁴ Evocoi cuña upe rumo imondosaño ñuvirio vira guasu pepo iveve água chupendar ivi imoingatupri ava porẽhisave seco água, amombri mbahe ipi oporomocañi vahe sui. Aheve oyopoi mbosapi araviter yemombitesa rupive.

¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tẽi’ oyapave viña.

¹⁶ Ivi rumo oime co cuña pïtivisa, ahe oyeca. Ipare opa omoco iai evocoi mbahe ipi oporomocañi vahe rembiapo.

¹⁷ Evocoiyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroya vahe ité Tūpa porocuita yuvireco iyavei yuvirecoi tupri vahe Jesucristo remimombehu rupi.

¹⁸ Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

¹ Ipare asepia para guasu pipe sui osẽse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vireco ñepeipei oyeguaca, iyavei oãca yacatu rese vireco terer Tūpa upe mbahe tẽi vahe.

² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua pita yuru. Mbahe ipi oporomocañi vahe evocoiyase omondo opiratasa iyavei omborerecuasa chupe.

³ Ñepeipe mbahe ipi vai ãca oyeapicha guasu vahe ndoyavii omano vaheerã ité viña; ahe rumo ocuera tupri iriño evocoiyase opacatu guasu ava sepiase, ndoyembovihai. Ichui viroya catu yuvireco.

⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerã sese” ehi yuvireco.

⁵ Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tūpa reroiro ãgua avei no, iyavei mborerecuar guasu seco ãgua cuarenta y dos yasi rupi.

⁶ Ëgüe ehi iñehe mara-mara tẽi Tūpa rese, iñehe-ñehe tẽi avei serer maranehi rese, sêta rese, iva pendar rese avei no.

⁷ Imondosa avei chupe vavasa apo uca ãgua Tūpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tẽi vahe upe, secua ambuae vahe upe, ambuae-ae tẽi iñehe vahe upe, iyavei ambuae ivi rupindar upe avei no.

⁸ Ipare omboetei ai sereco yuvireco opacatu ava ivi pipendar acoi ivi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaheerã, oyeoquenda ucaño itera; iyavei acoi ava omano vaheerã quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipiratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico.

¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui.

¹³ Iyavei oyapo setã mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave.

¹⁴ Ombopa tẽi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave.

¹⁵ Ipare imondosa piratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiẽhisar’ oyapave.

¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava

nimañecopri vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi.

¹⁷ Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuchía vahe Ovesami rer, Tu rer avei osiva rese yuvireco.

² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ēgüe ehi siapugüer.

³ Ipare osapucái sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuai pri eta rovai avei no. Ñepei yepe que iva pendar ndoicatu eté evocoi sapucaisa rese oyembohe vaherā. Ēgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pīendar pāhu sui, ahe güeraño tupri ité oicatu osapucái yuvireco.

⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catupri sa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipindar mbahe seropovēhepri Tūpa upe, Ovesami upe avei.

⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsirosa resendar ndopai vahe imombehu āgua opacatu ava co ivi pīendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no.

⁷ Ipare oñehe pīrata aipo ehi: “Pēsiquiye Tūpa sui iyavei pesapucái seco ivatesa rese chupe no. Esepia niha, cūrtei oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi pīratá iri oico: “Acoi que ava ombotei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no,

¹⁰ oipisi itera Tūpa ñemoirosa ipīrata vahe ité; ipare omombaraicura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no.

11 Tātachi icaigüer pendar evocoyase oyeupira ndopai vaherã, ahese ndipoi chietera pïtuhusa pïtu, ari pïpe evocoi mbahe ïpi vai mboeteisar upe, sahanga mboeteisar upe avei no, iyavei acoi vïreco vahe serer cuachiapri oyese yuvïreco no” ehi.

12 ¡Ëgüe ehira Tũpa rese ité yuvïrecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvïreco!

13 Ahese asendu ñehesa ïva pendar aipo ehi vahe cheu: “Eicuachía co: Co pïpe suive sorivete catura acoi ava omano vahe yande Yar rese yuvïreco” ehi.

“Ëgüe ehi eté —ehi Espïritu imombehu—, opïtuhura oporaviquisa sui yuvïreco. Esepia, mbahe sembiapo rerãcua osora ïvave supï” ehi.

Ivi pïpendar recoãhasa

14 Ahese asepia ïva quiha morochí vahe; iharïve ndoyavïi ava oguapï vahe oï. Vïreco niha oyeguaca oro apopri oãca rese iyavei mbahe miti asiasa saimbé vahe vïreco opove.

15 Ipare osë ambuae Tũpa rembiguai tũparo sui. Ahe osapucaï pïrata evocoi ïva quiha harïve chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ïvi pendar yaviye ité!” ehi ava recocuer uve chupe.

16 Evocoyase evocoi chini vahe oyasia güemiti ïvïve oico, ahese opa omonuha güembiasia.

17 Ipare osë ambuae Tũpa rembiguai tũparo sui, ahe avei vïreco mbahe miti asiasa saimbé vahe.

18 Ipare ambuae Tũpa rembiguai osë mbahe reropovêhepri renda sui, ahe tata rese hañecosar secoi. Iyavei oñehe pïrata evocoi vïreco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ïvi pïpe! ¡Esepia niha, opa yaviye!” ehi.

19 Evocoyase co Tũpa rembiguai inungar oyasia vahe uva ha Ëgüe ehi opa ava ipeha ïvi pïpendar. Ipare opa oyapocatu Tũpa ñemoïrosa rãro ãgua.

20 Ipare inungar uva ha icambepri tecua cupeve, Ëgüe ehi co ava imombaraisu; ichui osë tuvï evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tũpa rembiguai güeru mbaherasi yuvïreco

1 Ipare asepia ïvave ambuae mbahe mboyecuasa tuvichá vahe poromondïsa: siete Tũpa rembiguai, siete tupri mbaherasi ipa vahe vïreco vahe, ahe ipá vahe ité Tũpa ñemoïrosa.

2 Iyavei asepia para guasu ndoyavïi yepiasa oyeseha vahe tata rese. Ahe ipopïve yuvïnoha ati mbahe ïpi vai recopïsar, sahanga recopïsar iyavei nomondo uca potai vahe serer cuachía ãgua yuvïreco oyese. Ahe vïreco Tũpa upendar arpa yuvïreco.

3 Ipare osapucaï Tũpa rembiguai Moisés sapucaïsa yuvïreco, iyavei Ovesami sapucaïsa aipo ehi:

“Tuvichá opacatu mbahe nde rembiapo, che Yar Tũpa opacatu mbahe mboavaisarêhi; nde recocuer supï tupri vahe ité; seco ïvi vahe.

¡Too, nde mborerecuar guasu opacatu ïvi rupindar ereico!” ehi.

4 “Yar, nde sui opacatu ité osiquiyera yuvïreco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvïreco. Esepia niha, sepiasa nde rembiapo supï tupri vahe” ehi.

⁵ Ipare asepia ivave oyemboise Tūpa rēta imaranehi vahe. Aheve acoi yapocatusa mborocuaita resendar.

⁶ Evocoiyase ichui yuvinošepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua opochiha rupi tupri yuvireco.

⁷ Ipare ñepei evocoi irungatu iva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe.

⁸ Ipare Tūpa rēta omboapipo tātachi, evocoi ou vahe Tūpa reco porañetes a iyavei ipīratasa sui. Aheve ndiyai eté que ava upe seique āgua acoi opase voi eté omomba siete tupri mbaherasi vai vireco vahecuer siete Tūpa rembiguai.

16

Siete Tūpa ñemoirosa riru

¹ Evocoiyase asendu ñehesa ipīrata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

² Yipindar vahe Tūpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere igua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere igua riru pipendar iai pipe, i ohē vahe pipe avei no. Ipare opa ahe oyeapo tuvi yuvireco.

⁵ Co pare asendu Tūpa rembiguai i rese ihañeco vahe ñehesa aipo ehi: “Nde seco tupri vahe ité ereico evocoi ava upe eremouse nde ñemoirosa, che Yar Tūpa, seco maranehi vahe. Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehe mombehusar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

⁸ Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapipa āgua.

⁹ Ipare opacatu ité ava yuvirocaipa tupri; ndoyevii eté rumo Tūpa upe iyavei nomboteiño ité yuvireco. Ēgüe ehi rumo iñehe mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi sereciar ipovri pendar avei pītumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve;

¹¹ ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepe ovasa oipiyere mbahe riru pipendar iai guasu Eufrates pipe. Ahe evocoyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehusar supi vahe avei, ahe yuvirecoi vahe yuru rupi yuvinose mbosapi caruguar vireque nungar.

¹⁴ Co Caruguar suindar yuvirecoi, ahe oyapo poromondiisa mbahe mboye-cuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tūpa rembiguai oipiyere inemoirosa mbahe riru sui ivitu rupi. Ipare iva pendar Tūpa rêta pipe sui osē ñehesa ipirata vahe evocoi ou vahe senda sui: “¡Opa ité yaposa cute!” ehi.

¹⁸ Ahese oime overa vahe, mbahe siapu guasu vahe iyavei osunu vahe. Ipare ivi oririi ipirata catu vahe opacatu ivi ririi sui ava yuvirecove viteseve ivi pipe.

¹⁹ Tecua guasu oyeca-yeca mbosapi rupi, opacatu tecua evocoyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipirata catu vahe chupe.

²⁰ Opacatu caha pāhu, ivitri avei ocañipa ité yuvireco.

²¹ Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo ñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa pronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepe ou aipo ehi cheu: “Erio, amoyecuara co cuña yaguasa serai vahe upe ñemoirosa ndeu, ahe evocoi oguapi i harive oĩ” ehi.

² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pira vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi.

⁴ Co cuña turucuar, suendi vahe, pira vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasaguasa tēisa;

⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi.

⁶ Ipape aicua evocoi cuña osavaipo vahe oĩ Tũpa reroyasar ruvi pipe iyavei acoi Jesús recocuer mombehusa sui tẽi yucapri vahe ruvi pipe avei no.

Co asepiase che quer nungar pipe, ndache mbovĩhai eté.

⁷ Ahese ahe Tũpa rembiguai iva pendar aipo ehi cheu: “¿Mahera vo nderevĩhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oãca, diez tupri avei acoi sãchi” ehi.

⁸ “Acoi mbahe ipi vai erese pia vahe ahe yipive seci vahe, cũritei rumo ndipo iri; osẽra rumo ivicuar guasu ipicucu vahe sui omano ãgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoẽhiseve, ahe ndovĩhai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecua senducua ãgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapi oĩ iyavei ahe siete ñaca avei omoporẽhi ‘siete tupri mborerecuar’ oyapave.

¹⁰ Cinco tupri mborerecuar evocoi ipãhu pendar ndipo iri yuvireco, ñepeĩño evocoiyase oporocuai cũritei oico, ambuae rumo ndou vitei. Ouse rumo ipandar, ou raimi tẽira.

¹¹ Mbahe ipi vai seci vahe yipindar, ndoicove iri cũritei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi tẽi vaherã secocuer” ehi.

¹² “Evocoi diez tupri vahe sãchi, ahe mborerecuar diez tupri ndoyuviroique vitei vahe oporocuai vaherã yuvireco. Oyoya rumo oporocuai raimi tẽira mbahe ipi vai reseve yuvireco curi.

¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherã pĩratasa iporocuai ãgua yuvireco.

¹⁴ Ipape ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu seci no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata ãgua yuvireco” ehi.

¹⁵ Iyavei Tũpa rembiguai aipo ehi cheu: “Evocoi para guasu erese pia vahe, iharive cuña yaguasa-guasa tẽi vahe oguapi oĩ, ahe ‘ava rehii tecua yacatu rupindar, iñehe ambuae-ae vahe iyavei opacatu ambuae tẽi vahe ivi rupindar’ oyapave.

¹⁶ Evocoi erese pia diez tupri vahe sãchi mbahe ipi vai rese, ahe ndoyambotai chira cuña yaguasa-guasa tẽi vahe; iyavei osequiĩ tuprira seya; ohupara soho, ipape opara osapi.

¹⁷ Tũpa niha omondo ipiha pipe mbahe güemimbotar apo ãgua ‘ahe toyemonguerẽhi yuvireco omborerecuasa mondo ãgua mbahe ipi vai upe; tomboaviye rane ité che remimombehugüer yuvireco’ oyapave.

¹⁸ Iyavei evocoi cuña yaguasa-guasa tẽi vahe erese pia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tũpa rembiguai cheu.

18

Babilonia viapi agüer

¹ Ipape ase pia ambuae Tũpa rembiguai ipĩrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pĩrata oico aipo ehi:

“¡Oviapi tecua Babilonia cute!

Caruguar yuviroique sese, opacatu caruguar naporai vahe iyavei vírai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa íva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepi yepi taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vite mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi.

¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisusa catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que vīrocua vaherā imbahe yuvireco ichui,

¹² co opacatu mbahe sepi vaherā ahe: oro, guarepochi, ita iporāñete ai vahe, mbohīr sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape sīacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei;

¹³ mbahe serocuapri yahu vahe canela, tembihu moiacuasa; itaisi, mirra, mbahe sīacua vahe; uva ricuer, mbahe quira, trigo cuhi avīye vahe, trigo avei; iyavei mbahe mīmba ovosi vahe no, ovesa, cavayu, cāretomi iyavei mbiguai no.

¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tẽira iyavei ndoyembovihai tẽi chira yuvireco no,

¹⁶ iyavei aipo ehi tẽira yuvireco:

“¡Too! ¡Paraisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pĩra vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tẽi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecuar, ava imbehĩ ivirindar carite guasu reroguatasar, i rupi oporaviqui vahe oyeupe nara mbahe rereco ãgua, ahe opaño opita amombrive yuvireco ichui

¹⁸ iyavei co tecua rãtachi repiase, ahese osapucaĩ pĩrata tẽi yuvireco: “¡Ndipoi eté niha yipisui tecua na ehi vahe!” ehi yuvireco.

¹⁹ Ipare imboasipave omondo ivi cuhi oãcave yuvireco, oyaseho iyavei ndoyembovihai tẽi, ipare osapucaĩ tẽi yuvireco aipo ehi:

“¡Too! ¡Paraisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tẽi rumo opa ocañi!” ehi.

²⁰ Peyembovihaiño evocoi tecua rese, pe iba pendar, iyavei opacatu chupendar peico vahe, pe no Jesús apóstol peico vahe,

opacatu Tũpa ñehe mombehusar peico vahe avei no.

Esepia niha, co tecua omocañisa pipe Tũpa oyapo mbahe tupri pẽu nara.

²¹ Ahese Tũpa rembiguai iba pendar seco pĩrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirẽhi vaherã” ehi.

²² “Ndasendusa iri chietera ocar rupi arpa moñehesar, mimbĩ moñehesar, iyavei mimbĩ guasu moñehesar avei no; ndererecoi chietera ava oporaviqui vaherã, ndasendusa iri chiaveira ita mbahe mbocuhisa monarasa nde suindar.

²³ Iyavei ñepeĩ yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pĩrata etepri vahe opacatu rupi ereico viña.

Iyavei erembopa-mbopa tẽi opacatu ambuae tecua rupindar eico nde payesa pipe” ehi

Tũpa rembiguai chupe.

²⁴ Esepia niha, evocoi tecua guasu pipe oyecua Tũpa ñehe mombehusar ruvi, Tũpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehĩ ñehe pĩrata ivave aipo ehi vahe:

“¡Imboeteipri yande Yar tasecoi!

Poropĩsirosa, teco porañetesa iyavei ipĩratasa ahe yande Ru Tũpa suindar.

² Esepia niha, ahe oyapo mbahe supi eté vahe,

‘Tocañi’ ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepi oyeupendar” ehi.

³ Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rātachi ndopai chietera” ehi.

⁴ Evocoiyase veinticuatro tupri iva pendar icuai pri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipare aipo ehi yuvireco no: “¡Ēgüe tehi! ¡Imboeteipri yande Yar tasecoi!” ehi.

⁵ Evocoiyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya āgua!” ehi.

Pieta mendasa Ovesami resendar

⁶ Asendu avei ava rehi ñehe, inungar acoi itu guasu riapu, ndoyavi avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

⁷ Tayayemboiha catu yaico iyavei tayamondo yande viharetesa, yande sapucaisa yande Ru Tūpa upe.

Esepia niha, cūritei oyepota mendasa ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tūpa rese yuvirecoi vahe recocuer ihivi vahe’ oyapave aipo ehi” ehi.

⁹ Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipare añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa.

¹² Sesa evocoiyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyese; ahe güeraño ité oicua.

¹³ Iturucuar evocoiyase imopirapri tuvipi pipe; serer evocoiyase, “Tūpa Ñehe” ehi.

¹⁴ Sundao rehi iva pendar saquicuerive yuvirecoi. Iturucuar secose vahe pāve morochi vahe, ndiquihai vahe avei. Ahe cavayu morochi vahe harive yuvirecoi.

¹⁵ Iyuru pipe sui osē quise pucu saimbe vahe opacatu ambuae-ae tecua rupindar momara āgua. Ahe oyocuiria oamotarēhisar guarepochi apopri opo pendar pipe. Iyavei osecoñhara inungar uva opive otiamii vahe yuvireco

iyavei omboihura evocoi uva ricuer paraisu catusa resendar pipe. Ahese Tūpa mbahemboavaisarēhi oñemoiro itera chupe.

¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tūpa rembiguai opūha vahe arisave. Ahe osapucaí pīrata opacatu vīrai mbahe rohoguar upe oveve vahe iva rese: “¡Perio! ¡Peñemonuha Tūpa suindar carusa guasusave;

¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava āgua evocoi cavayu hari pendar rese iyavei isundao rese avei no.

²⁰ Co mbahe ipi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoyase co mbahe ipi vai iyavei Tūpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco.

²¹ Ambuae evocoyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoyase opacatu vīrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco.

² Ipare oipisi mbahe ipi oporomocañi vahe mboi nungar arachendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi.

³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi āgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava uguapi yuvinoi evocoi oipisi vahe omborerecuasa yuvireco ava upe mbahe rese porandu āgua. Iyavei asepia ava hā evocoi opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco.

⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter.

⁶ ¡Sorivete catu acoi ava vireco vahe yipindar cuerayevisa yuvireco! ¡Espia niha, ahe Tūpa upendar ité yuvirecoi! Imoñuviriosa manosa evocoyase chupe ndipo iri eté. Ēgüe ehira rumo ahe Tūpa upe naraño ité pahí yuvirecoira, Cristo upe avei. Ipare mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui.

⁸ Ichui osëra opacatú ava ivi pìpendar mbopa-mbopa tēi oico; osëra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi.

¹⁰ Caruguar evocoyase, ava mbopa-mbopa tēisar, ahe opa imombosa ipa azufre ocai vahe pìpe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaísura p̄itu, ari yuvireco apirēhi vaherā.

Tūpa oguapira güendave ava recocuer rese porandu āgua ari ipa vahe pìpe

¹¹ Evocoyase asepia tenda imboeteipri, morochi vahe. Iharive oime ava oguapi vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco.

¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pìpendar mbahe sembiapogüer rese.

¹³ Omano vahecuer opa yuvinose para guasu pìpe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no.

¹⁴ Ipare manosa recua opa imondosa tata nungar ipa pìpe. Evocoi ipa niha imoñuviriosa manosa.

¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pìpe.

21*Iva piasu iyavei ivi piasu*

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no.

² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe.

³ Ipare asendu ñehesa p̄rata tenda suindar aipo ehi vahe: “Tūpa cūritei oicove ava rehii p̄ahu rupi oico. Ahe oicove vaherā ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe.

⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pìpe.

⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira.

⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirío manosa” ehi.

Tecua Jerusalén piasu

⁹ Evocoyase ou ñepeí siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevī ndeu, Ovesami rembirecovī” ehi.

¹⁰ Evocoi che quer nungar pipe Espiritu osepiā uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui.

¹¹ Ahe tecua sendí iteanga Tūpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipīrerimi vahe rese.

¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese.

¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no.

¹⁴ Tecua guasu āchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñehe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no.

¹⁶ Tecua guasu pucucuer oyoya tupri ipigüer rese. Evocoyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no.

¹⁷ Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

¹⁸ Tecua āchisa ahe ita porañete vahe Jaspe serer vahe apopri; tecua evocoyase oro pāve tupri, aviye vidrio secose catu vahe.

¹⁹ Ñachisa moviracuasa vireco opacatu ambuae ita-ita tēi iporañete vahe pāve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda;

²⁰ imbopoyandeposa ónice; imoñepeí ovasa, cornalina; imoñuvirío ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista.

²¹ Doce tupri vahe oquenda guasu ahe doce tupri mbohír; ñepeí-peí oquenda ñepeí mbohír sui yapopri. Calle guasu tecua aviter rupindar evocoyase oro pāve, inungar vidrio yande porēhi tupri vahe ipipe.

²² Ndasepiāi eté evocoi tecua guasu pipe ñepeí yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve.

²³ Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe.

²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe.

²⁵ Evocoyase soquendipi nimboyasai chietera ari yacatu rupi. Pitu ndipoi chiaveira aheve.

²⁶ Ipare opara aheve ambuae tecua mbahe eta, porañete vahe omoingue yuvireco;

²⁷ ava angaipa viyar rumo, Tupa remimbotarēhi oyapo vahe, iporombopa serai vahe, ahe ndoyuviroiquei chietera aheve. Egüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tupa rembiguai omboyecua iai tecovesa resendar cheu, t̃piu, oyecua tupri, osē vahe Tupa iyavei Ovesami renda porañete vahe sui.

² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepei araviter pipe. Iyavei evocoi ivira ro aviye ai ava opacatu rupindar mbogüera água.

³ Ndipoi chietera aheve que mbahe t̃ivri pendar. Tupa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco.

⁴ Osepiara sova iyavei virecora serer osiva rese yuvireco.

⁵ Aheve ndipoi chietera pitu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape água yuvireco. Esepia niha, yande Yar Tupa teieté osesapera. Ipare ahe ava mborerecuar apirēhi vaherā ité yuvirecoira sese.

Cōimi eté Jesucristo yevi água

⁶ Ipare Tupa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tupa acoi omboyecua tupri vahe mbahe oyesuindar oñehe mombehusar upe, ahe ombou güembiguai iba pendar mbahe omboaviye poyava voi vaherā mboyecua água viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tupa suindar mbahe oime vaherā resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tupa rembiguai rovai imboetei água viña.

⁹ Ahe rumo aipo ehiño cheu: “Aní ereñenopiha che rovai. Esepia niha, che Tupa rembiguai t̃ei aico, nde nungar, nde rivireta nungar avei evocoi oñehe vahe Tupa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tupa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tupa suindar mbahe oime vaherā resendar sereco, evocoi icuachiapri cuachiar pipe. Esepia niha, ari cōimi secoi imboaviye água.

¹¹ Acoi ava mbahe t̃ei aposar, toyapoño mbahe t̃ei; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tupa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepei-pei ava rembiapogüer rupi-rupi amondo vaherā chupe.

¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaherā” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe.

¹⁵ Ava rehi ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyeroku vahe, iyavei opacatu ava oipota rai vahe oporombopa-mbopa tēi āgua yepi” ehi.

¹⁶ “Che, Jesús, amondo che rembiguai iva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe ñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaherã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pipendar mbahe-mbahe tēi imombehupri.

¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe seique āgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.